

नमो नमो निम्मलदंसणस्स
पूज्य आनंद-क्षमा-ललित-सुशील-सुधर्मसागर गुरुभ्यो नमः

On Line – आगममंजूषा

[६] नायाधम्मकहाओ

* संकलन एवं प्रस्तुतकर्ता *

मुनि दीपरत्नसागर [M.Com., M.Ed., Ph.D.]

॥ किंचित् प्रास्ताविकम् ॥

ये आगम-मंजूषा का संपादन आजसे ७० वर्ष पूर्व अर्थात् वीर संवत् २४६८, विक्रम संवत्-१९९८, ई.स.1942 के दौरान हुआ था, जिनका संपादन पूज्य आगमोद्धारक आचार्यश्री [आनंदसागरसूरिजी](#) म.सा.ने किया था। आज तक उन्ही के प्रस्थापित-मार्ग की रोशनी में सब अपनी-अपनी दिशाएँ ढूँढते आगे बढ़ रहे हैं।

हम ७० साल के बाद आज ई.स.-2012, विक्रम संवत्-२०६८, वीर संवत्-२५३८ में वो ही आगम-मंजूषा को कुछ उपयोगी परिवर्तनों के साथ इंटरनेट के माध्यम से सर्वथा सर्वप्रथम “**OnLine-आगममंजूषा**” नाम से प्रस्तुत कर रहे हैं।

*** मूल आगम-मंजूषा के संपादन की किंचित् भिन्नता का स्वीकार ***

- [१] आवश्यक सूत्र-(आगम-४०) में केवल मूल सूत्र नहीं है, मूल सूत्रों के साथ निर्युक्ति भी सामिल की गई है।
[२] जीतकल्प सूत्र-(आगम-३८) में भी केवल मूल सूत्र नहीं है, मूलसूत्रों के साथ भाष्य भी सामिल किया है।
[३] जीतकल्प सूत्र-(आगम-३८) का वैकल्पिक सूत्र जो “पंचकल्प” है, उनके भाष्य को यहाँ सामिल किया गया है।

[४] “ओघनिर्युक्ति”-(आगम-४१) के वैकल्पिक आगम “पिंडनिर्युक्ति” को यहाँ समाविष्ट तो किया है, लेकिन उनका मुद्रण-स्थान बदल गया है।

[५] “कल्प(बारसा)सूत्र” को भी मूल आगममंजूषा में सामिल किया गया है।

-मुनि दीपरत्नसागर

: Address:-

Mnui Deepratnasagar,
MangalDeep society, Opp.DholeswarMandir,
POST:- THANGADH Dist.surendranagar.
Mobile:-9825967397 jainmunideepratnasagar@gmail.com

मुनि दीपरत्नसागर



श्रीज्ञाताधर्मकथाङ्गम् । ॐ नमः सर्वज्ञाय । तेणं कालेणं तेणं समएणं चंपानामं नयरी होत्था वण्णओ । १ । तीसे णं चंपाए नयरीए बहिया उत्तरपुरच्छिमे दिसीभाए पुण्ण-
 भहे नामं चेइए होत्था, वण्णओ । २ । तत्थ णं चंपाए नयरीए कोणिको नामं राया होत्था, वण्णओ । ३ । तेणं कालेणं० समणस्स भगवओ महा-
 वीरस्स अंतेवासी अज्जसुहम्मस्स नामं थेरे जातिसंपन्ने कुलसंपण्णे बलरूवविणयणाणदंसणचरित्तलाघवसंपण्णे ओयंसी तेयंसी वच्चंसी जसंसी जियकोहे जियमाणे जियमाए जियलोहे
 जियइंदिए जियनिहे जियपरिसहे जीवियासमरणभयविप्पमुक्के तवप्पहाणे गुणप्पहाणे एवं करणचरणनिग्गहणिच्छयअज्जवमद्वलाघवखंतिगुत्तिमुत्ति१० विज्जामंतबंभवयनयनिय-
 मसच्चसोयणाणदंसण२० चारित्त० ओराले घोरे घोरव्वए घोरतवस्सी घोरबंभचेरवासी उच्छूढसरीरे संखित्तविउलतेयलेसे चोदसपुव्वी चउणाणोवगते पंचहिं अणगारसएहिं सद्धिं संप-
 रिवुडे पुव्वानुपुव्विं चरमाणे गामाणुगामं दूतिज्जमाणे सुहंसुहेणं विहरमाणे जेणेव चंपानगरी जेणेव पुण्णभहे चेतिए तेणामेव उवागच्छइ त्ता अहापडिरूवं उग्गहं उग्गिण्हित्ता संज-
 मेणं तवसा अप्पाणं भावेमाणे विहरति । ४ । तए णं चंपानयरीए परिसा निग्गया कोणिओ निग्गओ धम्मो कहिओ परिसा जामेव दिसं पाउब्भूया तामेव दिसिं पडिगया, तेणं कालेणं०
 अज्जसुहम्मस्स अणगारस्स जेट्ठे अंतेवासी अज्जजंबू णामं अणगारे कासवगोत्तेणं सत्तुस्सेहे जाव अज्जसुहम्मस्स थेरस्स अदूरसामंते उद्धंजाणू अहोसिरे झाणकोट्ठोवगते संजमेणं
 तवसा अप्पाणं भावेमाणे विहरति, तते णं से अज्जजंबूणामे० जायसइहे जायसंसए जायकोउहल्ले संजातसइहे संजातसंसए संजायकोउहल्ले उप्पन्नसइहे उप्पन्नसंसए उप्पन्नकोउहल्ले
 समुप्पन्नसइहे समुप्पन्नसंसए समुप्पन्नकोउहल्ले उट्ठाए उट्ठेति त्ता जेणामेव अज्जसुहम्मस्स थेरे तेणामेव उवागच्छति त्ता थेरे(सुहम्मं थेरं पा०)तिक्खुत्तो आयाहिणपयाहिणं करेइ त्ता वंदति
 नमंसति त्ता अज्जसुहम्मस्स थेरस्स णच्चासन्ने नातिदूरे सुस्सूसमाणे णमंसमाणे अभिमुहं पंजलिउडे विणएणं पज्जुवासमाणे एवं वयासी-जति णं भंते ! समणेणं भगवया महावीरेणं
 आइगरेणं तित्थग० सयंसंबु० पुरिसु० पुरिससी० पुरिसव० पुरिसवरगं० लोगु० लोगनाहेणं लोगहिएणं लोगप० लोगपज्जोय० अभयद० चक्खुद० मग्गद० सरणद० बोहिद० धम्मद०
 धम्मदे० धम्मना० धम्मसा० धम्मवरचा० अप्पडिह० वियट्ठ० जिणेणं जाणएणं (प्र० जावएणं) तिन्नेणं तार० बुद्धेणं बोहएणं मुत्तेणं मोअगेणं सव्वण्णेणं सव्वद० सिवमयलमरुतम-
 णंतमक्खयमव्वावाहमपुणरावित्तिं सासयं ठाणमुवगतेणं पंचमस्स अंगस्स अयमट्ठे पन्नत्ते, छट्ठस्स णं अंगस्स भंते ! णायाधम्मकहाणं के अट्ठे पन्नत्ते ?, जंबूत्ति तए णं अज्जसुहम्मस्स
 थेरे अज्जजंबूणामं अणगारं एवं वयासी-एवं खलु जंबू ! समणेणं भगवता महावीरेणं जाव संपत्तेणं छट्ठस्स अंगस्स दो सुयक्खंधा पं० तंजहा-णायाणि य धम्मकहाओ य, जति णं
 भंते ! समणेणं भगवता महावीरेणं जाव संपत्तेणं छट्ठस्स अंगस्स दो सुयक्खंधा पं० तं०-णायाणि य धम्मकहाओ य, पढमस्स णं भंते ! सुयक्खंधस्स समणेणं जाव संपत्तेणं णायाणं
 कति अज्झयणा पं० ?, एवं खलु जंबू ! समणेणं जाव संपत्तेणं णायाणं एगूणवीसं अज्झयणा पं० तं०-‘उक्खित्तणाए संघाडे, अंडे कुम्मे य सेलगे । तुंवे य रोहिणी मही, मायंदी
 चंदिमा इय १० ॥ १ ॥ दावहवे उदगणाए, मंडुक्के तेयलीविय । नंदीफले अवरकंका, अतिन्ने सुंसुमा इय ॥ २ ॥ अवेरे य पुंडरीयणायए १९ एगूणवीसतिमे । ५ । जति णं भंते ! समणेणं
 जाव संपत्तेणं णायाणं एगूणवीसा अज्झयणा पं० तं०-उक्खित्तणाए जाव पुंडरीएत्ति य, पढमस्स णं भंते ! अज्झयणस्स के अट्ठे पं० ?, एवं खलु जंबू ! तेणं कालेणं० इहेव जंबुहीवे
 दीवे भारहे वासे दाहिणद्धभरहे रायगिहे णामं नयरे होत्था, वण्णओ, चेतिए वन्नओ, तत्थ णं रायगिहे नगरे सेणिए नामं राया होत्था महताहिमवंत० वन्नओ, तस्स णं सेणियस्स
 रन्नो नंदा नामं देवी होत्था सुकुमालपाणिपाया वण्णओ । ६ । तस्स णं सेणियस्स पुत्ते नंदाए देवीए अत्तए अभए नामं कुमारे होत्था अहीणजावसुरूवे सामदंडभेयउवप्पयाणणीति-
 सुप्पउत्तणयविहिन्नू इहावूहमग्गणगवेसणअत्थसत्थमइविसारए उप्पत्तियाए वेणइयाए कम्मियाए पारिणामिआए चउव्विहाए बुद्धीए उववेए सेणियस्स रण्णो बहुसु कज्जेसु य कुटुं-
 बेसु य मंतेसु य गुज्जेसु य रहस्सेसु य निच्छएसु य आपुच्छणिज्जे पडिपुच्छणिज्जे मेढी पमाणं आहारे आलंबणं चक्खू (प्र० वत्थू) मेढीभूए पमाणभूए आहारभूए आलंबणभूए
 चक्खूभूए सव्वकज्जेसु सव्वभूमियासु लद्धपच्चए विइण्णवियारे रज्जधुरचित्तए यावि होत्था, सेणियस्स रन्नो रज्जं च रट्ठं च कोसं च कोट्ठागारं च बलं च वाहणं च पुरं च अंतेउरं (१०१)

च सयमेव समुवेक्खमाणे २ विहरति । ७ । तस्स णं सेणियस्स रन्नो धारिणी नामं देवी होत्था जाव सेणियस्स रन्नो इट्ठा जाव विहरइ । ८ । तए णं सा धारिणी देवी अन्नया कयाइ तंसि तारिसगंसि छक्कट्टकलट्टमट्टसंठियखंभुग्गयं पवरवरसालभंजियउज्जलमणिकणगरतणभूमिय(प्र० थूभियचिलंक) विडंकजालद्धचंदणिज्जूहकंतरकणयालिचंदसालियाविभत्तिकलिते सरसच्छाऊवलवण्णरइए बाहिरओ दूमियघट्टमट्टे अन्भितरओ पत्त(प्र० प्रसत्त) सुवि(प्र० इ)लिहियचित्तकम्मे णाणाविहपंचवण्णमणिरयणकोट्टिमतले पउमलयाफुल्लवहिवरपुप्फ-जातिउल्लोयचित्तियतले वं(प्र० चं)दणवरकणगकलससुविणिम्मियपडिपुंजि(पूजि पा०)यसरसपउमसोहंतदारभाए पयरगलंबंतमणिमुत्तदामसुविरइयदारसोहे सुगंधवरकुसुममउयपम्ह-लसयणोवयारे मणहिययनिव्वुइयरे कप्पूरलवंगमलयचंदनकालागुरुपवरकुंदुरुक्कतुरुक्कधूवडज्झंतसुरभिमघमघंतगंधुद्धुयाभिरामे सुगंधवरगंधि(प्र० गंधगंधि)ए गंधवट्ठिभूते मणिकि-रणपणासियंधकारे, किं बहुणा ? जुइगुणेहिं सुरवरविमाणवेलंबियवरघरए, तंसि तारिसगंसि सयणिजंसि सालिंगणवट्टिए उभओ बिब्बोयणे दुहओ उन्नए मज्झेणयगंभीरे गंगापुलिण-वालुयाउद्दालसालिसए उयचि(प्र० ओयवि)यखोमदुगुल्लपट्टपडिच्छण्णे अच्छरयमलयनय(प्र० नवय)तयकुसत्तलिंबसीहकेसरपच्चुत्थए सुविरइयरयत्ताणे रत्तंसुयसंवुए सुरम्मे आइण-गरूयबूरणवणीयतुल्लफासे पुव्वरत्तावरत्तकालसमयंसि सुत्तजागरा ओहीरमाणी २ एगं महं सत्तुस्सेहं रययकूडसन्निहं नहयलंसि सोमं सोमागारं लीलायंतं जंभायमाणं मुहमतिगयं गयं (जाव सीहं सुविणे पा०) पासित्ताणं पडिबुद्धा, तते णं सा धारिणी देवी अयमेयारूवं उरालं कल्लाणं सिवं धन्नं मंगलं सस्सिरीयं महासुमिणं पासित्ताणं पडिबुद्धा समाणी हट्टतुट्ठा चित्तमाणंदिया पीइमणा परमसोमणस्सिया हरिसवसविसप्पमाणहियया धाराहयकलंबपुप्फगंपिव समूससियरोमकूवा तं सुमिणं ओगिण्हइ ता सयणिजाओ उ(प्र० अब्भु)ट्टेति ता पायपीढातो पच्चोरुहइ ता अतुरियमचवलमसंभंताए अविलंबियाए रायहंससरिसीए गतीए जेणामेव से सेणिए राया तेणामेव उवागच्छइ ता सेणियं रायं ताहिं इट्ठाहिं कंताहिं पियाहिं मणुन्नाहिं मणामाहिं कल्लाणाहिं सिवाहिं धन्नाहिं मंगल्लाहिं सस्सिरियाहिं हिययगमणिजाहिं हिययपल्हायणिजाहिं मियमहुररिभियगंभीरसस्सिरीयाहिं गिराहिं संलवमाणी २ पडिबो-हेइ ता सेणिएणं रत्ता अब्भणुन्नाया समाणी णाणामणिकणगरयणभत्तिचित्तंसि भद्दासणंसि निसीयति ता आसत्था विसत्था सुहासणवरगया करयलपरिग्गहियं दसनहं सिरसावत्तं म-त्थए अंजलिं कट्टु सेणियं रायं एवं वदासी-एवं खलु अहं देवाणुप्पिया ! अज्ज तंसि तारिसगंसि सयणिजंसि सालिंगणवट्टिए जाव नियगवयणमइवयंतं गयं सुमिणे पासित्ताणं पडिबुद्धा, तं एयस्स णं देवाणुप्पिया ! उरालस्स जाव सुमिणस्स के मन्ने कल्लाणे फलवित्तिविमेसे भविस्सति ? । ९ । तते णं सेणिए राया धारिणीए देवीए अंतिए एयमट्टं सोच्चा निसम्म हट्टजाव-हियये धाराहयनीवसुरभिकुसुमचंचुमालइयतणुऊससियरोमकूवे तं सुमिणं उग्गिण्हइ ता ईहं पविसति ता अप्पणो साभाविणं मइपुव्वएणं बुद्धिविन्नाणेणं तस्स सुमिणस्स अत्थोग्गहं करेति ता धारणिं देवीं ताहिं जाव हिययपल्हायणिजाहिं मिउमहुररिभियगंभीरसस्सिरियाहिं वग्गूहिं अणुवूहेमाणे २ एवं वयासी-उराले णं तुमे देवाणुप्पिए ! सुमिणे दिट्ठे कल्लाणे णं तुमे देवाणुप्पिए ! सुमिणे दिट्ठे सिवे धन्ने मंगल्ले सस्सिरीए णं तुमे देवाणुप्पिए ! सुमिणे दिट्ठे आरोग्गतुट्ठिदीहाउयकल्लाणमंगल्लकारए णं तुमे देवी ! सुमिणे दिट्ठे अत्थलाभो ते देवाणुप्पिए ! पुत्तलाभो ते देवा० रज्जलाभो० भोग० सोक्खलाभो ते देवाणुप्पिए ! एवं खलु तुमं देवाणुप्पिए नवण्हं मासाणं बहुपडिपुन्नाणं अट्टट्टमाण य राइंदियाणं विइक्कंताणं अम्हं कुलके(हे पा०)उं कुलदीवं कुलपव्वयं कुलवडिसयं कुलतिलकं कुलकित्तिकरं (कुलवित्तिकरं पा०) कुलणंदिकरं कुलजसकरं कुलाधारं कुलपायवं कुलविवद्वणकरं सुकुमालपाणिपायं जाव दारयं पयाहिसि, सेवि य णं दारए उम्मुक्कबालभावे विन्नायपरिणयमेत्ते जोव्वणगमणुपत्ते सूर वीरे विक्कंते विच्छिन्नविपुलबलवाहणे रज्जवती राया भविस्सइ, तं उराले णं तुमे देवीए सुमिणे दिट्ठे जाव आरोग्गतुट्ठिदीहाउकल्लाणकारए णं तुमे देवी ! सुमिणे दिट्ठेत्तिकट्टु भुज्जो २ अणुवूहेइ । १० । तते णं सा धारणी देवी सेणिएणं रत्ता एवं वुत्ता समाणी हट्टतुट्ठा जाव हियया करतलपरिग्गहियं जाव अंजलिं कट्टु एवं वदासी-एवमेयं देवाणुप्पिया ! तहमेयं अवितहमेयं असंदिद्धमेयं इच्छियमेयं दे० पडिच्छियमेयं इच्छियपडिच्छियमेयं सच्चे णं एसमट्टे जं णं तुज्जे वदहत्तिकट्टु तं सुमिणं सम्मं पडिच्छइ ता सेणिएणं रत्ता अब्भणुन्नाया समाणी णाणामणिकणगरयणभत्तिचित्ताओ भद्दासणाओ अब्भुट्टेइ ता जेणेव सए सयणिजे तेणेव उवागच्छइ ता सयंसि सयणिजंसि निसीयइ ता एवं वदासी-मा मे से उत्तमे पहाणे मंगल्ले सुमिणे अच्चेहिं पावसुमिणेहिं पडिहंमिहित्तिकट्टु देवयगुरुजणसंबद्धाहिं पसत्थाहिं धम्मियाहिं कहाहिं सुमिणजागरियं पडिजागरमाणी विहरइ । ११ । तए णं सेणिए राया पच्चूसकालसमयंसि कोट्टुंबियपुरिसे सहावेइ ता एवं वदासी-खिप्पामेव भो देवाणु-प्पिया ! बाहिरियं उवट्टाणसालं अज्ज मविसेसं परमरम्मं गंधोदगसित्तसुइयसंमज्जिओवलित्तं पंचवन्नसरससुरभिमुक्कपुप्फपुंजोवयारकलियं कालागरुपवरकुंदुरुक्कतुरुक्कधूवडज्झंतमघमघं-तगंधुद्धुयाभिरामं सुगंधवरगंधियं गंधवट्ठिभूतं करेह य कारवेह य ता एवमाणत्तियं पच्चप्पिणह, तते णं ते कोट्टुंबियपुरिसा सेणिएणं रत्ता एवं वुत्ता समाणा हट्टतुट्ठा जाव पच्चप्पिणंति,

तते णं से सेणिए राया कल्लं पाउप्पभायाए रयणीए फुल्लुप्पलकमलकोमलुम्मिलियंमि अहापंडुरे पभाए रत्तासोगपगासकिंसुयसुयमुहगुंजद्वारागबंधुजीवगपारावयचलणनयणपरहुय-
सुरत्तलोयणजासुय(प्र० म)णकुसुमजलियजलणतवणिज्जकलसहिं गुलयनिगररूवाइरेगरेहन्तसस्सिरीए दिवागरे अहकमेण उदिए तस्स दिण(कर)करपरंपरोवयारपारद्वंमि अंधयारे
बालातवकुंकुमेण खइयव्व जीवलोए लोयणविसआणुआसविगसंतविसददंसियंमि लोए कमल्लागरसंडबोहए उट्टियंमि सूरु सहस्सरस्सिमि दिणयरे तेयसा जलंते सयणिज्जाओ उट्टेति ता
जेणेव अट्टणसाला तेणेव उवागच्छइ ता अट्टणसालं अणुपविसति ता अणेगवायामजोगवग्गणवामदणमल्लजुद्धकरणेहिं संते परिस्संते सयपागेहिं सहस्सपागेहिं सुगंधवरतेल्लमादिएहिं
पीणणिज्जेहिं दीवणिज्जेहिं दप्पणिज्जेहिं मदणिज्जेहिं विहणिज्जेहिं सव्विदियगायपल्हायणिज्जेहिं अब्भंगएहिं अब्भंगिए समाणे तेल्लचम्मंसि पडिपुण्णपाणिपायसुकुमालकोमलतलेहिं
पुरिसेहिं छेएहिं दक्खेहिं पट्टेहिं कुसलेहिं मेहावीहिं निउणेहिं निउणसिप्पोवगतेहिं जियपरिस्समेहिं अब्भंगणपरिमदणुव्वलणकरणगुणनिम्माएहिं अट्टिसुहाए मंससुहाए तयासुहाए
रोमसुहाए चउव्विहाए संबाहणाए संबाहिए समाणे अवगयपरिस्समे नरिंदे अट्टणसालाओ पडिनिक्खमइ ता जेणेव मज्जणघरे तेणेव उवागच्छइ ता मज्जणघरं अणुपविसति ता
समंत(मुत्त पा०)जालाभिरामे विचित्तमणिरयणकोट्टिमतले रमणिज्जे ण्हाणमंडवंसि णाणामणिरयणभत्तिचित्तंसि ण्हाणपीढंसि सुहनिसन्ने सुहोदगेहिं पुप्फोदएहिं गंधोदएहिं सुद्धो-
दएहि य पुणो पुणो कल्लाणगपवरमज्जणविहीए मज्जिए तत्थ कोउयसएहिं बहुविहेहिं कल्लाणगपवरमज्जणावसाणे पम्हलसुकुमालगंधकासाईयलूहियंगे अहतसुमहग्घदूसरयणसुसंवुए
सरससुरभिगोसीसचंदणाणुलित्तगत्ते सुइमालावन्नगविलेवणे आविद्धमणिसुवन्ने कप्पियहारद्वहारतिसरयपालंबपलंबमाणकडिसुत्तसुकयसोहे पिणद्धगेवेज्जे अंगुलेज्जगललियंगललियक-
याभरणे णाणामणिकडगतुडियथंभियभुए अहियरूवसस्सिरीए कुंडलुज्जोइयाणणे मउडदित्तसिए हारोत्थयसुकतरइयवच्छे पालंबपलंबमाणसुकयपडउत्तरिज्जे मुदियापिंगलंगुलीए
णाणामणिकणगरयणविमलमहरिहनिउणोवियमिसिमिसंतविरइयसुसिलिद्विसिद्वल्लसंठियपसत्थआविद्धवीरवलए, किं बहुणा ?, कप्परुक्खए चेव सुअलंकियविभूसिए नरिंदे सकोरि-
टमल्लदामेणं छत्तेणं धरिज्जमाणेणं उभओ चउचामरवालवीइयंगे मंगलजयसदकयालोए अणेगगणनायगदंडणायगराईसरतलवरमाडंबियकोडुंबियमंतिमहामंतिगणगदोवारियअमच्च-
चेडपीढमइयनगरणिगमसेट्टिसेणावइसत्थवाहदूयसंधिवाल सद्धिं संपरिवुडे धवलमहामेहनिग्गएविव गहगणदिप्पंतरिक्खतारागणाण मज्झे ससिक्ख पियदंसणे नरवई मज्जणघराओ पडि-
निक्खमति ता जेणेव बाहिरिया उवट्टाणसाला तेणेव उवागच्छइ ता सीहासणवरगते पुरत्थाभिमुहे सन्निसन्ने, तते णं से सेणिए राया अप्पणो अदूरसामंते उत्तरपुरच्छिमे दिसिभागे
अट्ट भद्दासणाइं सेयवत्थपच्चुत्थुयातिं सिद्धत्थ(प्र० कय)मंगलोवयारकत(प्र० नय)संतिकम्माइं रयावेइ ता णाणामणिरयणमंडियं अहियपेच्छणिज्जरूवं महग्घवरपट्टणुग्गयं सण्हबहुभ-
त्तिसयचित्तट्टा(ता)णं ईहामियउसभतुरयणरमगरविहगवालगकिंनररुसरभचमरकुंजरवणलयपउमलयभत्तिचित्तं सुखचियवरकणगपवरपेरंतदेसभागं अब्भितरियं जवणियं अल्लावेइ
ता अच्छरगमउअमसूरगउच्छइयं धवलवत्थपच्चुत्थुयं विसिट्टं अंगसुहफासयं सुमउयं धारिणीए देवीए भद्दासणं रयावेइ ता कोडुंबियपुरिसे सदावेइ ता एवं वदासी-खिप्पामेव भो देवा-
णुप्पिया ! अट्टंगमहानिमित्तसुत्तत्थपाढए विविहसत्थकुसले सुमिणपाढए सदावेइ ता एयमाणत्तियं खिप्पामेव पच्चप्पिणह, तते णं ते कोडुंबियपुरिसा सेणिएणं रत्ता एवं वुत्ता समाणा
हट्टजावहियया करयलपरिग्गहियं दसनहं सिरसावत्तं मत्थए अंजलिं कट्टु एवं देवो तहत्ति आणाए विणएणं वयणं पडिसुणेंति ता सेणियस्स रत्तो अंतियाओ पडिनिक्खमंति ता
रायगिहस्स नगरस्स मज्झंमज्झेणं जेणेव सुमिणपाढगगिहाणि तेणेव उवागच्छंति ता सुमिणपाढए सदावेति, तते णं ते सुमिणपाढगा सेणियस्स रत्तो कोडुंबियपुरिसेहिं सदाविया
समाणा हट्टजावहियया ण्हाया कयबलिकम्मा जाव पायच्छित्ता अप्पमहग्घाभरणालंकियसरीरा हरियालियसिद्धत्थयकय(सिद्धत्थयहरियालियाकयमंगल पा०)मुद्धाणा सतेहिं सतेहिं
गिहेहिंतो पडिनिक्खमंति ता रायगिहस्स नगरस्स मज्झंमज्झेणं जेणेव सेणियस्स रन्नो भवणवडेंसगदुवारे तेणेव उवागच्छंति ता एगतओ मिलायंति ता सेणियस्स रन्नो भवणव-
डेंसगदुवारेणं अणुपविसंति ता जेणेव बाहिरिया उवट्टाणसाला जेणेव सेणिए राया तेणेव उवागच्छंति ता सेणियं रायं जएणं विजएणं वद्धावेति, सेणिएणं रन्ना अच्चियवंदियपूतिय-
माणियसक्कारियसम्माणिया समाणा पत्तेयं २ पुव्वन्नत्थेसु भद्दासणेसु निसीयंति, तते णं सेणिये राया जवणियंतरियं धारणीं देवीं ठवेइ ता पुप्फफलपडिपुण्णहत्थे परेणं विणएणं ते
सुमिणपाढए एवं वयासी-एवं खलु देवाणुप्पिया ! धारिणीदेवी अज्ज तंसि तारिसयंसि सयणिज्जंसि जाव महासुमिणं पासित्ताणं पडिबुद्धा, तं एयस्स णं देवाणुप्पिया ! उरालस्स जाव
सस्सिरीयस्स महासुमिणस्स के मन्ने कल्लाणे फलवित्तिविसेसे भविस्सति, तते णं ते सुमिणपाढगा सेणियस्स रन्नो अंतिए एयमट्टं सोच्चा णिसम्म हट्टजावहियया तं सुमिणं सम्मं
ओगिण्हंति ता ईहं अणुपविसंति ता अन्नमन्नेण सद्धिं संचालेंति ता तस्स सुमिणस्स लद्धट्टा गहियट्टा पुच्छियट्टा विणिच्छियट्टा अभिगयट्टा सेणियस्स रन्नो पुरओ सुमिणसत्थाइं

उच्चारेमाणा २ एवं वदासी-एवं खलु अहं सामी ! सुमिणसत्थंसि बायालीसं सुमिणा तीसं महासुमिणा बावत्तारिं सब्वसुमिणा दिट्ठा, तत्थ णं सामी ! अरिहंतमायरो वा चक्कवट्टि-
मातरो वा अरहंतंसि वा चक्कवट्टिसि वा गब्भं वक्कममाणंसि एएसिं तीसाए महासुमिणाणं इमे चोदस महासुमिणे पासित्ताणं पडिबुज्झंति, तंजहा-‘ गयउसभसीहअभिसेयदामससि-
दिणयरं झयं कुंभं । पउमसरसागरविमाणभवणरयणुच्चय सिहिं च ॥ ३ ॥ वासुदेवमातरो वा वासुदेवंसि गब्भं वक्कममाणंसि एएसिं चोदसण्हं महासुमिणाणं अन्नतरे सत्त महासुमिणे
पासित्ताणं पडिबुज्झंति, बलदेवमातरो वा बलदेवंसि गब्भं वक्कममाणंसि एएसिं चोदसण्हं महासुमिणाणं अण्णतरे चत्तारि महासुमिणे पासित्ताणं पडिबुज्झंति, मंडलियमायरो वा
मंडलियंसि गब्भं वक्कममाणंसि एएसिं चोदसण्हं महासुमिणाणं अन्नतरं एगं महासुमिणं पासित्ताणं पडिबुज्झंति, इमे य णं सामी ! धारणीए देवीए एगे महासुमिणे दिट्ठे तं उराले
णं सामी ! धारणीए देवीए सुमिणे दिट्ठे जाव आरोग्गतुट्ठिदीहाउकल्लाणमंगल्लकारए णं सामी ! धारणीए देवीए सुमिणे दिट्ठे, अत्थलाभो सामी ! सोक्खलाभो सामी ! भोगलाभो
सामी ! पुत्तलाभो रज्जलाभो एवं खलु सामी ! धारिणीदेवी नवण्हं मासाणं बहुपडिपुत्ताणं जाव दारगं पयाहिति, सेवि य णं दारए उम्मुक्कवालभावे विन्ना(ण्ण पा०)यपरिणयमित्ते
जोव्वणगमणुपत्ते सूरु वीरे विक्कंते विच्छिन्नविउलबलवाहणे रज्जवती राया भविस्सइ अणगारे वा भावियप्पा, तं उराले णं सामी ! धारिणीए देवीए सुमिणे दिट्ठे जाव आरोग्गतुट्ठि-
जाव दिट्ठेत्तिकट्ठु भुज्जो २ अणुबूहेति, तते णं सेणिए राया तेसिं सुमिणपाढगाणं अंतिए एयमट्ठं सोच्चा णिसम्म हट्ठ जाव हियए करयल जाव एवं वदासी-एवमेयं देवाणुप्पिया ! जाव
जन्नं तुब्भे वदहत्तिकट्ठु तं सुमिणं सम्मं पडिच्छति ता ते सुमिणपाढए विपुलेणं असणपाणखाइमसाइमेणं वत्थगंधमल्लालंकारेण य सक्कारेति सम्माणेति ता विपुलं जीवियारिहं
पीतिदाणं दलयति ता पडिविसजेइ, तते णं से सेणिए राया सीहासणाओ अब्भुट्ठेति ता जेणेव धारिणी देवी तेणेव उवागच्छइ ता धारिणीदेवी एवं वदासी-एवं खलु देवाणुप्पिए !
सुमिणसत्थंसि बायालीसं सुमिणा जाव एगं महासुमिणं जाव भुज्जो २ अणुबूहति, तते णं धारिणीदेवी सेणियस्स रत्तो अंतिए एयमट्ठं सोच्चा णिसम्म हट्ठ जावहियया तं सुमिणं सम्मं
पडिच्छति ता जेणेव सए वासधरे तेणेव उवागच्छति ता ण्हाया कयबलिकम्मा जाव विपुलाहिं जाव विहरति । १२ । तते णं तीसे धारिणीए देवीए दोसु मासेसु वीतिकंतेसु ततिए
मासे वट्ठमाणे तस्स गब्भस्स दोहलकालसमयंसि अयमेयारूवे अकालमेहेसु दोहले पाउब्भवित्था-धन्नाओ णं ताओ अम्मयाओ सपुत्ताओ णं ताओ अम्मयाओ कयत्थाओ णं ताओ
कयपुत्ताओ कयलक्खणाओ कयविहवाओ सुलद्धे णं तासिं माणुस्सए जम्मजीवियफले जाओ णं मेहेसु अब्भुग्गतेसु अब्भुज्जएसु अब्भुन्नतेसु अब्भुट्ठिएसु सगज्जिएसु सविज्जिएसु
सफुसिएसु सथणिएसु धंतधोतरुप्पपट्ठअंकसंखचंदकुंदसालिपिट्ठरासिसमप्पभेसु चिउरहरियालभेयचंपगसण(कंचण पा०)कोरंटसरिसयपउमरयसमप्पभेसु लक्खारससरसत्तकिंसुय-
जासुमणरत्तबंधुजीवगजातिहिं गुलयसरसकुंकुमउरब्भससरुहिरइंदगोवगसमप्पभेसु बरहिणनीलगुलियसुगचासपिच्छभिगपत्तसासगनीलुप्पलनियरनवसिरीसकुसुमणवसदलसमप्पभेसु
जच्चंजणभिगभेयरिट्ठगभमरावल्लिगवल्लुगुलियकज्जलसमप्पभेसु फुरंतविज्जुतसगज्जिएसु वायवसविपुलगगणचवलपरिसक्किरेसु निम्मलवरवारिधारापगलियपयंडमारुयसमाहयसमोत्थरं-
तउवरिउवरि(प्र० सयय)तुरियवासं पवासिएसु धारापहकरणिवायनिव्वावियमेइणितले हरियगणकंचुए पल्लविय पायवगणेसु बल्लिवियाणेसु पसरिएसु उन्नएसु सोभग्गमुवागएसु
(नगेसु नएसु वा पा०) वेभारगिरिप्पवायतडकडगविमुक्केसु उज्झरेसु तुरियपहावियपलोट्ठफेणाउलं सकलुसं जलं वहंतीसु गिरिनीदीसु सज्जज्जुणनीवकुडयकंदलसिलिंधकल्लिएसु उवव-
णेसु मेहरसियहट्ठतुट्ठचिट्ठियहरिसवसपमुक्ककंठकेकारवं मुयंतेसु बरहिणेसु उउवसमयजणियतरुणसहयरिपणचित्तेसु नवसुरभिसिलिंधकुडयकंदलकलंबगंधद्वणिं मुयंतेसु उववणेसु परहु-
यरुयरिभितसंकुलेसु उदायंतरत्तइंदगोवयथोवयकारुन्नविलवितेसु ओणयतणमंडिएसु ददुदुरपयंपिएसु संपिंडियदरियभमरमहुकरिपहकरपरिलिंतमत्तलप्पयकुसुमासवलोलमधुरगुंजं-
तदेसभाएसु उववणेसु परिसा(प्र० ज्झा, ब्भा पा०)मियचंदसूरगहगणपणट्ठनक्खत्ततारगपहे इंदाउहबद्धचिंधपट्ठंसि अंबरतले उड्डीणबलागपंतिसोभंतमेहविंदे कारंडगचक्कवायकलहं-
सउस्सुयकरे संपत्ते पाउसंमि काले ण्हाया कयबलिकम्मा कयकोउयमंगलपायच्छित्ताओ किं ते वरपायपत्तणेउरमणिमेहलहाररइय(प्र० उचिय)कडगखुड्डयविचित्तवरवलयथंभियभु-
याओ कुंडलउज्जोवियाणणाओ रयणभूसियंगाओ नासानीसासवायवोज्झं चक्खुहरं वण्णफरिससंजुत्तं हयलालापेलवाइरेयं धवलकणयखचियन्तकम्मं आगासफलिहसरिसप्पभं अंसूयं
पवरपरिहियाओ दुगुल्लसुकुमालउत्तरिज्जाओ सब्बोउयसुरभिकुसुमपवरमल्लसोभितसिराओ (सुरइयपलंबमाणसोहमाणकंतविकसंतचित्तमालाओ पा०) कालागरुधूवधूवियाओ सिरिस-
माणवेसाओ सेयणयगंधहत्थिरयणं दुरूढाओ समाणीओ सकोरिंटमल्लदामेणं छत्तेणं धरिज्जमाणेणं चंदप्पभवइरवेरुलियविमलदंडसंखकुंददगरयअमयमहियफेणपुंजसन्निगासचउचा-
मरवालवीजितंगीओ (सेयवरचामरेहिं उद्धुव्वमाणीहिं २ पा०) सेणिएणं रत्ता सद्धिं हत्थिखंधवरगएणं पिट्ठओ समणुगच्छमाणीओ चाउरंगिणीए सेणाए महता हयाणीएणं गया-

नीएणं रहाणीएणं पायत्ताणीएणं सव्वड्ढीए सव्वज्जुईए जाव निग्घोसणादियरवेणं रायगिहं नगरं सिंघाडगतियचउक्कचच्चरचउम्मुहमहापहपहेसु आसित्तसित्तसुचियसंमज्जिओव-
 लित्तं जाव सुगंधवरगंधियं गंधवट्ठीभूयं अवलोएमाणीओ नागरजणेणं अभिणंदिज्जमाणीओ गुच्छलयाखुक्खगुम्भवह्निगुच्छओच्छाडयं सुरम्मं वेभारगिरिकडगपायमूलं सव्वओ समंता
 (ओलोएमाणीओ पा०) आहिंढंति (डेमाणीओ २ दोहलं विणियंति, पा०) तं जइ णं अहमवि मेहेसु अब्भुवगएसु जाव दोहलं विणिज्जामि । १३ । तए णं सा धारिणी देवी तंसि
 दोहलंसि अविणिज्जमाणंसि असंपन्नदोहला असंपुन्नदोहला असंमाणियदोहला सुक्का भुक्खा णिम्मंसा ओलुग्गा ओलुग्गसरीरा पमइलदुब्बला किलंता ओमंथियवयणनयणकमला
 पंडुइयमुही करयलमलियव्व चंपगमाला णित्तेया दीणविवणवयणा जहोचियपुप्फगंधमह्तालंकारहारं अणभिलममाणी कीडारमणकिरियं च परिहावेमाणी दीणा दुम्मणा निराणंदा
 भूमिगयदिट्ठीया ओहयमणसंकप्पा जाव झियायइ, तते णं तीसे धारिणीए देवीए अंगपडियारियाओ अब्भितरियाओ दासचेडीयाओ धारिणीं देवीं ओलुग्गं जाव झियायमाणि
 पासंति ता एवं वदासी-किण्णं तुमे देवाणुप्पिए ! ओलुग्गा ओलुग्गसरीरा जाव झियायसि ?, तते णं सा धारणी देवी ताहिं अंगपडियारियाहिं अब्भितरियाहिं दासचेडियाहिं एवं वुत्ता
 समाणी (प्र० ताओ चेडीओ) नो आढाति णो य परियाणाति अणाढायमाणी अपरियाणमाणी तुसिणिया संचिट्ठति, तते णं ताओ अंगपडियारियाओ अब्भितरियाओ दासचेडियाओ
 धारिणीं देवीं दोच्चंपि तच्चंपि एवं वयासी-किन्नं तुमे देवाणुप्पिए ! ओलुग्गा ओलुग्गसरीरा जाव झियायसि ?, तते णं सा धारिणीदेवी ताहिं अंगपडियारियाहिं अब्भितरियाहिं दास-
 चेडियाहिं दोच्चंपि तच्चंपि एवं वुत्ता समाणी णो आढाति णो परियाणाति अणाढायमाणा अपरियायमाणा तुसिणिया संचिट्ठति, तते णं ताओ अंगपडियारियाओ दासचेडियाओ
 धारिणीए देवीए अणाढातिज्जमाणीओ अपरिजाणिज्जमाणीओ तहेव संभंताओ समाणीओ धारणीए देवीए अंतियाओ पडिनिक्खमति ता जेणेव सेणिए राया तेणेव उवागच्छंति ता
 करतलपरिगहियं जाव कट्टु जएणं विजएणं वद्धावेंति ता एवं व०-एवं खलु सामी ! किंपि अज्ज धारिणीदेवी ओलुग्गा ओलुग्गसरीरा जाव अट्टझाणोवगया झियायति, तते णं से
 सेणिए राया तामिं अंगपडियारियाणं अंतिए एयमट्टं सोच्चा णिसम्म तहेव संभंते समाणे सिग्घं तुरियं चवलं वेइयं जेणेव धारिणीदेवी तेणेव (पहारेत्थ गमणाए पा०) उवागच्छइ
 ता धारणीं देवीं ओलुग्गं ओलुग्गसरीरं जाव अट्टझाणोवगयं झियायमाणि पासइ ता एवं वदासी-किन्नं तुमे देवाणुप्पिए ! ओलुग्गा ओलुग्गसरीरा जाव अट्टझाणोवगया झियायसि ?,
 तते णं सा धारणी देवी सेणिएणं रन्ना एवं वुत्ता समाणी नो आढाइ जाव तुसिणीया संचिट्ठति, तते णं से सेणिए राया धारिणीं देवीं दोच्चंपि तच्चंपि एवं वदासी-किन्नं तुमे देवाणु-
 प्पिए ! ओलुग्गा जाव झियायसि ?, तते णं सा धारिणीदेवी सेणिएणं रन्ना दोच्चंपि तच्चंपि एवं वुत्ता समाणी णो आढाति णो परिजाणाति तुसिणीया संचिट्ठइ, तते णं सेणिए राया
 धारिणीं देवीं सवहसावियं करइ ता एवं वयासी-किण्णं तुमे देवाणुप्पिए ! अहमेयस्स अट्टस्स अणरिहे सवणयाए ? ता णं तुमं ममं अयमेयारूवं मणोमाणसियं दुक्खं रहस्सीकरेसि,
 तते णं सा धारिणीदेवी सेणिएणं रन्ना सवहसाविया समाणी सेणियं रायं एवं वदासी-एवं खलु सामी ! मम तस्स उरालस्स जाव महासुमिणस्स तिण्हं मासाणं बहुपडिपुन्नाणं अय-
 मेयारूवे अकालमेहेसु दोहले पाउब्भए धन्नाओ णं ताओ अम्मयाओ कयत्थाओ णं ताओ अम्मयाओ जाव वेभारगिरिपायमूलं आहिंढमाणीओ दोहलं विणिति, तं जइ णं अहमवि
 जाव दोहलं विणिज्जामि, तते णं हं सामी ! अयमेयारूवंमि अकालदोहलंमि अविणिज्जमाणंमि ओलुग्गा जाव अट्टझाणोवगया झियायामि, एएणं अहं कारणेणं सामी ! ओलुग्गा
 जाव अट्टझाणोवगया झियायामि, तते णं मे सेणिए राया धारणीए देवीए अंतिए एयमट्टं सोच्चा णिसम्म धारिणीं देवीं एवं वदासी-मा णं तुमं देवाणुप्पिए ! ओलुग्गा जाव झियाहि,
 अहं णं तहा जत्तिहामि (करिम्मामि पा०) जहा णं तुब्भं अयमेयारूवस्स अकालदोहलस्स मणोरहसंपत्ती भविस्सइत्तिकट्टु धारिणीं देवीं इट्ठाहिं कंताहिं पियाहिं मणुन्नाहिं मणा-
 माहिं वग्गहिं समामासेइ ता जेणेव बाहिरिया उवट्ठाणमाला तेणामेव उवागच्छइ ता सीहासणवग्गते पुग्गत्थाभिमुहे सन्निसन्ने धारिणीए देवीए एयं अकालदोहलं बहूहिं आएहि
 य उवाएहि य उप्पत्तियाहि य वेणइयाहि य कम्मियाहि य परिणामियाहि य चउव्विहाहिं बुद्धीहिं अणुचितेमाणे २ तस्स दोहलस्स आयं वा उवायं वा ठिइं वा कम्मं वा (उप्पत्ति
 वा पा०) अविंदमाणे ओहयमणसंकप्पे जाव झियायति । १४ । तदाणंतरं च णं अभए कुमारे ण्हाते कयबलिकम्मे जाव सव्वालंकारविभूसिए पायवंदते पहारेत्थ गमणाए, तते णं से
 अभयकुमारे जेणेव सेणिए राया तेणेव उवागच्छइ ता सेणियं रायं ओहयमणसंकप्पं जाव पासइ ता अयमेयारूवे अब्भत्थिए चित्तिए मणोगते संकप्पे समुप्पज्जित्था-अन्नया य ममं
 सेणिए राया एज्जमाणं पासति ता आढाति परिजाणाति सक्कारेइ सम्माणेइ आलवति संलवति अद्दामणेणं उवणिमंतेति मत्थयंसि अग्घाति, इयाणिं ममं सेणिए राया णो आढाति
 णो परियाणाइ णो सक्कारेइ णो सम्माणेइ णो इट्ठाहिं कंताहिं पियाहिं मणुन्नाहिं (मणामाहिं पा०) ओरालाहिं वग्गहिं आलवति संलवति नो अद्दासणेणं उवणिमंतेति णो मत्थयंसि
 अग्घाति य, किंपि ओहयमणसंकप्पे झियायति, तं भवियव्वं णं एत्थ कारणेणं, तं सेयं खलु मे सेणियं रायं एयमट्टं पुच्छित्तए, एवं संपेहेइ ता जेणामेव सेणिए राया तेणामेव (१०२)

उवागच्छइ ता करयलपरिगहियं सिरसावत्तं मत्थए अंजलिं कट्टु जएणं विजएणं वद्धावेइ ता एवं वदासी-तुब्भे णं ताओ ! अन्नया ममं एज्जमाणं पासित्ता आढाह परिजाणह जाव मत्थयंसि अग्घा(प्र० परि०)यह आसणेणं उवणिमंतेह, इयाणिं ताओ ! तुब्भे ममं नो आढाह जाव नो आसणेणं उवणिमंतेह किंपि ओहयमणसंकप्पा जाव झियायह तं भवियव्वं ताओ ! एत्थ कारणेणं, तओ तुब्भे मम ताओ ! एयं कारणं(एयं पा०) अगूहेमाणा असंकेमाणा अनिण्हवेमाणा अपच्छाएमाणा जहाभूतमवितहममंदिद्धं एयमट्टमाइक्खह, तते णं हं तस्म कारणस्स अंतगमणं गमिस्सामि, तते णं से सेणिए राया अभएणं कुमारेणं एवं वुत्ते समाणे अभयकुमारं एवं वदासी-एवं खलु पुत्ता ! तव चुल्लमाउयाए धारिणीए देवीए तस्स गब्भस्स दोसु मासेसु अइकंतेसु तइयमासे वट्टमाणे दोहलकालसमयंसि अयमेयारूवे दोहले पाउब्भवित्था धन्नाओ णं ताओ अम्मयाओ तहेव निग्वसेसं भाणियव्वं जाव विणिति, तते णं अहं पुत्ता ! धारिणीए देवीए तस्स अकालदोहलस्स बहूहिं आएहि य उवाएहिं जाव उप्पत्तिं अविंदमाणे ओहयमणसंकप्पे जाव झियायामि तुमं आगयंपि न याणामि, तं एतेणं कारणेणं अहं पुत्ता ! ओहय जाव झियामि, तते णं से अभयकुमारे सेणियस्स रत्तो अंतिए एयमट्टं सोच्चा णिमम्म हट्टजावहियए सेणियं रायं एवं वदासी-मा णं तुब्भे ताओ ! ओह-यमण जाव झियायह अहणं तहा करिस्सामि जहा णं मम चुल्लमाउयाए धारिणीए देवीए अयमेयारूवस्स अकालदोहलस्स मणोरहसंपत्ती भविस्सइत्तिकट्टु सेणियं रायं ताहिं इट्ठाहिं कंताहिं जाव समासासेइ, तते णं सेणिए राया अभयेणं कुमारेणं एवं वुत्ते समाणे हट्टतुट्टे जाव अभयकुमारं सक्कारेति संमाणेति ता पडिविमज्जेति । १५। तते णं से अभयकुमारे सक्कारिय-सम्माणिए पडिविसज्जिए समाणे सेणियस्स रत्तो अंतियाओ पडिनिक्खमइ ता जेणामेव मए भवणे तेणामेव उवागच्छति ता सीहासणे निसन्ने, तते णं तस्स अभयकुमारस्स अयमे-यारूवे अब्भत्थिए जाव समुप्पज्जित्था-नो खलु सक्का माणुस्सएणं उवाएणं मम चुल्लमाउयाए धारिणीए देवीए अकालदोहलमणोरहसंपत्तिं करेत्तए णन्नत्थ दिव्वेणं उवाएणं, अत्थि णं मज्झ सोहम्मकप्पवासी पुव्वसंगतिए देवे महिड्ढीए जाव महासोक्खे, तं सेयं खलु मम पोसहसालाए पोसहियस्स बंभचारिस्स उम्मुक्कमणिसुवन्नस्स ववगयमालावन्नगविलेवण-स्स निक्खित्तसत्थमुसलस्स एगस्स अवीयस्स दब्भसंथारोवगयस्स अट्टमभत्तं परिगिण्हित्ता पुव्वसंगतियं देवं मणसि करेमाणस्स विहरित्तए, तते णं पुव्वसंगतिए देवे मम चुल्लमाउ-याए धारिणीए देवीए अयमेयारूवं अकालमेहेसु दोहलं विणेहिति, एवं संपेहेति ता जेणेव पोसहसाला तेणामेव उवागच्छति ता पोसहसालं पमज्जति ता उच्चारपासवणभूमिं पडि-लेहेइ ता दब्भसंथारगं पडिलेहेइ ता डब्भसंथारगं दुरूहइ ता अट्टमभत्तं परिगिण्हइ ता पोसहसालाए पोसहिए बंभयारी जाव पुव्वसंगतियं देवं मणसि करेमाणे २ चिट्ठइ, तते णं तस्स अभयकुमारस्स अट्टमभत्ते परिणममाणे पुव्वसंगतिअस्स देवस्स आसणं चलति, तते णं पुव्वसंगतिए सोहम्मकप्पवासी देवे आसणं चलियं पासति ता ओहिं पउंजति, तते णं तस्स पुव्वसंगतियस्स देवस्स अयमेयारूवे अब्भत्थिए जाव समुप्पज्जित्था-एवं खलु मम पुव्वसंगतिए जंबुदीवे दीवे भारहे वासे दाहिणड्ढभरहे वासे रायगिहे नयरे पोसहसालाए पोसहिए अभए नामं कुमारे अट्टमभत्तं परिगिण्हित्ताणं मम मणसि करेमाणे २ चिट्ठति, तं सेयं खलु मम अभयस्स कुमारस्स अंतिए पाउब्भवित्तए, एवं संपेहेइ ता उत्तरपुरच्छिमं दिसीभागं अवक्कमति ता वेउव्वियसमुग्घाएणं समोहणति ता संखेज्जाइं जोयणाइं दंडं निसिरति, तं-रयणाणं वड्डराणं वेरुलियाणं लोहियक्खवाणं मसारगल्लाणं हंसगब्भाणं पुल्लाणं सोगंधियाणं जोइरसाणं अंकाणं अंजणाणं रयणाणं जायरूवाणं अंजणपुल्लाणं फलिहाणं रिट्ठाणं १६, अहाबायरे पोग्गले परिमाडेइ ता अहासुहुमे पोग्गले परिगिण्हति ता अभय-कुमारमणुकंपमाणे देवे पुव्वभवजणियनेहपीइबहुमाणं(प्र०णे)जाय(जणिय पा०)सोगे(प्र० हो)(हे पा०) तओ विमाणवरपुंडरीयाओ रयणुत्तमाओ धरणियलगमणतुरितसंजणितग-मणपयारो वाघुणितविमलकणगपयरगवडिं(डें पा०)सग(पकंपमाणचल्लोल्लल्लियपरिल्लिमाणनरमगरतुरगमुहसयविणिग्गउग्गिन्नपवरमोत्तियविगयमाण पा०)मउडुक्कडाडोवदंस-णिज्जो अणेगमणिकणगरतणपहकरपरिमंडित(भाग पा०)भत्तिचित्तविणिउत्तगमणग(प्र० मणुगुण)जणियहरिसे पैंग्वोलमाणवरललितकुंडलुज्जलियवयणगुण(अहियआभरण पा०)-जनितसोम(भे गयजलमल्लविमलहंसपविरायमाण पा०)रूवे उदितोविव कोमुदीनिमाए सणिच्छरंगारउज्जलियमज्झभागत्थे णयणाणंदे (सरय -)चंदो दिव्वोसहिपज्जलुज्जलियदंसणा-भिरामो उउलच्छिसमत्तजायसोहे पइट्ठगंधुद्धुयाभिरामो मेरुरिव नगवगे विगुव्वियविचित्तवेसे दीवममुहाणं असंग्वपरिमाणनामधेज्जाणं मज्झंकारेणं वीइवयमाणो उज्जोयंतो पभाए विमलाते जीवलोगं रायगिहं पुरवरं च अभयस्स य तस्स पासं उवयति दिव्वरूवधारी । १६। तते णं से देवे अंतलिक्खपडिवन्ने दसद्ववन्नाइं सखिंखिणियाइं पवरवत्थाइं परिहिए, एक्को ताव एसो गमो अण्णोऽवि गमो, ताए उक्किट्ठाए तुरियाए चवलाए चंडाए सीहाए उद्धुयाए जतिणाए छेयाए दिव्वाए देवगतीए जेणामेव जंबुदीवे दीवे भारहे वासे जेणामेव दाहि-णद्वभरहे रायगिहे नगरे पोसहसालाए अभयए कुमारे तेणामेव उवागच्छइ ता अंतरिक्खपडिवन्ने दसद्ववन्नाइं सखिंखिणियाइं पवरवत्थाइं परिहिए अभयं कुमारं एवं वयासी-अहन्नं

देवाणुप्पिया ! पुव्वसंगतिए सोहम्मकप्पवासी देवे महडिढए जणं तुमं पोसहसालाए अट्टमभत्तं पगिण्हित्ताणं ममं मणसि करेमाणे चिट्ठसि तं एस णं देवाणुप्पिया ! अहं इहं हव्वमा-
 गए, संदिसाहि णं देवाणुप्पिया ! किं करेमि किं दलामि किं पयच्छामि किं वा ते हियइच्छितं?, तते णं से अभए कुमारे तं पुव्वसंगतियं देवं अंतलिक्खपडिवन्नं पासइ ता हट्टतुट्ठे
 पोसहं पारेइ ता करयल० अंजलिं कट्ठु एवं वदासी-एवं खलु देवाणुप्पिया ! मम चुल्लमाउयाए धारिणीए देवीए अयमेयारूवे अकालडोहले पाउब्भूते-धन्नाओ णं ताओ अम्मयाओ
 तहेव पुव्वगमेणं जाव विणिज्जामि, तन्नं तुमं देवाणुप्पि० मम चुल्लमाउयाए धारिणीए देवीए अयमेयारूवं अकालडोहलं विणेहि, तते णं से देवे अभएणं कुमारेणं एवं वुत्ते समाणे
 हट्टतुट्ठे अभयकुमारं एवं वदामी-तुमणं देवाणुप्पिया ! सुणिव्वुयवीसत्थे अच्छाहि, अहणं तव चुल्लमाउयाए धारिणीए देवीए अयमेयारूवं डोहलं विणेमीतिकट्ठु अभयस्स कुमा-
 रस्स अंतियाओ पडिणिक्खमति ता उत्तरपुरच्छिमे णं वेभारपव्वए वेउव्वियसमुग्घाएणं समोहण्णति ता संखेज्जाइं जोयणाइं दंढं निस्सरति जाव दोच्चं पि वेउव्वियसमुग्घाएणं
 समोहण्णति ता खिप्पामेव सगज्जितियं सविज्जुयं सफुसियं तं पंचवन्नमेहणिणाओवसोहियं दिव्वं पाउससिरीं विउव्वेइ ता जेणेव अभए कुमारे तेणामेव उवागच्छइ ता अभयं कुमारं
 एवं वदासी-एवं खलु देवाणुप्पिया ! मए तव पियट्ठयाए सगज्जिया सफुसिया सविज्जुया दिव्वा पाउससिरी विउव्विया, तं विणेउ णं देवाणुप्पिया ! तव चुल्लमाउया धारिणीदेवी अय-
 मेयारूवं अकालडोहलं, तते णं से अभयकुमारे तस्स पुव्वसंगतियस्स देवस्स सोहम्मकप्पवासिस्स अंतिए एयमट्ठं सोच्चा णिसम्म हट्टतुट्ठे सयातो भवणाओ पडिनिक्खमति ता
 जेणामेव सेणिए राया तेणामेव उवागच्छति करयल० अंजलिं कट्ठु एवं वदासी-एवं खलु ताओ ! मम पुव्वसंगतिएणं सोहम्मकप्पवासिणा देवेणं खिप्पामेव सगज्जिता सविज्जुता
 पंचवन्नमेहनिनाओवसोभिता दिव्वा पाउससिरी विउव्विया, तं विणेउ णं मम चुल्लमाउया धारिणी देवी अकालडोहलं, तते णं से सेणिए राया अभयस्स कुमारस्स अंतिए एतमट्ठं
 सोच्चा णिसम्म हट्टतुट्ठं कोडुंबियपुरिसे सदावेति ता एवं वदासी-खिप्पामेव भो देवाणुप्पिया ! रायगिहं नयरं सिंघाडगतियचउक्कचच्चर० आसित्तसित्त जाव सुगंधवरगंधियं गंधव-
 ट्ठिभूयं करेह य ता मम एतमाणत्तियं पच्चप्पिण्ह, तते णं ते कोडुंबियपुरिसा जाव पच्चप्पिणंति, तते णं से सेणिए राया दोच्चं पि कोडुंबियपुरिसे एवं वदासी-खिप्पामेव भो देवाणुप्पिया !
 हयगयरहजोहपवरकलितं चाउरंगिणिं सेन्नं सन्नाहेह सेयणयं च गंधहत्थिं परिकप्पेह, तेवि तहेव जाव पच्चप्पिणंति, तते णं से सेणिए राया जेणेव धारिणीदेवी तेणामेव उवागच्छति
 ता धारिणीं देवीं एवं वदासी-एवं खलु देवाणुप्पिए ! सगज्जिया जाव पाउससिरी पाउब्भूता तणं तुमं देवाणुप्पिए ! एयं अकालडोहलं विणेहि, तते णं सा धारिणीदेवी सेणिएणं रक्षा
 एवं वुत्ता समाणी हट्टतुट्ठा जेणामेव मज्जणघरे तेणेव उवागच्छति ता मज्जणघरं अणुपविसति ता अंतो अंतोउरंसि ण्हाता कतबलिकम्मा कतकोउयमंगलपायच्छित्ता, किं ते ? वरपा-
 यपत्तणेउर जाव आगासफालियसमप्पभं अंसुयं नियत्था सेयणयं गंधहत्थिं दूरूढा समाणी अमयमहियफेणपुंजसण्णिगासाहिं सेयचामरवालवीयणीहिं वीइज्जमाणी २ संपत्थिता,
 तते णं से सेणिए राया ण्हाए कयबलिकम्मे जाव सस्सिरीए हत्थिखंधवरगए सकोरंटमल्लदामेणं छत्तेणं धरिज्जमाणेणं चउचामराहिं वीइज्जमाणेणं धारिणीदेवीं पिट्ठतो अणुगच्छति,
 तते णं सा धारिणीदेवी सेणिएणं रन्ना हत्थिखंधवरगएणं पिट्ठतो पिट्ठतो समणुगम्ममाणमग्गा हयगयरहजोहकलियाए चाउरंगिणीए सेणाए सद्धिं संपरिवुडा भडचडगरवंदपरि-
 खित्ता सव्विड्ढीए सव्वजुईए जाव दुंदुभिनिग्घोसनादितरवेणं रायगिहे नगरे सिंघाडगतिगचउक्कचच्चर जाव महापहेसु नागरजणेणं अभिनंदिज्जमाणा २ जेणामेव वेभारगिरिप-
 व्वए तेणामेव उवागच्छति ता वेभारगिरिकडगतडपायमूले आरामेसु य उज्जाणेसु य काणणेसु य वणेसु य वणसंडेसु य रुक्खेसु य गुच्छेसु य गुम्मेसु य लयासु य वल्लीसु य कंदरासु
 य दरीसु य चुण्ढीसु य जू(द पा०)हेसु य कच्छेसु य नदीसु य संगमेसु य विवरतेसु य अच्छमाणी य पेच्छमाणी य मज्जमाणी य पत्ताणि य पुप्फाणि य फलाणि य पल्लवाणि य गिण्ह-
 माणी य माणेमाणी य अग्घायमाणी य परिभुंजमाणी य परिभाएमाणी य वेभारगिरिपायमूले दोहलं विणेमाणी सव्वतो समंता आहिंइति, तते णं धारिणी देवी विणीतदोहला संपुञ्ज-
 दोहला संपन्नडोहला जाया यावि होत्था, तते णं सा धारिणीदेवी सेयणयगंधहत्थिं दूरूढा समाणी सेणिएणं हत्थिखंधवरगएणं पिट्ठओ २ समणुगम्ममाणमग्गा हयगय जाव रहेणं
 जेणेव रायगिहे नगरे तेणेव उवागच्छइ ता रायगिहं नगरं मज्झंमज्झेणं जेणामेव सए भवणे तेणामेव उवागच्छति ता विउलाइं माणुस्साइं भोगभोगाइं जाव विहरति । १७। तते णं से
 अभए कुमारे जेणामेव पोसहसाला तेणामेव उवागच्छइ ता पुव्वसंगतियं देवं सक्कारेइ सम्माणेइ ता पडिविसज्जेति ता, तते णं से देवे सगज्जियं पंचवन्नं मेहोवसोहियं दिव्वं पाउससिरीं
 पडिसाहरति ता जामेव दिसिं पाउब्भूए तामेव दिसिं पडिगते । १८। तते णं सा धारिणीदेवी तंसि अकालडोहलंसि विणीयंसि सम्माणियडोहला तस्स गब्भस्स अणुकंपणट्ठाए जयं
 चिट्ठति जयं आसयति जयं सुवति आहारंपि य णं आहारेमाणी णाइतित्तं णातिकडुयं णातिकसायं णातिअंबिलं णातिमहुरं जं तस्स गब्भस्स हियं मियं पत्थयं देसे य काले य आहारं

आहरेमाणी णाइचिन्तं णाइसोगं णाइदेणं णाइमोहं णाइभयं णाइपरितासं (प्र० ववगयचित्तसोयमोहभयं उदुभयमाणपरितोसा सुहेहिं) भोयणच्छायणगंधमल्लालंकारेहिं तं गन्धं सुहंसुहेणं परिवहति । १९। तते णं सा धारिणीदेवी नवण्हं मासाणं बहुपडिपुच्चाणं अद्धट्टमाण रातिंदियाणं वीतिकंताणं अद्धरत्तकालसमयंसि सुकुमालपाणिपादं जाव सव्वंगसु-
दरंगं दारगं पयाया, तए णं ताओ अंगपडियारिआओ धारिणीं देवीं नवण्हं मासाणं जाव दारगं पयायं पासन्ति ता सिग्घं तुरियं चवलं वेतियं जेणेव सेणिए राया तेणेव उवागच्छंति ता सेणियं रायं जएणं विजएणं वद्धावेति ता करयलपरिग्गहियं सिरसावत्तं मत्थए अंजलिं कट्टु एवं वदासी-एवं खलु देवाणुप्पिया ! धारिणीदेवी नवण्हं मासाणं जाव दारगं पयाया तन्नं अम्हे देवाणुप्पियाणं पियं णिवेदेमो पियं भे भवउ, तते णं से सेणिए राया तासिं अंगपडियारियाणं अंतिए एयमट्टं सोच्चा णिमम्म हट्टुतुट्ट० ताओ अंगपडियारियाओ महुरेहिं वयणेहिं विपुलेण य पुप्फगंधमल्लालंकारेणं सक्कारेति सम्माणेति ता मत्थधोयाओ करेति पुत्ताणुपुत्तियं वित्तिं कप्पेति ता पडिविसज्जेति, तते णं से सेणिए राया कोडुंबियपुरिसे सदा-
वेति ता एवं वदासी-खिप्पामेव भो देवाणुप्पिया ! रायगिहं नगरं आसिय जाव परिगयं करेह ता चारगपरिसोहणं करेह ता माणुम्माणवद्धणं करेह ता एतमाणत्तियं पच्चप्पिणह जाव पच्चप्पिणंति, तते णं से सेणिए राया अट्टारस सेणीप्पसेणीओ सदावेति ता एवं वदासी-गच्छह णं तुम्भे देवाणुप्पिया ! रायगिहे नगरे अन्धितरबाहिरिए उस्सुकं उक्करं अभडप्पवेसं अदंडिमकुडंडिमं अधरिमं आधारणिज्जं अणुदधुयमुड्ढं अमिलाय(प्र० अव्वाय०)मल्लदामं गणियावरणाडइज्जकलियं अणेगतालायराणुचरितं पमुडयपक्कालियाभिरामं जहारिहं (दसदिवसियं पा०) करेह ता एयमाणत्तियं पच्चप्पिणह, तेवि करिंति ता तहेव पच्चप्पिणंति, तए णं से सेणिए राया बाहिरियाए उवट्टाणसालाए सीहासणवग्गए पुरत्थाभिमुहे सन्नि-
सन्ने मइएहि य साहस्सिएहि य सयसाहस्सेहि य जाएहिं दाएहिं भागेहिं दलयमाणे २ पडिच्छेमाणे २ एवं च णं विहरति, तते णं तस्स अम्मापियरो पढमे दिवसे जातकम्मं करेति ता चितियदिवसे जागरियं करेति ता ततिए दिवसे चंदसूरदंसणियं करेति ता एवामेव निव्वत्ते असुइजातकम्मकरणे संपत्ते बारसाहदिवसे विपुलं असणं पाणं खातिमं सातिमं उवक्ख-
डावेति ता मित्तणातिणियगमयणसंबंधिपरिजणं बलं च बहवे गणणायगदंडणायग जाव आमन्तेति ततो पच्छा ण्हाता कयबलिकम्मा कयकोउय जाव सव्वालंकारविभूसिया महति-
महालयंमि भोयणमंडवंमि तं विपुलं असणं पाणं खाइमं सातिमं मित्तनातिगणणायग जाव सद्धिं आसाएमाणा विसाएमाणा परिभाएमाणा परिभुंजेमाणा एवं च णं विहरंति जिमितभुत्तुतगगतावि य णं समाणा आयंता चोक्खा परमसुइभूया तं मित्तनातिनियगसयणसंबंधिपरितणगणणायग० विपुलेणं पुप्फवत्थगंधमल्लालंकारेणं सक्कारेति सम्माणेति ता एवं वदासी-जम्हा णं अम्हं इमस्स दारगस्स गन्धमत्थस्स चेव समाणस्स अकालमेहेसु डोहले पाउब्भूते तं होउ णं अम्हं दारए मेहे नामेणं मेहकुमारे, तस्स दारगस्स अम्मापियरो अयमेयारूवं गोणं गुणनिप्फन्नं नामधेज्जं करेति (प्र० मेहाति), तते णं से मेहकुमारे पंचधातीपरिग्गहिए, तं०-खीरधातीए मंडणधातीए मज्जणधातीए कीलावणधातीए अंकधातीए अन्नाहि य बहूहिं खुज्जाहिं चिलाइयाहिं वामणिवडभिब्वरिबउसिजोणियपल्हविणइमिणियाचाधोरुगिणिलासियलउसियदमित्तिसिंहल्लिआरविपुल्लिदिपक्कणिबहल्लिमरुंडिसवरिपार-
सीहिं णाणादेसीहिं विदेसपरिमंडियाहिं इंगितचितियपत्थियवियाणियाहिं सदेसणेवत्थगहितवेसाहिं निउणकुसलाहिं विणीयाहिं चेडियाचक्कवालवरिसधरकंचुइअमहयरगवंदपरिखित्ते हत्थाओ हत्थं मंहरिज्जमाणे अंकाओ अंकं परिभुज्जमाणे परिगिज्जमाणे चालिज्जमाणे (उवणच्चिज्जमाणे २ उवगाइज्जमाणे २ पा०) उवत्तालिज्जमाणे २ (अवगूहिज्जमाणे २ पा०) रम्मंसि मणिकोट्टिमतलंसि परिमिज्जमाणे २ णिव्वायणिव्वाघायंसि गिरिकंदरमल्लीणेव चंपगपायवे सुहंसुहेणं वड्डइ, तते णं तस्स मेहस्स कुमारस्स अम्मापियरो अणुपुव्वेणं नाम-
करणं च पजेमणं च पचंकम्मणगं चोलोवणयं महता महया इड्ढीसक्कारममुदएणं करिंसु, तते णं ते मेहकुमारं अम्मापियरो सातिरेगट्टवासजातगं चेव गन्धट्टमे वासे सोहणंसि तिहिकरणमुहुत्तंसि कलायरियस्स उवणेति, तते णं से कलायरिए मेहं कुमारं लेहाइयाओ गणितप्पहाणाओ सउणरुतपज्जवसाणाओ बावत्तरिं कलाओ सुत्तओ य अत्थओ य करणओ य सेहावेति सिक्खावेति तं०-लेहं गणियं रूवं नट्टं गीयं वाइयं सर(ग)यं पोक्खरगयं समतालं जूयं १० जणवायं पासयं अट्टावयं पोरेकच्चं दगमट्टियं अन्नविहिं पाणविहिं वत्थविहिं विले-
वणविहिं सयणविहिं २० अज्जं (प्र० मज्जं) पहेलियं मागहियं गाहं गीइयं सिलोयं हिरण्णजुत्तिं सुवन्नजुत्तिं चुन्नजुत्तिं आभरणविहिं ३० तरुणीपडिकम्मं इत्थिलक्खणं पुरिसलक्खणं हयलक्खणं गयलक्खणं गोणलक्खणं कुकुडलक्खणं छत्तलक्खणं डंडलक्खणं असिलक्खणं ४० मणिलक्खणं कागणिलक्खणं वत्थुविज्जं खंधारमाणं नगरमाणं वूहं परिवूहं चारं परि-
चारं चक्कवूहं ५० गरुलवूहं सगडवूहं जुद्धं निजुद्धं जुद्धातिजुद्धं अट्टियुद्धं मुट्टियुद्धं बाहुयुद्धं लयाजुद्धं ईसत्थं ६० छरुप्पवायं धणुव्वेयं हिरन्नपागं सुवन्नपागं सुत्तखेडं वट्टखेडं नालियाखेडं पत्तच्छेज्जं सजीवं ७० निज्जीवं सऊणरुयमिति । २०। तते णं से कलायरिए मेहं कुमारं लेहादीयाओ गणियप्पहाणाओ सउणरुयपज्जवसाणाओ बावत्तरिं कलाओ सुत्तओ य अत्थओ

४११ ज्ञातधर्मकथांगं, - अ० २१२/०१-१

य करणओ य सेहावेति सिक्खावेइ सेहावेत्ता सिक्खावेत्ता अम्मापिऊणं उवणेति, तते णं मेहस्स कुमारस्स अम्मापितरो तं कलायरियं मधुरेहिं वयणेहिं विपुलेणं वत्थगंधमल्लालंकारेणं सक्कारेति सम्माणेति ता विपुलं जीवियारिहं पीइदाणं दलयंति ता पडिविसज्जेति । २१ । तते णं से मेहे कुमारे बावत्तरिकलापंडिए णवंगसुत्तपडिबोहिए अट्टारसविहिप्पगारदेसीभासावि-सारए गीइरई गंधव्वनट्टकुसले हयजोही गयजोही रहजोही बाहुजोही बाहुप्पमही अलं भोगसमत्थे साहसिए वियालचारी जाते यावि होत्था, तते णं तस्स मेहकुमारस्स अम्मापियरो मेहं कुमारं बावत्तरिकलापंडितं जाव वियालचारीजायं पासंति ता अट्ट पासातवडिसए करेति अब्भुग्गयमूसियपहसिए विव मणिकणगरयणभत्तिचित्ते वाउद्धूतविजयवेजयंतीप-डागाछत्ताइच्छत्तकलिए तुंगे गगणतलमभिलंघमाणसिहरे जालंतररयणपंजरुम्मिल्लियव्व मणिकणगथूभियाए वियसितसयपत्तपुंडरीए तिलयरयणद्वचंदच्चिए नानामणिमयदामा-लंकिते अंतो बहिं च सण्हे तवणिजरुइलवालुयापत्थरे सुहफासे सस्सिरीयरूवे पासादीए जाव पडिरूवे, एगं च णं महं भवणं करेति अणेगखंभसयसभिविट्ठं लीलट्टियसालभंजियागं अब्भुग्गयसुकयवइरवेतियातोरणवररइयसालभंजियासुसिलिट्टिविसिट्टलट्टसंठितपसत्थवेरुलियखंभनाणामणिकणगरयणखचितउज्जलं बहुसमसुविभत्तनिचियरमणिजभूमिभागं ईहा-मियजावभत्तिचित्तं खंभुग्गयवयरवेइयापरिगयाभिरामं विज्जाहरजमलजुयलजंतजुत्तंपिव अच्चीसहस्समालणीयं रूवगसहस्सकलियं भिसमाणं भिब्भिसमाणं चक्खुल्लोयणलेसं सुह-फासं सस्सिरीयरूवं कंचणमणिरयणथूभियागं नाणाविहपंचवन्नघंटापडागपरिमंडियग्गसिहरं धवलमरीचिकवयं विणिम्मयुतं लाउल्लोइयमहियं जाव गंधवट्टिभूयं पासादीयं दरिसणिज्जं अभिरूवं पडिरूवं । २२ । तते णं तस्स मेहकुमारस्स अम्मापियरो मेहं कुमारं सोहणंसि तिहिकरणनक्खत्तमुहुत्तंसि सरिसियाणं सरिसव्वयाणं सरित्तयाणं सरिसलावन्नरूवजोव्वण-गुणोव्वेयाणं सरिसएहिंतो रायकुलेहिंतो आणिल्लियाणं पसाहणट्टंगअविहवबहुओवयणमंगलसुजंपियाहिं अट्टहिं रायवरकण्णाहिं सद्धिं एगदिवसेणं पाणिं गिण्हाविंसु, तते णं तस्स मेहस्स अम्मापितरो इमं एतारूवं पीतिदाणं दलयइ अट्ट हिरण्णकोडीओ अट्ट सुवण्णकोडीओ गाहाणुसारेण भाणियव्वं जाव पेसणकारियाओ, अन्नं च विपुलं धणकणगरयणमणि-मोत्तियसंखसिलप्पवालरत्तरयणसंतसारसावतेज्जं अलाहि जाव आसत्तमाओ कुलवंसाओ पकामं दाउं पकामं भोत्तुं पकामं परिभाएउं, तते णं से मेहे कुमारे एगमेगाए भारियाए एगमेगं हिरण्णकोडिं दलयति एगमेगं सुवन्नकोडिं दलयति जाव एगमेगं पेसणकारिं दलयति, अन्नं च विपुलं धणकणग जाव परिभाएउं दलयति, तते णं से मेहे कुमारे उप्पि पासातवरगते फुट्टमाणेहिं मुइंगमत्थएहिं वरतरुणिसंपउत्तेहिं बत्तीसइवट्टएहिं नाडएहिं उवगिजमाणे २ उवलालिज्जमाणे २ सदफरिसरसरूवगंधविउले माणुस्सए कामभोगे पच्चणु-भवमाणे विहरति । २३ । तेणं कालेणं० समणे भगवं महावीरे पुव्वाणुपुव्विं चरमाणे गामाणुगामं दूइज्जमाणे सुहंसुहेणं विहरमाणे जेणामेव रायगिहे नगरे गुणसिलए चेतिए जाव विहरति, तते णं रायगिहे नगरे सिंघाडग० महया बहुजणसदेति वा जाव बहवे उग्गा भोगा जाव रायगिहस्स नगरस्स मज्झंमज्झेणं एगदिसिं एगाभिमुहा निग्गच्छंति इमे य णं मेहे कुमारे उप्पि पासातवरगते फुट्टमाणेहिं मुयंगमत्थएहिं जाव माणुस्सए कामभोगे पुजमाणे रायमग्गं च ओलोएमाणे २ एवं च णं विहरति, तए णं से मेहे कुमारे ते बहवे उग्गे भोगे जाव एगदिसाभिमुहे निग्गच्छमाणे पासति ता कंचुइज्जपुरिसं सदावेति ता एवं वदासी-किन्नं भो देवाणुप्पिया ! अज्ज रायगिहे नगरे इंदमहेति वा खंदमहेति वा एवं रुइसि-व्वेसमणनागजक्खभूयनईतलायरूक्खचेतियपव्वयउज्जाणगिरिजत्ताइ वा जओ णं बहवे उग्गा भोगा जाव एगदिसिं एगाभिमुहा निग्गच्छंति, तते णं से कंचुइज्जपुरिसे समणस्स भग-वओ महावीरस्स गहियागमणपवत्तीए मेहं कुमारं एवं वदासी-नो खलु देवाणुप्पिया ! अज्ज रायगिहे नगरे इंदमहेति वा जाव गिरिजत्ताओ वा जन्नं एए उग्गा जाव एगदिसिं एगा-भिमुहा निग्गच्छन्ति, एवं खलु देवाणुप्पिया ! समणे भगवं महावीरे आइकरे तित्थकरे० इहमागते इह संपत्ते इह समोसटे इह चेव रायगिहे नगरे गुणसिलए चेइए अहापडि जाव विहरति । २४ । तते णं से मेहे कंचुइज्जपुरिसस्स० एतमट्टं सोच्चा णिसम्म हट्टतुट्टे कोडुंबियपुरिसे सदावेति ता एवं वदासी-खिप्पामेव भो देवाणुप्पिया ! चाउघंटं आसरहं जुत्तामेव उवट्ट-वेह, तहत्ति उवणेंति, तते णं से मेहे ण्हाते जाव सव्वालंकारविभूसिए चाउघंटं आसरहं दूरूढे समाणे सकोरंटमल्लुदामेणं छत्तेणं धरिजमाणेणं महया भडचडगरविंदपरियालसंपरिवुडे रायगिहस्स नगरस्स मज्झंमज्झेणं निग्गच्छति ता जेणामेव गुणसिलए चेतिए तेणामेव उवागच्छति ता समणस्स भगवओ महावीरस्स छत्तातिच्छत्तं पडागातिपडागं विज्जाहरचारणे जंभए य देवे ओवयमाणे उप्पयमाणे पासति ता चाउघंटाओ आसरहाओ पच्चोरुहति ता समणं भगवं महावीरं पंचविहेणं अभिगमेणं अभिगच्छति, तं०-सचित्ताणं दव्वाणं विउ(ओ पा०)सरणयाए अचित्ताणं दव्वाणं अविउसरणयाए एगसाडियउत्तरासंगकरणेणं चक्खुफासे अंजलिपग्गहेणं मणसो एगत्तीकरणेणं (एगत्तीभावेणं पा०), जेणामेव समणे भ० महावीरे तेणामेव उवागच्छति ता समणं ३ तिक्खुत्तो आदाहिणं पदाहिणं करेति ता वंदति णमंसइ ता समणस्स ३ णच्चासन्ने नातिदूरे सुस्ससमाणे नमंसमाणे अंजलियउडे अभिमुहे विणएणं पज्जुवासति, तए णं समणे ३ मेहकुमारस्स तीसे य महतिमहालियाए परिसाए मज्झगए विचित्तं धम्ममातिक्खति जहा जीवा बज्झंति मुच्चंति जह य संकिलिस्संति (१०३)

धम्मकहा भाणियव्वा जाव परिसा पडिगया । २५ । तते णं से मेहे कुमारे समणस्स भगवओ महावीरस्स अंतिए धम्मं सोच्चा णिसम्मं हट्टतुट्टे समणं भगवं महावीरं तिक्खुत्तो आदा-
हिणं पदाहिणं करेति ता वंदति नमंसइ ता एवं वदासी-सदहामि णं भंते ! णिग्गंथं पावयणं एवं पत्तियामि णं० रोएमि णं० अब्भुट्टेमि णं भंते ! निग्गंथं पावयणं एवमेयं भंते ! तहमेयं
अवितहमेयं इच्छितमेयं पडिच्छियमेयं भंते ! इच्छितपडिच्छियमेयं भंते ! से जहेव तं तुब्भे वदह जं नवरं देवाणुप्पिया ! अम्मापियरो आपुच्छामि तओ पच्छा मुंडे भवित्ताणं पव्वइ-
स्सामि, अहासुहं देवाणुप्पिया ! मा पडिबंधं करेह, तते णं से मेहे कुमारे समणं ३ वंदति नमंसति ता जेणामेव चाउग्घंटे आसरहे तेणामेव उवागच्छति ता चाउग्घंटे आसरहं दूरूहति
ता महया भडचडगरपहकरणं रायगिहस्स नगरस्स मज्झंमज्झेणं जेणामेव सए भवणे तेणामेव उवागच्छति ता चाउग्घंटाओ आसरहाओ पच्चोरूहति ता जेणामेव अम्मापियरो
तेणामेव उवागच्छति ता अम्मापिऊणं पायवडणं करेति ता एवं वदासी-एवं खलु अम्मयाओ ! मए समणस्स भगवतो महावीरस्स अंतिए धम्मं णिसंते सेवि य मे धम्मं इच्छिते
पडिच्छिते अभिरुइए, तते णं तस्स मेहस्स अम्मापियरो एवं वदासी-धन्ने सि तुमं जाया ! सपुत्तो० कयत्थो० कयलक्खणो सि तुमं जाया ! जन्नं तुमे समणस्स ३ अंतिए धम्मं णिसंते
सेवि य ते धम्मं इच्छिते पडिच्छिते अभिरुइए, तते णं से मेहे कुमारे अम्मापियरो दोच्चं पि तच्चं पि एवं वदासी-एवं खलु अम्मयाओ ! मए समणस्स ३ अंतिए धम्मं निसंते सेवि य
मे धम्मं० इच्छियपडिच्छिए अभिरुइए तं इच्छामि णं अम्मयाओ ! तुब्भेहिं अब्भणुन्नाए समाणे समणस्स भगवतो महावीरस्स अंतिए मुंडे भवित्ताणं आगारातो अणगारियं
पव्वइत्तए, तते णं सा धारिणी देवी तमणिट्ठं अकंतं अप्पियं अमणुन्नं अमणामं असुयपुव्वं फरुसं गिरं सोच्चा णिसम्म इमेणं एतारूवेणं मणोमाणसिएणं महया पुत्तदुक्खेणं अभि-
भूता समाणी सेयागयरोमकूवपगलंतविलीणगाया सोयभरपवेवियंगी णित्तेया दीणविमणवयणा करयलमलियव्व कमलमाला तक्खणओलुग्गदुब्बलसरीरा लावन्नसुन्ननिच्छायगय-
सिरीया पसिढिलभूसणपंडतखुम्मियसंचुन्नियधवलवलयपब्भट्टउत्तरिज्जा सूमालविकिन्नकेसहत्था मुच्छावसणट्टचेयगरुई परसुनियत्तव्व चंपकलया निव्वत्तमहिमव्व इंदलट्ठी विमुक्क-
संधिबंधणा कोट्टिमतलंसि सव्वंगेहिं धसत्ति पडिया, तते णं सा धारिणी देवी ससंभमोवत्तियाए तुरियं कंचणभिंंगारमुहविणिग्गयसीयलजलविमलधाराए परिसिंचमाणा निव्वावि-
यगायलट्ठी उक्खेवणतालवंटवीयणगजणियवाएणं सफुसिएणं अंतेउरपरिजणेणं आसासिया समाणी मुत्तावलिसन्निगासपवडंतअंसुधाराहिं सिंचमाणी पओहरे कलुणविमणदीणा
रोयमाणी कंदमाणी तिप्पमाणी सोयमाणी विलवमाणी मेहं कुमारं एवं वयासी- । २६ । तुमं सि णं जाया ! अम्हं एगे पुत्ते इट्ठे कंते पिए मणुब्भे मणामे थेज्जे वेसासिए सम्मए बहुमए
अणुमए भंडकरंडगसमाणे रयणे रयणभूते जीवियउस्सासय (इए पा०) हिययाणंदजणणे उंबरपुप्फं व दुल्लभे सवणयाए किमंग पुण पासणयाए ? णो खलु जाया ! अम्हे इच्छामो
खणमवि विप्पओगं सहित्तते तं भुंजाहि ताव जाया ! विपुले माणुस्सए कामभोगे जावताव वयं जीवामो तओ पच्छा अम्हेहिं कालगतेहिं परिणयवए वडिढयकुलवंसतंतुकज्जंमि निरा-
वयक्खे समणस्स भगवओ महावीरस्स अंतिए मुंडे भवित्ता आगारातो अणगारियं पव्वइस्ससि । तते णं से मेहे कुमारे अम्मापिऊहिं एवं वुत्ते समाणे अम्मापियरो एवं वदासी-तहेव
णं तं अम्म(प्र० म्मो) तायौ ! जहेव णं तुम्हे ममं एवं वदह तुमं सि णं जाया ! अम्हं एगे पुत्ते तं चेव जाव निरावयक्खे समणस्स ३ जाव पव्वइस्ससि, एवं खलु अम्मयाओ ! माणु-
स्सए भवे अधुवे अणियए असासए वसणसउवदवाभिभूते विज्जुलयाचंचले अणिच्चे जलबुब्बुयसमाणे कुसग्गजलबिंदुसन्निभे संझब्भरागसरिसे सुविणदंसणोवमे सडणपडणविद्धंसण-
धम्मं पच्छा पुरं च णं अवस्स विप्पजहणिज्जे से केणं जाणति अम्मयाओ ! के पुव्वि गमणाए के पच्छा गमणाए ?, तं इच्छामि णं अम्मयाओ ! तुब्भेहिं अब्भणुन्नाते समाणे समणस्स
भगवतो० जाव पव्वत्तिए, तते णं तं मेहं कुमारं अम्मापियरो एवं वदासी-इमातो ते जाया ! सरिसियाओ सरिसत्तयाओ सरिसव्वयाओ सरिसलावन्नरूवजोव्वणगुणोववेयाओ सरि-
सेहिंतो रायकुलेहिंतो आणियल्लियाओ भारियाओ, तं भुंजाहि णं जाया ! एताहिं सद्धिं विपुले माणुस्सए कामभोगे तओ पच्छा भुत्तभोगे समणस्स ३ जाव पव्वइस्ससि, तते णं से
कुमारे अम्मापितरं एवं वदासी-तहेव णं अम्मयाओ ! जन्नं तुब्भे ममं एवं वदह-इमाओ ते जाया ! सरिसियाओ जाव समणस्स० पव्वइस्ससि, एवं खलु अम्मयाओ ! माणुस्सगा
कामभोगा असुई असासया वंतासवा पित्तासवा खेलासवा सुक्कासवा सोणियासवा दुरुस्सासनीसासा दुरूयमुत्तपुरिसपूयबहुपडिपुच्चा उच्चारपासवणखेलजल्लसिंघाणगवंतपित्तसुक्कसो-
णितसंभवा अधुवा अणितिया असासया सडणपडणविद्धंसणधम्मा पच्छा पुरं च णं अवस्स विप्पजहणिज्जा, से के णं अम्मयाओ ! जाणंति के पुव्वि गमणाए के पच्छा गमणाए ?, तं
इच्छामि णं अम्मयाओ ! जाव पव्वत्तिए, तते णं तं मेहं कुमारं अम्मापितरो एवं वदासी-इमे ते जाया ! अज्जयपज्जययपिउपज्जयागए सुबहु हिरन्ने य सुवण्णे य कंसे य दूसे य
मणिमोत्तिए य संखसिलप्पवालरत्तरयणसंतसारसावतिज्जे य अलाहि जाव आसत्तमाओ कुलवंसाओ पगामं दाउं पगामं भोत्तुं पकामं परिभाएउं तं अणुहोहि तावजाव जाया ! विपुलं

माणुस्सगं इडिढसक्कारसमुदयं तओ पच्छा अणुभूयकल्लाणे समणस्स भगवओ महावीरस्स अंतिए पव्वइस्ससि, तते णं से मेहे कुमारे अम्मापियरं एवं वदासी-तहेव णं अम्मयाओ ! जण्णं तं वदह इमे ते जाया ! अज्जगपज्जगपि० जाव तओ पच्छा अणुभूयकल्लाणे पव्वइस्ससि, एवं खलु अम्मयाओ ! हिरन्ने य सुवण्णे य जाव सावतेज्जे अग्गिसाहिए चोरसाहिए रायसाहिए दाइयसाहिए मच्चुसाहिए अग्गिसामन्ने जाव मच्चुसामन्ने सडणपडणविद्धंसणधम्मो पच्छा पुरं च णं अवस्स विप्पजहणिज्जे से के णं जाणइ अम्मयाओ ! के जाव गमणाए तं इच्छामि णं जाव पव्वतित्तए, तते णं तस्स मेहस्स कुमारस्स अम्मापियरो जाहे नो संचाएइ मेहं कुमारं बहूहिं विसयाणुलोमाहिं आघवणाहि य पण्णवणाहि य सन्नवणाहि य वि-
 न्नवणाहि य आघवित्तए वा पन्नवित्तए वा सन्नवित्तए वा विन्नवित्तए वा ताहे विसयपडिकूलाहिं संजमभउव्वेयकारियाहिं पन्नवणाहिं पन्नवेमाणा एवं वदासी-एस णं जाया निग्गंथे पावयणे सच्चे अणुत्तरे केवलिए पडिपुन्ने नेयाउए संसुद्धे सल्लगतत्ते सिद्धिमग्गे मुत्तिमग्गे निज्जाणमग्गे निव्वाणमग्गे सव्वदुक्खप्पहीणमग्गे अहीव एगंतदिट्ठीए खुरो इव एग(गंत-
 पा०)धाराए लोहमया इव जवा चावेयव्वा वालुयाकवले इव निरस्साए गंगा इव महानदी पडिसोयगमणाए महासमुद्धो इव भुयाहिं दुत्तरे तिक्खं चंकमियव्वं गरुअं लंबेयव्वं असि-
 धारव्व सं(प्र० रावयं)चरियव्वं, णो य खलु कप्पति जाया ! समणाणं निग्गंथाणं आहाकम्मिए वा उदेसिए वा कीयगडे वा ठवियए वा रइयए वा दुब्भिक्खभत्ते वा कंतारभत्ते वा वदलियाभत्ते वा गिलाणभत्ते वा मूलभोयणे वा कंदभोयणे वा फलभोयणे वा बीयभोयणे वा हरियभोयणे वा भोत्तए वा पायए वा, तुमं च णं जाया ! सुहसमुचिए णो चेव णं दुहस-
 मुचिए णालं सीयं णालं उण्हं णालं खुहं णालं पिवासं णालं वाइयपित्तियसिंभियसन्निवाइयविविहे रोगायंके उच्चावए गामकंटए बावीसं परीसहोवसग्गे उदिन्ने सम्मं अहियासित्तए, तं भुंजाहि ताव जाया ! माणुस्सए कामभोगे ततो पच्छा भुत्तभोगी समणस्स ३ जाव पव्वतिस्ससि, तते णं से मेहे कुमारे अम्मापिऊहिं एवं वुत्ते समाणे अम्मापितरं एवं वदासी-तहेव
 णं तं अम्मयाओ ! जन्नं तुब्भे ममं एवं वदह एस णं जाया ! निग्गंथे पावयणे सच्चे अणुत्तरे० पुणरवि तं चेव जाव तओ पच्छा भुत्तभोगी समणस्स ३ जाव पव्वइस्ससि, एवं खलु अम्मयाओ ! निग्गंथे पावयणे कीवाणं कायराणं कापुरिसाणं इहलोगपडिबद्धाणं परलोगनिप्पिवासाणं दुरणुचरे पाययजणस्स णो चेव णं धीरस्स निच्छियस्स (च्छया) ववसियस्स
 एत्थं किं दुक्करं करणयाए ?, तं इच्छामि णं अम्मयाओ ! तुब्भेहिं अब्भणुन्नाए समाणे समणस्स भगवओ० जाव पव्वइत्तए । २७। तते णं तं मेहं कुमारं अम्मापियरो जाहे नो संचाइंति बहूहिं विसयाणुलोमाहि य विसयपडिकूलाहि य आघवणाहि य पन्नवणाहि य सन्नवणाहि य विन्नवणाहि य आघवित्तए वा पन्नवित्तए वा सन्नवित्तए वा विन्नवित्तए
 वा ताहे अकामगाइं चेव मेहं कुमारं एवं वदासी-इच्छामो ताव जाया ! एगदिवसमवि ते रायसिरिं पासित्तए, तते णं से मेहे कुमारे अम्मापितरमणुवत्तमाणे तुसिणीए संचिद्धति, तते
 णं से सेणिए राया कोडुंबियपुरिसे सदावेति त्ता एवं वदासी-खिप्पामेव भो देवाणुप्पिया ! मेहस्स कुमारस्स महत्थं महग्घं महरिहं विउलं रायाभिसेयं उवट्ठवेह, तते णं ते कोडुंबियपु-
 रिसा जाव तेवि तहेव उवट्ठवेति, तते णं से सेणिए राया बहूहिं गणणायगदंडणायगेहि य जाव संपरिवुडे मेहं कुमारं अट्ठसएणं सोवन्नियाणं कलसाणं एवं रूपमयाणं कलसाणं सुव-
 न्नरूपमयाणं कलसाणं मणिमयाणं कलसाणं सुवन्नमणिमयाणं० रूपमणिमयाणं० सुवन्नरूपमणिमयाणं० भोमेज्जाणं० सव्वोदएहिं सव्वमट्ठियाहिं सव्वपुप्फेहिं सव्वगंधेहिं सव्व-
 मल्लेहिं सव्वोसहीहि य सिद्धत्थएहि य सव्विड्ढीए सव्वजुईए सव्वबलेणं जाव दुंदुभिनिग्घोसणादितरवेणं महया २ रायाभिसेएणं अभिसिंचति त्ता करयल जाव कट्ठु एवं वदासी-
 जय जय णंदा ! जय २ भदा ! जय णंदा० भदं ते अजियं जिणेहि जियं पालयाहि जियमज्झे वसाहि अजियं जिणेहि सत्तुपक्खं जियं च पालेहि मित्तपक्खं जाव भरहो इव मणुयाणं
 रायगिहस्स नगरस्स अच्चेसिं च बहूणं गामागरनगरजावसन्निवेसाणं आहेवच्चं जाव विहराहिति कट्ठु जय२सहं पउंजंति, तते णं से मेहे राया जाते महया जाव विहरति, तते णं
 तस्स मेहस्स रन्नो अम्मापितरो एवं वदासी-भण जाया ! किं दलयामो किं पयच्छामो किं वा ते हियइच्छिए सामत्थे (मन्ते) ?, तते णं से मेहे राया अम्मापितरो एवं वदासी-इच्छामि
 णं अम्मयाओ ! कुत्तियावणाओ रयहरणं पडिग्गहं च उवणेह (प्र० आणितं) कासवयं च सदावेह (प्र० सदाविउं) तते णं से सेणिए राया कोडुंबियपुरिसे सदावेति त्ता एवं वदासी-
 गच्छह णं तुब्भे देवाणुप्पिया ! सिरिधरातो तिन्नि सयसहस्सातिं गहाय दोहिं सयसहस्सेहिं कुत्तियावणाओ रयहरणं पडिग्गहं च उवणेह सयसहस्सेणं कासवयं सदावेह, तते णं ते
 कोडुंबियपुरिसा सेणिएणं रन्ना एवं वुत्ता समाणा हट्ठतुट्ठा सिरिधराओ तिन्नि सयसहस्सातिं गहाय कुत्तियावणातो दोहिं सयसहस्सेहिं रयहरणं पडिग्गहं च उवणेति सयसहस्सेणं
 कासवयं सदावेति, तते णं से कासवए तेहिं कोडुंबियपुरिसेहिं सदाविए समाणे हट्ठे जाव हयहियए ण्हाते कतबलिकम्मे कयकोउयमंगलपायच्छित्ते सुद्धप्पावेसातिं वत्थाइं मंगलाइं
 पवरपरिहिए अप्पमहग्घाभरणालंकितसरीरे जेणेव सेणिए राया तेणामेव उवागच्छति त्ता सेणियं रायं करयलमंजलिं कट्ठु एवं वदासी-संदिसह णं देवाणुप्पिया ! जं मए करणिज्जं,

तते णं से सेणिए राया कासवयं एवं वदासी-गच्छाहि णं तुमे देवाणुप्पिया ! सुरभिणा गंधोदएणं णिके हत्थपाए पक्खालेह सेयाए चउप्फालाए पोत्तीए मुहं बंधेत्ता मेहस्स कुमारस्स चउरंगुलवज्जे णिक्खमणपाउग्गे अग्गकेसे कप्पेहि, तते णं से कासवए सेणिएणं रन्ना एवं वुत्ते समाने हट्ट जाव हियए पडिसुणेति ता सुरभिणा गंधोदएणं हत्थपाए पक्खालेति ता सुद्धवत्थेणं मुहं बंधति ता परेणं जत्तेणं मेहस्स कुमारस्स चउरंगुलवज्जे णिक्खमणपाउग्गे अग्गकेसे कप्पति, तते णं तस्स मेहस्स कुमारस्स माया महरिहेणं हंसलक्खणेणं पडसाडएणं अग्गकेसे पडिच्छति ता सुरभिणा गंधोदएणं पक्खालेति ता सरसेणं गोसीसचंदणेणं चच्चाआ दलयति ता सयाए पोतीए बंधेति ता रयणसमुग्गयंसि पक्खिवति ता मंजूसाए पक्खिवति ता हारवारिधारसिंदुवारच्छिन्नमुत्तावलिपगासाइं अंसूइं विणिम्मयमाणी २ रोयमाणी २ कंदमाणी २ विलवमाणी २ एवं वदासी-एस णं अम्हं मेहस्स कुमारस्स अब्भुदएसु य उस्सवेसु य पव्वेसु य तिहीसु य छणेसु य जन्नेसु य पव्वणीसु य अपच्छिमे दरिसणे भविस्सइत्तिकट्टु उस्सीसामूले ठवेति, तते णं तस्स मेहस्स कुमारस्स अम्मापितरो उत्तरावक्कमणं सीहासणं रयावेंति मेहं कुमारं दोच्चंपि तच्चंपि सेयपीयएहिं कलसेहिं ण्हावेंति ता पम्हलसुकुमालाए गंधकासाइयाए गायातिं लूहेति ता सरसेणं गोसीसचंदणेणं गायातिं अणुलिंपति नासानीसासवायवोज्झं जाव हंसलक्खणं पडगसाडगं नियंसेंति ता हारं पिणद्धंति ता अद्धहारं पिणद्धंति ता एगावलिं मुत्तावलिं कणगावलिं रयणावलिं पालंबं पायपलंबं कडगाइं तुडिगाइं केउरातिं अंगयातिं दसमुहियाणंतयं कडिसुत्तयं कुंडलातिं चूडामणिं रयणुक्कडं मउडं पिणद्धंति ता दिव्वं सुमणदामं पिणद्धंति ता दइदुरमलयसुगंधिए गंधे पिणद्धंति, तते णं तं मेहं कुमारं गंठिमवेढिमपूरिमसंघाइमेणं चउव्विहेणं मल्लेणं कप्परुक्खगंपिव अलंकितविभूसियं करेंति, तते णं से सेणिए राया कोडुंबियपुरिसे सदावेति ता एवं वयासी-खिप्पा-मेव भो देवाणुप्पिया ! अणेगखंभसयसन्निविट्ठं लीलट्टियसालभंजियागं ईहामिगउसभतुरयनरमगरविहगवालगकिन्नररुसरभचमरकुंजरवणलयपउमलयभत्तिचित्तं घंटावलिमहुरमणहरसरं सुभकंतदरिसणिज्जं निउणोवियमिसिमिसिंतमणिरयणघंटियाजालपरिखित्तं अब्भुग्गयवइरवेतियापरिगयाभिरामविजाहरजमलजंतजुत्तंपिव अच्चीसहस्समालणीयं रूवगसहस्सकलियं भिसमाणं भिब्भिसमाणं चक्खुलोयणलेस्सं सुहफासं सस्सिरीयरूवं सिग्घं तुरितं चवलं वेतियं पुरिससहस्सवाहिणीं सीयं उवट्टवेह, तते णं ते कोडुंबियपुरिसा हट्टतुट्टा जाव उवट्टवेंति, तते णं से मेहं कुमारे सीयं दूरूहति ता सीहासणवरगए पुरत्थाभिमुहे सन्निसन्ने, तते णं तस्स मेहस्स कुमारस्स माया ण्हाता कयबलिकम्मा जाव अप्पमहग्घाभरणालंकियसरीरा सीयं दूरूहति ता मेहस्स कुमारस्स दाहिणे पासे भद्दासणंसि निसीयति, तते णं तस्स मेहस्स कुमारस्स अंबधाती रयहरणं च पडिग्गहगं च गहाय सीयं दूरूहति ता मेहस्स कुमारस्स वामे पासे भद्दासणंसि निसीयति, तते णं तस्स मेहस्स कुमारस्स पिट्ठतो एगा वरतरुणी सिंगारागारचारूवेसा संगयगयहसियभणियचेट्टियविलाससंलावुल्लावनिउणजुत्तोवयारकुसला आमेलगजमलजुयलवट्टियअब्भुन्नयपीणरतियसंठितपओहरा हिमरययकुंदेदुपगासं सकोरेंटमल्लदामधवलं आयवत्तं गहाय सलीलं ओहारेमाणी २ चिट्ठति, तते णं तस्स मेहस्स कुमारस्स दुवे वरतरुणीओ सिंगारागारचारूवेसाओ जाव कुसलाओ सीयं दूरूहति ता मेहस्स कुमारस्स उभओ पासिं नाणामणिकणगरयणमहरिहतवणिज्जुलविचित्तदंडाओ चिल्लियाओ सुहुमवरदीहवालाओ संखकुंददगरयअमयमहियफेणपुंजसन्निगासाओ चामराओ गहाय सलीलं ओहारेमाणीओ २ चिट्ठति, तते णं तस्स मेहकुमारस्स एगा वरतरुणी सिंगारा जाव कुसला सीयं जाव दूरूहति ता मेहस्स कुमारस्स पुरतो पुरत्थिमेणं चंदप्पभवइरवेरुलियविमलदंडं तालविटं गहाय चिट्ठति, तते णं तस्स मेहस्स कुमारस्स एगा वरतरुणी जाव सुरूवा सीयं दूरूहति ता मेहस्स कुमारस्स पुव्वदक्खिणेणं सेयं रययामयं विमलसलिलपुन्नं मत्तगयमहामुहाकितिसमाणं भिंगारं गहाय चिट्ठति, तते णं तस्स मेहस्स कुमारस्स पिया कोडुंबियपुरिसे सदावेति ता एवं वदासी-खिप्पामेव भो देवाणुप्पिया ! सरिसयाणं सरिसत्तयाणं सरिव्वयाणं एगाभरणगहितनिजोयाणं कोडुंबियवरतरुणाणं सहस्सं सदावेह जाव सदावेंति, तए णं कोडुंबियवरतरुणपुरिसा सेणियस्स रन्नो कोडुंबियपुरिसेहिं सदाविया समाना हट्टा ण्हाया जाव एगाभरणगहितनिजोया जेणामेव सेणिए राया तेणामेव उवागच्छंति ता सेणियं रायं एवं वदासी-संदिसह णं देवाणुप्पिया ! जन्नं अम्हेहिं करणिज्जं, तते णं से सेणिए तं कोडुंबियवरतरुणसहस्सं एवं वदासी-गच्छह णं देवाणुप्पिया ! मेहस्स कुमारस्स पुरिससहस्सवाहिणिं सीयं परिवहेह, तते णं तं कोडुंबियवरतरुणसहस्सं सेणिएणं रन्ना एवं वुत्तं संतं हट्टं तुट्टं तस्स मेहस्स कुमारस्स पुरिससहस्सवाहिणीं सीयं परिवहति, तए णं तस्स मेहस्स कुमारस्स पुरिससहस्सवाहिणिं सीयं दूरूढस्स समणस्स इमे अट्टट्टमंगलया तप्पढमयाए पुरतो अहाणुपुव्वीए संपट्टिया, तं० सोत्थिय-सिरिवच्छणंदियावत्तवद्धमाणगभद्दासणकलसमच्छदप्पणा जाव बहवे अत्थत्थिया जाव ताहिं इट्ठाहिं जाव अणवरयं अभिणंदंता य अभिथुणंता य एवं वदासी-जय २ णंदा ! जय २ णंदा ! जय २ भद्दा ! भद्दं ते अजियाइं जिणाहि इंदियाइं जियं च पालेहि समणधम्मं जियविग्घोऽविय वसाहि तं देव ! सिद्धिमज्जे निहणाहि रागदोसमल्ले तवेणं धितिधणि(बलि-

पा०) यच्चदकच्छे महादि य अट्ट कम्मसत्तु झानेणं उत्तमेणं सुक्केणं अप्पमत्तो पावय वितिमिरमणुत्तरं केवलं नाणं गच्छ य मोक्खं परमपयं सासयं च अयलं हंता परीसहचमुं अभीओ परीसहोवसग्गाणं धम्ममे ते अविग्घं भवउत्तिकट्टु पुणो २ मंगलजय २ सहं पउजंति, तते णं से मेहे कुमारे रायगिहस्स नगरस्स मज्झमज्झेणं निग्गच्छति ता जेणेव गुणसिलए चेति ए तेणामेव उवागच्छति ता पुरिससहस्सवाहिणीओ सीयाओ पच्चोरुभत्ति । २८ । तते णं तस्स मेहस्स कुमारस्स अम्मापियरो मेहं कुमारं पुरओ कट्टु जेणामेव समणे भगवं महावीरे तेणामेव उवागच्छंति ता समणं भगवं महावीरं तिक्खुत्तो आयाहिणं पयाहिणं करेति ता वंदंति नमंसंति ता एवं वदासी-एस णं देवाणुप्पिया मेहे कुमारे अम्हं एगे पुत्ते इट्ठे कंते जाव जीवियाउसासए हिययणंदिजणए उंवरपुप्फंपिव दुल्लहे सवणयाए किमंगं पुण दरिसणयाए ? . से जहा नामए उप्पलेति वा पउमेति वा कुमुदेति वा पंके जाए जले संबड्ढिए नोवल्लिप्पइ जलरएणं नोवल्लिपइ पंकरएण एवामेव मेहे कुमारे कामेसु जाए भोगेसु संवुड्ढे नोवल्लिप्पति कामरएणं नोवल्लिप्पति भोगरएणं, एस णं देवाणुप्पिया ! संसारभउव्विगे भीए जम्मणजरमरणाणं इच्छइ देवाणुप्पियाणं अंतिए मुंडे भवित्ता आगाराओ अणगारियं पव्वत्तिए, अम्हे णं देवाणुप्पियाणं सिस्सभिक्खं दलयामो, पडिच्छंतु णं देवाणुप्पिया ! सिस्सभिक्खं, तते णं से समणे भगवं महावीरे मेहस्स कुमारस्स अम्मापिऊहिं एवं वुत्ते समाणे एयमट्ठं सम्मं पडिसुणेति, तते णं से मेहे कुमारे समणस्स भगवओ महावीरस्स अंति-याओ उत्तरपुरच्छिमं दिसिभागं अवक्कमति ता सयमेव आभरणमल्लालंकारं ओमुयति, तते णं से मेहकुमारस्स माया हंसलक्खणेणं पडसाडएणं आभरणमल्लालंकारं पडिच्छति ता हारवारिधारसिंदुवारल्लिन्नमुत्तावल्लिपगासातिं अंसूणि विणिम्मयमाणी २ रोयमाणी २ कंदमाणी २ विलवमाणी २ एवं वदासी-जतियव्वं जाया ! घडियव्वं जाया ! परक्कमियव्वं जाया ! अस्सि च णं अट्ठे नो पमादेयव्वं अम्हंपि णं एमेव मग्गे भवउत्तिकट्टु मेहस्स कुमारस्स अम्मापियरो समणं भगवं महावीरं वंदंति नमंसंति ता जामेव दिसिं पाउब्भूता तामेव दिसिं पडिगया । २९ । तते णं से मेहे कुमारे सयमेव पंचमुट्ठियं लोयं करेति ता जेणामेव समणे ३ तेणामेव उवागच्छति ता समणं भगवं महावीरं तिक्खुत्तो आयाहिणं पयाहिणं करेति ता वंदंति नमंसंति ता एवं वदासी-आलित्ते णं भंते ! लोए पलित्ते णं भंते ! लोए आलित्तपलित्ते णं भंते ! लोए जराए मरणेण य, से जहाणामए केई गाहावती आगारंसि झियायमा-णंसि जे तत्थ भंडे भवति अप्पभा(सा पा०)रे मोल्लगुरुए तं गहाय आयाए एगंतं अवक्कमति एस मे णित्थारिए समाणे पच्छा पुरा (उरस्स पा०) हियाए सुहाए खमाए णिस्सेसाए आणुगामियत्ताए भविस्सति एवामेव ममवि एगे आयाभंडे इट्ठे कंते पिए मणुत्ते मणामे एस मे नित्थारिए समाणे संसारवोच्छेयकरे भविस्सति तं इच्छामि णं देवाणुप्पियाहिं सय-मेव पव्वादियं सयमेव मुंडावियं सेहावियं सिक्खावियं सयमेव आयारगोयरविणयवेणइयचरणकरणजायामायावत्तियं धम्ममाइक्खियं, तते णं समणे भगवं महावीरे मेहं कुमारं सयमेव पव्वावेति सयमेव आयारजाव धम्ममातिकखइ-एवं देवाणुप्पिया ! गंतव्वं चिट्ठितव्वं णिसीयव्वं तुयट्ठियव्वं भुंजियव्वं भासियव्वं एवं उट्ठाए उट्ठाय पाणेहिं भूतेहिं जीवेहिं सत्तेहिं संजमेणं संजमितव्वं अस्सि च णं अट्ठे णो पमादेयव्वं, तते णं से मेहे कुमारे समणस्स भगवओ महावीरस्स अंतिए इमं एयारूव्वं धम्मियं उवएसं णिसम्म मम्मं पडिवज्जइ तमाणाए तह गच्छइ तह चिट्ठइ जाव उट्ठाए उट्ठाय पाणेहिं भूतेहिं जीवेहिं सत्तेहिं संजमइ । ३० । जं दिवसं च णं मेहे कुमारे मुंडे भवित्ता आगाराओ अणगारियं पव्वइए तस्स णं दिवसस्स पुव्वावर(प्र० पच्चावर०)ण्हकालसमयंसि समणाणं निग्गंथाणं अहारातिणियाए सेज्जासंधारएसु विभज्जमाणेसु मेहकुमारस्स दारमूले सेज्जासंधारए जाए यावि होत्था, तते णं समणा णिग्गंथा पुव्वरत्तावरत्तकालसमयंसि वायणाए पुच्छणाए परियट्ठणाए धम्माणुजोगचिंताए य उच्चारस्स य पासवणस्स य अइगच्छमाणा य निग्गच्छमाणा य अप्पेगतिया मेहं कुमारं हत्थेहिं संघट्ठंति एवं पाएहिं सीसे पोट्टे कायंसि अप्पेगतिया ओलंडेति अप्पेगइया पोलंडेइ अप्पेगतिया पायरयरेणुगुंडियं करेति, एवंमहालियं च णं रयणीं मेहे कुमारे णो संचाएति खणमवि अच्छि निमीलित्तए, तते णं तस्स मेहस्स कुमारस्स अयमेयारूवे अब्भत्थिए जाव ममुप्पजित्था-एवं खलु अहं सेणियस्स रन्नो पुत्ते धारिणीए देवीए अत्तए मेहे जाव सवणयाए तं जया णं अहं अगारमज्झे व(आव पा०)सामि तया णं मम समणा णिग्गंथा आढायंति परिजाणंति सक्कारेति सम्माणेति अट्ठाइं हेऊति पसिणातिं कारणाइं वाकरणाइं आतिक्खंति इट्ठाहिं कंताहिं वग्गूहिं आलवेंति संलवेंति, जप्पभित्तिं च णं अहं मुंडे भवित्ता आगाराओ अणगारियं पव्वइए तप्पभित्तिं च णं मम समणा नो आढायंति जाव नो संलवंति, अदुत्तरं च णं मम समणा णिग्गंथा गओ पुव्वरत्तावरत्तकालसमयंसि वायणाए पुच्छणाए जाव महालियं च णं रत्ति नो संचाएमि अच्छि णिमिलावेत्तए, तं सेयं खलु मज्झं कल्लं पाउप्पभायाए रयणीए जाव तेयसा जलंते समणं भगवं महावीरं आपुच्छित्ता पुणरवि आगारमज्झे वसित्तएत्तिकट्टु एवं संपेहेति ता अट्ठदुहट्ठवसट्ठमाणसगए णिरयप-डिरूवियं च णं तं रयणिं खवेति ता कल्लं पाउप्पभायाए सुविमलाए रयणीए जाव तेयसा जलंते जेणेव समणे भगवं महावीरे तेणामेव उवागच्छति ता तिक्खुत्तो आदाहिणं पदा-हिणं करेइ ता वंदइ नमंसइ ता जाव पज्जुवासइ । ३१ । तते णं मेहाति समणे भगवं महावीरे मेहं कुमारं एवं वदासी-से णूणं तुमं मेहा ! राओ पुव्वरत्तावरत्तकालसमयंसि (१ - १)

समणेहिं निगंथेहिं वायणाए पुच्छणाए जाव महालियं च णं राइं णो संचाएसि मुहुत्तमवि अचिंल निमिलावेत्तए, तते णं तुम्भं मेहा ! इमे एयारूवे अब्भत्थिए० समुप्पजित्था-जया णं अहं अगारमज्जे वमामि तया णं मम समणा निगंथा आढायंति जाव परियाणंति, जप्पभित्तिं च णं मुंडे भवित्ता अगाराओ अणगारियं पव्वयामि तप्पभित्तिं च णं मम समणा णो आढायंति जाव नो परियाणंति अदुत्तरं च समणा निगंथा राओ अप्पेगतिया वायणाए जाव पायग्गयेणुगुंडियं करेंति, तं सेयं खलु मम कहं पाउप्पभायाए (रयणीए) समणं भगवं महावीरं आपुच्छित्ता पुणरवि आगारमज्जे आवसित्तएत्तिकट्ठु एवं संपेहेसि त्ता अट्ठुहट्ठवसट्ठमाणसे जाव रयणीं खवेसि त्ता जेणामेव अहं तेणामेव हव्वमागए, से णूणं मेहा ! एस अत्थे समट्ठे ?, हंता अत्थे समट्ठे, एवं खलु मेहा ! तुमं इओ तच्चे अईए भवग्गहणे वेयइढगिरिपायमूले वणयरेहिं णिव्वत्तियणामधेज्जे सेते संखदलउज्जलविमलनिम्मलदाहिघण-गोखीरफेणरयणियरप्पयासे सत्तुस्सेहे णवायए दमपरिणाहे सत्तंगपतिट्ठिए समे सुसंठिए सोमे समिए (सोम्मसम्मिए पा०) सुरूव पुरतो उदग्गे समूसियसिरे सुहासणे पिट्ठओ वराहे अतियाकुच्छी अचिंलहकुच्छी अलंबकुच्छी पलंबलंबोदराहरकरे धणुपट्टागिइविसिट्ठपुट्ठे अह्ठीणपमाणजुत्तवट्ठियापीवरगत्तावरे (अब्भुग्गयमउलमल्लियाधवलदंते आनामियचावललि-यसंवेत्थित्तगसुंडे. पा०) अह्ठीणपमाणजुत्तपुच्छे पडिपुत्तसुचारुकुम्मचलणे पंडुरमुविसुद्धनिद्धणिरुवहयविसंतिणहे लहंते सुमेरुप्पभे नामं हत्थिराया होत्था, तत्थ णं तुमं मेहा ! बहूहिं हत्थीहिं य हत्थीणियाहिं य लोट्टएहिं य लोट्टियाहिं य कलभेहिं य कलभियाहिं य सद्धिं संपरिवुडे हत्थिसहस्सणायए देसए पागट्ठी पट्टवए जूहवई वंदपरियट्टए अच्चेसिं च बहूणं एक्क-ल्लाणं हत्थिकलभाणं आहेवच्चं जाव विहरसि, तते णं तुमं मेहा ! णिच्चमप्पमत्ते सइं पललिए कंदप्परई मोहणसीले अवितण्हे कामभोगतिसिए बहूहिं हत्थीहिं य जाव संपरिवुडे वेयइढ-गिरिपायमूले गिरिसु य दरीसु य कुहरेसु य कंदरासु य उज्झरेसु य निज्झरेसु य वियरएसु य गइडासु य पल्लवेसु य चिल्लेसु य कडयेसु य कडयपल्लेसु य तडीसु य वियडीसु य टंकेसु य कूडेसु य सिहरेसु य पम्भारेसु य मंचेसु य मालेसु य काणणेसु य वणेसु य वणसंडेसु य वणराईसु य नदीसु य नदीकच्छेसु य जूहेसु य संगमेसु य वावीसु य पोक्खरिणीसु य दीहियासु य गुंजालियासु य सरेसु य सरपंतियासु य सरसरपंतियासु य वणयरएहिं दिन्नवियारे बहूहिं हत्थीहिं य जाव सद्धिं संपरिवुडे बहुविहतरुपल्लवपउरपाणियतणे निब्भए निरुव्विग्गे सुहंसुहेणं विहरसि, तते णं तुमं मेहा ! अन्नया कयाई पाउसवरिसारत्तसरयहेमंतवसंतेसु कमेण पंचसु ऊऊसु समतिकंतेसु गिम्हकालसमयंसि जेट्टामूलमासे पायवधंससमुट्ठिएणं सुक्कत-णपत्तकयवरमारुतसंजोगदीविएणं महाभयंकरेणं हुयवहेणं वणदवजालासंपलित्तेसु वणंतेसु धूमाउलासु दिसासु महावायवेगेणं संघट्टिएसु छिन्नजालेसु आवयमाणेसु पोह्लरुक्खेसु अंतो २ श्रियायमाणेसु मयकुहितविणिविट्ठकिमिय(मव पा०) कइमनदीवियरगजिण्णपाणीयंतेसु वणंतेसु भिंजारकदीणकंदियरवेसु खरफरुसअणिट्ठरिट्ठवाहितवि(विध पा०)दुदुमग्गेसु दुमेसु तण्हावसमुक्कपक्खपयडियजिन्भतालुयअसंपुडिततुंडपक्खिसंधेसु ससंतेसु गिम्हउम्हउण्हावायखरफरुसचंडमारुयसुक्कतणपत्तकयवरवाउलिभमंतदित्तसंभंतसावयाउलमिगतण्हाबद्धचि-ण्हपट्टेसु गिरिवरेसु संवट्टिएसु तत्थमियपसवसिरीसिवेसु अवदालियवयणविवरणिट्ठालियग्गजीहे महंततुंबइव पुन्नकच्चे संकुचियथोरपीवरकरे ऊसियलंगूले पीणाइयविरसरडियसहेणं फोडयंतेव अंबरतलं पायदहरएणं कंपयंतेव मेइणितलं विणिम्मयमाणे य सीयारं सव्वतो समंता वल्लिवियाणाइं छिंदमाणे रुक्खसहस्सातिं तत्थ सुबहूणि णोह्ठायंते विणट्ठरट्ठेव्व णरवरिंदे वायाइद्वेव्व पोए मंडलवाएव्व परिन्भमंते अभिक्खणं २ लिंडणियरं पमुंचमाणे २ बहूहिं हत्थीहिं य जाव सद्धिं दिसोदिसिं विप्पलाइत्था, तत्थ णं तुमं मेहा ! जुच्चे जराजज्जरियदेहे आउरे झंझिए पिवासिए दुब्बले किलंते नट्टसुइए मूढदिसाए सयातो जूहातो विप्पहूणे वणदवजालापारद्धे उण्हेण तण्हाए य छुहाए य परम्भाहए समाणे भीए तत्थे तसिए उव्विगे संजातभए सव्वतो समंता आधावमाणे परिधावमाणे एगं च णं महं सरं अप्पोदयं पंकबहुलं अतित्थेणं पाणियपाए उइन्नो, तत्थ णं तुमं मेहा ! तीरमतिगते पाणियं असंपत्ते अंतरा चेव सेयंसि विसच्चे, तत्थ णं तुमं मेहा ! पाणियं पाइस्सामित्तिकट्ठु हत्थं पसारेसि, सेवि य ते हत्थे उदगं न पावति, तते णं तुमं मेहा ! पुणरवि कायं पच्चुद्धरिस्सामीतिकट्ठु बलियत-रायं पंकंसि खुत्ते, तते णं तुमे मेहा ! अन्नया कदाइ एगे चिरनिज्जूटे गयवरजुवाणए सगाओ जूहाओ करचरणदंतमुसलप्पहारेहिं विप्परद्धे समाणे तं चेव महदहं पाणीयं पादेउं समो-यरेति, तते णं से कलभए तुमं पासति त्ता तं पुव्ववरं समरति त्ता आसुरुत्ते रुट्टे कुविए चंडिक्किए मिसिमिसेमाणे जेणेव तुमं तेणेव उवागच्छति त्ता तुमं तिक्खेहिं दंतमुसलेहिं तिक्खुत्तो पिट्ठतो उच्छुभति त्ता पुव्ववरं निज्जाएति त्ता हट्ठुट्टे पाणियं पियति त्ता जामेव दिसिं पाउब्भूए तामेव दिसिं पडिगए, तते णं तव मेहा ! सरीरगंसि वेयणा पाउब्भवित्था उज्जला विउला तिउला कक्खडा जाव दुरहियासा पित्तज्जरपरिगयसरीरे दाहवक्कंतीए यावि विहरित्था, तते णं तुमं मेहा ! तं उज्जलं जाव दुरहियासं सत्तराइंदियं वेयणं वेदेसि सवीसं वास-सतं परमाउं पालइत्ता अट्ठवसट्ठुहट्टे कालमासे कालं किच्चा इहेव जंबुदीवे भारहे वासे दाहिणइढभरहे गंगाए महाणदीए दाहिणे कूले विंझगिरिपायमूले एगेणं मत्तवरगंधहत्थिणा

एगाए गयवरकरेणूए कुच्छिसि गयकलभए जणिते, तते णं सा गयकलभिया णवणं मामाणं वसंतमासंमि तुमं पयाया. तते णं तुमं मेहा ! गम्भवासाओ विप्पमुक्के समाने गयकल-
भए यावि होत्था, रत्तुप्पलरत्तसूमालए जासुमणारत्तपारिजत्तयलक्खवारससरसकुंकुमसंझभरागवच्चे इट्ठे णिगम्म जूहवइणो गणियायारकणेरुकोत्थहत्थी अणेगहत्थिसयसंपरिवुडे
रम्मेसु गिरिकाणणेसु सुहंसुहेणं विहरसि, तते णं तुमं मेहा ! उम्मुक्कबालभावे जोव्वणगमणुपत्ते जूहवइणा कालधम्मणा संजुत्तेणं तं जूहं सयमेव पडिवज्जसि. तते णं तुमं मेहा ! वण-
यरेहिं निव्वत्तियनामधेच्चे जाव चउदंते मेरुप्पभे हत्थिरयणे होत्था, तत्थ णं तुमं मेहा ! सत्तुस्सेहे (सत्तंगपइट्ठिए पा०) तहेव जाव पडिरूवे, तत्थ णं तुमं मेहा ! सत्तसइयस्स जूह-
स्स आहेवच्चं जाव अभिरमेत्था, तते णं तुमं अन्नया कयाइ गिम्हकालसमयंसि जेट्टामूले वणदवजालापलित्तसु वणंतेसु सुधूमाउलासु दिसासु जाव मंडलवाएव्व तते णं परिब्भमेते
भीते तत्थे जाव संजायभए बहूहिं हत्थीहि य जाव कलभियाहि य सद्धिं संपरिवुडे सव्वतो समंता दिसोदिसिं विप्पलाइत्था, तते णं तव मेहा ! तं वणदवं पासित्ता अयमेयारूवे अज्झ-
त्थिए जाव समुप्पजित्था-कहिण्णं मन्ने मए अयमेयारूवे अगिसंभवे अणुभूयपुव्वे ?, तव मेहा ! लेस्साहिं विमुज्झमाणीहिं अज्झवसाणेणं सोहणेणं सुभेणं परिणामेणं तयावरणि-
ज्जाणं कम्माणं खओवसमेणं ईहावूहमग्गणगवेसणं करेमाणस्स मन्निपुव्वे जातिसरणे समुप्पजित्था, तते णं तुमं मेहा ! एयमट्ठं सम्मं अभिसमेसि. एवं खलु मया अतीए दोच्चे भव-
ग्गहणे इहेव जंबुदीवे २ भारहे वासे वियइडगिरिपायमूले जाव तत्थ णं महया अयमेयारूवे अगिसंभवे समणुभूए, तते णं तुमं मेहा ! तस्सेव दिवसस्स पुव्वावर(प्र० पच्चावर०)-
ण्हकालसमयंसि नियएणं जूहेणं सद्धिं समन्नागए यावि होत्था, तते णं तुमं मेहा ! सत्तुस्सेहे जाव सन्नि(पुव्वे)जाइस्सरणे चउदंते मेरुप्पभे नाम हत्थी होत्था, तते णं तुज्झं मेहा
अयमेयारूवे अज्झत्थिए जाव समुप्पजित्था-तं सेयं खलु मम इयाणिं गंगाए महानदीए दाहिणिहंसि कूलंसि विंझगिरिपायमूले दवग्गि जाव (संताण पा०)कारणट्टा सएणं जूहेणं
महालयं मंडलं घाइत्तएत्तिकट्टु एवं संपेहेसि ता सुहंसुहेणं विहरसि, तते णं तुमं मेहा ! अन्नया कदाई पढमपाउसंसि महावुट्टिकायंसि सन्निवइयंसि गंगाए महानदीए अदूरसामंते
बहूहिं हत्थीहिं जाव कलभियाहि य सत्तहि य हत्थिसएहिं संपरिवुडे एगं महं जोयणपरिमंडलं महतिमहालयं मंडलं घाएसि, जं तत्थ तणं वा पत्तं वा कट्टं वा कंटए वा लया वा वल्ली
वा खाणुं वा रुक्खे वा खुवे वा तं सव्वं तिक्खुत्तो आहुणिय एगंतं एडेसि ता पाएण उट्टवेसि हत्थेणं गेण्हसि, तते णं तुमं मेहा ! तस्सेव मंडलस्स अदूरसामंते गंगाए महानदीए
दाहिणिहंसे कूले विंझगिरिपायमूले गिरीसु य जाव विहरसि, तते णं मेहा ! अन्नया कदाई मज्झिमए वरिसारत्तंसि महावुट्टिकायंसि सन्निवइयंसि जेणेव से मंडले तेणेव उवागच्छसि
त्ता दोच्चंपि तच्चंपि मंडलं घाएसि ता एवं चरिमे वासारत्तंसि महावुट्टिकायंसि सन्निवइयमाणंसि जेणेव से मंडले तेणेव उवागच्छसि ता तच्चंपि मंडलघायं करेसि जं तत्थ तणं वा
जाव सुहंसुहेणं विहरसि, अह मेहा ! तुमं गइंदभावंमि वट्टमाणो कमेणं नलिणिवणविहणगरे हेमंते कुंदलोद्धउद्धततुमारपउगंमि अतिकंते अहिणवे गिम्हसमयंसि पत्ते वियट्टमाणेसु
वणेसु वणकरेणुविविहदिण्णकयपसवघाओ (कीलाकयपंसुघाओ पा०) तुमं (उउय पा०)कुसुमकयचामरकन्नपूरपरिमंडियाभिरामो मयवसविगसंतकडतडकिलिन्नगंधमदवारिणा सुर-
भिजणियगंधो करेणुपरिवारिओ उउसमत्तजणितसोभो काले दिणयरकरपयंडे परिसोसियतरुवरसिरिहरभीमतरदंसणिजे भिंगाररवंतभेरवरवे णाणाविहपत्तकट्टतणकयवरुद्धतपइमारु-
याइद्धनहयलपउम्माणे(दुमगणे पा०) वाउलियादारुणतरे तण्हावसदोसदूसियभमंतविविहसावयसमाउले भीमदरिसणिजे वट्टंते दारुणंमि गिम्हे मारुतवसपसरपसरियवियंभिएणं
अब्भहियभीमभेरवरवप्पगारेणं महुधारापडियसित्तउद्धायमाणधगधगधगंतपंदु(सद्धु पा०)द्धुएणं दित्ततरसफुल्लिगेणं धूममालाउलेणं सावयसयंतकरणेणं अब्भहियवणदवेणं जाला-
लोवियनिरुद्धधूमंधकारभीयो अंतपाल(आयवालो पा०)यमहंततुंबइपुन्नकन्नो आकुंचियथोरपीवरकरो भयवसभयंतदित्तनयणो वेगेण महामेहोव्व पवणोल्लियमहल्लरूवो जेणेव कओ
ते पुरा दवग्गिभयभीयहियएणं अवगयतणप्पएसरूखो रूखोहेसो दवग्गिसंताणकारणट्टाए जेणेव मंडले तेणेव पहारेत्थ गमणाए, एक्को ताव एम गमो, तते णं तुमं मेहा ! अन्नया
कदाई कमेणं पंचसु उऊसु समतिकंतेसु गिम्हकालसमयंसि जेट्टामूले मासे पायवसंधंससमुट्टिए जाव संवट्टिएसु मियपसुपक्खिसिरीसिवे दिसो दिसिं विप्पलायमाणेसु तेहिं बहूहिं
हत्थीहि य० सद्धिं जेणेव मंडले तेणेव पहारेत्थ गमणाए, तत्थ णं अण्णे बहवे सीहा य वग्घा य विगया दीविया अच्छा य तरच्छा य पारासरा य सरभा य सियाला विराला सुणहा
कोला ससा कोकंतिया चित्ता चिहल्ला पुव्वपविट्टा अग्गिभयविहुया एगयओ बिलधम्मेणं चिट्ठंति, तए णं तुमं मेहा ! जेणेव से मंडले तेणेव उवागच्छसि ता तेहिं बहूहिं सीहेहिं
जाव चिहल्लएहि य एगयओ बिलधम्मेणं चिट्ठसि, तते णं तुमं मेहा ! पाएणं गत्तं कंडुइस्सामीतिकट्टु पाए उक्खित्ते तंसि च णं अंतरंसि अच्चेहिं बलवन्तेहिं सत्तेहिं पणोल्लिज्जमाणे
२ ससए अणुपविट्टे, तते णं तुमं मेहा ! गायं कंडुइत्ता पुणरवि पायं पडिनिक्खविस्सामित्तिकट्टु तं ससयं अणुपविट्टं पाससि ता पाणाणुकंपयाए भूयाणुकंपाए जीवाणुकंपाए सत्ताणु-

कंपयाए सो पाए अंतरा चैव संधारिए नो चैव णं णिक्खित्ते, तते णं तुमे मेहा ! ताए पाणाणुकंपयाए जाव मत्ताणुकंपयाए संसारे परिर्त्तीकते माणुस्साउए निबद्धे, तते णं से वणदवे अइहातिज्जातिं रातिंदियाइं तं वणं झामेइ त्ता निट्टिए उवरए उवसंते विज्झाए यावि होत्था, तते णं ते बहवे सीहा य जाव चिट्ठत्ता य तं वणदवं निट्टियं जाव विज्झायंति पासंति त्ता अग्गिभयविप्पमुक्का तण्हाए य लुहाए य पग्ग्भाहया समाणा मंडलातो पडिनिक्खमंति त्ता मव्वतो समता विप्पमरित्था, (तए णं ते बहवे हत्थि जाव लुहाए य पग्ग्भाहया समाणा तओ मंडलाओ पडिनिक्खमंति त्ता दिसो दिसिं विप्पमरित्था,) तए णं तुमं मेहा ! जुत्ते जगज्जरियदेहे सिद्धिलवलितयापिणद्धगत्ते दुब्बले किलंते जुंजिए पिवासिते अत्थामे अब्बले अपरक्कमे अचंकमणो वा ठाणुग्वंडे वेगेण विप्पमरिस्सामित्तिकट्टु पाए पसारमाणे विज्जुहते विव रयतगिरिपग्ग्भारे धरणितलंसि मव्वंगेहि य सन्निवइए, तते णं तव मेहा ! सरीरगंसि वेयणा पाउब्भूता उज्जला जाव दाहवक्कंतिए यावि विहरसि, तते णं तुमं मेहा ! तं उज्जलं जाव दुरहियासं तिन्नि राइंदियाइं वेयणं वेएमाणे विहरित्ता एगं वाससतं परमाउं पालइत्ता इहेव जंबुदीवे दीवे भारहे वासे रायगिहे नयरे सेणितस्स रन्नो धारिणीए देवीए कुच्छिसि कुमारत्ताए पच्चायाए । ३२ । तते णं तुमं मेहा ! आणुपुव्वेणं गग्ग्भवासाओ निक्खवंते समाणे उम्मुक्कवालभावे जोव्वणगमणुपत्ते मम अंतिए मुंडे भवित्ता आगाराओ अणगारियं पव्वइए, तं जति जाव तुमे मेहा ! तिग्गिक्खजोणियभावमुवगएणं अपडिलद्धमंत्तरयणलंभेणं से पाणे (प्र० पाये) पाणाणुकंपयाए जाव अंतरा चैव संधारिते नो चैव णं निक्खित्ते किमंग पुण तुमं मेहा ! इयाणिं विपुलकुलसमुब्भवेणं निरुव्वहयसरीरदंते(पत्त पा०) लद्धपंचिंदिएणं एवं उट्ठाणबलवीरियपुरिसगारपरक्कमसंजुत्तेणं मम अंतिए मुंडे भवित्ता आगाराओ अणगारियं पव्वतिए समाणे ममणाणं निग्गंथाणं गओ पुव्वरत्तावरत्तकालसमयंमि वायणाए जाव धम्मणाओगचिंताए य उच्चारस्स वा पासवणस्स वा अतिगच्छमाणाण य निग्गच्छमाणाण य हत्थसंघट्टणाणि य पायसंघट्टणाणि य जाव रयरेणुगुंडणाणि य नो मम्मं सहसि खमसि तितिक्खमि अहियासेसि ?, तते णं तस्स मेहस्स अणगारस्स समणस्स भगवतो महावीरस्स अंतिए एतमट्ठं मोच्चा णिसम्म सुभेहिं परिणामेहिं पमत्थेहिं अज्झवमाणेहिं लेस्साहिं विसुज्झमाणीहिं तयावरणिज्जाणं कम्मणां खओवसमेणं ईहावूहमग्गणगवेसणं करमाणस्स सन्निपुव्वे जातीमरणे ममुप्पन्ने, एतमट्ठं सम्मं अभिसमेति, तते णं से मेहे कुमारे समणेणं भगवया महावीरेणं संभारियपुव्वभवे जातीसंभरणे दुगुणाणीयसंवेगे आणंदयंसुपुन्नमुहे हरिसवसेणं धाराहयकंदबकं पिव समुस्समितरोमकृवे समणं भगवं महावीरं वंदति नमंसति त्ता एवं वदासी-अज्जप्पमिती णं भंते ! मम दो अच्छाणि मोत्तूणं अवसेसे काए समणाणं निग्गंथाणं निसट्टेत्तिकट्टु पुणरवि समणं भगवं महावीरं वंदति नमंसति त्ता एवं वदासी-इच्छामि णं भंते ! इयाणिं दोच्चंमि सयमेव पव्वावियं सयमेव मुंडावियं जाव सयमेव आयागोयरजायामायावत्तियं धम्ममातिक्खह, तए णं समणे भगवं महावीरे मेहं कुमारं सयमेव पव्वावेइ जाव जायामायावत्तियं धम्ममाइक्खइ, एवं देवाणुप्पिया ! गन्तव्वं एवं चिट्ठियव्वं एवं णिसीयव्वं एवं तुयट्ठियव्वं एवं भुंजियव्वं भासियव्वं उट्ठाए २ पाणाणं भूयाणं जीवाणं मत्ताणं संजमेणं संजमितव्वं, तते णं से मेहे समणस्स भगवतो महावीरस्स अयमेयारूवं धम्मियं उवएसं सम्मं पडिच्छति त्ता तह चिट्ठति जाव संजमेणं संजमति, तते णं से मेहे अणगारे जाए ईरियासमिए अणगारवन्नओ भाणियव्वो, तते णं से मेहे अणगारे समणस्स भगवतो महावीरस्स अंतिए एतारूवाणं थेराणं मामातियमातियाणि एक्कारस अंगातिं अहिज्जति त्ता बहूहिं चउत्थलट्टट्टमदसमदुवालसेहिं मासद्धमासखमणेहिं अप्पाणं भावेमाणे विहरति, तते णं स० भ० महावीरे रायगिहाओ नगराओ गुणसिल्लाओ चेतियाओ पडि-निक्खमति त्ता बहिया जणवयविहारं विहरति । ३३ । तते णं से मेहे अणगारे अन्नया कदाइ समणं भगवं० वंदति नमंसति त्ता एवं वदासी-इच्छामि णं भंते ! तुब्भेहिं अब्भणुच्चाते समाणे मासियं भिक्खुपडिमं उवसंपजित्ताणं विहरित्ताए, अहासुहं देवाणुप्पिया ! मा पडिबन्धं करेह, तते णं से मेहे समणेणं भगवया० अब्भणुच्चाते समाणे मासियं भिक्खुपडिमं उवसंपजित्ताणं विहरति, मासियं भिक्खुपडिमं अहासुत्तं अहाकप्पं अहामग्गं० सम्मं काएणं फासेति पालेति सोभेति तीरेति किट्ठेति सम्मं काएण फासेत्ता पालित्ता सोभेत्ता तीरेत्ता किट्ठेत्ता पुणरवि समणं भगवं महावीरं वंदति नमंसति त्ता एवं वदासी-इच्छामि णं भंते ! तुब्भेहिं अब्भणुच्चाते समाणे दोमासियं भिक्खुपडिमं उवसंपजित्ताणं विहरित्ताए, अहासुहं देवाणुप्पिया ! मा पडिबन्धं करेह, जहा पढमाए अभिलावो तहा दोच्चाए तच्चाए चउत्थाए पंचमाए छम्मासियाए सत्तमासियाए पढमसत्तराइंदियाए दोच्चंसत्तरातिंदियाए तइयं-सत्तरातिंदियाए अहोरातिंदियाएवि एगराइंदियाएवि, तते णं से मेहे अणगारे बारस भिक्खुपडिमाओ सम्मं काएणं फासेत्ता पालेत्ता सोभेत्ता तीरेत्ता किट्ठेत्ता पुणरवि वंदति नमंसइ त्ता एवं वदासी-इच्छामि णं भंते ! तुब्भेहिं अब्भणुच्चाए समाणे गुणरतणसंवच्छरं तवोकम्मं उवसंपजित्ताणं विहरित्ताए, अहासुहं देवाणुप्पिया ! मा पडिबन्धं करेह, तते णं से मेहे अणगारे पढमं मासं चउत्थं चउत्थेणं अणिक्खित्तेणं तवोकम्मेणं दिया ठाणुकुडुए सूरामिमुहे आयावणभूमीए आयावेमाणे रत्तिं वीरासणेणं अवाउडएणं दोच्चं मासं छट्ठं छट्ठेणं० तच्चं

मासं अट्टमंअट्टमेणं० चउत्थं मासं दसमं २ अणिक्खित्तेणं तवोकम्मेणं दिया ठाणुकुडुए सूरामिमुहे आयावणभूमीए आयावेमाणे रत्तिं वीरासणेणं अवाउडएणं पंचमं मासं दुवा-
 लसमं २ अणिक्खित्तेणं तवोकम्मेणं दिया ठाणुकुडुए सूरामिमुहे आयावणभूमीए आयावेमाणे रत्तिं वीरासणेणं अवाउडतेणं, एवं खलु एएणं अभिलावेणं छट्ठे चोदसमं २ सत्तमे
 सोलसमं २ अट्टमे अट्टारसमं २ नवमे वीसतिमं २ दसमे बावीसतिमं २ एक्कारसमे चउव्वीसतिमं २ बारसमे छव्वीसतिमं २ तेरसमे अट्टावीसतिमं २ चोदसमे तीसइमं २ पंचदसमे
 बत्तीसतिमं २ सोलसमे चउत्तीसतिमं २ अणिक्खित्तेणं तवोकम्मेणं दिया ठाणुकुडुएणं सूरामिमुहे आयावणभूमीए आयावेमाणे रत्तिं वीरासणेणं य अवाउडतेणं य, तते णं से मेहे
 अणगारे गुणरयणसंवच्छरं तवोकम्मं अहासुत्तं जाव सम्मं काएणं फासेइ पालेइ सोभेइ तीरेइ किट्ठेइ अहासुत्तं अहाकप्पं जाव किट्ठेत्ता समणं भगवं महावीरं वंदति नमंसति त्ता बहूहिं
 चउत्थं छट्ठमदसमदुवालसेहिं मासद्धमासखमणेहिं विचित्तेहिं तवोकम्मेहिं अप्पाणं भावेमाणे विहरति । ३४। तते णं से मेहे अणगारे तेणं उरालेणं विपुलेणं सस्सिरीएणं पयत्तेणं पग्ग-
 हिएणं कल्लाणेणं सिवेणं धन्नेणं मंगलेणं उदग्गेणं उदारएणं उत्तमेणं महाणुभावेणं तवोकम्मेणं सुक्के भुक्खे लुक्खे निम्मंसे निस्सोणिए किडिकिडियाभूए अट्टिचम्मावणद्धे किसे धम्मणिसं-
 तए जाते यावि होत्था, जीवंजीवेणं गच्छति जीवंजीवेणं चिट्ठति भासं भासित्ता गिलायति भासं भासमाणे गिलायति भासं भासिस्सामित्ति गिलायति से जहा नामए इंगालसग-
 डियाइ वा कट्टसगडियाइ वा पत्तसगडियाइ वा तिलसगडियाइ वा एरंडकट्टसगडियाइ वा उण्हे दिन्ना सुक्का समाणी ससहं गच्छइ ससहं चिट्ठति एवामेव मेहे अणगारे ससहं गच्छइ
 ससहं चिट्ठइ उवचिए तवेणं अवचिते मंससोणिएणं हुयासणे इव भासरासिपरिच्छिन्ने तवेणं तेएणं तवतेयसिरीए अतीव अतीव उवसोभेमाणे २ चिट्ठति, तेणं कालेणं० समणे भगवं
 महावीरे आइगरे तित्थगरे जाव पुव्वाणुपुव्वि चरमाणे गामाणुगामं दूतिजमाणे सुहंसुहेणं विहरमाणे जेणामेव रायगिहे नगरे जेणामेव गुणसिलए चेतिए तेणामेव उवागच्छति त्ता
 अहापडिरूवं उग्गहं उग्गिण्हित्ता संजमेणं तवसा अप्पाणं भावेमाणे विहरति, तते णं तस्स मेहस्स अणगारस्स राओ पुव्वरत्तावरत्तकालसमयंसि धम्मजागरियं जागरमाणस्स अय-
 मेयारूवे अज्झत्थिते जाव समुप्पज्जित्था-एवं खलु अहं इमेणं उरालेणं तहेव जाव भासं भासिस्सामीति गिलामि तं अत्थि ता मे उट्ठाणे कम्मे बले वीरिए पुरिसक्कारपरक्कमे सद्धा
 धिई संवेगे तं जाव ता मे अत्थि उट्ठाणे कम्मे बले वीरिए पुरिसगारपरक्कमे सद्धा धिई संवेगे जाव इमे धम्मायरिए धम्मोवदेसए समणे भगवं महावीरे जिणे सुहत्थी विहरति ताव ताव
 मे सेयं कल्लं पाउप्पभायाए रयणीए जाव तेयसा जलंते सूरै समणं ३ वंदित्ता नमंसित्ता समणेणं भगवता महावीरेणं अब्भणुन्नायस्स समाणस्स सयमेव पंच महव्वयाइं आरुहित्ता
 गोयमादिए समणे निग्गंथे निग्गंथीओ य खामेत्ता तहारूवेहिं कडाईहिं थेरेहिं सद्धिं विउलं पव्वयं सणियं सणियं दुरूहित्ता सयमेव मेहघणसन्निगासं पुढवीसिलापट्टयं पडिलेहेत्ता
 संलेहणाझूसणाए झूसियस्स भत्तपाणपडियाइक्खित्तस्स पाओवगयस्स कालं अणवकंखमाणस्स विहरित्तए, एवं संपेहेति त्ता कल्लं पाउप्पभायाए रयणीए जाव जलंते जेणेव समणे
 भगवं महावीरे तेणेव उवागच्छति त्ता समणं ३ तिक्खुत्तो आदाहिणं पदाहिणं करेइ त्ता वंदति नमंसति त्ता नच्चासन्ने नातिदूरे सुस्ससमाणे नमंसमाणे अभिमुहे विणएणं पंजलियपुडे
 पज्जुवासति, मेहेत्ति समणे भगवं महावीरे मेहं अणगारं एवं वदासी-से णूणं तव मेहा ! राओ पुव्वरत्तावरत्तकालसमयंसि धम्मजागरियं जागरमाणस्स अयमेयारूवे अज्झत्थिते जाव
 समुप्पज्जित्था-एवं खलु अहं इमेणं ओरालेणं जाव जेणेव अहं तेणेव हव्वमागए, से णूणं मेहा ! अट्ठे समट्ठे?, हंता अत्थि, अहासुहं देवाणुप्पिया ! मा पडिबंघं करेह, तते णं से मेहे
 अणगारे समणेणं भगवया० अब्भणुच्चाए समाणे हट्टजावहियए उट्ठाइ उट्ठेइ त्ता समणं २ तिक्खुत्तो आयाहिणं पयाहिणं करेइ त्ता वंदइ नमंसइ त्ता सयमेव पंच महव्वयाइं आरुभेइ
 त्ता गोयमाति समणे निग्गंथे निग्गंथीओ य खामेति खामेत्ता य तहारूवेहिं कडाईहिं थेरेहिं सद्धिं विपुलं पव्वयं सणियं २ दुरूहित्ता सयमेव मेहघणसन्निगासं पुढवीसिलापट्टयं
 पडिलेहति त्ता उच्चारपासवणभूमिं पडलेहति त्ता दब्भसंथारगं संथरति त्ता दब्भ० दुरूहित्ता पुरत्थाभिमुहे संपलियंकनिसन्ने करयलपरिग्गहियं सिरसावत्तं मत्थए अंजलिं कट्टु
 एवं वदासी-नमोऽत्थु णं अरिहंताणं भगवंताणं जाव संपत्ताणं, णमोऽत्थु णं समणस्स भगवओ महावीरस्स जाव संपाविउकामस्स मम धम्मायरियस्स, वंदामि णं भगवंतं तत्थगयं
 इहगए पासउ मे भगवं तत्थगते इहगतंतिकट्टु वंदति नमंसइ त्ता एवं वदासी-पुव्विपिय णं मए समणस्स ३ अंतिए सव्वे पाणाइवाए पच्चक्खाए मुसावाए अदिन्नादाणे मेहुणे
 परिग्गहे कोहे माणे माया लोभे पेजे दोसे कलहे अब्भक्खाणे पेसुन्ने परपरिवाए अरतिरती मायामोसे मिच्छादंसणसल्ले पच्चक्खाते, इयाणिंपि णं अहं तस्सेव अंतिए सव्वं पाणाति-
 वायं पच्चक्खामि जाव मिच्छादंसणसल्लं पच्चक्खामि, सव्वं असणपाणखादिमसातिमं चउव्विहंपि आहारं पच्चक्खामि जावज्जीवाए, जंपिय इमं सरीरं इट्ठं कंतं पियं जाव विविहा
 रोगायंका परीसहोवसग्गा फुसंतीतिकट्टु एयंपिय णं चरमेहिं ऊसासनिस्सासेहिं वोसिरामित्तिकट्टु संलेहणाफासए(झूसणाझूसिए पा०) भत्तपाणपडियाइक्खिए पाओवगए कालं
 अणवकंखमाणे विहरति, तते णं ते थेरा भगवंतो मेहस्स अणगारस्स अगिलाए वेयावडियं करेंति, तते णं से मेहे अणगारे समणस्स भगवओ महावीरस्स तहारूवाणं थेराणं (१०५)

अंति ए सामाइयमाइयाइं एकारस अंगाइं अहिज्जिता बहुपडिपुन्नाइं दुवालस वरिसाइं सामन्नपरियागं पाउणिता मासियाए संलेहणाए अप्पाणं झोसेत्ता सट्ठि भत्ताइं अणमणाए छेदेत्ता आलोतियपडिक्कंते उद्वियसहे समाहिपत्ते आणुपुव्वेणं कालगए, तते णं ते थेरा भगवंतो मेहं अणगारं आणुपुव्वेणं कालगयं पासेति ता परिनिव्वाणवत्तियं काउस्सग्गं करंति ता मेहस्स आयाभंडयं गेण्हंति ता विउलाओ पव्वयाओ सणियं २ पच्चोरुहंति जेणामेव गुणसिलए चेइए जेणामेव समणे भगवं महावीरे तेणामेव उवागच्छंति ता समणं ३ वंदंति नमंसंति ता एवं वयासी-एवं खलु देवाणुप्पियाणं अंतेवासी मेहे णामं अणगारे पगइभइए जाव विणीते से णं देवाणुप्पिएहिं अब्भणुच्चाए समाणे गोतमाति ए समणे निग्गंथे निग्गं-थीओ य खामेत्ता अम्हेहिं सट्ठि विउलं पव्वयं मणियं २ दुरूहति ता सयमेव मेघघणसन्निगासं पुढवीसिलं पट्टयं पडिलेहेति ता भत्तपाणपडियाइक्खिते अणुपुव्वेणं कालगए, एस णं देवाणुप्पिया ! मेहस्स अणगारस्स आयाभंडए । ३५ । भंतेत्ति भगवं गोतमे समणं ३ वंदंति नमंसंति ता एवं वदासी-एवं खलु देवाणुप्पियाणं अंतेवासी मेहे णामं अणगारे से णं भंते ! मेहे अणगारे कालमासे कालं किच्चा कहिं गए कहिं उववन्ने ? गोतमादि समणे भगवं महावीरे भगवं गोयमं एवं वयासी-एवं खलु गोयमा ! मम अंतेवासी मेहे णामं अण-गारे पगतिभइए जाव विणीए से णं तहारूवाणं थेराणं अंति ए सामाइयमाइयातिं एकारस अंगातिं अहिज्जति ता बारस भिक्खुपडिमाओ गुणरयणसंवच्छरं तवोकम्मं काएणं फामेत्ता जाव किट्टेत्ता मए अब्भणुन्नाए समाणे गोयमाइं थेरे खामेइ ता तहारूवेहिं जाव विउलं पव्वयं दुरूहति ता दब्भसंधारगं संधरति ता दब्भसंधारोवगए सयमेव पंच महव्वए उच्चारइ बारस वामातिं सामणपरिगायं पाउणिता मासियाए संलेहणाए अप्पाणं झोसित्ता सट्ठि भत्तातिं अणमणाए छेदेत्ता आलोइयपडिक्कंते उद्वियसहे समाहिपत्ते कालमासे कालं किच्चा उद्धं चंदिमसूरगहगणणक्खत्ततारारूवाणं बहूइं जोयणाइं बहूइं जोयणसयाइं बहूइं जोयणसहस्साइं बहूइं जोयणसयसहस्साइं बहूइं जोयणकोडीओ बहूइं जोअणकोडाकोडीओ उद्धं दूरं उप्पइत्ता सोहंमीसाणसणंकुमारमाहिंदवभलंतगमहामुक्कसहस्साराणयपाणयारणच्चुते तिण्णि य अट्टारमुत्तरे गेवेज्जविमाणावाससए वीइवइत्ता विजए महाविमाणे देवत्ताए उववण्णे, तत्थ णं अत्थेगइयाणं देवाणं तेत्तीमं सागरोवमाइं ठिई पं० तत्थ मेहस्सवि देवस्स तेत्तीसं सागरोवमातिं ठिती पं०, एम णं भंते ! मेहे देवे ताओ देवलोयाओ आउक्खएणं ठितिक्खएणं भवक्खएणं अणंतरं चयं चइत्ता कहिं गच्छिहिति कहिं उववज्जिहिति ? गोयमा ! महाविहेहे वासे सिज्झिहिति वुज्झिहिति मुच्चिहिति परिनिव्वाहिति सव्वदुक्खवाणमंतं काहिति । एवं खलु जंबू ! समणेणं भगवया महावीरेणं आइगरेणं तित्थगरेणं जाव संपत्तेणं अप्पो(पा)लंभनिमित्तं पढमस्स नायज्झयणस्स अयमट्टे पन्नत्तेत्ति वेमि । ३६ ॥ इति नायसुयक्खंधे मेघकुमारज्झयणं ? ॥ जति णं भंते ! समणेणं भगवया महावीरेणं पढमस्स नायज्झयणस्स अयमट्टे पं० वितीयस्स णं भंते ! नायज्झयणस्स के अट्टे पं० ?, एवं खलु जंबू ! तेणं कालेणं० रायगिहे णामं नयरे होत्था (प्र० नगर) वन्नओ, तस्स णं रायगिहस्स णगरस्स वहिया उत्तरपुरच्छिमे दिसीभाए गुणसिलए नामं चेति ए होत्था वन्नओ, तस्स णं गुणसिलयस्स चेतियस्स अदूरसामंते एत्थ णं महं एगे जिण्णुज्जाणे यावि होत्था विणट्टदेवउले परिसडियतोरणघरे नाणाविहगुच्छगुम्मलयावट्टिवच्छच्छाइए अणेगवालसयसंक-णिज्जे यावि होत्था, तस्स णं जिबुज्जाणस्स बहुमज्झदेसभाए एत्थ णं महं एगे भग्गकूवए यावि होत्था, तस्स णं भग्गकूवस्स अदूरसामंते एत्थ णं महं एगे मालुयाकच्छए यावि होत्था, किण्हे किण्होभासे जाव रम्मे महामेहनिउरंबभूते (पत्ति ए पुप्फिए फलिए हरियगरेरिज्जमाणे सिरीए अईव अईव उवसोभेमाणे चिट्टइ पा०) बहूहिं रुक्खेहि य गुच्छेहि य गुम्मेहि य ल्याहि य वल्लीहि य (तणेहि य) कुसेहि (कुविएहि पा०) य खाणु(खत्त पा०) एहि य संछन्ने पल्लिच्छन्ने अंतो झुसिरे बाहिं गंभीरे अणेगवालसयसंकणिज्जे यावि होत्था । ३७ । तत्थ णं रायगिहे नगरे धण्णे (प्र० धणे) नामं सत्थवाहे अट्टे दित्ते जाव विउलभत्तपाणे, तस्स णं धण्णस्स सत्थवाहस्स भद्दा नामं भारिया होत्था मुकुमालपाणिपाया अहीणपडिपु-ण्णपंचिंदियसरीरा लक्खणवंचणगुणोववेया माणुम्माणप्पमाणपडिपुन्नमुजातसव्वंगसुंदरंगी ससिसोमागारा कंता पियदंसणा सुरूवा करयत्तपरिमियतिवत्तियमज्झा कुंडलुट्टिहियगं-डलेहा कोमुदीरयणियरपडिपुण्णसोमवयणा सिंगारागारचारुवेसा जाव पडिरूवा वंझा अवियाउरी जाणुकोप्परमाया यावि होत्था । ३८ । तस्स णं धण्णस्स सत्थवाहस्स पंथए नाम दासचेडे होत्था सव्वंगसुंदरंगे मंसोवचिते वालकीलावणकुसले यावि होत्था, तते णं से धण्णे सत्थवाहे रायगिहे नयरे बहूणं नगरनिगमसेट्टिसत्थवाहाणं अट्टारसण्ह य सेणियप्पसेणीणं बहुसु कज्जेसु य कुडुंबेसु य मंतेसु य जाव चक्खुभूते यावि होत्था नियगस्सवि य णं कुडुंबस्स बहुसु य कज्जेसु जाव चक्खुभूते यावि होत्था । ३९ । तत्थ णं रायगिहे नगरे विजए नामे तक्करे होत्था पावे चंडालरूवे भीमतररुहकम्मे आरुसियदित्तरत्तनयणे खरफरुसमहल्लविगयवीभत्थदाट्टिए असंपुडितउट्टे उद्धुयपडिन्नलंबंतमुद्धए भमरराहुवन्ने निरणुक्कोसे निरणुतावे दारुणे पइभए निसंसति ए (संसे पा०) निराणुकं पे अहिच्च एगंतदिट्टिए खुरेव एगंतधाराए गिद्धेव आमिसतट्टिच्छे अग्गिमिव सव्वभक्खे जलमिव सव्वगाही उक्कंचणवंचणमायानि-

यदिकूडकवडसाइसंपओगबहुले चिरनगरविणट्टदुट्टसीलायारचरित्ते जूयपसंगी मज्जपसंगी भोजपसंगी मंसपसंगी दारुणे हिययदारए (जणहियाकारए पा०) साहसिए संधिच्छेयए
 उवहिए विस्संभघानी आलीयगतित्थभेयलहुहत्थसंपउत्ते परस्स दव्वहरणंमि निच्चं अणुबन्धे तिच्चवेरे रायगिहस्स नगरस्स बहूणि अइगमणाणि य दाराणि य अवदाराणि य छिंडिओ
 य खंडीओ य नगरनिद्धमणाणि य संवट्टणाणि य निवट्टणाणि य जूवखलयाणि य पाणागाराणि य वेसागाराणि य तट्टारट्टाणाणि य तक्करट्टाणाणि य तक्करघराणि य सिंगाडगाणि य
 तियाणि य चउक्काणि य चच्चराणि य नागघराणि य भूयघराणि य जक्खदेउलाणि य सभाणि य पवाणि य पणियसाळाणि य सुन्नघराणि य आभोएमाणे २ मग्गमाणे गवेसमाणे
 बहुजणस्स छिंदेसु य विसमेसु य विहुरेसु य वसणेसु य अब्भुदएसु य उस्सवेसु य पसवेसु य तिहीसु य छणेसु य जन्नेसु य पट्टवणीसु य मत्तपमत्तस्स य वक्खित्तस्स य वाउलस्स
 य मुहितस्स य दुक्खियस्स य विदेसत्थस्स य विप्पवसियस्स य मग्गं च छिंदं च विरहं च अंतरं च मग्गमाणे गवेसमाणे एवं च णं विहरति. बहियाविय णं रायगिहस्स नगरस्स आरा-
 मेसु य उज्जाणेसु य वाविपोक्खरणीदीहियागुंजाळियासरेसु य सरपंतिसु य सरसरपंतियासु जिण्णुज्जाणेसु य भग्गकूवएसु य मालुयाकच्छएसु य सुसाणएसु य गिरिकंदरलेणउवट्टाणे
 (प्र० णसाले)सु य बहुजणस्स छिंदेसु य जाव एवं च णं विहरति । ४० । तते णं तीसे भद्दाए भारियाए अन्नया कयाई पुच्चरत्तावरत्तकालसमयंसि कुटुंबजागरियं जागरमाणीए अय-
 मेयारूवे अज्झत्थिए जाव समुप्पज्जित्था-अहं धण्णेण सत्थवाहेण सद्धिं बहूणि वासाणि सदफरिसरसगंधरूवाणि माणुस्सगाइं कामभोगाइं पच्चणुभवमाणी विहरामि. नो चेव णं अहं
 दारगं वा दारिगं वा पयाया(प्र० पया)मि. तं धन्नाओ णं ताओ अम्मयाओ जाव सुलद्धे णं माणुस्सए जम्मजीवियफले तासिं अम्मयाणं जासिं मन्ने णिगयकुच्छिसंभूयातिं थणदुद्ध-
 लुद्धयातिं महुरसमुद्धावगातिं मम्मणपयंपियातिं थणमूलकक्खदेसभागं अभिसरमाणातिं मुद्धयाइं थणयं पियंति. ततो य कोमलकमलोवमेहिं हत्थेहिं गिण्हऊणं उच्छंगे निवेसियाइं
 देंति समुद्धावए पिए सुमहुरे पुणो २ मंजुलप्पभणिते. तं अहन्नं अधन्ना अपुन्ना अलक्खणा (अकयपुन्ना) एत्तो एगमवि न पत्ता. तं सेयं मम कट्ठं पाउप्पभायाए रयणीए जाव
 जलंते धण्णं सत्थवाहं आपुच्छित्ता धण्णेणं सत्थवाहेणं अब्भणुन्नाया समाणी सुबहुं विपुलं असणपाणखातिमसातिमं उवक्खडावेत्ता सुबहुं पुप्फ(वत्थ)गंधमट्टालंकारं गहाय बहूहिं
 मित्तनातिनियगसयणसंबंधिपरिजणमहित्थाहिं सद्धिं संपरिवुडा जाइं इमाइं रायगिहस्स नगरस्स बहिया णागाणि य भूयाणि य जक्खाणि य इंदाणि य खंदाणि य रुद्धाणि य सेवाणि
 य वेसमणाणि य तत्थ णं बहूणं नागपडिमाण य जाव वेसमणपडिमाण य महुरिहं पुप्फच्चणियं करेत्ता जाणुपायपडियाए एवं वइत्तए-जइ णं अहं देवाणुप्पिया ! दारगं वा दारिगं वा
 पयायामि तो णं अहं तुब्भं जायं च दायं च भायं च अक्खयणिहिं च अणुवड्ढेमिच्चि कट्ठु उवातियं उवाइत्तए. एवं संपेहेति त्ता कट्ठं जाव जलंते जेणामेव धण्णे सत्थवाहे तेणामेव
 उवागच्छति त्ता एवं वदासी-एवं खलु अहं देवाणुप्पिया ! तुब्भेहिं सद्धिं बहूइं वासातिं जाव देंति समुद्धावए सुमहुरे पुणो २ मंजुलप्पभणिते तण्णं अहं अहन्ना अपुन्ना अकयलक्खणा
 एत्तो एगमवि न पत्ता. तं इच्छामि णं देवाणुप्पिया ! तुब्भेहिं अब्भणुन्नाता समाणी विपुलं असणं ४ जाव अणुवड्ढेमि उवाइयं करेत्तए. तते णं धण्णे सत्थवाहे भद्दं भारियं एवं वदासी-
 ममंपि य णं (खलु) देवाणुप्पिए ! एस चेव मणोरहे-कहं णं तुमं दारगं वा दारियं वा पयाएजसि ? . भद्दाए सत्थवाहीए एयमट्टमणुजाणति. तते णं सा भद्दा सत्थवाही धण्णेणं सत्थवा-
 हेणं अब्भणुन्नाता समाणी हट्टतुट्टजावहयहियया विपुलं असणपाणखातिमसातिमं उवक्खडावेति त्ता सुबहुं पुप्फगंधवत्थमट्टालंकारं गेण्हति त्ता सयाओ गिहाओ निग्गच्छति त्ता राय-
 गिहं नगरं मज्झंमज्झेणं निग्गच्छति त्ता जेणेव पोक्खरिणी तेणेव उवागच्छति त्ता पुक्खरिणीए तीरे सुबहुं पुप्फजावमट्टालंकारं ठवेइ त्ता पुक्खरिणि ओगाहइ त्ता जलमज्जणं करेति
 जलकीडं करेति त्ता ण्हाया कयबलिकम्मा उल्लपडसाडिगा जाइं तत्थ उप्पलाइं जाव सहस्सपत्ताइं ताइं गिण्हइ त्ता पुक्खरिणीओ पच्चोरुहइ त्ता तं सुबहुं पुप्फवत्थगंधमट्टं गेण्हति त्ता
 जेणामेव नागघरए य जाव वेसमणघरए य तेणेव उवागच्छति त्ता तत्थ णं नागपडिमाण य जाव वेसमणपडिमाण य आलोए पणामं करेइ ईसिं पच्चुन्नमइ त्ता लोमहत्थगं परामुसइ
 त्ता नागपडिमाओ य जाव वेसमणपडिमाओ य लोमहत्थेणं पमज्जति उदगधाराए अब्भुक्खेति त्ता पम्ह(ल)सुकुमालाए गंधकासाईए गायाइं लूहेइ त्ता महुरिहं वत्थारूहणं च
 मल्लारूहणं च गंधारूहणं च चुन्नारूहणं च वन्नारूहणं च करेति त्ता जाव धूवं डहति त्ता जानुपायपडिया पंजलिउडा एवं वदासी-जइ णं अहं दारगं वा दारिगं वा पयायामि तो णं
 अहं जायं च जाव अणुवड्ढेमिच्चि कट्ठु उवातियं करेति त्ता जेणेव पोक्खरिणी तेणेव उवागच्छति त्ता विपुलं असणं ४ आसाएमाणी जाव विहरति, जिमिया जाव सुइभूया जेणेव
 सए गिहे तेणेव उवागया. अदुत्तरं च णं भद्दा सत्थवाही चाउदसट्टमुद्धिपुन्नमासिणीसु विपुलं असणं ४ उवक्खडेति त्ता बहवे नागा य जाव वेसमणा य उवायमाणी जाव एवं च णं
 विहरति । ४१ । तते णं सा भद्दा सत्थवाही अन्नया कयाई केणति कालंतरेणं आवन्नसत्ता जाया यावि होत्था, तते णं तीसे भद्दाए सत्थवाहीए दोसु मासेसु वीतिकंतेसु ततिए मासे

वट्टमाणे इमेयारूवे दोहले पाउब्भूते-धन्नाओ णं ताओ अम्मयाओ जाव कयलक्खणाओ णं ताओ अम्मयाओ जाओ णं विउलं असणं ४ मुबहुयं पुप्फवत्थगंधमल्लालंकारं गहाय
 मित्तनातिनियगसयणसंबंधिपरिण(प्र० नयर)महिलियाहि य सद्धिं संपरिवुडाओ गयगिहं नगरं मज्झमज्जेणं निग्गच्छति ता जेणेव पुक्खरिणी तेणेव उवागच्छति ता पोक्खरिणी
 ओगाहिति ता ण्हायाओ कयबलिकम्माओ सव्वालंकारविभूसियाओ विपुलं असणं ४ आसाएमाणीओ जाव पडिभुंजेमाणीओ दोहलं विणेति एवं संपेहेति ता कट्ठं जाव जलंते जेणेव
 धण्णे सत्थवाहे तेणेव उवागच्छति ता धण्णं सत्थवाहं एवं वदासी-एवं खलु देवाणुप्पिया ! मम तस्स गब्भस्स जाव विणेति तं इच्छामि णं देवाणुप्पिया ! तुम्हेहिं अम्भणुत्ता समाणी
 जाव विहरित्ते, अहासुहं देवाणुप्पिया ! मा पडिबन्धं करेह, तते णं सा भद्दा सत्थवाही धण्णेणं सत्थवाहेणं अम्भणुत्ता समाणी हट्टुत्ता जाव विपुलं असणं ४ जाव ण्हाया जाव
 उल्लपडसाडगा जेणेव नागधरते जाव धूवं दहति ता पणामं करेति ता जेणेव पोक्खरिणी तेणेव उवागच्छति ता तते णं ताओ मित्तनातिजावनगरमहिल्याओ भहं सत्थवाहिं सव्वालं-
 कारविभूसितं करेति, तते णं सा भद्दा सत्थवाही ताहिं मित्तनातिनियगसयणसंबंधिपरिजणनगरमहिलियाहिं सद्धिं तं विपुलं असणं ४ जाव परिभुंजमाणी य दोहलं विणेति ता जामेव
 दिसिं पाउब्भूता तामेव दिसिं पडिगया, तते णं सा भद्दा सत्थवाही संपुब्बदोहला जाव तं गब्भं मुहंमुहेणं परिवहति, तते णं सा भद्दा सत्थवाही णवणं मासाणं बहुपडिपुत्ताणं अद्धट्ट-
 माण(प्र० य)राइंदियाणं सुकुमालपाणिपादं जाव दारगं पयाया, तते णं तस्स दारगस्स अम्मापियगे पढमे दिवसे जातकम्मं करेति ता तहेव जाव विपुलं असणं ४ उवक्खडावेति ता
 तहेव मित्तनाति० भोयावेत्ता अयमेयारूवं गोष्ठं गुणनिप्फलं नामधेज्जं करेति जम्हा णं अम्हं इमे दारए बहूणं नागपडिमाण य जाव वेसमणपडिमाण य उवाइयल्ले णं तं होउ णं
 अम्हं इमे दारए देवदिन्ननामेणं, तते णं तस्स दारगस्स अम्मापियगे नामधेज्जं करेति देवदिन्नेति, तते णं तस्स दारगस्स अम्मापियगे जायं च दायं च भायं च अक्खयनिहिं च
 अणुवट्ठिति । ४२ । तते णं से पंथए दासचेडए देवदिन्नस्स बालग्गाही जाए, देवदिन्नं दारयं कडीए गेण्हति ता बहूहिं डिंभएहि य डिंभगाहि य दारएहि य दारियाहि य (×कुमारेहि
 य) कुमारियाहि य सद्धिं संपरिवुडे (×अभिरममाणे) अभिरमति, तते णं सा भद्दा सत्थवाही अन्नया कयाई देवदिन्नं दारयं ण्हायं कयबलिकम्मं कयकोउयमंगलपायच्छित्तं सव्वा-
 लंकारभूसियं करेति पंथयस्स दासचेडयस्स हत्थयंसि दलयति, तते णं से पंथए दासचेडए भद्दाए सत्थवाहीए हत्थाओ देवदिन्नं दारगं कडिए गिण्हति ता सयातो गिहाओ पडिनि-
 क्खमति ता बहूहिं डिंभएहि य डिंभियाहि य जाव कुमारियाहि य सद्धिं संपरिवुडे जेणेव गयमग्गे तेणेव उवागच्छइ ता देवदिन्नं दारगं एगंते ठावेति ता बहूहिं डिंभएहि य जाव
 कुमारियाहि य सद्धिं संपरिवुडे पमत्ते यावि होत्था, इमे य णं विजए तक्करे गयगिहस्स नगरस्स बहूणि बागणि य अवदागणि य तहेव जाव आभोएमाणे मग्गेमाणे गवेसेमाणे जेणेव
 देवदिन्ने दारए तेणेव उवागच्छइ ता देवदिन्नं दारगं सव्वालंकारविभूसियं पासति ता देवदिन्नस्स दारगस्स आभरणालंकारेसु मुच्छिए गट्टिए गिट्टे अज्झोववन्ने पंथयं दासचेडं
 पमत्तं पासति ता दिसालोयं करेति ता देवदिन्नं दारगं गेण्हति ता कक्खंसि अल्लियावेति ता उत्तरिज्जेणं पिहेइ ता सिग्घं तुरियं चवलं चेतियं रायगिहस्स नगरस्स अवदारेणं निग्ग-
 च्छति ता जेणेव जिण्णुज्जाणे जेणेव भग्गकूवए तेणेव उवागच्छति ता देवदिन्नं दारयं जीवियाओ ववगेवेति ता आभरणालंकारं गेण्हति ता देवदिन्नस्स दारगस्स सरीरगं निप्पाणं
 निच्चेट्टं जीवियविप्पजटं भग्गकूवए पक्खिवति ता जेणेव मालुयाकच्छए तेणेव उवागच्छति ता मालुयाकच्छयं अणुपविसति ता निच्चले निप्फंदे तुसिणीए दिवसे खि(प्र० ख)वेमाणे
 चिट्ठति । ४३ । तते णं से पंथए दासचेडे तओ मुहुत्तंतरस्स जेणेव देवदिन्ने दारए ठविए तेणेव उवागच्छति ता देवदिन्नं दारगं तंसि ठाणंसि अपासमाणे रोयमाणे कंदमाणे विलव-
 माणे देवदिन्नदारगस्स सव्वतो समंता मग्गणगवेसणं करेइ ता देवदिन्नस्स दारगस्स कत्थइ सुतिं वा खुतिं वा पउत्तिं वा अलभमाणे जेणेव सए गिहे जेणेव धण्णे सत्थवाहे तेणेव उवा-
 गच्छति ता धण्णं सत्थवाहं एवं वदासी-एवं खलु सामी ! भद्दा सत्थवाही देवदिन्नं दारयं ण्हायं जाव मम हत्थंसि दलयति तते णं अहं देवदिन्नं दारयं कडीए गिण्हामि ता जाव
 मग्गणगवेसणं करेमि तं न णज्जति णं सामी ! देवदिन्ने दारए केणइ (प्र० णीइए वा) हते वा अवहिए वा अवक्खित्ते वा पायंवडिए धण्णस्स सत्थवाहस्स एतमट्टं निवेदेति, तते णं से
 धण्णे सत्थवाहे पंथयदासचेडयस्स एतमट्टं सोच्चा णिसम्म तेण य महया पुत्तसोएणाभिभूते समाणे परसुणियत्तेव चंपगपायवे धसत्ति धरणीयलंसि सव्वंगेहिं सन्निवइए, तते णं से
 धण्णे सत्थवाहे ततो मुहुत्तंतरस्स आसत्थे प(कि)च्छागयपाणे देवदिन्नस्स दारगस्स सव्वतो समंता मग्गणगवेसणं करेति देवदिन्नस्स दारगस्स कत्थइ सुइं वा खुइं वा पउत्तिं वा अलभमाणे
 जेणेव सए गिहे तेणेव उवागच्छइ ता महत्थं पाहुडं गेण्हति ता जेणेव नगरगुत्तिया तेणेव उवागच्छति ता तं महत्थं पाहुडं उवणेति ता एवं वयासी-एवं खलु देवाणुप्पिया ! मम पुत्ते
 भद्दाए भारियाए अत्तए देवदिन्ने नाम दारए इट्ठे जाव उंवरपुप्फपिव दुल्लहे सवणयाए किमंग पुण पासणयाए ?, तते णं सा भद्दा देवदिन्नं ण्हायं सव्वालंकारविभूसियं पंथगस्स हत्थे

दलानि जाव पायवडिए तं मम निवेदेति, तं इच्छामि णं देवाणुप्पिया ! देवदिन्नदारगस्स सव्वओ समंता मग्गणगवेसणं काउं(प्र० कयं) । तए णं ते नगरगोत्तिया धण्णेणं सत्थवाहेणं एवं वुत्ता समाणा सन्नद्धवद्धवस्मियकवया उप्पीलियसगसणवट्टिया जाव गहियाउहपहरणा धण्णेणं सत्थवाहेणं सद्धिं रायगिहस्स नगरस्स बहूणि अतिगमणाणि य जाव पवासु य मग्गणगवेसणं करेमाणा रायगिहाओ नगराओ पडिनिक्खमंति ता जेणेव जिण्णुजाणे जेणेव भग्गकूवए तेणेव उवागच्छंति ता देवदिन्नस्स दारगस्स सरीरगं निप्पाणं निच्छेदं जीव (प्र० जीविय प्र० जाव) विप्पजढं पासंति ता हा हा अहो अकज्जमितिकट्टु देवदिन्नं दारगं भग्गकूवाओ उत्तारंति ता धण्णस्स सत्थवाहस्स हत्थेणं दलयंति । ४४ । तते णं ते नगरगुत्तिया विजयस्स तक्करस्स पयमग्गमणुगच्छमाणा जेणेव मालुयाकच्छए तेणेव उवागच्छंति ता मालुयाकच्छयं अणुपविसंति ता विजयं तक्करं ससक्खं सहोढं सगेवेज्जं जीवग्गाहं गिण्हंति ता अट्टिमुट्टिजाणुकोप्परपहारसंभग्गमहियगत्तं करेंति ता अवउडाबन्धणं करेंति ता देवदिन्नगस्स दारगस्स आभरणं गेण्हंति ता विजयस्स तक्करस्स गीवाए बंधंति ता मालुयाकच्छगाओ पडिनिक्खमंति ता जेणेव रायगिहे नगरे तेणेव उवागच्छंति ता रायगिहं नगरं अणुपविसंति ता रायगिहे नगरे सिंघाडगति यचउक्कचच्चरमहापहपहेसु कसप्पहारे य लयप्पहारे य छिवापहारे य निवाएमाणा छारं च धूलिं च कयवरं च उवरिं पक्किरमाणा २ महया २ सहेणं उग्घोसेमाणा एवं वदंति-एस देवाणुप्पिया ! विजए नामं तक्करे जाव गिद्धे विव आमिसभक्खी बालघायए बालमारए, तं नो खलु देवाणुप्पिया ! एयस्स केति (* राया वा रायपुत्ते वा) रायमच्चे वा अवरज्झति एत्थट्टे (जन्नत्थ पा०) अप्पणो सयातिं कम्माहं अवरज्झंतित्तिकट्टु जेणामेव चारगसाला तेणामेव उवागच्छंति ता हडिबंधणं करेंति ता भत्तपाणनिगेहं करेंति ता तिसंझं कसप्पहारे य जाव निवाएमाणा विहरंति, तते णं से धण्णे सत्थवाहे मित्तनानिनियगसयणसंबंधिपरियणेणं सद्धिं रोयमाणे जाव विलवमाणे देवदिन्नस्स दारगस्स सरीरस्स महया इड्ढीसक्कारसमुदएणं निहरणं करेंति ता बहूहं लोतियातिं मयगकिच्चाहं करेंति ता केणइ कालंतरेणं अवगयसोए जाए यावि होत्था । ४५ । तते णं से धण्णे सत्थवाहे अन्नया कयाई लहूसयंसि रायावराहंसि संपलत्ते जाए यावि होत्था, तते णं ते नगरगुत्तिया धण्णं सत्थवाहं गेण्हंति ता जेणेव चारगे तेणेव उवागच्छंति ता चारगं अणुपवेसंति ता विजएणं तक्करेणं सद्धिं एगयओ हडिबंधणं करेंति, तते णं सा भदा भारिया कल्लं जाव जलंते विपुलं असणं ४ उवक्खडेति ता भोयणपिडयं (ए पा०) क(भ पा०) रेंति ता भोयणाइं पक्खिवति लंछियमुद्धियं करेइ ता एगं च सुरभिवारिपडिपुन्नं दगवारयं करेति ता पंथयं दासचेडं सदावेति ता एवं वदासी-गच्छ णं तुमं देवाणुप्पिया ! इमं विपुलं असणं ४ गहाय चारगसालाए धण्णस्स सत्थवाहस्स उवणेहि, तते णं से पंथए भदाए सत्थवाहीए एवं वुत्ते समाणे हट्टुट्टे तं भोयणपिडयं तं च सुरभिवारिपडिपुन्नं दगवारयं गेण्हति ता सयाओ गिहाओ पडिनिक्खमति ता रायगिहे नगरे मज्झंमज्झेणं जेणेव चारगसाला जेणेव धन्ने सत्थवाहे तेणेव उवागच्छति ता भोयणपिडयं ठावेति ता उल्लंछति ता भायणाइं गेण्हति ता भायणाइं धोवेति ता हत्थसोयं दलयति ता धण्णं सत्थवाहं तेणं विपुलेणं असणं ० ४ परिवेसति, तते णं से विजए तक्करे धण्णं सत्थवाहं एवं वदासी-तुमण्णं देवाणुप्पिया ! मम एयाओ विपुलाओ असणं ० ४ संविभागं करेहि, तते णं से धण्णे सत्थवाहे विजयं तक्करं एवं वदासी-अवि याइं अहं विजया ! एयं विपुलं असणं ४ कायाणं वा सुणगाणं वा दलएज्जा उक्कुरुडियाए वा णं लुड्डेज्जा नो चेव णं तव पुत्तघायगस्स पुत्तमारगस्स अरिस्स वेरियस्स पडिणीयस्स पच्चामित्तस्स एत्तो विपुलाओ असणं ० ४ संविभागं करेज्जामि, तते णं से धण्णे सत्थवाहे तं विपुलं असणं ४ आहारेति ता तं पंथयं पडिविसज्जेति, तते णं से पंथए दासचेडे तं भोयणपिडयं गिण्हति ता जामेव दिसिं पाउब्भूते तामेव दिसिं पडिगए, तते णं तस्स धण्णस्स सत्थवाहस्स तं विपुलं असणं ४ आहारियस्स समाणस्स उच्चारपासवणे णं उब्बाहित्था, तते णं से धण्णे सत्थवाहे विजयं तक्करं एवं वदासी-एहि ताव विजया ! एगंतमवक्कमामो जेणं अहं उच्चारपासवणं परिट्टवेमि, तते णं से विजए तक्करे धण्णं सत्थवाहं एवं वयासी-तुब्भं देवाणुप्पिया ! विपुलं असणं ४ आहारियस्स अत्थि उच्चारे वा पासवणे वा ममन्नं देवाणुप्पिया ! इमेहिं बहूहिं कसप्पहारेहि य जाव लयापहारेहि य तण्हाए य लुहाए य परब्भवमाणस्स णत्थि केई उच्चारे वा पासवणे वा तं छंदेणं तुमं देवाणुप्पिया ! एगंते अवक्कमित्ता उच्चारपासवणं परिट्टवेति, तते णं से धण्णे सत्थवाहे विजएणं तक्करेणं एवं वुत्ते समाणे तुसिणीए संचिट्ठति, तते णं से धण्णे सत्थवाहे मुहुत्तंतरस्स बलियतराणं उच्चारपासवणेणं उब्बाहिज्जमाणे विजयं तक्करं एवं वदासी-एहि ताव विजया ! जाव अवक्कमामो, तते णं से विजए धण्णं सत्थवाहं एवं वदासी-जइ णं तुमं देवाणुप्पिया ! ततो विपुलाओ असणं ० ४ संविभागं करेसि ततोऽहं तुमेहिं सद्धिं एगंतं अवक्कमामि, तते णं से धण्णे सत्थवाहे विजयं एवं वदासी-अहन्नं तुब्भं ततो विपुलाओ असणं ० ४ संविभागं करिस्सामि, तते णं से विजए धण्णस्स सत्थवाहस्स एयमट्टं पडिसुणेति, तते णं से विजए धण्णेणं सद्धिं एगंतं अवक्कमेति उच्चारपासवणं परिट्टवेति आयंते चोक्खे परमसुइभूए तमेव ठाणं उवसंकमित्ताणं विहरति, तते णं सा भदा कल्लं जाव जलंते विपुलं असणं ४ जाव परिवेसेति, तते णं से धण्णे सत्थवाहे विजयस्स तक्करस्स ततो विपुलाओ असणं ० ४ संविभागं करेति, तते णं से धण्णे सत्थवाहे पंथयं दासचेडं विसज्जेति, तते णं से पंथए भोयणपिडयं गहाय चारगाओ (१०६)

पडिनिक्खमति ता रायगिहं नगरं मज्झंसज्जेणं जेणेव सए गेहे जेणेव भद्दा भारिया तेणेव उवागच्छइ ता भद्दं सत्थवाहिणि एवं वयासी-एवं खलु देवाणुप्पिए ! धण्णे सत्थवाहे त(प्र० हे)व पुत्तघायगस्स जाव पच्चामित्तस्स ताओ विपुलाओ असण० ४ संविभागं करेति । ४६ । तते णं सा भद्दा सत्थवाही पंथयस्स दासचेडयस्स अंतिए एयमट्ठं सोच्चा आसुरुत्ता रुद्धा जाव मिसिमिसेमाणा धण्णस्स सत्थवाहस्स पओसमावज्जति, ततो णं से धण्णे सत्थवाहे अन्नया कयाई मित्तनातिनियगसयणसंबंधिपरियणेणं सएण य अत्थसारेणं रायकज्जातो अप्पाणं मोयावेति ता चारगसालाओ पडिनिक्खमति ता जेणेव अलंकारियसभा तेणेव उवागच्छति ता अलंकारियकम्मं करेति (प्र० करावेइ) ता जेणेव पुक्खवरिणी तेणेव उवागच्छति ता अह (प्र० अहाकय) धोयमट्ठियं गेण्हति पोक्खवरिणी ओगाहति ता जलमज्जणं करेति ता ण्हाए कयबलिकम्मं जाव रायगिहं नगरं अणुपविसति रायगिहनगरस्स मज्झंसज्जेणं जेणेव सए गिहे तेणेव पधारेत्थ गमणाए, तते णं तं धण्णं सत्थवाहं एज्जमाणं पासित्ता रायगिहे नगरे बहवे नियगसेट्ठिसत्थवाहपभितओ आढंति परिजाणंति सक्कारेति सम्माणेति अच्भुट्ठेति सरीरकुसलं पुच्छंति, तते णं से धण्णे जेणेव सए गिहे तेणेव उवागच्छति ता जाविय से तत्थ बाहिरिया परिसा भवति तं०-दासाति वा पेस्साति वा भियगाइ वा भाइ-इदगाइ वा सेवि य णं धण्णं सत्थवाहं एज्जंतां पासति ता पायवडियाए खेमकुसलं पुच्छंति, जावि य से तत्थ अचमंतरिया परिसा भवति तं०-मायाइ वा पियाइ वा भायाति वा भगिणीति वा सावि य णं धण्णं सत्थवाहं एज्जमाणं पासति ता आसणाओ अच्भुट्ठेति ता कंठाकंठियं अवयासिय बाहप्पमोक्खणं करेति, तते णं से धण्णे सत्थवाहे जेणेव भद्दा भारिया तेणेव उवागच्छति, तते णं सा भद्दा धण्णं सत्थवाहं एज्जमाणं पासति पासित्ता णो आढाति नो परियाणाति अणाढायमाणी अपरिजाणमाणी तुसिणीया परम्मुहा संचिट्ठति, तते णं से धण्णे सत्थवाहे भद्दं भारियं एवं वदासी-किञ्चं तुच्चं देवाणुप्पिए ! न तुट्ठी वा न हरिसे वा नाणंदे वा जं मए सएणं अत्थसारेणं रायकज्जातो अप्पाणं विमोतिए ?, तते णं सा भद्दा धण्णं सत्थवाहं एवं वदासी-कहन्नं देवाणुप्पिया ! मम तुट्ठी वा जाव आणंदे वा भविस्सति ? जेणं तुमं मम पुत्तघायगस्स जाव पच्चामित्तस्स ततो विपुलातो असण० ४ संविभागं करेसि, तते णं से धण्णे भद्दं एवं वदासी-नो खलु देवाणुप्पिए ! धम्मोत्ति वा तवोत्ति वा कयपडिकइया वा लोगजत्ताति वा नायएति वा घाडिएति वा सहाएति वा सुहिति वा ततो विपुलातो असण० ४ संविभागे कए नन्नत्थ सरीरचिंताए, तते णं सा भद्दा धण्णेणं सत्थवाहेणं एवं वुत्ता समाणी हट्ठ जाव आसणातो अच्भुट्ठेति कंठाकंठिं अवयासेति खेमकुसलं पुच्छति ता ण्हाया जाव पायच्छित्ता विपुलातिं भोगभोगाइं भुंजमाणी विहरति, तते णं से विजए तक्करे चारगसालाए तेहिं बंधेहिं वहेहिं कसप्पहारेहि य जाव तण्हाए य छुहाए य परब्भवमाणे कालमासे कालं किच्चा नरएमु नेरइयत्ताए उववन्ने, से णं तत्थ नेरइए जाते काले कालोभासे जाव वेयणं पच्चणुभवमाणे विहरइ, से णं ततो उव्वट्ठित्ता अणादीयं अणवदग्गं दीहमद्दं चाउरंतसंसारकंतरं अणुपरियट्ठिस्सति, एवामेव जंबू ! जे णं अम्हं निग्गंथो वा निग्गंथी वा आयरियउवज्झायाणं अंतिए मुंटे भवित्ता आगाराओ अणगारियं पव्वतिए समाणे विपुलमणिमुत्तियधणकणगरयणसारेणं लुब्धमति सेविय एवं चेव । ४७ । तेणं कालेणं० धम्मघोसा नामं थेरा भगवंतो जातिसंपन्ना जाव पुव्वाणुपुव्विं चरमाणा जाव जेणेव रायगिहे नगरे जेणेव गुणसिलए चेतिए जाव अहापडिरूवं उग्गहं उग्गिण्हित्ता संजमेणं तवसा अप्पाणं भावेमाणा विहरंति, परिसा निग्गया धम्मो कहिओ, तते णं तस्स धण्णस्स सत्थवाहस्स बहुजणस्स अंतिए एतमट्ठं सोच्चा णिसम्म इमेनारूवे अज्झत्थिते जाव समुप्पज्जित्था-एवं खलु भगवंतो जातिसंपन्ना इहमागया इह संपत्ता तं इच्छामि णं थेरे भगवंते वंदामि नमं-सामि ण्हाते जाव सुद्धप्पावेसातिं मज्झइं वत्थाइं पवरपरिहिए पायविहारचारेणं जेणेव गुणसिले चेतिए जेणेव थेरा भगवंतो तेणेव उवागच्छति ता वंदति नमंसति । तते णं थेरा धण्णस्स विचित्तं धम्ममातिक्खंति, तते णं से धण्णे सत्थवाहे धम्मं सोच्चा एवं वदासी-सद्दहामि णं भंते ! निग्गंथं पावयणं जाव बहूणि वासाणि सामन्नपरियागं पाउणित्ता भत्तं पच्चक्खाति ता मासियाए संलेहणाए मट्ठिं भत्ताइं अणसणाए छेदेइ ता कालमासे कालं किच्चा सोहम्मे कप्पे देवत्ताए उववन्ने, तत्थ णं अत्थेगतियाणं देवाणं चत्तारि पलिओवमाइं ठिती पत्तत्ता, तत्थ णं धण्णस्स देवस्स चत्तारि पलिओवमाइं ठिती पणत्ता, से णं धण्णे देवे ताओ देवलोयाओ आउक्खएणं ठितीक्खएणं भवक्खएणं अणंतरं चयं चइत्ता महाविदेहे वासे सिज्झिहिति जाव सब्बदुक्खाणमंतं करेहिति । ४८ । जहा णं जंबू ! धण्णेणं सत्थवाहेणं नो धम्मोत्ति वा जाव विजयस्स तक्करस्स ततो विपुलाओ असण० ४ संविभागे कए नन्नत्थ सरीरसारक्खणट्ठाए एवामेव जंबू ! जे णं अम्हं निग्गंथे वा० जाव पव्वतिए समाणे ववगयण्हाणुम्महणपुप्फगंधमल्लालंकारविभूसे इमस्स ओरालियसरीरस्स नो वन्नहेउं वा रूवहेउं वा विसयहेउं वा असणं ४ आहारमाहारेति नन्नत्थ णाणदंसणचरित्ताणं वहणयाए से णं इहलोए चेव बहूणं समणाणं समणीणं सावगाण य साविगाण य अच्चणिज्जे जाव पज्जुवासणिज्जे भवति परलोएऽवि य णं नो बहूणि हत्थच्छेयणाणि य कन्नच्छेयणाणि य नासाच्छेयणाणि य एवं हिययउप्पाडणाणि य वसणुप्पाडणाणि य उल्लंबणाणि य पाविहिति

अणातीयं च णं अणवदग्गं दीह जाव वीतिवतिस्सति जहा व से धण्णे मत्थवाहे । एवं खलु जंबू ! समणेणं जाव दोच्चस्स नायज्झयणस्स अयमट्ठे पणत्तेत्तिवेमि । ४९ । इति संघाड-
गज्झयणं २ ॥ जति णं भंते ! समणेणं भगवया महावीरेणं दोच्चस्स अज्झयणस्स नायाधम्मकहाणं अयमट्ठे पं० तइअस्स अज्झयणस्स के अट्ठे पं० ? । एवं खलु जंबू ! तेणं कालेणं० चंपा
नामं नयरी होत्था वन्नओ, तीसे णं चंपाए नयरीए बहिया उत्तरंपुरच्छिमे दिसीभाए सुभूमिभाए नामं उज्जाणे होत्था सव्वोउय० सुरम्मे नंदणवणे इव सुहसुगभिसीयलच्छायाए
समणुबद्धे, तस्स णं सुभूमिभागस्स उज्जाणस्स उत्तरओ एगदेसंमि मालुयाकच्छए वन्नओ, तत्थ णं एगा वणमऊरी दो पुट्टे परियागते पिट्ठुंडीपंडुरे (प्र० पंडुरे) निव्वणे निरुवहए
भिन्नमुट्ठिप्पमाणे मऊरीअंडए पसवति ता सएणं पक्खवाएणं सारक्खमाणी संगोवेमाणी संविट्ठेमाणी विहरति, तत्थ णं चंपाए नयरीए दुवे सत्थवाहदारगा पग्गिसंति तं०-जिणद-
त्तपुत्ते य सागरदत्तपुत्ते य, सहजायया सहवड्ढियया सहपंसुकीलियया सहदारदरिसी अन्नमन्नमणुरत्तया अन्नमन्नमणुव्वयया अन्नमन्नच्छंदाणुवत्तया अन्नमन्नहियतिच्छियंका-
रया अन्नमन्नेसु गिहेसु किच्चाइं करणिज्जाइं पच्चणुभवमाणा विहरन्ति । ५० । तते णं तेसिं मत्थवाहदारगाणं अन्नया कयाई एगतओ महियाणं समुवागयाणं सन्निसन्नाणं सन्निवि-
ट्ठाणं इमेयारूवे मिहो कहासमुत्तावे समुप्पज्जित्था-जन्नं देवाणुप्पिया ! अम्हं सुहं वा दुक्खं वा पव्वज्जा वा विदेसगमणं वा समुप्पज्जति तन्नं अम्हेहिं एगयओ समेच्चा (संहिच्च पा०)
णित्थरियव्वंतिकट्ठु अन्नमन्नमेयारूवं संगारं पडिसुणेति ता सकम्मसंपउत्ता जाया यावि होत्था । ५१ । तत्थ णं चंपाए नयरीए देवदत्ता नामं गणिया परिवसइ अट्ठ्ठा जाव
भत्तपाणा चउसट्ठिकलापंडिया चउसट्ठिगणियागुणोववेया अउणत्तीसं विसेसे रममाणी एक्कवीसरतिगुणप्पहाणा बत्तीसपुरिसोवयाग्गकुसला णवंगसुत्तपडिबोहिया अट्ठारसदेसीभासा-
विमारया मिंगागगारचारूवेसा संगयगयहसिय० (सुंदरथणजघणवयणनयणआवण्णरूवजोव्वणविलासकलिया पा०) ऊसियझया सहस्सलंभा विदिन्नलत्तचामग्गालवियणिया
कक्कीरहप्पयाया यावि होत्था बहूणं गणियामहम्माणं आहवच्चं जाव विहरति, तते णं तेसिं मत्थवाहदारगाणं अन्नया कदाई पुच्चा(प्र० पच्चा)वरण्हकालसमयंसि जिमियभुत्तुत्तरागयाणं
समाणाणं आयन्ताणं चोक्खाणं परमसुतिभूयाणं मुहामणवरगयाणं इमेयारूवे मिहोकहासमुत्तावे समुप्पज्जित्था, तं मेयं खलु अम्हं देवाणुप्पिया ! कट्ठं जाव जलंते विपुलं असणं ४
उवक्खडावेत्ता तं विपुलं असणं ४ धूवपुप्फगंधवत्थं गहाय देवदत्ताए गणियाए सद्धिं सुभूमिभागस्स उज्जाणस्स उज्जाणसिरिं पच्चणुभवमाणाणं विहरत्तिएत्तिकट्ठु अन्नमन्नस्स
एयमट्ठं पडिसुणेति ता कट्ठं पाउभूए कोटुंबियपुरिसे सहावेति ता एवं वदासी-गच्छह णं देवाणुप्पिया ! विपुलं असणं ४ उवक्खडेह ता तं विपुलं असणं ४ धूवपुप्फं गहाय जेणेव
सुभूमिभागे उज्जाणे जेणेव णंदापुक्खरिणी तेणामेव उवागच्छह ता नंदापुक्खरिणीतो अदूरसामंते थूणामंडवं आहणह ता आसित्तसम्मज्जितोवलित्तं सुगंध जाव कलियं करेह ता
अम्हं पडिवालेमाणा २ चिट्ठह जाव चिट्ठंति, तए णं मत्थवाहदारगा दोच्चं पि कोटुंबियपुरिसे सहावेति ता एवं वदासी-खिप्पामेव लहुकरणजुत्तजोतियं (एहिं पा०) समखुग्गालिहाणं
समलिहियतिक्खग्गसिं गएहिं (जंबूणयमयकलावजुत्तपडिविसिट्ठएहिं पा०) रययामयघंटसुत्तरज्जुपवरकंचणग्गचियणत्थपग्गहोवग्गहितेहिं नीलुप्पलकयामेलएहिं पवरगोणजुवाणएहिं
नाणामणिरयणकंचणघंटियाजालपरिक्खित्तं पवरलक्खणोववेयं (सुजातजुगजुत्तउज्जुगपसत्थमुविरइयनिम्मियं पा०) जुत्तमेव पवहणं उवणेह, तेऽवि तहेव उवणेति, तते णं ते सत्थ-
वाहदारगा ण्हाया जाव सरीरा पवहणं दुरूहंति ता जेणेव देवदत्ताए गणियाए गिहं तेणेव उवागच्छंति ता पवहणातो पच्चोरुहंति ता देवदत्ताए गणियाए गिहं अणुपविसंति, तते णं
सा देवदत्ता गणिया सत्थवाहदारए एज्जमाणे पासति ता हट्ठ० आसणाओ अम्भुट्ठेति ता सत्तट्ठ पदातिं अणुगच्छति ता ते सत्थवाहदारए एवं वदासी-संदिसंतु णं देवाणुप्पिया !
किमिहागमणप्पतोयणं ? तते णं ते सत्थवाहदारगा देवदत्तं गणियं एवं वदासी-इच्छामो णं देवाणुप्पिए ! तुम्हेहिं सद्धिं सुभूमिभागस्स उज्जाणस्स उज्जाणसिरिं पच्चणुभवमाणा विह-
रित्तए, तते णं सा देवदत्ता तेसिं सत्थवाहदारगाण एतमट्ठं पडिसुणेति ता ण्हाया कयकिच्चा किं ते पवर जाव सिरिसमाणवेसा जेणेव सत्थवाहदारगा तेणेव समा(प्र० उवा)गया, तते
णं ते सत्थवाहदारगा देवदत्ताए गणियाए सद्धिं जाणं दुरूहंति ता चंपाए नयरीए मज्झमज्झेणं जेणेव सुभूमिभागे उज्जाणे जेणेव नंदापुक्खरिणी तेणेव उवागच्छंति ता पवहणातो
पच्चोरुहंति ता नंदापुक्खरिणीं ओगाहंति ता जलमज्जणं करंति जलकीडं करंति ण्हाया देवदत्ताए सद्धिं पच्चुत्तरंति जेणेव थूणामंडवे तेणेव उवागच्छंति ता थूणामंडवं अणुपविसंति
ता सव्वालंकारविभूसिया आसत्था वीसत्था सुहासणवरगया देवदत्ताए सद्धिं तं विपुलं असणं ४ धूवपुप्फगंधवत्थं आसाएमाणा वीसाएमाणा परिभुंजेमाणा एवं च णं विहरंति,
जिमियभुत्तुत्तरागयाविय णं समाणा देवदत्ताए सद्धिं विपुलातिं माणुस्सगाइं कामभोगाइं भुंजमाणा विहरंति । ५२ । तते णं ते सत्थवाहदारगा पुद्वावर (प्र० पच्च०)ण्हकालसमयंसि
देवदत्ताए गणियाए सद्धिं थूणामंडवाओ पडिनिक्खमंति ता हत्थसंगेह्ठीए सुभूमिभागे बहूसु आलीघरएसु य कयलीघरेसु य लयाघरएसु य अच्छणघरएसु य पेच्छणघरएसु य

पमाहणघरएसु य मोहणघरएसु य मालघरएसु य जालघरएसु य कुसुमघरएसु (जाव पा०) उज्जाणमिरि पच्चणुभवमाणा विहरंति । ५३ । तते णं ते सत्थवाहदारया जेणेव से मालु-
याकच्छाए तेणेव पहारेत्थ गमणाए, तते णं मा वणमऊरी ते सत्थवाहदारए एजमाणे पामति ता भीया तत्था० महया २ सहेण केकारवं विणिस्सुयमाणी २ मालुयाकच्छाओ पडि-
निक्खमति ता एगंसि रुक्खमा(प्र० डा)लयंसि ठिच्चा ते सत्थवाहदारए मालुयाकच्छयं च अणिमिसाए दिट्ठीए पेहमाणी २ चिट्ठति, तते णं ते सत्थवाहदारगा अण्णमन्नं सदावेति
ता एवं वदामी-जहा(ओ) णं देवाणुप्पिया ! एसा वणमऊरी अम्हे एजमाणा पामित्ता भीता तत्था तसिया उव्विग्गा पलाया महता २ सहेणं जाव अम्हे मालुयाकच्छयं च पेच्छ-
माणी २ चिट्ठति तं भवियव्वमेत्थ कारणेणंतिकट्ठु मालुयाकच्छयं अंतो अणुपविसंति ता तत्थ णं दो पुट्टे परियागये जाव पामित्ता अन्नमन्नं सदावेति ता एवं वदामी-सेयं खलु देवा-
णुप्पिया ! अम्हं इमे वणमऊरीअंडए माणं जाइमंताणं कुकुडियाणं अंडएसु अ पक्खियावेत्तए, तते णं ताओ जातिमन्ताओ कुकुडियाओ ताए अंडए सए य अंडए सएणं पक्ख-
वाएणं मारक्खमाणीओ संगोवेमाणीओ विहरिस्संति, तते णं अम्हं एत्थं दो कीलावणगा मऊरपोयगा भविस्संतित्तिकट्ठु अन्नमन्नं एतमट्ठं पडिसुणेंति ता सए सए दासचेडे
सदावेति ता एवं वदामी-गच्छह णं तुब्भे देवाणुप्पिया ! इमे अंडए गहाय सगाणं जाइमंताणं कुकुडीणं अंडएसु पक्खिवह जाव तेवि पक्खिवेंति, तते णं ते सत्थवाहदारगा देवदत्ताए
गणियाए सद्धिं सुभूमिभागस्स उज्जाणस्स उज्जाणमिरि पच्चणुभवमाणा विहरित्ता तमेव जाणं दुरूढा समाणा जेणेव चंपानयरी जेणेव देवदत्ताए गणियाए गिहे तेणेव उवागच्छंति
देवदत्ताए गिहं अणुपविसंति देवदत्ताए गणियाए विपुलं जीवियारिहं पीडिदाणं दलयंति ता सद्धारेंति ता सम्माणेंति ता देवदत्ताए गिहातो पडिनिक्खमंति ता जेणेव सयाइं २ गिहाइं
तेणेव उवागच्छंति ता मकम्ममंपउत्ता जाया यावि होत्था । ५४ । तते णं जे से सागरदत्तपुत्ते सत्थवाहदारए से णं कट्ठं जाव जलंते जेणेव से वणमऊरीअंडए तेणेव उवागच्छति ता
तंसि मऊरीअंडयंसि संकिते कंखिते वित्तिगिच्छाममावस्से भेयममावस्से कलुमममावस्से किञ्चं ममं एत्थं कीलावणमऊरीपोयए भविस्सति उदाहु णो भविस्सइत्तिकट्ठु तं मऊरीअंडयं
अभिकखणं २ उव्वत्तेति परियत्तेत्ति आमागेति संसारेति चालेति फंदेइ घट्टेति ग्वोभेति अभिकखणं २ कन्नमूलंसि टिट्ठियावेति, तते णं से मऊरीअंडए अभिकखणं २ उव्वत्तिज्जमाणे
जाव टिट्ठियाविज्जमाणे पोच्चडे जाते यावि होत्था, तते णं से सागरदत्तपुत्ते सत्थवाहदारए अन्नया कयाई जेणेव से मऊरअंडए तेणेव उवागच्छति ता तं मऊरीअंडयं पोच्चडेमेव पासति
ता अहो णं ममं एस कीलावणए मऊरीपोयए ण जाएत्तिकट्ठु ओहतमण जाव झियायति, एवामेव समणाउसो ! जो अम्हं निग्गंथो वा निग्गंथी वा आयरियउवज्झायाणं अंतिए
पव्वतिए समाणे पंचमहव्वएसु लजीवनिकाएसु निग्गंथे पावयणे संकिते जाव कलुमममावस्से से णं इहभवे चेव बहूणं समणाणं बहूणं समणीणं मावगाणं माविगाणं हीलणिज्जे निंद-
णिज्जे ग्विसणिज्जे गरहणिज्जे परिभवणिज्जे परलोएऽविय णं आगच्छति बहूणि दंडणाणि य जाव अणुपरियट्ठए । ५५ । तते णं से जिणदत्तपुत्ते जेणेव से मऊरीअंडए तेणेव उवागच्छति
ता तंसि मऊरीअंडयंसि निस्संकिते० सुवत्तए णं मम एत्थ कीलावणए मऊरीपोयए भविस्सतीतिकट्ठु तं मऊरीअंडयं अभिकखणं २ नो उव्वत्तेत्ति जाव नो टिट्ठियावेति, तते णं से
मऊरीअंडए अणुव्वत्तिज्जमाणे जाव अटिट्ठियाविज्जमाणे तेणं कालेणं० उच्चिन्ने मऊरपोयए एत्थ जाते, तते णं से जिणदत्तपुत्ते तं मऊरपोययं पासति ता हट्टुट्टे मऊरपोसए
सदावेति ता एवं वदामी-तुब्भे णं देवाणुप्पिया ! इमं मऊरपोययं बहूहिं मऊरपोसणपाउग्गेहिं दव्वेहिं अणुपुव्वेणं मारक्खमाणा संगोवेमाणा संवड्ढेह नट्ठुल्लगं च सिक्खावेह, तते णं
ते मऊरपोसगा जिणदत्तस्स पुत्तस्स एतमट्ठं पडिसुणेंति ता तं मऊरपोययं गेण्हति जेणेव सए गिहे तेणेव उवागच्छंति ता तं मयूरपोयगं जाव नट्ठुल्लगं सिक्खावेति, तते णं से मऊर-
पोयए उम्मुक्कबालभावे विन्ना(प्र० न्न)य० जोव्वणग० लक्खणवंजण० माणुम्माणप्पमाणपडिपुन्न० पक्खपेहुणकलावे विचित्तपिच्छे सत्तचंदए नीलकंठए नच्चणसीलए एगाए
चप्पुडियाए कयाए समाणीए अणेगातिं नट्ठुल्लगसयातिं केकारव(प्र० केयाइग) सयाणि य करेमाणे विहरति, तते णं ते मऊरपोसगा तं मऊरपोयगं उम्मुक्क जाव करेमाणं पासित्ता
मऊरपोयगं गेण्हति ता जिणदत्तस्स पुत्तस्स उव्वणेंति, तते णं से जिणदत्तपुत्ते सत्थवाहदारए मऊरपोयगं उम्मुक्क जाव करेमाणं पासित्ता हट्टुट्टे तेसिं विपुलं जीवियारिहं पीडिदाणं
जाव पडिविसजेइ, तए णं से मऊरपोतए जिणदत्तपुत्तेणं एगाए चप्पुडियाए कयाए समाणीए णंगोलाभंगसिरोधरे सेयावंगे गिण्हइ अवयारियपडन्नपक्खे उक्खित्तचंदकातियकलावे
केकाइयसयाणि विमुच्चमाणे णच्चइ, तते णं से जिणदत्तपुत्ते तेणं मऊरपोयएणं चंपाए नयरीए सिंघाडग जाव पहेसु सतिएहि य माहस्सिएहि य सयसाहस्सिएहि य पणिएहि
य जयं करेमाणे विहरति, एवामेव समणाउसो ! जो अम्हं निग्गंथो वा निग्गंथी वा पव्वतिए समाणे पंचसु महव्वएसु लसु जीवनिकाएसु निग्गंथे पावयणे निस्संकिते निक्खिए
निश्चितिगिच्छे से णं इहभवे चेव बहूणं समणाणं समणीणं जाव वीतिवतिस्सति । एवं खलु जंबू ! समणेणं० णायाणं तच्चस्स अज्झयणस्स अयमट्ठे पच्चत्तेत्तिवेमि । ५६ ॥ इति अण्ड-

गज्जयणं ३ ॥ जति णं भंते ! समणेणं भगवया महावीरेणं नायाणं तच्चस्स नायज्झयणस्स अयमट्ठे पन्नत्ते चउत्थस्स णं णाय० के अट्ठे पन्नत्ते ? एवं खलु जंबू ! तेणं कालेणं० वाणारसी नामं नयरी होत्था वन्नओ, तीसे णं वाणारसीए नयरीए बहिया उत्तरपुरच्छिमे दिसिभागे गंगाए महानदीए मयंगतीरद्वहे नामं दहे होत्था, अणुपुब्सुजायवप्पगंभीरसीयलजले (अच्छविमलसल्लिपल्लिच्छे पा०) संल्लपत्तपुप्फपलासे (पउमपत्तभिसमुणाले पा०) बहुउप्पलपउमकुमुयनलिणमुभगसोगंधियपुंडरीयमहापुंडरीयसयपत्तसहस्सपत्तकेसरपुप्फोवचिए पासादीए ४, तत्थ णं बहूणं मच्छाण य कच्छभाण य गाहाण य मगराण य सुंमुमाराण य सइयाण य साहस्सियाण य सयसाहस्सियाण य जूहाइं निब्भयाइं निरुव्विग्गाइं मुहंसुहेणं अभिरममाणगातिं २ विहरंति, तस्स णं मयंगतीरद्वहस्स अदूरसामंते एत्थ णं महं एगे मालुयाकच्छए होत्था वन्नओ, तत्थ णं दुवे पावसियालगा परिवसंति, पावा चंडा रोहा तल्लिच्छा साहसिया लोहितपाणी आभिसत्थी आभिसाहारा आभिसप्पिया आभिसल्लोला आमिसं गवेसमाणा रत्तिं वियालचारिणो दिया पच्छन्नं चावि चिट्ठंति, तते णं ताओ मयंगतीरद्वहातो अन्नया कदाई मुरियंसि चिरत्थभियंसि लुलियाए संझाए पविरलमाणुसंसि णिसंतपडिणिसंतंसि समाणंसि दुवे कुम्मगा आहारत्थी आहारं गवेसमाणा सणियं २ उत्तरंति, तस्सेव मयंगतीरद्वहस्स परिपेरंतेणं सव्वतो समंता परिघोलेमाणा २ वित्तिं कप्पेमाणा विहरंति, तयणंतरं च णं ते पावसियालगा आहारत्थी जाव आहारं गवेसमाणा मालुयाकच्छयाओ पडि- निक्खमंति ता जेणेव मयंगतीरे दहे तेणेव उवागच्छंति तस्सेव मयंगतीरद्वहस्स परिपेरंतेणं परिघोलेमाणा २ वित्तिं कप्पेमाणा विहरंति, तते णं ते पावसियालगा ते कुम्मए पासंति ता जेणेव ते कुम्मए तेणेव पहारेत्थ गमणाए, तते णं ते कुम्मगा ते पावसियालए एज्जमाणे पासंति ता भीता तत्था तसिया उव्विग्गा संजातभया हत्थे य पादे य गीवाओ य सण्हिं २ काएहिं साहरंति ता निच्चला निष्फंदा तुसिणीया संचिट्ठंति, तते णं ते पावसियालया जेणेव ते कुम्मगा तेणेव उवागच्छंति ता ते कुम्मगा सव्वतो समन्ता उव्वत्तेति परियत्तेति आसारंति संसा- रंति चालेंति घट्टेंति फंदेंति खोभेंति नहेहिं आलुपंति दंतेहि य अक्खोडेंति नो चेव णं संचाएन्ति तेसिं कुम्मगाणं सरीरस्स आबाहं वा पबाहं वा वाबाहं वा उप्पाएत्तए छविच्छेयं वा करेत्तए, तते णं ते पावसियालया एए कुम्मए दोच्चंपि तच्चंपि सव्वतो समंता उव्वत्तेति जाव नो चेव णं संचाएन्ति करेत्तए, ताहे संता तंता परितंता निच्चिन्ना समाणा सणियं २ पच्चो- सक्केति एगंतमवक्कमंति निच्चला निष्फंदा तुसिणीया संचिट्ठंति, तत्थ णं एगे कुम्मगे ते पावसियालए चिरंगते दूरंगए जाणित्ता सणियं २ एगं पायं निच्छुभति, तते णं ते पावसियालगा तेणं कुम्मएणं सणियं २ एगं पायं नीणियं पासंति ता ताए उक्किट्ठाए गईए सिग्घं चवलं तुरियं चंडं जतिणं वेगितं जेणेव से कुम्मए तेणेव उवागच्छंति ता तस्स णं कुम्मगस्स तं पायं नखेहिं आलुपंति दंतेहिं अक्खोडेंति ततो पच्छा मंसं च सोणियं च आहारंति ता तं कुम्मगं सव्वतो समंता उव्वत्तेति जाव नो चेव णं संचाइन्ति करेत्तए ताहे दोच्चंपि अवक्कमंति एवं चत्तारिवि पाया जाव सणियं २ गीवं णीणेति, तते णं ते पावसियालगा तेणं कुम्मएणं गीवं णीणियं पासंति ता सिग्घं चवलं ४ नहेहिं दंतेहिं कवालं विहाडेंति ता तं कुम्मगं जीवियाओ ववरोवेंति ता मंसं च सोणियं च आहारंति, एवामेव समणाउसो ! जो अम्हं निग्गंथो वा णिग्गंथी वा आयरियउवज्झायाणं अंतिए पव्वतिए समाणे पंच से इंदिया अगुत्ता भवंति से णं इहभवे चेव बहूणं समणाणं ४ हीलणिजे० परलोगेऽविय णं आगच्छति बहूणं दंडणाणं जाव अणुपरियट्ठति जहा से कुम्मए अगुत्तिंदिए, तते णं ते पावसियालगा जेणेव से दोच्चए कुम्मए तेणेव उवागच्छंति ता तं कुम्मगं सव्वतो समंता उव्वत्तेति जाव दंतेहिं अक्खोडेंति जाव करेत्तए, तते णं ते पावसियालगा दोच्चंपि तच्चंपि जाव नो संचाएन्ति तस्स कुम्मगस्स किंचि आबाहं वा विबाहं वा जाव छविच्छेयं वा करेत्तए ताहे संता तंता परितंता निच्चिन्ना समाणा जामेव दिसिं पाउब्भूता तामेव दिसिं पडिगया, तते णं से कुम्मए ते पावसियालए चिरंगए दूरंगए जाणित्ता सणियं २ गीवं नेणेति ता दिसावल्लोयं करेइ ता जमगसमगं चत्तारिवि पादे नीणेति ता ताए उक्किट्ठाए कुम्मगईए वीडवयमाणे २ जेणेव मयंगतीरद्वहे तेणेव उवा- गच्छइ ता मित्तनातिनियगसयणसंबंधिपरियणेणं सद्धिं अभिसमन्नागए यावि होत्था, एवामेव (प्र० एवमेव) समणाउसो ! जो अम्हं समणो वा० पंच से इंदियातिं गुत्तातिं भवंति जाव जहा उ से कुम्मए गुत्तिंदिए, एवं खलु जंबू ! समणेणं भगवया महावीरेणं चउत्थस्स नायज्झयणस्स अयमट्ठे पन्नत्ते पंचमस्स णं भंते ! णायज्झयणस्स के अट्ठे पन्नत्ते ? एवं खलु जंबू ! तेणं कालेणं० बारवती नामं नयरी होत्था पाईणपडीणायया उदीणदाहिणविच्छिन्ना नवजोयणविच्छिन्ना दुवालसजोयणायामा धणव्वड्मतिनिम्मिया चामीयरपवरपागारा णाणामणिपंचवन्नकविसीसगसोहिया अलयापु- रिसंकासा पमुतियपक्कीलिया पच्चक्खं देवल्लोयभूता, तीसे णं बारवतीए नयरीए बहिया उत्तरपुरच्छिमे दिसीभाए रेवतगे नाम पव्वए होत्था तुंगे गगणतल्लमणुलिहंतसिहरे णाणाविहगु- च्छगुम्मलयावल्लिपरिगते हंसमिगमयूरकोंचसारमचक्कवायमयणसालकोइलकुलोववेए अणेगतउकडगवियरउज्झरयपवायपच्चभारसिहरपउरे अच्छरगणदेवमंघचारणविजाहरमिहुणसं- विचिन्ने निच्चच्छणए दसारवरवीरपुरिसतेलोकबलवगाणं सोमे सुभगे पियदंसणे सुरूवे पासातीए ४, तस्स णं रेवयगस्स अदूरसामंते एत्थ णं णंदणवणे नामं उज्जाणे होत्था (१०७)

सबोउयपुष्पफलसमिद्धे रम्मे नंदणवणप्पगासे पासातीए ४, तस्स णं उज्जाणस्स बहुमज्झदेसभाए सुरप्पिए नामं जक्खाययणे होत्था दिव्वे० वन्नओ, तत्थ णं बारवतीए नयरीए कण्हे नामं वासुदेवे (× राया) परिवसति, से णं तत्थ समुहविजयपामोक्खाणं दसण्हं दसाराणं बलदेवपामोक्खाणं पंचण्हं महावीराणं उग्गसेणपामोक्खाणं सोलसण्हं राईसहस्साणं पज्जु-
न्नपामोक्खाणं अद्धुट्ठाणं कुमारकोडीणं संबपामोक्खाणं सट्ठीए दुइंतसाहस्सीणं वीरसेणपामोक्खाणं एक्कवीसाए वीरसाहस्सीणं महासेणपामोक्खाणं छप्पन्नाए बलवगसाहस्सीणं
रुप्पिणीपामोक्खाणं बत्तीसाए महिलासाहस्सीणं अणंगसेणापामोक्खाणं अणेगाणं गणियासाहस्सीणं अन्नेसिं च बहूणं ईसरतलवरजावसत्थवाह(प्र० सत्थाह)पभिईणं वेयड्ढगि-
रिसायरपेरंतस्स य दाहिणइढभरहस्स बारवतीए नयरीए य आहेवच्चं जाव पालेमाणे विहरति । ५८ । तत्थ णं बारवईए नयरीए थावच्चा णामं गाहावतिणी परिवसति अड्ढा जाव अप-
रिभूता, तीसे णं थावच्चाए गाहावतिणीए पुत्ते थावच्चापुत्ते णामं सत्थवाहदारए होत्था सुकुमालपाणिपाए जाव सुरूवे, तते णं सा थावच्चागाहावइणी तं दारयं सातिरेगअट्ठवासजा-
ययं जाणित्ता सोहणंसि तिहिकरणणक्खत्तमुहुत्तंसि कलायरियस्स उवणेंति, जाव भोगसमत्थं जाणित्ता बत्तीसाए इब्भ(कुल)बालियाणं एगदिवसेणं पाणिं गेण्हावेति बत्तीसतो दाओ
जाव बत्तीसाए इब्भकुलबालियाहिं सद्धिं विपुले सदफरिसरसरूव(वन्न)गंधे जाव भुंजमाणे विहरति, तेणं कालेणं० अरहा अरिट्ठनेमी सो चेव वण्णओ दसधणुस्सेहे नीलुप्पलगवल-
गुलियअयसियकुसुमप्पगासे अट्ठारसहिं समणसाहस्सीहिं सद्धिं संपरिवुडे चत्तालीसाए अजियासाहस्सीहिं सद्धिं संपरिवुडे पुट्ठाणुपुट्ठिं चरमाणे जाव जेणेव बारवती नगरी जेणेव रेव-
यगपट्टए जेणेव नंदणवणे उज्जाणे जेणेव सुरप्पियस्स जक्खस्स जक्खाययणे जेणेव असोगवरपायवे तेणेव उवागच्छइ त्ता अहापडिरूवं उग्गहं ओगिण्हित्ता संजमेणं तवसा अप्पाणं
भावेमाणे विहरति, परिसा निग्गया धम्मो कहिओ, तते णं से कण्हे वासुदेवे इमीसे कहाए लद्धट्ठे समाणे कोडुंबियपुरिसे सदावेति त्ता एवं वदासी-खिप्पामेव भो देवाणुप्पिया ! सभाए
सुहम्माए मेघोघरसियं गंभीरं महुरसहं कोमुदितं भेरिं तालेह, तते णं ते कोडुंबियपुरिसा कण्हेणं वासुदेवेणं एवं वुत्ता समाणा हट्ठ जाव मत्थए अंजलिं कट्ठु एवं सामी ! तहत्ति जाव
पडिसुणेंति त्ता कण्हस्स वासुदेवस्स अंतियाओ पडिनिक्खमंति त्ता जेणेव सहा सुहम्मा जेणेव कोमुदिया भेरी तेणेव उवागच्छंति तं मेघोघरसियं गंभीरं महुरसहं कोमुदितं (सामु-
याइगीं पा०) भेरिं तालेंति, ततो निद्धमहुरगंभीरपडिसुएणंपिव सारइएणं बलाहएणंपिव अणुरसियं भेरीए, तते णं तीसे कोमुदियाए भेरियाए तालियाए समाणीए बारवतीए नय-
रीए नवजोयणविच्छिन्नाए दुवालसजोयणायामाए सिंघाडगतियचउक्कचच्चरकंदरदरीए विवरकुहरगिरिसिहरनगरगोउरपासातदुवारभवणदेउलपडिसुयासयसहस्ससंकुलं सदं करेमाणे
बारवतिं नगरिं सन्निभतरबाहिरियं सव्वतो समंता से सहे विप्पसरित्था, तते णं बारवतीए नयरीए नवजोयणविच्छिन्नाए बारसजोयणायामाए समुहविजयपामोक्खा दस दसारा जाव
गणियासहस्साइं कोमुदीयाए भेरीए सदं सोच्चा णिसम्म हट्ठतुट्ठा जाव ण्हाया आविद्धवग्धारियमल्लदामकलावा अहतवत्थचंदणोक्किन्नगायसरीरा अप्पेगतिया हयगया एवं गयगया
रहसीयासंदमाणीगया अप्पेगतिया पायविहारचारेणं पुरिसवग्गुरापरिक्खत्ता कण्हस्स वासुदेवस्स अंतियं पाउब्भवित्था, तते णं से कण्हे वासुदेवे समुहविजयपामोक्खे दस दसारे जाव
अंतियं पाउब्भवमाणे पासति त्ता हट्ठतुट्ठ जाव कोडुंबियपुरिसे सदावेति त्ता एवं वदासी-खिप्पामेव भो देवाणुप्पिया ! चाउरंगिणीं सेणं सज्जेह विजयं च गंधहत्थि उवट्ठवेह, तेवि
तहत्ति उवट्ठवेंति, जाव पज्जुवासंति । ५९ । थावच्चापुत्तेवि णिग्गए जहा मेहे तहेव धम्मं सोच्चा णिसम्म जेणेव थावच्चागाहावतिणी तेणेव उवागच्छति त्ता पायग्गहणं करेति जहा
मेहस्स तहा चेव णिवेयणा जाहे नो संचाएति विसयाणुलोमाहि य विसयपडिकूलाहि य बहूहिं आघवणाहि य पन्नवणाहि य सन्नवणाहि य विण्णवणाहि य आघवित्तए वा ४ ताहे
अकामिया चेव थावच्चापुत्तदारगस्स निक्खमणमणुमन्नित्था, नवरं निक्खमणाभिसेयं पासामो, तए णं से थावच्चापुत्तेतुसिणीए संचिट्ठइ, तते णं सा थावच्चा आसणाओ अब्भुट्ठेति
२ महत्थं महग्घं महरिहं रायरिहं पाहुडं गेण्हति त्ता मित्त जाव संपरिवुडा जेणेव कण्हस्स वासुदेवस्स भवणवरपडिदुवारदेसभाए तेणेव उवागच्छति त्ता पडिहारदेसिएणं मग्गेणं
जेणेव कण्हे वासुदेवे तेणेव उवागच्छति त्ता करयल० वद्धावेति त्ता तं महत्थं महग्घं महरिहं रायरिहं पाहुडं उवणेइ त्ता एवं वदासी-एवं खलु देवाणुप्पिया ! मम एगे पुत्ते थावच्चापुत्ते
नामं दारए इट्ठे जाव से णं संसारभयउव्विग्गे इच्छति अरहओ अरिट्ठनेमिस्स जाव पव्वतित्तए, अहण्णं निक्खमणसक्कारं करेमि, इच्छामि णं देवाणुप्पिया ! थावच्चापुत्तस्स निक्ख-
ममाणस्स छत्तमउडचामराओ य विदिन्नाओ, तते णं कण्हे वासुदेवे थावच्चागाहावतिणीं एवं वदासी-अच्छाहि णं तुमं देवाणुप्पिए ! सुनिव्वुया वीसत्था, अहण्णं सयमेव थावच्चा-
पुत्तस्स दारगस्स निक्खमणसक्कारं करिस्सामि, तते णं से कण्हे वासुदेवे चाउरंगिणीए सेणाए विजयं हत्थिरयणं दुरूढे समाणे जेणेव थावच्चाए गाहावतिणीए भवणे तेणेव उवागच्छति
त्ता थावच्चापुत्तं एवं वदासी-मा णं तुमे देवाणुप्पिया ! मुंडे भवित्ता पव्वयाहि, भुंजाहि णं देवाणुप्पिया ! विउले माणुस्सए कामभोए मम बाहुच्छायापरिग्गहिए, केवलं देवाणुप्पियस्स

अहं णो संचाएमि वाउकायं उवग्गिमेणं गच्छमाणं निवारित्तए. अण्णे णं देवाणुप्पियस्स जे किंचिवि आबाहं वा वाबाहं वा उप्पाएति तं संव्वं निवारिमि, तते णं से थावच्चापुत्ते कण्हेणं वासुदेवेणं एवं वुत्ते समाणे कण्हं वासुदेवं एवं वयासी-जइ णं तुमं देवाणुप्पिया! मम जीवियंतकरणं मच्चुं एज्जमाणं निवारिसि जरं वा सरीरूवविणासिणिं सरीरं वा अइवयमाणं नि-
 वारेसि ततो णं अहं तव बाहुच्छायापरिग्गहिणं विउले माणुस्सए कामभोगे भुंजमाणे विहरामि, तते णं से कण्हे वासुदेवे थावच्चापुत्तेणं एवं वुत्ते समाणे थावच्चापुत्तं एवं वदासी-एए
 णं देवाणुप्पिया दुरतिकमणिजा णो खलु सक्का सुबल्लिएणावि देवेण वा दाणवेण वा णिवारित्तए णन्नत्थ अप्पणो कम्मक्खएणं. तं इच्छामि णं देवाणुप्पिया! अन्नाणमिच्छत्तअविर-
 इकसायसंचियस्स अत्तणो कम्मक्खयं करित्तए. तते णं से कण्हे वासुदेवे थावच्चापुत्तेणं एवं वुत्ते समाणे कोडुंबियपुरिसे सदावेति त्ता एवं वदासी-गच्छह णं देवाणुप्पिया! बारवतीए
 नयरीए सिंघाडगतियगचउक्कचच्चर जाव हत्थिग्वंधवग्गया महया २ सहेणं उग्घोसेमाणा २ उग्घोसणं करेह-एवं खलु देवा० थावच्चापुत्ते संसारभउव्विग्गे भीए जम्मणमरणाणं (प्र०
 जम्मजगमरणाणं) इच्छति अरहतो अरिट्टनेमिस्स अंतिए मुंडे भवित्ता पव्वइत्तए तं जो खलु देवाणुप्पिया! राया वा जुवराया वा देवी वा कुमारे वा ईसरे वा तलवरे वा कोडुंबिय०
 माडंबिय० इब्भसेट्टिसेणावइसत्थवाहे वा थावच्चापुत्तं पव्वयंतमणुपव्वयति तस्स णं कण्हे वासुदेवे अणुजाणति पच्छातुरस्सविय से मित्तनातिनियगसंबंधिपरिजणस्स जोगखेमं वट्टमाणं
 पडिवहत्तित्तिकट्टु घोसणं घोसेह जाव घोसंति, तते णं थावच्चापुत्तस्स अणुगएणं पुरिससहस्सं निक्खमणाभिमुहं ण्हायं सत्तालंकारविभूसियं पत्तेयं २ पुरिससहस्सवाहिणीसु सिबियासु
 दुरूढं समाणं मित्तणातिपरिवुडं थावच्चापुत्तस्स अंतियं पाउब्भूयं. तते णं से कण्हे वासुदेवे पुरिससहस्समंतियं पाउब्भवमाणं पासति त्ता कोडुंबियपुरिसे सदावेति त्ता एवं वयासी जहा
 मेहस्स निक्खमणाभिसेओ तहेव सेयापीएहिं ण्हावेंति त्ता जाव अरहतो अरिट्टनेमिस्स लत्ताइच्छत्तं पडागातिपडांगं पासंति त्ता विजाहरचारणे जाव पासित्ता सीबियाओ पच्चोरुहंति,
 तते णं से कण्हे वासुदेवे थावच्चापुत्तं पुरओ काउं जेणेव अरिहा अरिट्टनेमी सव्वं तं चैव आभरणं०, तते णं से थावच्चागाहावइणी हंसलक्खणेणं पडगसाडएणं आभरणमल्लालंकारे पडि-
 च्छइ हारवारिधारल्लिन्नमुत्तावलिप्पगासातिं अंसुणि विणिम्मंचमाणी २ एवं वदासी-जतियव्वं जाया! घडियव्वं जाया! परिक्रमियव्वं जाया! अस्सि च णं अट्टे णो पमादेयव्वं०
 जामेव दिसिं पाउब्भूता तामेव दिसिं पडिगया, तते णं से थावच्चापुत्ते पुरिससहस्सेहिं (प्र० ण) सद्धिं सयमेव पंचमुट्ठियं लोयं करेति जाव पव्वतिए, तते णं से थावच्चापुत्ते अणगारे
 जाते ईरियासमिए भासासमिए जाव विहरति, तते णं से थावच्चापुत्ते अरहतो अरिट्टनेमिस्स तहारूवाणं थेराणं अंतिए सामाइयमाइयातिं चोइस पुव्वाइं अहिज्जति त्ता बहूहिं
 चउत्थ जाव विहरति, तते णं अरिहा अरिट्टनेमी थावच्चापुत्तस्स अणगारस्स तं इब्भाइयं अणगारसहस्सं सीसत्ताए दलयति, तते णं से थावच्चापुत्ते अन्नया कयाई अरहं अरिट्टनेमिं
 वंदति नमंसति त्ता एवं वदासी-इच्छामि णं भंते! तुब्भेहिं अब्भणुन्नाते समाणे सहस्सेणं अणगारेणं सद्धिं बहिया जणवयविहारं विहरित्तए, अहासुहं देवाणुप्पिआ!, तते णं से थाव-
 च्चापुत्ते अणगारसहस्सेणं सद्धिं तेणं उरालेणं उग्गेणं पयत्तेणं पग्गहिणं० बहिया जणवयविहारं विहरति। ६०। तेणं कालेणं० सेलगपुरे नामं नगरे होत्था, सुभूमिभागे उज्जाणे, सेलए
 राया पउमावती देवी मंडुए कुमारे जुवराया, तस्स णं सेलगस्स पंथगपामोक्खा पंच मंतिसया होत्था उप्पत्तियाए वेणइयाए ४ उववेया रज्जधुरं चिंतयंति, थावच्चापुत्ते सेलगपुरे समो-
 सहे राया णिग्गतो धम्मकहा, धम्मं सोच्चा जहा णं देवाणुप्पियाणं अंतिए बहवे उग्गा भोगा जाव चइत्ता हिरन्नं जाव पव्वइया तहा णं अहं नो संचाएमि पव्वतित्तए, अहन्नं देवाणु-
 प्पियाणं अंतिए पंचाणुव्वइयं जाव समणोवासए जाव अहिगयजीवाजीवे जाव अप्पाणं भावेमाणे विहरंति, पंथगपामोक्खा पंच मंतिसया समणोवासया जाया, थावच्चापुत्ते बहिया
 जणवयविहारं विहरति। ६१। तेणं कालेणं० सोगंधिया नाम नयरी होत्था वन्नओ, नीलासोए उज्जाणे वन्नओ, तत्थ णं सोगंधियाए नयरीए सुदंसणे नामं नगरसेट्ठी परिवसति
 अइहे जाव अपरिभूते। तेणं कालेणं० सुए नामं परिव्वायए होत्था रिउव्वेयजजुव्वेयसामवेयअथव्वणवेयसट्ठितंतकुसले संखाणे सिक्खाणकप्पे कप्पे वागरणे लंदे निरुत्ते जोइसामयणे
 संखसमए लद्धट्टे(पंचजमपंचनियमजुत्तं प्र०)(वेयाणं इतिहासपंचमाणं निघंटुल्लट्ठाणं संगोवंगाणं सरहस्साणं सारए वारए पारए सडंगवी सट्ठितंतविसारए अच्चेसु य बंभण्णएसु सत्थेसु
 सुपरिणिट्टिए पा०) सोयमूलयं दसप्पयारं परिव्वायगधम्मं दाणधम्मं च सोयधम्मं च तित्थाभिसेयं च आघवेमाणे पन्नवेमाणे धाउरत्तवत्थपवरपरिहिणं तिदंडकुंडियल्लत्तल्लुकरो-
 डियल्लण्णालयंकुसपवित्तयकेसरीहत्थगए परिव्वायगसहस्सेणं सद्धिं संपरिवुडे जेणेव सोगंधियानगरी जेणेव परिव्वायगावसहे तेणेव उवागच्छइ त्ता परिव्वायगावसहंसि भंडगनिक्खेवं
 करेइ त्ता संखसमएणं अप्पाणं भावेमाणे विहरति, तते णं सोगंधियाए सिंघाडग० बहुजणो अन्नमन्नस्स एवमाइक्खइ-एवं खलु सुए परिव्वायए इह हव्वमागते जाव विहरइ, परिसा
 निग्गया सुदंसणे निग्गए (प्र० णो निइ), तते णं से सुए परिव्वायए तीसे परिसाए सुदंसणस्स य अच्चेसिं च बहूणं संखाणं परिकहेति-एवं खलु सुदंसणा! अम्हं सोयमूलए धम्मं पन्नत्ते,

सेऽविय सोए दुविहे पं० तं०-दबसोए य भावसोए य, दबसोए य उदएणं मट्टियाए य, भावसोए दब्भेहि य मंतेहि य, जन्नं अम्हं देवाणुप्पिया ! किंचि असुई भवति तं सन्नं सज्जो पुढवीए आलिप्पति ततो पच्छा सुद्धेण वारिणा पक्खालिज्जति ततो तं असुई सुई भवति, एवं खलु जीवा जलाभिसेयपूयप्पाणो अविग्घेणं सग्गं गच्छंति, तते णं से सुदंसणे सुयस्स अंतिए धम्मं सोच्चा हट्ठे सुयस्स अंतियं सोयमूलयं धम्मं गेण्हति ता परिब्बायए विपुलेणं असण० ४ वत्थ० पडिलाभेमाणे जाव विहरति, तते णं से सुए परिब्बायगे सोगंधियाओ नगरीओ निग्गच्छति ता बहिया जणवयविहारं विहरति, तेणं कालेणं० थावच्चापुत्तस्स समोसरणं, परिसा निग्गया, सुदंसणोवि णीइ, थावच्चापुत्तं वंदति नमंसति ता एवं वदासी-तुम्हाणं किंमूलए धम्मे पं० ?, तते णं थावच्चापुत्ते सुदंसणेणं एवं वुत्ते समाणे सुदंसणं एवं वदासी-सुदंसणा ! विणयमूले धम्मे पं०, सेविय विणए दुविहे पं० तं०-अगारविणए अणगारविणए य, तत्थ णं जे से अगारविणए से णं पंच अणुब्रयातिं सत्त सिक्खावयातिं एक्कारस उवासगपडिमाओ, तत्थ णं जे से अणगारविणए से णं पंच महब्रयाइं, तं०-सद्वातो पाणातिवायाओ वेरमणं सद्वाओ मुसावायाओ वेरमणं सद्वातो अदिच्चादाणातो वेरमणं सद्वाओ मेहुणाओ वेरमणं सद्वाओ परिग्गहाओ वेरमणं सद्वाओ राइभोयणाओ वेरमणं जाव मिच्छादंसणस-ल्लाओ वेरमणं, दसविहे पक्खवाणे बारस भिक्खुपडिमाओ, इच्चेएणं दुविहेणं विणयमूलएणं धम्मेणं अणुपुब्बेणं अट्टकम्मपगंठीओ खवेत्ता लोयग्गपइट्ठाणे भवति, तते णं थावच्चापुत्ते सुदंसणं एवं वदासी-तुम्भे णं सुदंसणा ! किंमूलए धम्मे पं० ?, अम्हाणं देवाणुप्पिया ! सोयमूले धम्मे पं० जाव सग्गं गच्छंति, तते णं थावच्चापुत्ते सुदंसणं एवं वदासी-सुदंसणा ! से जहानामए केइ पुरिसे एगं महं रुहिरकयं वत्थं रुहिरेण चेव धोवेज्जा तते णं सुदंसणा ! तस्स रुहिरकयस्स वत्थस्स रुहिरेण चेव पक्खालिज्जमाणस्स अत्थि काई सोही ?, णो तिणट्ठे समट्ठे, एवामेव सुदंसणा ! तुम्भंपि पाणातिवाएणं जाव मिच्छादंसणसल्लेणं नत्थि सोही जहा तस्स रुहिरकयस्स वत्थस्स रुहिरेण चेव पक्खालिज्जमाणस्स नत्थि सोही, सुदंसणा ! से जहानामए केई पुरिसे एगं महं रुहिरकयं वत्थं सज्जियाखारेणं अणुलिप्पति ता पयणं आरुहेति ता उण्हं गाहेइ ता ततो पच्छा सुद्धेणं वारिणा धोवेज्जा, से णूणं सुदंसणा ! तस्स रुहिरकयस्स वत्थस्स सज्जियाखारेणं अणुलिप्पति पयणं आरुहियस्स उण्हं गाहितस्स सुद्धेणं वारिणा पक्खालिज्जमाणस्स सोही भवति ?, हंता भवइ, एवामेव सुदंसणा ! अम्हंपि पाणाइवायवेरमणेणं जाव मिच्छादंसणसल्लवेरमणेणं अत्थि सोही, जहा वा तस्स रुहिरकयस्स वत्थस्स जाव सुद्धेणं वारिणा पक्खालिज्जमाणस्स अत्थि सोही, तत्थ णं से सुदंसणे संबुद्धे थावच्चापुत्तं वंदति नमंसति ता एवं वदासी-इच्छामि णं भंते ! धम्मं सोच्चा जाणित्तए जाव समणोवासए जाते अहिगयजीवाजीवे जाव पडिलाभेमाणे विहरति, तए णं तस्स सुयस्स परिब्बायगस्स इमीसे कहाए लद्धट्ठस्स समाणस्स अयमेयारूवे जाव समुप्पजित्था-एवं खलु सुदंसणेणं सोयं धम्मं विप्पजहाय विणयमूले धम्मे पडिवन्ने, तं सेयं खलु मम सुदंसणस्स दिट्ठिं वामेत्तए, पुणरवि सोयमूलए धम्मे आघवित्तएत्तिकट्ठु एवं संपेहेति ता परिब्बायगसहस्सेणं सद्धिं जेणेव सोगंधिया नगरी जेणेव परिब्बायगावसहे तेणेव उवागच्छति ता परिब्बायगावसहंसि भंडनिक्खेवं करेति ता धाउरत्तवत्थपवरपरिहिते पविरलपरिब्बायगेणं सद्धिं संपरिवुडे परिब्बायगावसहाओ पडिनिक्खमति ता सोगंधियाए नयरीए मज्झंमज्झेणं जेणेव सुदंसणस्स गेहे जेणेव सुदंसणे तेणेव उवागच्छति, तते णं से सुदंसणे तं सुयं एज्जमाणं पासति ता नो अब्भुट्ठेति नो पच्चुग्गच्छति णो आढाइ नो परियाणाइ नो वंदति तुसि-णीए संचिद्धति, तए णं से सुए परिब्बायए सुदंसणं अणब्भुट्ठियं० पासित्ता एवं वदासी-तुमं णं सुदंसणा ! अन्नदा ममं एज्जमाणं पासित्ता अब्भुट्ठेसि जाव वंदसि, इयाणिं सुदंसणा ! तुमं ममं एज्जमाणं पासित्ता जाव णो वंदसि तं कस्स णं तुमे सुदंसणा ! इमेयारूवे विणयमूले धम्मे पडिवन्ने, तते णं से सुदंसणे सुएणं परिब्बायएणं एवं वुत्ते समाणे आसणाओ अब्भुट्ठेति ता करयल० सुयं परिब्बायगं एवं वदासी-एवं खलु देवाणुप्पिया ! अरहतो अरिट्ठनेमिस्स अंतेवासी थावच्चापुत्ते नामं अणगारे जाव इहमागए इह चेव नीलासोए उज्जाणे विहरति, तस्स णं अंतिए विणयमूले धम्मे पडिवन्ने, तते णं से सुए परिब्बायए सुदंसणं एवं वदासी य-तं गच्छामो णं सुदंसणा ! तव धम्मायरियस्स थावच्चापुत्तस्स अंतियं पाउब्भवामो इमाइं च णं एयारूवार्ति अट्ठाइं हेऊइं पसिणार्ति कारणार्ति वागरणार्ति पुच्छामो, तं जइ णं मे से इमाइं अट्ठातिं जाव वागरति तते णं अहं वंदामि नमंसामि, अह मे से इमातिं अट्ठातिं जाव नो से वाकरेति तते णं अहं एएहिं चेव अट्ठेहिं हेऊहिं निप्पट्ठपसिणवागरणं करिस्सामि, तते णं से सुए परिब्बायगसहस्सेणं सुदंसणेण य सेट्ठिणा सद्धिं जेणेव नीलासोए उज्जाणे जेणेव थावच्चापुत्ते अणगारे तेणेव उवागच्छति ता थावच्चापुत्तं एवं वदासी-जत्ता ते भंते ! जवणिज्जं ते अब्बाबाहंपि ते फासुयं विहारं ते ?, तते णं से थावच्चापुत्ते सुएणं परिब्बायगेणं एवं वुत्ते समाणे सुयं परिब्बायगं एवं वदासी-सुया ! जत्तावि मे जवणिज्जंपि मे अब्बाबाहंपि मे फासुयविहारंपि मे, तते णं से सुए थावच्चापुत्तं एवं वदासी-किं भंते ! जत्ता ?, सुया ! जन्नं मम णाणदंसणचरित्तवसंजममातिएहिं जोएहिं जयणा से तं जत्ता, से किं तं भंते ! जवणिज्जं ?, सुया ! जवणिज्जे दुविहे पं० तं०-इंदियजवणिज्जे य नोइंदियजवणिज्जे य, से

किं तं इंदियजवणिज्जे ?, सुया ! जन्नं ममं सोतिंदियचक्खिंदियघाणिंदियजिब्भिंदियफासिंदियाइं निरुवहयाइं वसे वट्ठंति से तं इंदियजवणिज्जे, से किं तं नोइंदियजवणिज्जे ?, सुया ! जन्नं कोहमाणमायालोभा खीणा उवसंता नो उदयंति से तं नोइंदियजवणिज्जे, से किं तं भंते ! अब्बाबाहं ?, सुया ! जन्नं मम वातियपित्तियसिंभियसन्निवाइया विविहा रोगातंका णो उदीरंति सेत्तं अब्बाबाहं, से किं तं भंते ! फासुयविहारं ?, सुया ! जन्नं आरामेसु उज्जाणेसु देवउलेसु सभासु पवासु इत्थिपसुपंडगविवज्जियासु वसहीसु पाडिहारियं पीढफलगसेज्जासं-थारयं उग्गिण्हित्ताणं विहरामि सेत्तं फासुयविहारं, सरिसवया ते भंते ! किं भक्खेया अभक्खेया ?, सुया ! सरिसवया भक्खेयावि अभक्खेयावि, से केणट्टेणं भंते ! एवं वुच्चइ-सरिसवया भक्खेयावि अभक्खेयावि ?, सुया ! सरिसवया दुविहा पं० तं०-मित्तसरिसवया धन्नसरिसवया य, तत्थ णं जे ते मित्तसरिसवया ते तिविहा पं० तं०-सहजायया सहवड्ढियया सहपं-सुकीलियया, ते णं समणाणं निग्गंथाणं अभक्खेया, तत्थ णं जे ते धन्नसरिसवया तं दुविहा पं० तं०-सत्थपरिणया य असत्थपरिणया य, तत्थ णं जे ते असत्थपरिणया ते समणाणं निग्गंथाणं अभक्खेया, तत्थ णं जे ते सत्थपरिणया ते दुविहा पं० तं०-फासुगा य अफासुगा य, अफासुया णं सुया ! नो भक्खेया, तत्थ णं जे ते फासुया ते दुविहा पं० तं०-जातिया य अजातिया य, तत्थ णं जे ते अजातिया ते अभक्खेया, तत्थ णं जे ते जाइया ते दुविहा पं० तं०-एसणिज्जा य अणेसणिज्जा य, तत्थ णं जे ते अणेसणिज्जा ते णं अभक्खेया, तत्थ णं जे ते एसणिज्जा ते दुविहा पं० तं०-लद्धा य अलद्धा य, तत्थ णं जे ते अलद्धा ते अभक्खेया, तत्थ णं जे ते लद्धा ते निग्गंथाणं भक्खेया, एएणं अट्टेणं सुया ! एवं वुच्चति-सरिसवया भक्खेयावि अभक्खेयावि, एवं कुलत्थावि भाणियद्वा, नवरि इमं णाणत्तं-इत्थिकुलत्था य धन्नकुलत्था य, इत्थिकुलत्था तिविहा पं० तं०-कुलवधुया य कुलमाउयाइ य कुलधूयाइ य, धन्नकुलत्था तहेव, एवं मासावि, नवरि इमं नाणत्तं-मासा तिविहा पं० तं०-कालमासा य अत्थमासा य धन्नमासा य, तत्थ णं जे ते कालमासा ते णं दुवालसविहा पं० तं०-सावणे जाव आसाढे, ते णं अभक्खेया, अत्थमासा दुविहा-हिरन्नमासा य सुवण्णमासा य, ते णं अभक्खेया, धन्नमासा तहेव, एगे भवं दुवे भवं अणेगे भवं अक्खए भवं अब्बए भवं अवट्ठिए भवं अणेगभूयभावे भविएवि भवं ?, सुया ! एगेवि अहं दुवेवि अहं जाव अणेगभूयभावभविएवि अहं, से केणट्टेणं भंते ! एगेवि अहं जाव सुया ! दव्वट्ठयाए एगे अहं नाणदंसणट्ठयाए दुवेवि अहं पएसट्ठयाए अक्खएवि अहं अव्वएवि अहं अवट्ठिएवि अहं उवओगट्ठयाए अणेगभूयभावभविएवि अहं, एत्थ णं से सुए संबुद्धे थावच्चापुत्तं वंदति नमंसति ता एवं वदासी-इच्छामि णं भंते ! तुब्भं अंतिए केवलपन्नत्तं धम्मं निसामित्तए, धम्मकहा भाणियद्वा, तए णं से सुए परिट्ठायए थावच्चापुत्तस्स अंतिए धम्मं सोच्चा णिसम्म एवं वदासी-इच्छामि णं भंते ! परिट्ठायगसहस्सेणं सद्धिं संपरिवुडे देवाणुप्पियाणं अंतिए मुंडे भवित्ता पव्वइत्तए, अहासुहं जाव उत्तरपुरच्छिमे दिसीभागे तिडंडयं जाव धाउरत्ताओ य एगंते एडेति ता सयमेव सिंहं उप्पाडेति ता जेणेव थावच्चापुत्ते० मुंडे भवित्ता जाव पव्वतिए सामाइयमातियाइं चोइस पुट्ठातिं अहिज्जति, तते णं थावच्चापुत्ते सुयस्स अणगारसहस्सं सीसत्ताए वियरति, तते णं से थावच्चापुत्ते सोगंधियाओ नीलासोयाओ पडिनिक्खमति २ बहिया जणवयविहारं विहरति, तते णं से थावच्चापुत्ते अणगारसहस्सेणं सद्धिं संपरिवुडे जेणेव पुंडरीए पव्वए तेणेव उवागच्छइ ता पुंडरीयं पव्वयं सणियं २ दुरूहति ता मेघघणसन्निगासं देवसन्निवायं पुढवीसिलापट्ठयं जाव पाओवगमणं णुवन्ने, तते णं से थावच्चापुत्ते बहूणि वासाणि सामन्नप-रियागं पाउणित्ता मासियाए संलेहणाए सट्ठिं भत्तातिं अणसणाए जाव केवलवरनाणदंसणं समुप्पाडित्ता ततो पच्छा सिद्धे जाव पहीणे । ६१ । तते णं से सुए अन्नया कयाई जेणेव सेलगपुरे नगरे जेणेव सुभूमिभागे उज्जाणे समोसरणं परिसा निग्गया सेलओ निग्गच्छति धम्मं सोच्चा जं नवरं देवाणुप्पिया ! पंथगपामोक्खातिं पंच मंतिसयातिं आपुच्छामि मण्डुयं च कुमारं रज्जे ठावेमि ततो पच्छा देवाणुप्पियाणं अन्तिए मुंडे भवित्ता आगाराओ अणगारियं पव्वयामि, अहासुहं, तते णं से सेलए राया सेलगपुरं नयरं अणुपविसति ता जेणेव सए गिहे जेणेव बाहिरिया उवट्ठाणसाला तेणेव उवागच्छइ ता सीहासणं सन्निसन्ने, तते णं से सेलए राया पंथयपामोक्खे पंच मंतिसए सदावेइ ता एवं वदासी-एवं खलु देवाणुप्पिया ! मए सुयस्स अंतिए धम्मे णिसंते सेवि य मे धम्मे इच्छिए पडिच्छिए अभिरुतिए अहं णं देवाणुप्पिया ! संसारभयउव्विग्गे जाव पव्वयामि, तुब्भे णं देवाणुप्पिया ! किं करेह किं ववसह किं वा ते (प्र० भे) हियइच्छियंति ?, तते णं ते पंथयपामोक्खा पंचमंतिसया सेलगं रायं एवं वदासी-जइ णं तुब्भे देवा० संसार जाव पव्वयह (अम्हाणं देवाणुप्पिया ! किमन्ने आहारे वा आलंभे वा x) अम्हेऽविय णं देवा० संसारभयउव्विग्गा जाव पव्वयामो जहा देवाणुप्पिया ! अम्हं बहुसु कज्जेसु य कारणेसु य जाव तहा णं पव्वतियाणवि समाणाणं बहुसु जाव चक्खुभूते, तते णं से सेलगो पंथगपामोक्खे पंच मंतिसए एवं व०-जति णं देवाणु० तुब्भे संसार जाव पव्वयह तं गच्छह णं देवा० सएसु २ कुटुंबेसु जेट्टे पुत्ते कुटुंबमज्झे ठावेत्ता पुरिससहस्सवाहिणीओ सीयाओ दुरूढा समाणा मम अंतियं पाउब्भवहत्ति, तहेव पाउब्भवन्ति, तते णं से सेलए राया पंच मंतिसयाइं पाउब्भवमाणातिं पासति ता हट्ठतुट्टे कोटुंबि-यपुरिसे सदावेति ता एवं वदासी-खिप्पामेव भो देवाणुप्पिया ! मंडुयस्स कुमारस्स महत्थं जाव रायाभिसेयं उवट्ठवेह० अभिसिंचति जाव राया विहरति, तते णं से सेलए (१०८)

मंडुयं रायं आपुच्छइ, तते णं से मंडुए राया कोडुंबियपुरिसे० एवं वदासी-खिप्पामेव सेलगपुरं नगरं आसित्त जाव गंधवट्टिभूतं करेह य कारवेह य ता एयमाणत्तियं पच्चप्पिणह, तते णं से मंडुए दोच्चं पि कोडुंबियपुरिसे सदावेइ ता एवं वदासी-खिप्पामेव सेलगस्स रन्नो महत्थं जाव निक्खमणाभिसेयं जहेव मेहस्स तहेव णवरं पउमावतीदेवी अग्गंकेसे पडिच्छति सव्वेवि पडि-ग्गहं गहाय सीयं दुरूहंति, अवसेसं तहेव जाव सामातियमातियातिं एक्कारस अंगाइं अहिज्जति ता बहूहिं चउत्थ जाव विहरति, तए णं से सुए सेलयस्स अणगारस्स ताइं पंथयपा-मोक्खातिं पंच अणगारसयाइं सीसत्ताए वियरति, तते णं से सुए अन्नया कयाई सेलगपुराओ नगराओ सुभूमिभागाओ उज्जाणाओ पडिनिक्खमति ता बहिया जणवयविहारं विह-रति, तते णं से सुए अणगारे अन्नया कयाई तेणं अणगारसहस्सेणं सद्धिं संपरिवुडे पुद्धानुपुद्धिं चरमाणे गामाणुगामं विहरमाणे जेणेव पोंडरीए पव्वए जाव सिद्धे । ६२ । तते णं तस्स सेलगस्स रायरिसिस्स तेहिं अंतेहि य पंतेहि य तुच्छेहि य लूहेहि य अरसेहि य विरसेहि य सीएहि य उण्हेहि य कालातिकंतेहि य पमाणाइकंतेहि य णिच्चं पाणभोयणेहि य पयइ-सुकुमालयस्स सुहोचियस्स सरीरगंसि वेयणा पाउब्भूता (रोगायंके पा०) उज्जला जाव दुराहेयासा कंडुयदाहपित्तजरपरिगयसरीरे यावि विहरति, तते णं से सेलए तेणं रोयायंकेणं सुक्के० जाए यावि होत्था, तते णं से सेलए अन्नया कदाई पुद्धानुपुद्धिं चरमाणे जाव जेणेव सुभूमिभागे जाव विहरति, परिसा निग्गया, मंडुओऽवि निग्गओ, सेलयं अणगारं जाव वंदति नमं० पज्जुवासति, तते णं से मंडुए राया सेलयस्स अणगारस्स सरीरयं सुक्कं भुक्खं जाव सद्वाबाहं सरोगं पासति ता एवं वदासी-अहं णं भंते ! तुब्भं अहापवित्तेहिं तिगिच्छएहिं अहापवित्तेणं ओसहभेसज्जेणं भत्तपाणेणं तिगिच्छं आउंटावेमि, तुब्भे णं भंते ! मम जाणसालासु समोसरह फासुअं एसणिज्जं पीढफलगसेज्जासंथारगं ओगिण्हित्ताणं विहरह, तते णं से सेलए अणगारे मंडुयस्स रन्नो एयमट्ठं तहत्ति पडिसुणेति, तते णं से मंडुए सेलयं वंदति नमंसति ता जामेव दिसिं पाउब्भूते तामेव दिसिं पडिगए, तते णं से सेलए कल्लं जाव जलंते सभंडमत्तोवगरणमायाए पंथयपामोक्खेहिं पंचहिं अणगारसएहिं (× सद्धिं) सेलगपुरमणुपविसति ता जेणेव मंडुयस्स जाणसाला तेणेव उवागच्छति ता फासुयं पीढ जाव विह-रति, तते णं से मंडुए चिगिच्छए सदावेति ता एवं वदासी-तुब्भे णं देवाणुप्पिया ! सेलयस्स फासुएसणिज्जेणं जाव तेगिच्छं आउट्टेह, तते णं तेगिच्छया मंडुएणं रन्ना एवं वुत्ता हट्ठे० सेलयस्स अहापवित्तेहिं ओसहभेसज्जभत्तपाणेहिं तेगिच्छं आउट्टेति, मज्जपाणयं च से उवदिसंति, तते णं तस्स सेलयस्स अहापवित्तेहिं जाव मज्जपाणेण रोगायंके उवसंते होत्था हट्ठे कल्लसरीरे जाते ववगयरोगायंके, तते णं से सेलए तंसि रोयायंकेसि उवसंतंसि समाणंसि तंसि विपुलंसि असण ४ मज्जपाणए य मुच्छिए गढिए गिद्धे अज्झोववन्ने ओसन्ने ओसन्नवि-हारी एवं पासत्ये २ कुसीले २ पमत्ते २ संसत्ते २ उउबद्धपीढफलगसेज्जासंथारए पमत्ते यावि विहरति, नो संचाएति फासुएसणिज्जं पीढं पच्चप्पिणित्ता मंडुयं च रायं आपुच्छित्ता बहिया जाव (जणवयविहारं अब्भुज्जएण पवत्तेण पग्गहिएण) विहरित्तए । ६३ । तते णं तेसिं पंथयक्काणं पंचणं अणगारसयाणं अन्नया कयाई एगयओ भहियाणं जाव पुव्वरत्तावरत्तकाल-समयंसि धम्मजागरियं जागरमाणानं अयमेयारूवे अब्भत्थिए जाव समुप्पज्जित्था-एवं खलु सेलए रायरिसी चइत्ता रज्जं जाव पव्वतिए, विपुलेणं असण० ४ मज्जपाणए मुच्छिए नो संचाएति जाव विहरित्तए, नो खलु कप्पइ देवाणुप्पिया ! समणाणं जाव पमत्ताणं विहरित्तए, तं सेयं खलु देवा० अम्हं कल्लं सेलयं रायरिसिं आपुच्छित्ता पाडिहारियं पीढफलगसे-ज्जासंथारगं पच्चप्पिणित्ता सेलगस्स अणगारस्स पंथयं अणगारं वेयावच्चकरं ठवेत्ता बहिया अब्भुज्जएणं जाव विहरित्तए, एवं संपेहेति ता कल्लं जेणेव सेलए० आपुच्छित्ता पाडिहारियं पीढ० पच्चप्पिणंति ता पंथयं अणगारं वेयावच्चकरं ठावंति ता बहिया जाव विहरंति । ६४ । तते णं से पंथए सेलयस्स सेज्जासंथारउच्चारपासवणखेल (× संघाण) मत्तओसहभेसज्ज-भत्तपाणएणं अगिलाए विणएणं वेयावडियं करेइ, तते णं से सेलए अन्नया कयाई कत्तियचाउम्मासियंसि विपुलं असण० ४ आहारमाहारिए सुबहुं मज्जपाणयं पीएत्ता पुव्वा- (प्र० पच्चा) वरण्हकालसमयंसि सुहप्पसुत्ते, तते णं से पंथए कत्तियचाउम्मासियंसि कयकाउस्सग्गे देवसियं पडिक्कमणं पडिक्कंते चाउम्मासियं पडिक्कमिउकामे सेलयं रायरिसिं खामणट्टयाए सीसेणं पाएसु संघट्टेइ, तते णं से सेलए पंथएणं सीसेणं पाएसु संघट्टिए समाणे आसुरुत्ते जाव मिसिमिसेमाणे उट्टेति ता एवं वदासी-से केस णं भो एस अप्पत्थियप-त्थए जाव परिवज्जिए जे णं ममं सुहपसुत्तं पाएसु संघट्टेति ?, तते णं से पंथए सेलएणं एवं वुत्ते समाणे भीए तत्थे तसिए करयल० कट्टु एवं वदासी-अहण्णं भंते ! पंथए कयकाउ-स्सग्गे देवसियं पडिक्कमणं पडिक्कंते चाउम्मासियं पडिक्कंते चाउम्मासियं खामेमाणे देवाणुप्पियं वंदमाणे सीसेणं पाएसु संघट्टेमि, तं खमंतु णं देवाणुप्पिया ! खमन्तु मेऽवराहं तुमण्णं (प्र० खंतुमरहंतु णं) देवाणुप्पिया ! णाइभुज्जो एवं करणयाएत्तिकट्टु सेलयं अणगारं एतमट्ठं सम्मं विणएणं भुज्जो २ खामेति, तते णं तस्स सेलयस्स रायरिसिस्स पंथएणं एवं वुत्तस्स अयमेयारूवे जाव समुप्पज्जित्था-एवं खलु अहं रज्जं च जाव ओसन्नो जाव उउबद्धपीढ० विहरामि, तं नो खलु कप्पति समणाणं णिग्गंथाणं अपसत्थाणं (प्र० पासत्थाणं) जाव

विहरित्तए, तं सेयं खलु मे कल्लं मंडुयं रायं आपुच्छित्ता पाडिहारियं पीढफलगसेज्जासंथारयं पच्चप्पिणित्ता पंथएणं अणगारेणं सद्धिं बहिया अब्भुज्जएणं जाव जणवयविहारेणं विह-
रित्तए, एवं संपेहेति त्ता कल्लं जाव विहरति । ६५ । एवामेव समणाउसो ! जाव निग्गंथी वा ओसन्ने जाव संथारए पमत्ते विहरति से णं इहलोए चेव बहूणं समणाणं ४ हीलणिज्जे-
संसारो भाणियवो । तते णं ते पंथगवज्जा पंच अणगारसया इमीसे कहाए लद्धट्ठा समाणा अन्नमन्नं सदावेति त्ता एवं वयासी-सेलए रायरिसी पंथएणं बहिया जाव विहरति, तं सेयं
खलु देवा ! अम्हं सेलयं उवसंपज्जित्ताणं विहरित्तए, एवं संपेहेति त्ता सेलयं रायं उवसंपज्जित्ताणं विहरति । ६६ । तते णं ते सेलयपामोक्खा पंच अणगारसया बहूणि वासाणि साम-
न्नपरियागं पाउणित्ता जेणेव पोंडरीये पव्वए तेणेव उवागच्छंति त्ता जहेव थावच्चापुत्ते तहेव सिद्धा, एवामेव समणाउसो ! जो निग्गंथो वा जाव विहरिस्मति । एवं खलु जंबू ! सम-
णेणं ३ पंचमस्स नायज्झयणस्स अयमट्ठे पण्णत्तेत्तिवेमि । ६७ ॥ इति सेलयअज्झयणं ५ ॥ जति णं भंते ! समणेणं जाव संपत्तेणं पंचमस्स नायज्झयणस्स अयमट्ठे पन्नत्ते छट्ठस्स णं
भंते ! नायज्झयणस्स समणेणं जाव संपत्तेणं के अट्ठे पन्नत्ते ? , एवं खलु जंबू ! तेणं कालेणं० रायगिहे समोसरणं परिसा निग्गया, तेणं कालेणं० समणस्स जेट्ठे अंतेवासी इंदभूती०
अदूरसामंते जाव सुक्कज्झाणोवगए विहरति, तते णं से इंदभूती० जायसइडे० समणस्स ३ एवं वदासी-कहण्णं भंते ! जीवा गुरुयत्तं वा लहुयत्तं वा हव्वमागच्छंति ? , गोयमा ! से जहा-
नामए केइ पुरिसे एगं महं सुक्कं तुंबं णिच्छिड्डं निरुवहयं दब्भेहिं कुसेहिं वेढेइ त्ता मट्ठियालेवेणं लिंपति उण्हे दलयति त्ता सुक्कं समाणं दोच्चं पि दब्भेहिं य कुसेहिं य वेढेति त्ता मट्ठि-
यालेवेणं लिंपति त्ता उण्हे सुक्कं समाणं तच्चं पि दब्भेहिं य कुसेहिं य वेढेति त्ता मट्ठियालेवेणं लिंपति, एवं खलु एएणुवाएणं अंतरा वेढेमाणे अंतरा लिंपेमाणे अंतरा सुक्कवेमाणे जाव
अट्ठहिं मट्ठियालेवेहिं आलिंपति, अत्थाहमतारमपोरिसियंसि उदगंसि पक्खिवेज्जा, से णूणं गोयमा ! से तुंबे तेसिं अट्ठणं मट्ठियालेवाणं गुरुययाए भारिययाए गुरुयभारिययाए उप्पिं
सलिलमतिवइत्ता अहेधरणियलपइट्ठाणे भवति, एवामेव गोयमा ! जीवावि पाणातिवाएणं जाव मिच्छादंसणसल्लेणं अणुपुव्वेणं अट्ठ कम्मपगडीओ समज्जिणन्ति, तासिं गुरुययाए
भारिययाए गुरुयभारिययाए कालमासे कालं किच्चा धरणियलमतिवत्तिता अहे नरगतलपइट्ठाणा भवन्ति, एवं खलु गोयमा ! जीवा गुरुयत्तं हव्वमागच्छंति, अह णं गोतमा ! से तुंबे
तंसि पढमिल्लुगंसि मट्ठियालेवंसि तिन्नंसि कुहियंसि परिसडियंसि ईसिं धरणियलाओ उप्पत्तिताणं चिट्ठति, ततोऽणंतरं च णं दोच्चं पि मट्ठियालेवे जाव उप्पत्तिताणं चिट्ठति, एवं खलु
एएणं उवाएणं तेसु अट्ठसु मट्ठियालेवेसु तिन्नेसु जाव विमुक्कबंधणे अहेधरणियलमइवइत्ता उप्पिं सलिलतलपइट्ठाणे भवति, एवामेव गोयमा ! जीवा पाणातिवातवेरमणेणं जाव मिच्छा-
दंसणसल्लवेरमणेणं अणुपुव्वेणं अट्ठ कम्मपगडीओ खवेत्ता गगणतलमुप्पइत्ता उप्पिं लोयगपतिट्ठाणा भवन्ति, एवं खलु गोयमा ! जीवा लहुयत्तं हव्वमागच्छंति । एवं खलु जंबू ! समणेणं
भगवया महावीरेणं छट्ठस्स नायज्झयणस्स अयमट्ठे पन्नत्तेत्तिवेमि । ६८ ॥ इति तुंबगज्झयणं ६ ॥ जति णं भंते ! समणेणं जाव संपत्तेणं छट्ठस्स नायज्झयणस्स अयमट्ठे पन्नत्ते
सत्तमस्स णं भंते ! नायज्झयणस्स के अट्ठे पन्नत्ते ? , एवं खलु जंबू ! तेणं कालेणं० रायगिहे नाम नयरे होत्था, सुभूमिभागे उज्जाणे, तत्थ णं रायगिहे नगरे धण्णे नामं सत्थवाहे
परिवसति, अइडे०, भदा भारिया अहीणपंचेंदिय० जाव सुरूवा, तस्स णं धण्णस्स सत्थवाहस्स पुत्ता भदाए भारियाए अत्तया चत्तारि सत्थवाहदारया होत्था, तंजहा-धणपाले धण-
देवे धणगोवे धणरक्खिए, तस्स णं धण्णस्स सत्थवाहस्स चउण्हं पुत्ताणं भारियाओ चत्तारि सुण्हाओ होत्था, तं०-उज्झिया भोगवतिया रक्खंतिया रोहिणिया, तते णं तस्स धण्णस्स
अन्नया कदाई पुव्वरत्तावरत्तकालसमयंसि इमेयारूवे अब्भत्थिए जाव समुप्पज्जित्था-एवं खलु अहं रायगिहे बहूणं ईसरजावपभिईणं सयस्स कुटुंबस्स बहूसु कज्जेसु य करणिज्जेसु
कोटुंबेसु य मंतणेसु य गुज्जे रहस्से निच्छए ववहारेसु य आपुच्छणिज्जे पडिपुच्छणिज्जे मेढी पमाणं आहारे आलंबणे चक्खुमेढीभूते कज्जवट्ठावए, तं ण णज्जति जं मए गयंसि वा
चुयंसि वा मयंसि वा भग्गंसि वा लुग्गंसि वा सडियंसि वा पडियंसि वा विदेसत्थंसि वा विप्पवसियंसि वा इमस्स कुटुंबस्स किं मन्ने आहारे वा आलंबे वा पडिबंधे वा भविस्सति ? , तं
सेयं खलु मम कल्लं जाव जलंते विपुलं असणं ४ उवक्खडावेत्ता मित्तणाति० चउण्हं सुण्हाणं कुलघरवग्गं आमंतेत्ता तं मित्तणाइणियगसयण० य चउण्हं सुण्हाणं कुलघरवग्गं विपुलेणं
असण ४ धूवपुप्फवत्थगंध जाव सक्कारेत्ता सम्माणेत्ता तस्सेव मित्तणाति० चउण्ह य सुण्हाणं कुलघरवग्गस्स पुरतो चउण्हं सुण्हाणं परिक्खणट्ठयाए पंच पंच सालिअक्खए दलइत्ता
जाणामि ताव का किहं वा सारक्खइ वा संगोवेइ वा संवइडेति वा ? , एवं संपेहेइ त्ता कल्लं जाव मित्तणाति० चउण्हं सुण्हाणं कुलघरवग्गं आमंतइ त्ता विपुलं असणं ४ उवक्खडावेइ
ततो पच्छा ण्हाए० भोयणमंडवंसि सुहासण० मित्तणाति० चउण्ह य सुण्हाणं कुलघरवग्गेणं सद्धिं तं विपुलं असण ४ जाव सक्कारेति त्ता तस्सेव मित्तणाति० चउण्ह य सुण्हाणं कुलघ-
रवग्गस्स य पुरतो पंच सालिअक्खए गेण्हाहि त्ता अणुपुव्वेणं

सारक्खेमाणी संगोवेमाणी विहराहि. जया णं हं पुत्ता ! तुमं इमे पंच सालिअक्खए जाएजा तया णं तुमं मम इमे पंच सालिअक्खए पडिदिजाएजासित्तिकट्टु सुण्हाए हत्थे दलयति ता पडिविसजेति, तते णं सा उज्झिया धण्णस्स तहत्ति एयमट्ठं पडिसुणेति ता धण्णस्स सत्थवाहस्स हत्थाओ ते पंच सालिअक्खए गेण्हति ता एगंतमवक्कमति एगंतमवक्कमियाए इमेयारूवे अब्भत्थिए०-एवं खलु तायाणं कोट्टागारंमि बहवे पट्ठा सालीणं पडिपुण्णा चिट्ठंति तं जया णं ममं ताओ इमे पंच सालिअक्खए जाएस्सति तया णं अहं पट्ठंतराओ अन्ने पंच सालिअक्खए गहाय दाहामित्तिकट्टु एवं संपेहेइ ता तं पंच सालिअक्खए एगंते एडेति ता सकम्मसंजुत्ता जाया यावि होत्था, एवं भोगवतियाएवि, णवरं सा छोछेति ता अणुगिलति (कोछेइ पा०) ता सकम्मजुत्ता जाया, एवं रक्खियाएवि, नवरं गेण्हति ता इमेयारूवे अब्भत्थिए०-एवं खलु ममं ताओ इमस्स मित्तनाति० चउण्ह य सुण्हाणं कुल-घरवग्गस्स य पुरतो सदावेत्ता एवं वदासी-तुमण्णं पुत्ता ! मम हत्थाओ जाव पडिदिजाएजासित्तिकट्टु मम हत्थंसि पंच सालिअक्खए दलयति तं भवियव्वमेत्थ कारणेणंतिकट्टु एवं संपेहेति ता ते पंच सालिअक्खए सुद्धे वत्थे बंधइ ता रयणकरंडियाए पक्खिवेइ ता उत्तीसामूले ठावेइ ता तिसंझं पडिजागरमाणी विहरइ, तए णं से धण्णे सत्थवाहे तस्सेव मित्त जाव चउत्थि रोहिणीयं सुण्हं सदावेति ता जाव तं भवियव्वं एत्थ कारणेणंति तं सेयं खलु मम एए पंच सालिअक्खए सारक्खेमाणीए संगोवेमाणीए संवड्ढेमाणीएत्तिकट्टु एवं संपेहेति ता कुलघरपुरिसे सदावेति ता एवं वदासी-तुम्भे णं देवाणुप्पिया ! एते पंच सालिअक्खए गेण्हह ता पढमपाउसंसि महावुट्टिकायंसि निवइयंसि समाणंसि खुड्डागं केयारं सुपरिकम्मियं करेह ता इमे पंच सालिअक्खए वावेह ता दोच्चंपि तच्चंपि उक्खयनिहए करेह ता वाडिपरिक्खेवं करेह ता सारक्खेमाणा संगोवेमाणा अणुपुब्बेणं संवड्ढेह, तते णं ते कोडुंबिया रोहिणीए एतमट्ठं पडिसुणेति ते पंच सालिअक्खए गेण्हति ता अणुपुब्बेणं सारक्खंति संगोवंति० विहरंति, तए णं ते कोडुंबिया पढमपाउसंसि महावुट्टिकायंसि निवइयंसि समाणंसि खुड्डागं केदारं सुपरिकम्मियं करेंति ता ते पंच सालिअक्खए ववंति दुच्चंपि तच्चंपि उक्खयनिहए करेंति ता वाडिपरिक्खेवं करेंति ता अणुपुब्बेणं सारक्खेमाणा संगो-वेमाणा संवड्ढेमाणा विहरंति, तते णं ते साली अणुपुब्बेणं सारक्खज्जमाणा संगोविज्जमाणा संवड्ढज्जमाणा साली जाया किण्हा किण्होभासा जाव निउरंभभूया पासादीया ४ तते णं साली पत्तिया वत्तिया (तइया वा० पा०) गब्भिया पसूया आगयगंधा खीराइया बद्धफला पक्का परियागया सहइपत्तइया हरियपव्वकंडा जाया यावि होत्था, तते णं ते कोडुंबिया ते सालीए पत्तिए जाव सहइए पत्तिए जाणित्ता तिक्खेहिं णवपज्जएहिं असियएहिं लुणेंति ता करयलमलिते करेंति ता पुणंति, तत्थ णं चोक्खाणं सूयाणं अक्खंडाणं अप्फोडि-याणं छडच्छडापुट्ठा (पूया पा०)णं सालीणं मागहए पत्थए जाए, तते णं ते कोडुंबिया ते साली णवएसु घडएसु पक्खिवंति ता उवलंपंति (लिंपेति पा०) लंछियमुद्धिते करेंति ता कोट्टागारस्स एगदेसंसि ठावेंति ता सारक्खेमाणा संगोवेमाणा विहरंति, तते णं ते कोडुंबिया दोच्चंमि वासारत्तंसि पढमपाउसंसि महावुट्टिकायंसि निवइयंसि खुड्डागं केयारं सुपरि-कम्मियं करेंति ते साली ववंति दोच्चंपि तच्चंपि उक्खयणिहए जाव लुणेंति जाव चलणतलमलिए करेंति ता पुणंति, तत्थ णं सालीणं बहवे कुडवा(मुरला)जाव एगदेसंसि ठावेंति ता सारक्ख० संगो० विहरंति, तते णं ते कोडुंबिया तच्चंसि वासारत्तंसि महावुट्टिकायंसि (प्र० निवइयंसि) बहवे केदारे सुपरि० जाव लुणेंति ता संवहंति ता खलयं करेंति ता मलेंति जाव बहवे कुंभा जाया, तते णं ते कोडुंबिया साली कोट्टागारंसि पक्खिवंति जाव विहरंति, चउत्थे वासारत्ते बहवे कुंभसया जाया। तते णं तस्स धण्णस्स पंचमयंसि संवच्छरंसि परि-णममाणंसि पुब्बरत्तावरत्तकालसमयंसि इमेयारूवे अब्भत्थिए जाव समुप्पज्जित्था-एवं खलु मम इओ अतीते पंचमे संवच्छरे चउण्हं सुण्हाणं परिक्खणट्टयाए पंच सालिअक्खता हत्थे दिग्धा तं सेयं खलु मम कल्लं जाव जलंते पंच सालिअक्खए परिजाइत्तए जाव जाणामि ताव काए किहं सारक्खिया वा संगोविया वा संवड्ढिया जावत्तिकट्टु एवं संपेहेति ता कल्लं जाव जलंते विपुलं असण ४ मित्तनाइ० चउण्ह य सुण्हाणं कुलघर जाव सम्माणित्ता तस्सेव मित्त० चउण्ह य सुण्हाणं कुलघरवग्गस्स पुरओ जेट्ठं उज्झियं सदावेइ ता एवं वयासी-एवं खलु अहं पुत्ता ! इतो अतीते पंचमंसि संवच्छरंसि इमस्स मित्त० चउण्ह य सुण्हाणं कुलघरवग्गस्स य पुरतो तव हत्थंसि पंच सालिअक्खए दलयामि जया णं अहं पुत्ता ! एए पंच सालिअक्खए जाएजा तया णं तुमं मम इमे पंच सालिअक्खए पडिदिजाएजासित्तिकट्टु तं हत्थंसि दलयामि, से नूणं पुत्ता ! अत्थे समट्ठे ?, हंता अत्थि, तण्णं पुत्ता ! मम ते सालिअक्खए पडिनिजाएहि, तते णं सा उज्झितिया एयमट्ठं धण्णस्स पडिसुणेति ता जेणेव कोट्टागारे तेणेव उवागच्छति ता पट्ठातो पंच सालिअक्खए गेण्हति ता जेणेव धण्णे सत्थवाहे तेणेव उवागच्छति ता धण्णं० एवं वदासी-एए णं ते पंच सालिअक्खएत्तिकट्टु धण्णस्स हत्थंसि ते पंच सालिअक्खए दलयति, तते णं धण्णे उज्झियं सवहसावियं करेति ता एवं वयासी-किण्णं पुत्ता ! एए ते चेव पंच सालिअक्खए उदाहु अन्ने ?, तते णं उज्झिया धण्णं सत्थवाहं एवं वयासी-एवं खलु तुम्भे तातो ! इओ तीए पंचमे संवच्छरे इमस्स

मित्तनाति० चउण्ह य० कुल० जाव विहरामि, तते णं हं तुब्भं एतमट्ठं पडिसुणेमि ता ते पंच सालिअक्खए गेण्हामि एगंतमवक्कमामि, तते णं मम इमेयारूवे अब्भत्थिए जाव समुप्पजित्था-एवं खलु तायाणं कोट्टागारंसि० सकम्मसंजुत्ता तं णो खलु ताओ ! ते चेव पंच सालिअक्खए एए णं अन्ने, तते णं से धण्णे उज्झियाए अंतिए एयमट्ठं सोच्चा णिसम्म आसुरुत्ते जाव मिसिमिसेमाणे उज्झितियं तस्स मित्तनाति० चउण्ह य सुण्हाणं कुलघरवग्गस्स य पुरओ तस्स कुलघरस्स छारुज्झियं च छाणुज्झियं च कयवरुज्झियं च समु(संपु-पा०)च्छियं च सम्मज्झिअं च पाउवदाइं च ण्हाणोवदाइं च बाहिरपेसणकारिं ठवेति, एवामेव समणाउसो ! जो अम्हं निग्गंथो वा जाव पव्वतिते पंच य से महव्वयातिं उज्झियाइं भवंति से णं इहभवे चेव बहूणं समणाणं जाव अणुपरियट्ठिस्सइ जहा सा उज्झिया, एवं भोगवइयावि, नवरं तस्स कंडितियं वा कोट्टंतियं च पीसंतियं च एवं रुच्चंतियं रंधंतियं परिवेसंतियं च परिभायंतियं च अब्भंतरियं च पेसणकारिं महाणसिणिं ठवेति, एवामेव समणाउसो ! जो अम्हं समणो पंच य से महव्वयाइं फोडियाइं (प्र० फोल्लियाइं) भवंति से णं इहभवे चेव बहूणं समणाणं जाव हील० जहा व सा भोगवतिया, एवं रक्खितियावि, नवरं जेणेव वासघरे तेणेव उवागच्छइ ता मंजूसं विहाडेइ ता रयणकरंडगाओ ते पंच सालिअक्खए गेण्हति ता जेणेव धण्णे तेणेव उवा० ता पंच सालिअक्खए धण्णस्स हत्थे दलयति, तते णं से धण्णे रक्खितियं एवं वदासी-किन्नं पुत्ता ! ते चेव ते पंच सालिअक्खया उदाहु अन्नेत्ति ?, तते णं रक्खितिया धण्णं एवं० ते चेव ताया ! एए पंच सालिअक्खया णो अन्ने, कहन्नं पुत्ता !, एवं खलु ताओ ! तुब्भे इओ पंचमंमि जाव भवियव्वं एत्थ कारणेणंतिकट्ठु ते पंच सालिअक्खए सुद्धे वत्थे जाव तिसंझं पडिजागरमाणी य विहरामि, तते एतेणं कारणेणं ताओ ! ते चेव ते पंच सालिअक्खए णो अन्ने, तते णं से धण्णे रक्खितियाए अंतिए एयमट्ठं सोच्चा हट्ठुट्ठु० तस्स कुलघरस्स हिरन्नस्स य कंसदूसविपुलधणजावसावतेज्जस्स य भंडागारिणिं ठवेति, एवामेव समणाउसो ! जाव पंच य से महव्वयातिं रक्खितियातिं भवंति से णं इहभवे चेव बहूणं समणाणं ४ अच्चणिज्जे जहा जाव सा रक्खितिया, रोहिणियावि एवं चेव, नवरं तुब्भे ताओ ! मम सुबहुयं सगडीसागडं दलाहि जेणं अहं तुब्भं ते पंच सालिअक्खए पडिणिज्जाएमि, तते णं से धण्णे रोहिणिं एवं वदासी-कहणं तुमं मम पुत्ता ! ते पंच सालिअक्खए सगड(डी)सागडेणं निज्जाइस्ससि ?, तते णं सा रोहिणी धण्णं एवं वदासी-एवं खलु तातो ! इओ तुब्भे पंचमे संवच्छरे इमस्स मित्त जाव बहवे कुंभसया जाया तेणेव कमेणं एवं खलु ताओ ! तुब्भे ते पंच सालिअक्खए सगडसागडेणं निज्जाएमि, तते णं से धण्णे सत्थवाहे रोहिणीयाए सुबहुयं सगडसागडं दलयति, तते णं रोहिणी सुबहुं सगडसागडं गहाय जेणेव सए कुलघरे तेणेव उवागच्छइ ता कोट्टागारे विहाडेति ता पल्ले उब्भिदति ता सगडीसागडं भरेति ता रायगिहं नगरं मज्झंमज्झेणं जेणेव सए गिहे जेणेव धण्णे सत्थवाहे तेणेव उवागच्छति, तते णं रायगिहे नगरे सिंघाडग जाव बहुजणो अन्नमन्नं एवमातिक्खति०-धन्ने णं देवा० ! धण्णे सत्थवाहे जस्स णं रोहिणिया सुण्हा जीए णं पंच सालिअक्खए सगड(डी)सागडिणं निज्जाएति, तते णं से धण्णे सत्थ० ते पंच सालिअक्खए सगडसागडेणं निज्जातिते पासति ता हट्ठु० पडिच्छति ता तस्सेव मित्तनाति० चउण्ह य सुण्हाणं कुलघरपुरतो रोहिणीयं सुण्हां तस्स कुलघरस्स बहुसु कज्जेसु य जाव रहस्सेसु य आपुच्छणिज्जं जाव वट्ठावितं पमाणभूयं ठावेति, एवामेव समणाउसो ! जाव पंच महव्वया संवडिठया भवंति से णं इहभवे चेव बहूणं समणाणं जाव वीतीवइस्सइ जहा व सा रोहिणीया । एवं खलु जंबू ! समणेणं भगवया महावीरेणं सत्तमस्स नायज्झयणस्स अयमट्ठे पन्नत्तेत्तिवेमि । ६९॥ इति रोहिणीअज्झयणं ७॥ जति णं भंते ! समणेणं० सत्तमस्स नायज्झयणस्स अयमट्ठे पं० अट्ठमस्स णं भंते ! के अट्ठे पं० ?, एवं खलु जंबू ! तेणं कालेणं० इहेव जंबुदीवे दीवे महाविदेहे वासे मंदरस्स पव्वयस्स पच्चत्थिमेणं निसट्ठस्स वासहरपव्वयस्स उत्तरेणं सीयोयाए महाणदीए दाहि-णेणं सुहावहस्स वक्खारपव्वतस्स पच्चत्थिमेणं पच्चत्थिमलवणसमुहस्स पुरच्छिमेणं एत्थ णं सलिलावती नामं विजए पं०, तत्थ णं सलिलावतीविजए वीयसोगा नामं रायहाणी पं०, नवजोयणविच्छिन्ना जाव पच्चक्खं देवलोगभूया, तीसे णं वीयसोगाए रायहाणीए उत्तरपुरच्छिमे दिसिभाए इंदकुंभे नामं उज्जाणे, तत्थ णं वीयसोगाए रायहाणीए बले नामं राया, तस्सेव धारणीपामोक्खं देविसहस्सं उवरोधे होत्था, तते णं सा धारिणी देवी अन्नया कदाई सीहं सुमिणे पासित्ताणं पडिबुद्धा जाव महब्बले नामं दारए जाए उम्मुक्क जाव भोगस-मत्थे, तते णं तं महब्बलं अम्मापियरो सरिसियाणं कमलसिरीपामोक्खाणं पंचणं रायवरकन्नासयाणं एगदिवसेणं पाणिं गेण्हावेंति, पंच पासायसया पंचसतो दातो जाव विहरति, थेरागमणं इंदकुंभे उज्जाणे समोसढे परिसा निग्गया, बलोवि निग्गओ धम्मं सोच्चा णिसम्म जं नवरं महब्बलं कुमारं रज्जे ठावेमि जाव एक्कारसंगवी बहूणि वासाणि सामण्णपरियायं पाउणित्ता जेणेव चारुपव्वए मासिएणं भत्तेणं सिद्धे, तते णं सा कमलसिरी अन्नदा सीहं सु० जाव बलभहो कुमारो जाओ, जुवराया यावि होत्था, तस्स णं महब्बलस्स रन्नो इमे छप्पियबालवयंसगा रायाणो होत्था, तं०-अयले धरणे पूरणे वसू वेसमणे अभिचंदे, सहजायया जाव संहिच्चाते णित्थरियव्वेत्तिकट्ठु अन्नमन्नस्सेयमट्ठं पडिसुणेति, तेणं कालेणं० इंदकुंभे उज्जाणे थेरा समोसढा, परिसा० महब्बले णं धम्मं सोच्चा जं नवरं छप्पियबालवयंसए आपुच्छामि बलभहं च कुमारं रज्जे ठावेमि जाव छप्पियबालवयंसए आपुच्छति, (१०९)

तते णं ते छप्पिय० महब्बलं रायं एवं वदासी-जति णं देवाणुप्पिया ! तुम्हे पवयह अम्हं के अन्ने आहारे वा जाव पवयामो, तते णं से महब्बले राया ते छप्पिय० एवं०-जति णं तुम्हे मए सद्धिं जाव पवयह तो णं गच्छह जेट्ठे पुत्ते सएहिं २ रज्जेहिं ठावेह पुरिससहस्सवाहिणीओ सीयाओ दुरूढा जाव पाउब्भवंति, तते णं से महब्बले राया छप्पियबालवयंसए पाउब्भूते पासति ता हट्ठ० कोडुंबियपुरिसे० बलभदस्स अभिसेओ, आपुच्छति, तते णं से महब्बले जाव महया इड्ढी० पवतिए एक्कारस अंगाइं० बहूहिं चउत्थ जाव भावेमाणे विहरति, तते णं तेसिं महब्बलपामो-क्खाणं सत्तण्हं अणगाराणं अन्नया कयाई एगयओ सहियाणं इमेयारूवे मिहो कहासमुल्लावे समुप्पज्जित्था-जणं अम्हं देवाणु० एगे तवोकम्मं उवसंपज्जित्ताणं विहरति तण्णं अम्हेहिं सब्बेहिं तवोकम्मं उवसंपज्जित्ताणं (कप्पइ) विहरित्तएत्तिकट्ठु अण्णमण्णस्स एयमट्ठं पडिसुणेंति ता बहूहिं चउत्थ जाव विहरंति, तते णं से महब्बले अणगारे इमेणं कारणेणं इत्थिणामगोयं कम्मं निवत्तेंसु-जति णं ते महब्बलवज्जा छ अणगारा चउत्थं उवसंपज्जित्ताणं विहरंति ततो से महब्बले अणगारे छट्ठं उवसंपज्जित्ताणं विहरइ, जति णं ते महब्बलवज्जा अणगारा छट्ठं उवसंपज्जित्ताणं विहरंति ततो से महब्बले अणगारे अट्ठमं उवसंपज्जित्ताणं विहरति, एवं अट्ठमं तो दसमं अह दसमं तो दुवालसमं, इमेहि य णं वीसाएण य कारणेहिं आसेवियबहुलीकएहिं तित्थयरनामगोयं कम्मं निवत्तेंसु, तं०-“ अरहंत सिद्ध पवयण गुरु थेर बहुस्सुए तवस्सीसु। वच्छल्लया य तेसिं अभिक्खणाणोवओगे य ॥४॥ दंसण विणए १० आवस्सए य सीलवए निरइयारो। खणलव तव च्चियाए वेयावच्चे समाही य ॥ ५ ॥ अप्पुव्वणाणगहणे सुयभत्ती पवयणे पभावणया २०। एएहिं कारणेहिं तित्थयरत्तं लहइ जीवो (प्र० एसो, सो उ) ॥ ६ ॥” तए णं ते महब्बलपा-मोक्खा सत्त अणगारा मासियं भिक्खुपडिमं उवसंपज्जित्ताणं विहरंति जाव एगराइयं० उव०, तते णं ते महब्बलपामोक्खा सत्त अणगारा खुड्डागं सीहनिक्कीलियं तवोकम्मं उवसंप-ज्जित्ताणं विहरंति, तं०-चउत्थं करेंति ता सब्बकामगुणियं पारेंति ता छट्ठं करेंति ता चउत्थं करेंति ता अट्ठमं करेंति ता छट्ठं करेंति ता दसमं करेंति ता अट्ठमं करेंति ता दुवालसमं करेंति ता दसमं करेंति ता चोदसमं करेंति ता दुवालसमं करेंति ता सोलसमं करेंति ता चोदसमं करेंति ता अट्ठारसमं करेंति ता सोलसमं करेंति ता वीसइमं करेंति ता अट्ठारसमं करेंति ता वीसइमं करेंति ता सोलसमं करेंति ता अट्ठारसमं करेंति ता चोदसमं करेंति ता सोलसमं करेंति ता दुवालसमं करेंति ता चाउदसमं करेंति ता दसमं करेंति ता दुवालसमं करेंति ता अट्ठमं करेंति ता दसमं करेंति ता छट्ठं करेंति ता अट्ठमं करेंति ता चउत्थं करेंति ता छट्ठं करेंति ता चउ०क० सब्बत्थ सब्बकामगुणिणं पारेंति, एवं खलु एसा खुड्डागसीहनिक्की-लियस्स तवोकम्मस्स पढमा परिवाडी छहिं मासेहिं सत्तहि य अहोरत्तेहिं अहासुत्ता जाव आराहिया भवइ, तयाणंतरं दोच्चाए परिवाडीए चउत्थं करेंति नवरं विगइवज्जं पारेंति, एवं तच्चावि परिवाडी नवरं पारणए अलेवाडं पारेंति, एवं चउत्थावि परिवाडी नवरं पारणए आयंबिलेण पारेंति, तए णं ते महब्बलपामोक्खा सत्त अणगारा खुड्डागं सीहनिक्कीलियं तवो-कम्मं दोहिं संवच्छरेहिं अट्ठावीसाए य अहोरत्तेहिं अहासुत्तं जाव आणाए आराहेत्ता जेणेव थेरे भगवंते तेणेव उवागच्छंति ता थेरे भगवंते वंदंति नमंसंति ता एवं वयासी-इच्छामो णं भंते! महालयं सीहनिक्कीलियं तहेव जहा खुड्डागं नवरं चोत्तीसइमाओ नियत्तए एगाए परिवाडीए कालो एगेणं संवच्छरेणं छहिं मासेहिं अट्ठारसहि य अहोरत्तेहिं समप्पेति, सब्बपि सीहनिक्कीलियं छहिं वासेहिं दोहि य मासेहिं बारसहि य अहोरत्तेहिं समप्पेति, तए णं ते महब्बलपामोक्खा सत्त अणगारा महालयं सीहनिक्कीलियं अहासुत्तं जाव आराहेत्ता जेणेव थेरे भगवंते तेणेव उवागच्छंति ता थेरे भगवंते वंदंति नमंसंति ता बहूणि चउत्थ जाव विहरंति, तते णं ते महब्बलपामोक्खा सत्त अणगारा तेणं ओरालेणं० सुक्का भुक्खा जहा खंदओ नवरं थेरे आपुच्छित्ता चारुपव्वयं दुरूहंति ता जाव दोमासियाए संलेहणाए सवीसं भत्तसयं चतुरासीतिं वाससयसहस्सातिं सामण्णपरियागं पाउणंति चुलसीतिं पुव्वसयसहस्सातिं सव्वाउयं पालइत्ता जयंते विमाणे देवत्ताए उववन्ना। ७०। तत्थ णं अत्थेगतियाणं देवाणं बत्तीसं सागरोवमाइं ठिती, तत्थ णं महब्बलवज्जाणं छण्हं देवाणं देसूणाइं बत्तीसं सागरोवमाइं ठिती, महब्बलस्स देवस्स पडिपुन्नाइं बत्तीसं सागरोवमाइं ठिती, तते णं ते महब्बलवज्जा छप्पिय० देवा ताओ देवलोगाओ आउक्खएणं ठिइक्खएणं भवक्खएणं अणंतरं चयं चइत्ता इहेव जंबुदीवे दीवे भारहे वासे विसुद्धपितिमातिवंसेसु रायकुलेसु पत्तेयं २ कुमारत्ताए पच्चायाया, तं०-पडिबुद्धी इक्खागराया चंदच्छाए अंगराया संखे कासिराया रूप्पी कुणालाहिवती अदीणसत्तू कुरुराया जितसत्तू पंचालाहिवई, तते णं से महब्बले देवे तीहिं णाणेहिं समग्गे उच्चट्ठाणट्ठि (प्र० ग)एसु गहेसु सोमासु दिसासु वितिमिरासु विसुद्धासु जइतेसु सउणेसु पयाहिणाणुकूलंसि भूमिसप्पिसि मारुतंसि पवायंसि निप्फन्नसस्समेइणीयंसि कालंसि पमुइयपक्कीलिएसु जणवएसु अद्धरत्तकालसमयंसि अस्सिणीणक्खत्तेणं जोगमुवागएणं जे से हेमंताणं चउत्थे मासे अट्ठमे पक्खे फग्गुणसुद्धे तस्स णं फग्गुणसुद्धस्स (गिम्हाणं पढमे मासे दोच्चे पक्खे चेत्तसुद्धे तस्स णं चित्तसुद्धस्स पा०) चउत्थिपक्खेणं जयंताओ विमाणाओ बत्तीसंसागरोवमट्ठितीयाओ अणंतरं चयं चइत्ता इहेव जंबुदीवे दीवे भारहे वासे मिहिलाए रायहाणीए कुंभगस्स रन्नो पभावतीए देवीए कुच्छिसि आहारवक्कंतीए सरीरवक्कंतीए भवव-

कंतीए गम्भत्ताए वक्कंते, तंरयणिं च णं चोदस महासुमिणा वक्कओ, भत्तारकहणं सुमिणपाढगपुच्छा जाव विहरति, तते णं तीसे पभावतीए देवीए तिण्हं मासाणं बहुपडिपुञ्जाणं इमे-
 यारूवे डोहले पाउब्भूते-धन्नाओ णं ताओ अम्मयाओ जाओ णं जलथलयभासुरप्पभूएणं दसद्धवन्नेणं मल्लेणं अत्थुयपच्चत्थुयंसि सयणिज्जंसि सन्निसन्नाओ सण्णिवन्नाओ य विहरंति,
 एगं च महं सिरिदामगंडं पाडलमल्लियचंपयअसोगपुञ्जागनागमरुयगदमणगअणोज्जकोज्जयपउरं परमसुहफासदरिसणिज्जं महया गंधद्धणिं मुयंतं अग्घायमाणीओ डोहलं विणेंति, तते
 णं तीसे पभावतीए देवीए इमेयारूवं डोहलं पाउब्भूतं पासित्ता अहासन्निहिया वाणमंतरा देवा खिप्पामेव जलथलय० जाव दसद्धवन्नं मल्लं कुंभगसो य भारगसो य कुंभगस्स रन्नो
 भवणंसि साहरंति, एगं च णं महं सिरिदामगंडं जाव मुयंतं उवणेंति, तए णं सा पभावती देवी जलथलय जाव मल्लेणं डोहलं विणेति, तए णं सा पभावतीदेवी पसत्थडोहला जाव
 विहरइ, तए णं सा पभावतीदेवी नवण्हं मासाणं अद्धट्टमाण य राइंदियाणं जे से हेमंताणं पढमे मासे दोच्चे पक्खे मग्गसिरसुद्धे तस्स णं० एक्कारसीए पुव्वरत्तावरत्त० अस्सिणीनक्खत्तेणं
 उच्चट्टाण० जाव पमुइयपक्कीलिएसु जणवएसु आरोयाऽऽरोयं एकूणवीसतिमं तित्थयरं पयाया । ७१ । तेणं कालेणं० अहोलोगवत्थवाओ अट्ट दिसाकुमारीओ मयहरियाओ जहा
 जंबुहीवपक्कीए जम्मणं सव्वं नवरं मिहिलाए कुंभयस्स पभावतीए अभिलावो संजोएयव्वो जाव नंदीसरवरे दीवे महिमा, तथा णं कुंभए राया बहुहिं भवणवति० तित्थयर० जाव
 कम्मं जाव नामकरणं, जम्हा णं अम्हे इमीए दारियाए माउए मल्लसयणिज्जंसि डोहले विणीते तं होउ णं णामेणं मल्ली, जहा महाबले जाव परिवड्ढिया-‘सा वद्धती भगवती दिय-
 लोयचुता अणोवमसिरीया । दासीदासपरिवुडा परिकिन्ना पीढमहेहिं ॥ ७॥ असियसिरया सुनयणा बिंबोटी धवलदंतपंतीया (सेढीया पा०) । वरकमलगम्भगोरी (वन्ना, कोमलंगी पा०)
 फुल्लुप्पलगंधनीसासा (पउमुप्पलगंधनीसासा पा०) ॥ ८ ॥ ७२ । तए णं सा मल्ली विदेहरायवरकन्ना उम्मुक्कबालभावा जाव रूवेण जोव्वणेण य लावन्नेण य अतीव २ उक्किट्टा उक्किट्ट-
 सरीरा जाया यावि होत्था, तते णं सा मल्ली देसूणवाससयजाया ते छप्पि रायाणो विपुलेण ओहिणा आभोएमाणी २ विहरति, तं०-पडिबुद्धिं जाव जियसत्तुं पंचालाहिवइं, तते णं सा
 मल्ली कोडुंबि० तुब्भे णं देवा० असोगवणियाए एगं महं मोहणघरं करेह अणेगखंभसयसन्निविट्टं, तस्स णं मोहणघरस्स बहुमज्झदेसभाए छ गम्भघरए करेह, तेसिं णं गम्भघरगाणं
 बहुमज्झदेसभाए जालघरयं करेह, तस्स णं जालघरयस्स बहुमज्झदेसभाए मणिपेढियं करेह जाव पच्चप्पिणंति, तते णं मल्ली मणिपेढियाए उवरिं अप्पणो सरिसियं सरित्तयं सरिच्चयं
 सरिसलावन्नजोव्वणगुणोववेयं कणगमइं मत्थयच्छिड्डं पउमुप्पलपिहाणं पडिमं कारेति त्ता जं विपुलं असणं ४ आहारेति ततो मणुक्काओ असण ४ कल्लाकल्लिं एगमेगं पिंडं गहाय
 तीसे कणगामतीए मत्थयच्छिड्डाए जाव पडिमाए मत्थयंसि पक्खिवमाणी २ विहरति, तते णं तीसे कणगमतीए जाव मत्थयच्छिड्डाए पडिमाए एगमेगंसि पिंडे पक्खिप्पमाणे २
 ततो गंधे पाउब्भवति, से जहानामए अहिमडेत्ति वा जाव एत्तो अणिट्टतराए अमणामतराए । ७३ । तेणं कालेणं० कोसला नाम जणवए, तत्थ णं सागेए नाम नयरे तस्स णं उत्त-
 रपुरच्छिमे दिसीभाए, एत्थ णं महं एगे णागघरए होत्था दिव्वे सच्चे सच्चोवाए संनिहियपाडिहेरे, तत्थ णं नगरे पडिबुद्धिनाम इक्खागुराया परिवसति पउमावती देवी सुबुद्धी अमच्चे
 सामदंड०, तते णं पउमावतीए देवीए अन्नया कयाई नागजन्नए यावि होत्था, तते णं सा पउमावती नागजन्नमुवट्टियं जाणित्ता जेणेव पडिबुद्धि० करयल० एवं वदासी-एवं खलु
 सामी ! मम कल्लं नागजन्नए यावि भविस्सति तं इच्छामि णं सामी ! तुब्भेहिं अब्भणुक्काया समानी नागजन्नयं गमित्तए, तुब्भेऽवि णं सामी ! मम नागजन्नयंसि समोसरह, तते णं
 पडिबुद्धी पउमावतीए देवीए एयमट्टं पडिसुणेति, तते णं पउमावती पडिबुद्धिणा रन्ना अब्भणुक्काया हट्ट० कोडुंबिय० सदावेति त्ता एवं वदासी-एवं खलु देवाणुप्पिया ! मम कल्लं नाग-
 जण्णए भविस्सति तं तुब्भे मालागारे सदावेह त्ता एवं वदह-एवं खलु पउमावईए देवीए कल्लं नागजन्नए भविस्सइ तं तुब्भे णं देवाणुप्पिया ! जलथलय० दसद्धवन्नं मल्लं णागघरयंसि
 साहरइ एगं च णं महं सिरिदामगंडं उवणेह, तते णं जलथलय० दसद्धवन्नेणं मल्लेणं णाणाविहभत्तिसुविरइयं हंसमियमउरकौचसारसचक्कवायमयणसालकोइलकुलोववेयं ईहामिय-
 जावभत्तिचित्तं महग्घं महरिहं विपुलं पुप्फमंडवं विरएह, तस्स णं बहुमज्झदेसभाए एगं महं सिरिदामगंडं जाव गंधद्धुणिं मुयंतं उल्लोयंसि ओलंबेह त्ता पउमावतीं देविं पडिवाले-
 माणा २ चिट्ठह, तते णं ते कोडुंबिया जाव चिट्ठंति, तते णं सा पउमावती देवी कल्लं० कोडुंबिए एवं वदासी-खिप्पामेव भो देवाणुप्पिया ! सागेयं नगरं सन्निभतरबाहिरियं आसित्तस-
 म्मजितोवलित्तं जाव पच्चप्पिणंति, तते णं सा पउमावती दोच्चं पि कोडुंबिय० खिप्पामेव लहुकरणजुत्तं जाव जुत्तामेव उवट्टवेह, तते णं ते तहेव उवट्टवेंति, तते णं सा पउमावती अंतो
 अंतोउरंसि ण्हाया जाव धम्मियं जाणं दूरूढा, तए णं सा पउमावई नियगपरिवालसंपरिवुडा सागेयं नगरं मज्झमज्झेणं णिजाति त्ता जेणेव पुक्खरणी तेणेव उवागच्छति त्ता पुक्खरणिं
 ओगाहइ त्ता जलमज्जणं जाव परमसुइभूया उल्लपडसाडया जातिं तत्थ उप्पलत्तिं जाव गेण्हति त्ता जेणेव नागघरए तेणेव पहारेत्थ गमणाए, तते णं पउमावतीए दासचेडीओ बहुओ

पुष्पपडलगहत्थगयाओ धूवकडुच्छुगहत्थगयाओ पिट्ठतो समणुगच्छंति, तते णं पउमावती सव्विद्धिं जेणेव नागघरे तेणेव उवागच्छति ता नागघरयं अणुपविसति ता लोमहत्थगं जाव धूवं डहति ता पडिबुद्धिं पडिवालेमाणी २ चिट्ठति, तते णं पडिबुद्धी ण्हाए हत्थिखंधवरगते सकोरंट जाव सेयवरचामराहिं हयगयरहजोहमहयाभडचडकरपहकरेहिं साकेय-नगरं० णिग्गच्छति ता जेणेव नागघरे तेणेव उवागच्छति ता हत्थिखंधाओ पच्चोरुहति ता आलोए पणामं करेइ ता पुष्पमंडवं अणुपविसति ता पासति तं एगं महं सिरिदामगंडं, तए णं पडिबुद्धी तं सिरिदामगंडं सुइरं कालं निरिक्खइ ता तंसि सिरिदामगंडंसि जायविम्हए सुबुद्धिं अमच्चं एवं वयासी-तुमन्नं देवाणुप्पिया ! मम दोच्चेणं बहूणि गामागरजावस-न्निवेसाइं आहिंढसि बहूणि राईसर जाव गिहातिं अणुपविससि तं अत्थि णं तुमे कहिंचि एरिसए सिरिदामगंडे दिट्ठपुत्रे जारिसए णं इमे पउमावतीए देवीए सिरिदामगंडे ?, तते णं सुबुद्धी पडिबुद्धिं रायं एवं वदासी-एवं खलु सामी ! अहं अन्नया कयाई तुभं दोच्चेणं मिहिलं रायहाणिं गते तत्थ णं मए कुंभगस्स रन्नो धूयाए पंभावईए देवीए अत्तयाए मल्लीए संवच्छरपडिलेहणगंसि दिव्वे सिरिदामगंडे दिट्ठपुत्रे तस्स णं सिरिदामगंडस्स इमे पउमावतीए देवीए सिरिदामगंडे सयसहस्सतिमंपि कलं ण अग्घति, तते णं पडिबुद्धी सुबुद्धिं अमच्चं एवं वदासी-केरिसिया णं देवाणुप्पिया ! मल्ली विदेहरायवरकन्ना जस्स णं संवच्छरपडिलेहणयंसि सिरिदामगंडस्स पउमावतीए देवीए सिरिदामगंडे सयसहस्सतिमंपि कलं न अग्घति ?, तते णं सुबुद्धी पडिबुद्धिं इक्खागुरायं एवं वदासी-विदेहरायवरकन्नगा सुपइट्ठियेकुमुन्नयचारुचरणा वन्नओ, तते णं पडिबुद्धी सुबुद्धिस्स अमच्चस्स अंतिए सोच्चा णिसम्म मिरिदामगंडजणितहासे दूयं सदावेइ ता एवं व०-गच्छाहि णं तुमं देवाणुप्पिया ! मिहिलं रायहाणिं तत्थ णं कुंभगस्स रन्नो धूयं पभावतीए देवीए अत्तियं मल्लिं विदेहरायवरकण्णगं मम भारि-यत्ताए वरेहि जतिवियणं सा सयं रज्जसुंका, तते णं से दूए पडिबुद्धिणा रन्ना एवं वुत्ते समाणे हट्ठ० पडिसुणेति ता जेणेव सए गिहे जेणेव चाउग्घंटे आसग्हे तेणेव उवागच्छति ता चाउग्घंटे आसरहं पडिकप्पावेति ता दुरुहे जाव हयगयमहयाभडचडगरेणं साएयाओ णिग्गच्छति ता जेणेव विदेहजणवए जेणेव मिहिला रायहाणी तेणेव पहारेत्थ गमणाए । ७४। तेणं कालेणं० अंगानाम जणवए होत्था, तत्थ णं चंपानामे णयरी होत्था, तत्थ णं चंपाए नयरीए चंदच्छाए अंगराया होत्था, तत्थ णं चंपाए नयरीए अग्घन्नगपामोक्खा बहवे संज-त्ताणावावाणियगा परिवसंति अड्ढा जाव अपरिभूया, तते णं से अरहन्नगे समणोवासए यावि होत्था अहिगयजीवाजीवे वन्नओ, तते णं तेसिं अरहन्नगपामोक्खाणं संजुत्ताणावावा-णियगाणं अन्नया कयाई एगयओ सहिआणं इमे एयारूवे मिहो कहासंलावे समुप्पज्जित्था-सेयं खलु अम्हं गणिमं च धरिमं च मेज्जं च पारिच्छेज्जं च भंडगं गहाय लवणसमुहं पोत-वहणेण ओगाहित्तएत्तिकट्ठ अन्नमन्नं अयमट्ठं पडिसुणेति ता गणिमं च ४ गेण्हंति ता सगडिसागडियं सज्जेति ता गणिमस्स ४ भंडगस्स सगडिसागडियं भरेति ता सोहणंसि तिहिकरणनक्खत्तमुहुत्तंसि विपुलं असणं ४ उवक्खडावेति मित्तणाइ० भोअणवेलाए भुंजावेति जाव आपुच्छंति ता सगडिसागडियं जोयंति ता चंपाए नयरीए मज्झमज्झेणं जेणेव गंभीरए पोयपट्ठणे तेणेव उवा० ता सगडिसागडियं जोयंति ता पोयवहणं सज्जेति ता गणिमस्स य जाव चउव्विहस्स भंडगस्स भरेति तंदुलाण य समितस्स य नेट्ठयस्स य गुल्लस्स य घयस्स य गोरसस्स य उदयस्स य उदयभायणाण य ओसहाण य भेसज्जाण य तणस्स य कट्ठस्स य आवरणाण य पहरणाण य अच्चेसिं च बहूणं पोयवहणपाउग्गाणं दव्वाणं पोतवहणं भरेति सोहणंसि तिहिकरणनक्खत्तमुहुत्तंसि विपुलं असणं ४ उवक्खडावेति ता मित्तणाति० आपुच्छंति ता जेणेव पोतट्ठणे तेणेव उवागच्छंति तते णं तेसिं अरहन्नग जाव वाणि-यगाणं जाव ताहिं वग्गूहिं अभिणंदंता य अभिसंथुणमाणा य एवं वदासी-अज्ज ताय भाय माउल भाइणेजे भगवता समुदेणं अनभिखिज्जमाणा २ चिरं जीवह भदं च भे पुणगवि लद्धट्ठे कयकज्जे अणहसमग्गे नियगं घरं हव्वमागए पासामोत्तिकट्ठ ताहिं सोमाहिं निद्धाहिं दीहाहिं पप्पु(प्र०च्छ)याहिं दिट्ठीहिं निरीक्खमाणा मुहुत्तमेत्तं संचिट्ठंति, तओ समाणिएसु पुष्पबलिकम्मेसु दिन्नेसु सरसरत्तचंदणदहरपंचंगुलितलेसु अणुक्खत्तंसि धूवंसि पूतिएसु समुहवाएसु संसारियासु वल्लयबाहासु ऊसिएसु सिएसु झयग्गेसु पट्ठप्पवाइएसु तूरेसु जइएसु सव्वसउणेसु गहिएसु रायवरसासणेसु महया उक्किट्ठिमीहणायजावरवेणं पक्खुभितमहासमुहरवभूयंपिव मेइणिं करेमाणा एगदिसिं जाव वाणियगा णावं दुरुद्धा, ततो पुस्समाणवो वक्कमुदाहु-हं भो ! सव्वेसिमवि अत्थसिद्धी उवट्ठिताइं कट्ठाणाइं पडिहयातिं सव्वपावाइं जुत्तो पूसो विजओ मुहुत्तो अयं देसकालो, ततो पुस्समाणएणं वक्के समुदाहिए हट्ठतुट्ठे कुच्छि-धारकन्नधारगन्धिभजसंजत्ताणावावाणियगा वावारिंसु तं नावं पुन्नुच्छंगं पुण्णमुहिं बंधणेहिंतो मुंचंति, तते णं सा नावा विमुक्कबंधणा पवणबलसमाहया उम्भिसयसिया विततपक्खा इव गरुडजुवई गंगासलिलतिक्खसोयवेगेहिं संवुज्झमाणी २ उम्मीतरंगमालासहस्साइं समतिच्छमाणी २ कइवएहिं अहोरत्तेहिं लवणसमुहं अणेगातिं जोयणसतातिं ओगाढा, तते णं तेसिं अरहन्नगपामोक्खाणं संजुत्तानावावाणियगाणं लवणसमुहं अणेगाइं जोयणसयाइं ओगाढाणं समाणाणं बहूतिं उप्पातियसतातिं पाउग्ग्भूयाइं, तंजहा-अकाले गज्जिते अकाले विज्जुते

अकाले थणियसहे अभिक्खणं २ आगासे देवताओ नच्चंति, एगं च णं महं पिसायरूवं पासंति, तालजंघं दिवं गयाहिं बाहाहिं मसिमूसगमहिसकालगं भरियमेहवन्नं लंबोट्टं निग्ग-
यग्गदंतं निह्वालियजमलजुयलजीहं आऊ(प्र०गू)सियवयणगंडदेसं चीणचिपिटनासियं विगयभुग्गभग्गभुमयं खज्जोयगदित्तचक्खुरागं उत्तासणगं विसालवच्छं विसालकुच्छं पलं-
बकुच्छं पहसियपयलियपयडियगत्तं पणच्चमाणं अप्फोटंतं अभिवग्गंतं अभिगज्जंतं बहुसो २ अट्टट्टहासे विणिम्मुयंतं नीलुप्पलगवलगुलियअयसिकुसुमप्पगासं खुरधारं असिं गहाय
अभिमुहमावयमाणं पासंति, तते णं ते अरहण्णगवज्जा संजुत्ताणावावाणियगा एगं च णं महं तालपिसायं पासंति तालजंघं दिवं गयाहिं बाहाहिं फुट्टसिरं भमरणिगरवरमासरासिम-
हिसकालगं भरियमेहवन्नं सुप्पणहं फालसरिसजीहं लंबोट्टं धवलवट्टअसिलिट्टित्तिक्खथिरपीणकुडिलदाढोवगूढवयणं विकोसियधारासिजुयलसमसरिसतणुयचंचलगलंतरसलोलचवलफु-
रुफुरेतनिह्वालियग्गजीहं अवयच्छियमहल्लविगयबीभत्सलालपगलंतरत्ततालुयं हिंगुलुयसगम्भकंदरबिलंव अंजणगिरिस्स अ(प्र० गिज्जरस्स)गिगजालुगिलंतवयणं आऊसियअक्ख-
चम्मउइट्ट(प्र० उट्ट)गंडदेसं चीणचिपिटवंकभग्गणासं रोसागयधमधमैतमारुतनिट्टुरखरफरुसझुसिरं ओभुग्गणासियपुडं घाडुम्भडरइयभीसणमुहं उद्धमुहकन्नसकुलियमहंतविगय-
लोमसंखालगलंबंतचलियकन्नं पिंगलदिप्पंतलोयणं भिउडितडियं(डि पा०)निडालं नरसिरमालपरिणद्धचिंधं विचित्तगोणससुबद्धपरिकरं अवहोलंतपुप्फुयायंतसप्पविच्छुयगोधुंदरनउ-
लसरडविरइयविचित्तवेयच्छमालियागं भोगकूरकण्हसप्पधमधमैतलंबंतकन्नपूरं मज्जारसियाललइयखंधं दित्तघुघुयंतघूयकयकुंतलसिरं घंटारवेण भीमं भयंकरं कायरजणहिययफोडणं
दित्तमट्टट्टहासं विणिम्मुयंतं वसारुहिरपूयमंसमलमलिणपोच्चडतणुं उत्तासणयं विसालवच्छं पेच्छंता भिन्नणहमुहनयणकन्नवरवग्घचित्तकत्तीणियंसणं सरसरुहिरगयचम्मविततऊस-
वियबाहुजुयलं ताहि य खरफरुसअसिणिद्धअणिट्टदित्तअसुभअप्पियअक्कंतवग्गूहि य तज्जयंतं पासंति तं तालपिसायरूवं एज्जमाणं ता भीया संजायभया अन्नमन्नस्स कायं समतु-
रंगेमाणा २ बहूणं इंदाण य खंदाण य रुद्धसिववेसमणणागाणं भूयाण य जक्खाण य अज्जकोट्टकिरियाण य बहूणि उवाइयसयाणि ओवातियमाणा २ चिट्ठंति, तए णं से अरहन्नए
समणोवासए तं दिव्वं पिसायरूवं एज्जमाणं पासति ता अभीते अतत्थे अचलिए असंभंते अणाउले अणुव्विग्गे अभिन्नमुहरागणयणवन्ने अदीणविमणमाणसे पोयवहणस्स एगदेसंसि
वत्थंतेणं भूमिं पमज्जति ता ठाणं ठाइ ता करयल० एवं वयासी-नमोऽत्थु णं अरहंताणं जाव संपत्ताणं, जइ णं अहं एत्तो उवसग्गातो मुंचामि तो मे कप्पति पारित्तए अह णं एत्तो
उवसग्गाओ ण मुंचामि तो मे तहा पच्चक्खाएयव्वेत्तिकट्टु सागारं भत्तं पच्चक्खाति, तते णं से पिसायरूवे जेणेव अरहन्नए समणोवासए तेणेव उवागच्छति ता अरहन्नगं एवं वदासी-
हं भो! अरहन्नगा अपत्थियपत्थिया जाव परिवज्जिया णो खलु कप्पति तव सीलव्वयगुणवेरमणपच्चक्खाणपोसहोववासातिं चालित्तए वा एवं खोभेत्तए वा खंडित्तए वा भंजित्तए वा
उज्झित्तए वा परिच्चइत्तए वा?, तं जति णं तुमं सीलव्वयं जाव ण परिच्चयसि तो ते अहं एयं पोतवहणं दोहिं अंगुलियाहिं गेण्हामि ता सत्तट्टतलप्पमाणमेत्तातिं उड्ढं वेहासं उव्वि-
हामि ता अंतो जलंसि णिब्बोलेमि जेणं तुमं अट्टट्टट्टवसट्टे असमाहिपत्ते अकाले चेव जीवियाओ ववरोविज्जसि, तते णं से अरहन्नते समणोवासए तं देवं मणसा चेव एवं वदासी-
अहं णं देवाणु०! अरहन्नए णामं समणोवासए अहिगयजीवाजीवे नो खलु अहं सक्को केणइ देवेण वा जाव निग्गंथाओ पावयणाओ चालित्तए वा खोभेत्तए वा विपरिणामेत्तए वा
तुमं णं जा सद्धा तं करेहित्तिकट्टु अभीए जाव अभिन्नमुहरागणयणवन्ने अदीणविमणमाणसे निच्चले निप्फंदे तुसिणीए धम्मज्झाणोवगते विहरति, तए णं से दिव्वे पिसायरूवे अर-
हन्नगं समणोवासगं दोच्चंपि तच्चंपि एवं वदासी-हंभो अरहन्नगा०! अदीणविमणमाणसे निच्चले निप्फंदे तुसिणीए धम्मज्झाणोवगए विहरति, तते णं से दिव्वे पिसायरूवे अरहन्नगं
धम्मज्झाणोवगयं पासति ता वलियतरागं० आसुरुत्ते तं पोयवहणं दोहिं अंगुलियाहिं गिण्हति ता सत्तट्टतलाइं जाव अरहन्नगं एवं वदासी-हं भो अरहन्नगा! अपत्थियपत्थिया णो
खलु कप्पति तव सीलव्वय तहेव जाव धम्मज्झाणोवगए विहरति, तते णं से पिसायरूवे अरहन्नगं जाहे नो संचाएइ निग्गंथाओ० चालित्तए वा० ताहे उवसंते जाव निव्विन्ने तं पोय-
वहणं सणियं २ उवरिं जलस्स ठवेति ता तं दिव्वं पिसायरूवं पडिसाहरइ ता दिव्वं देवरूवं विउव्वइ ता अंतलिक्खपडिवन्ने सखिखिणियाइं जाव परिहिते अरहन्नगं स० एवं वयासी-हं-
भो! अरहन्नगा! धन्नोऽसि णं तुमं देवाणुप्पिया! जाव जीवियफले जस्स णं तव निग्गंथे पावयणे इमेयारूवा पडिवत्ती लद्धा पत्ता अभिसमन्नागया, एवं खलु देवाणुप्पिया! सक्के
देविंदे देवराया सोहम्मं कप्पे सोहम्मवडिंसए विमाणे सभाए सुहम्माए बहूणं देवाणं मज्झगते महया सदेणं आतिक्रुवति ४-एवं खलु जंबुद्दीवे २ भारहे वासे चंपाए नयरीए अरहन्नए
सम० अहिगयजीवाजीवे नो खलु सक्को केणति देवेण वा दाणवेण वा निग्गंथाओ पावयणाओ चालित्तए वा जाव विपरिणामेत्तए वा, तते णं अहं देवाणु०! सक्कस्स णो एयमट्टं सह-
हामि० तते णं मम इमेयारूवे अब्भत्थिए ५-गच्छामि णं अरहन्नयस्स अंतियं पाउब्भवामि जाणामि ताव अहं अरहन्नगं किं पियधम्मं णो पियधम्मं? दढधम्मं नो दढधम्मं? सील-
व्वयगुण० किं चालेति जाव परिच्चयति णो परिच्चयतित्तिकट्टु, एवं संपेहेमि ता ओहिं पउंजामि ता देवाणु० ओहिणा आभोएमि ता उत्तरपुरच्छिमं० ता उत्तरविउव्वियं० (११०)

ताए उक्किट्टाए जेणेव समुदे जेणेव देवाणुप्पिया तेणेव उवागच्छामि ता देवाणु० उवसग्गं करेमि, नो चेव णं देवाणुप्पिया भीया वा०, तं जण्णं सक्के देविंदे देवराया वदति सच्चे णं एस-
मट्ठे तं दिट्ठे णं देवाणुप्पियाणं इड्ढी जुई जसे जाव परक्कमे लद्धे पत्ते अभिसमन्नागए तं खामेमि णं देवाणु०! खमंतुमरहंतु णं देवाणुप्पिया! णाइभुजो २ एवंकरणयाएत्तिकट्ठु पंज-
लिउडे पायवडिए एयमट्ठं विणएणं भुजो २ खामेइ ता अरहन्नयस्स दुवे कुंडलजुयले दलयति ता जामेव दिसिं पाउब्भूए तामेव पडिगए । ७५। तते णं से अरहन्नए निरुवसग्गमि-
तिकट्ठु पडिमं पारेति, तए णं ते अरहन्नगपामोक्खा जाव वाणियगा दक्खिणाणुकूलेणं वाएणं जेणेव गंभीरए पोयपट्टणे तेणेव उवागच्छंति ता पोयं लंबेति ता सगडसागडं सज्जेति
ता तं गणिमं ४ सगडि० संकामेति ता सगडी० जोएंति ता जेणेव मिहिला तेणेव उवागच्छंति ता मिहिलाए रायहाणीए बहिया अग्गुज्जाणंसि सगडीसगडं मोएन्ति ता मिहिलाए
रायहाणीए तं महत्थं महग्घं महरिहं विउलं रायरिहं पाहुडं कुंडलजुयलं च गेण्हंति ता अणुपविसंति ता जेणेव कुंभए तेणेव उवागच्छंति ता करयल० तं महत्थं० दिव्वं कुंडलजुयलं च
उवणेति तते णं कुंभए तेसिं संजत्तगाणं जाव पडिच्छइ ता मल्लीं विदेहरायवरकन्नं सदावेति ता तं दिव्वं कुंडलजुयलं मल्लीए विदेहरायवरकन्नगाए पिणद्धेति ता पडिविसज्जेति,
तते णं से कुंभए राया ते अरहन्नगपामोक्खे जाव वाणियगे विपुलेणं असणवत्थगंध जाव उस्सुकं वियरति ता रायमग्गमोगाढे आवासे वियरति० पडिविसज्जेति, तते णं अरहन्नग० सं-
जत्तगा जेणेव रायमग्गमोगाढे आवासे तेणेव उवागच्छंति ता भंडववहरणं करेंति ता पडिभंडं गेण्हंति ता सगडी० भरेंति जेणेव गंभीरए पोयपट्टणे तेणेव उवा०त्ता पोतवहणं सज्जेति
ता भंडं संकामेति ता दक्खिणाणु० जेणेव चंपा पोयट्टाणं तेणेव पोयं लंबेति ता सगडी० सज्जेति ता तं गणिमं ४ सगडी० संकामेति ता जाव महत्थं० पाहुडं दिव्वं च कुंडलजुयलं
गेण्हंति ता जेणेव चंदच्छाए अंगराया तेणेव उवा० तं महत्थं जाव उवणेति, तते णं चंदच्छाए अंगराया तं दिव्वं महत्थं च कुंडलजुयलं पडिच्छति ता ते अरहन्नगपामोक्खे एवं वदासी-
तुब्भे णं देवा०! बहूणि गामागर जाव आहिंडह लवणसमुदं च अभिक्खणं २ पोयवहणेहिं ओगाहह गाहह तं अत्थियाइं भे केइ कहिंचि अच्छेरए दिट्ठपुब्बे?, तते णं ते अरहन्नगपा-
मोक्खा चंदच्छायं अंगरायं एवं वदासी-एवं खलु सामी! अम्हे इहेव चंपाए नयरीए अरहन्नगपामोक्खा बहवे संजत्तगा णावावाणियगा परिवसामो, तते णं अम्हे अन्नया कयाई
गणिमं च ४ तहेव अहीणमतिरित्तं जाव कुंभगस्स रन्नो उवणेमो तते णं से कुंभए मल्लीए विदेहरायवरकन्नाए तं दिव्वं कुंडलजुयलं पिणद्धेति ता पडिविसज्जेति, तं एस णं सामी!
अम्हेहिं कुंभगरायभवणंसि मल्ली विदेह० अच्छेरए दिट्ठे तं नो खलु अन्ना कावि तारिसिया देवकन्ना वा जाव जारिसिया णं मल्ली विदेह०, तते णं से चंदच्छाए ते अरहन्नगपामोक्खे
सक्कारेति सम्माणेति ता पडिविसज्जेति, तते णं से चंदच्छाए वाणियगजणियहासे दूतं सदावेति जाव जइविय णं सा सयं रज्जसुंका, तते णं से दूते हट्ठे जाव पहारेत्थ गमणाए । ७६।
तेणं कालेणं० कुणाला नाम जणवए होत्था, तत्थ णं सावत्थी नामं नगरी होत्था, तत्थ णं रुप्पी कुणालाहिवई नामं राया होत्था, तस्स णं रुप्पिस्स धूया धारिणीए देवीए अत्तया
सुबाहुनामं दारिया होत्था, सुकुमाल० रूवेण य जोव्वणेणं लावण्णेण य उक्किट्टा उक्किट्टसरीरा जाया यावि होत्था, तीसे णं सुबाहुए दारियाए अन्नदा चाउम्मासियमज्जणए जाए
यावि होत्था, तते णं से रुप्पी कुणालाहिवई सुबाहुए दारियाए चाउम्मासियमज्जणयं उवट्ठियं जाणति ता कोटुंबियपुरिसे सदावेति ता एवं वयासी-एवं खलु देवाणुप्पिया! सुबाहुए
दारियाए कल्लं चाउम्मासियमज्जणए भविस्सति तं कल्लं तुब्भे णं रायमग्गमोगाढंसि चउक्कंसि जलथलयदसद्धवन्नमल्लं साहरह जाव सिरिदामगंडं ओलइन्ति, तते णं से रुप्पी कुणाला-
हिवती सुवन्नगारसेणिं सदावेति ता एवं वयासी-खिप्पामेव भो देवाणुप्पिया! रायमग्गमोगाढंसि पुप्फमंडवंसि णाणाविहपंचवच्चेहिं तंदुलेहिं णगरं आलिहह तस्स बहुमज्झदेसभाए
पट्टयं रएह ता जाव पच्चप्पिणंति, तते णं से रुप्पी कुणालाहिवई हत्थिखंधवरगए चाउरंगिणीए सेणाए महया भड० अंतेउरपरियालसंपरिवुडे सुबाहुं दारियं पुरतो कट्ठु जेणेव रायमग्गे
जेणेव पुप्फमण्डवे तेणेव उवागच्छति ता हत्थिखंधातो पच्चोरुहति ता पुप्फमंडवं अणुपविसति ता सीहासणवरगए पुरत्थाभिमुहे सन्निसन्ने, तते णं ताओ अंतेउरियाओ सुबाहुं दारियं
पट्टयंसि दुरूहेति ता सेयपीतएहिं कलसेहिं ण्हारोति ता सब्बालंकारविभूसियं करेंति ता पिउणो पायं वंदिउं उवणेति, तते णं सुबाहुदारिया जेणेव रुप्पी राया तेणेव उवागच्छति ता
पायग्गहणं करेति, तते णं से रुप्पी राया सुबाहुं दारियं अंके निवेसेति ता सुबाहुए दारियाए रूवेण य जो० लाव० जाव विम्हिए वरिसधरं सदावेति ता एवं वयासी-तुमण्णं देवाणु-
प्पिया! मम दोच्चेणं बहूणि गामागरनगरगिहाणि अणुपविससि, तं अत्थि याइं तं कस्सइ रन्नो ईसरस्स वा कहिंचि एयारिसए मज्जणए दिट्ठपुब्बे जारिसए णं इमीसे सुबाहुदारियाए
मज्जणए?, तते णं से वरिसधरे रुप्पिं करयल० एवं व०-एवं खलु सामी! अहं अन्नया तुब्भेणं दोच्चेणं मिहिलं गए तत्थ णं मए कुंभगस्स रन्नो धूयाए पभावतीए देवीए अत्तयाए मल्लीए
विदेहरायवरकन्नगाए मज्जणए दिट्ठे, तस्स णं मज्जणगस्स इमे सुबाहुए दारियाए मज्जणए सयसहस्सइमंपि कलं न अग्घेति, तए णं से रुप्पी राया वरिसधरस्स अंतिए एयमट्ठं सोच्चा

णिसम्म सेसं तहेव मज्जणगजणितहासे दूतं सदावेति ता एवं वयासी० जेणेव मिहिला नयरी तेणेव पहारित्थ गमणाए । ७७ । तेणं कालेणं० कासी नाम जणवए होत्था, तत्थ णं वाणारसीनाम नगरी होत्था, तत्थ णं संखे नामं कासीराया होत्था, तते णं तीसे मल्लीए विदेहरायवरकन्नाए अन्नया कयाई तस्स दिवस्स कुंडलजुयलस्स संधी विसंघडिए यावि होत्था, तते णं से कुंभए राया सुवन्नगारसेणिं सदावेति ता एवं वदासी-तुम्हे णं देवाणुप्पिया ! इमस्स दिवस्स कुंडलजुयलस्स संधिं संघाडेह, तए णं सा सुवन्नगारसेणी एतमट्ठं तहत्ति पडिसुणेति ता तं दिव्वं कुंडलजुयलं गेण्हति ता जेणेव सुवन्नगारभिसियाओ तेणेव उवागच्छति ता सुवन्नगारभिसियासु णिवेसेति ता बहूहिं आएहि य जाव परिणामेमाणा इच्छति तस्स दिवस्स कुंडलजुयलस्स संधिं घडित्तए नो चेव णं संचाएति संघडित्तए, तते णं सा सुवन्नगारसेणी जेणेव कुंभए तेणेव उवागच्छति ता करयल० वद्धावेत्ता एवं वदासी-एवं खलु सामी ! अज्ज तुम्हे अम्हे सदावेह जाव संधिं संघाडेत्ता एतमाणं पच्चप्पिणह, तते णं अम्हे तं दिव्वं कुंडलजुयलं गेण्हामो जेणेव सुवन्नगारभिसियाओ जाव नो संचाएमो संघाडित्तए, तते णं अम्हे सामी ! एयस्स दिवस्स कुंडलस्स अन्नं सरिसयं कुंडलजुयलं घडेमो, तते णं से कुंभए राया तीसे सुवन्नगारसेणीए अंतिए एयमट्ठं सोच्चा निसम्म आसु-रुत्ते तिवलियं भिउडीं निडाले साहट्टु एवं वदासी-से के णं तुम्हे कलायाणं भवह जे णं तुम्हे इमस्स कुंडलजुयलस्स नो संचाएह संधिं संघाडेत्ता ? ते सुवन्नगारे निव्विसए आणवेति, तते णं ते सुवन्नगारा कुंभेणं रण्णा निव्विसया आणत्ता समाणा जेणेव सातिं २ गिहातिं तेणेव उवा० ता सभंडमत्तोवगरणमायाए मिहिलाए रायहाणीए मज्झंमज्झेणं निक्खमंति ता विदेहस्स जणवयस्स मज्झंमज्झेणं जेणेव कासी जणवए जेणेव वाणारसी नयरी तेणेव उवा० ता अग्गुजाणंसि सगडीसागडं मोएन्ति ता महत्थं जाव पाहुडं गेण्हंति ता वाणारसीनयरीं मज्झंमज्झेणं जेणेव संखे कासीराया तेणेव उवागच्छंति ता करयल० जाव एवं० अम्हे णं सामी ! मिहिलातो नयरीओ कुंभएणं रन्ना निव्विसया आणत्ता समाणा इहं हव्वमागता तं इच्छामो णं सामी ! तुम्हं बाहुच्छायापरिग्गहिया निब्भया निरुव्विग्गा सुहंसुहेणं परिवसित्तं, तते णं संखे कासीराया ते सुवन्नगारे एवं वदासी-किन्नं तुम्हे देवा० ! कुंभएणं रन्ना निव्विसया आणत्ता ? तते णं ते सुवन्नगारा संखं एवं वदासी-एवं खलु सामी ! कुंभगस्स रन्नो धूयाए पभावतीए देवीए अत्तयाए मल्लीए कुंडलजुयलस्स संधी विसंघ-डिए तते णं से कुंभए सुवन्नगारसेणिं सदावेति ता जाव निव्विसया आणत्ता, तं एएणं कारणेणं सामी ! अम्हे कुंभएणं निव्विसया आणत्ता, तते णं से संखे सुवन्नगारे एवं वदासी-केरिसिया णं देवाणुप्पिया ! कुंभगस्स धूया पभावतीदेवीए अत्तया मल्ली वि० ?, तते णं सुवन्नगारा संखरायं एवं वदासी-णो खलु सामी ! अन्ना काई तारिसिया देवकन्ना वा गंधव-कन्नगा वा जाव जारिसिया णं मल्ली विदेहवररायकन्ना, तते णं से संखे कुंडलजुअलजणितहासे दूतं सदावेति जाव तहेव पहारेत्थ गमणाए । ७८ । तेणं कालेणं० कुरुजणवए होत्था हत्थिणाउरे नगरे अदीणसत्तू नामं राया होत्था जाव विहरति, तत्थ णं मिहिलाए कुंभगस्स पुत्ते पभावतीए अत्तए मल्लीए अणुजायए मल्लदिन्नए नाम कुमारे जाव जुवराया यावि होत्था, तते णं मल्लदिन्ने कुमारे अन्नया कोटुंबिय० सदावेति ता गच्छह णं तुम्हे मम पमदवणंसि एगं महं चित्तसभं करेह अणेग जाव पच्चप्पिणंति, तते णं से मल्लदिन्ने चित्तगर-सेणिं सदावेति ता एवं वयासी-तुम्हे णं देवा० ! चित्तसभं हावभावविलासविब्बोयकल्लिएहिं रूवेहिं चित्तेह ता जाव पच्चप्पिणह, तते णं सा चित्तगरसेणी तहत्ति पडिसुणेति ता जेणेव सयाइं गिहाइं तेणेव उवा० ता तूलियाओ वन्नए य गेण्हंति ता जेणेव चित्तसभा तेणेव उवागच्छंति ता अणुपविसंति ता भूमिभागे विरंचंति ता भूमिं सज्जेति ता चित्तसभं हाव-भाव जाव चित्तेउं पयत्ता यावि होत्था, तते णं एगस्स चित्तगरस्स इमेयारूवा चित्तगरलद्धी लद्धा पत्ता अभिसमन्नागया-जस्स णं दुपयस्स वा चउपयस्स वा अपयस्स वा एगदे-समवि पासति तस्स णं देसाणुसारेणं तयाणुरूवं रूवं निव्वत्तेति, तए णं से चित्तगरदारए मल्लीए जवणियंतरियाए जालंतरेण पायंगुट्ठं पासति, तते णं तस्म णं चित्तगरस्स इमेयारूवे जाव सेयं खलु ममं मल्लीएवि पायंगुट्ठाणुसारेणं सरिसगं जाव गुणोववेयं रूवं निव्वत्तित्तए, एवं संपेहेति ता भूमिभागं सज्जेति ता मल्लीएवि पायंगुट्ठाणुसारेणं जाव निव्वत्तेति, तते णं सा चित्तगरसेणी चित्तसभं जाव हावभाव० चित्तेति ता जेणेव मल्लदिन्ने कुमारे तेणेव उवा० ता जाव एतमाणत्तियं पच्चप्पिणंति, तए णं मल्लदिन्ने चित्तगरसेणिं सक्कारेइ ता विपुलं जीवियारिहं पीइदाणं दलेइ ता पडिविसज्जेइ, तए णं मल्लदिन्ने अन्नया ण्हाए अंतेउरपरियालसंपरिवुडे अम्मधाईए सद्धिं जेणेव चित्तसभं उवा० चित्तसभं अणुपविसइ ता हावभाव-विलासविब्बोयकल्लियाइं रूवाइं पासमाणे २ जेणेव मल्लीए विदेहवररायकन्नाए तयाणुरूवे रूवे णिव्वत्तिए तेणेव पहारेत्थ गमणाए, तए णं से मल्लदिन्ने कुमारे मल्लीए विदेहवररायक-न्नाए तयाणुरूवं रूवं निव्वत्तियं पासति ता इमेयारूवे अब्भत्थिए जाव समुप्पजित्था-एस णं मल्ली विदेहवररायकन्नत्तिकट्टु लज्जिए वीडिए विअडे सणियं २ पच्चोसक्कइ, तए णं मल्लदिन्नं अम्मधाई सणियं २ पच्चोसक्कतं पासित्ता एवं वदासी-किन्नं तुमं पुत्ता ! लज्जिए वीडिए (प्र० वेइडे) विअडे सणियं २ पच्चोसक्कसि ?, तते णं से मल्लदिन्ने अम्मधातिं एवं

वदासी-जुत्तं णं अम्मो ! मम जेट्टाए भगिणीए गुरुदेवयभूयाए लज्जणिज्जाए मम चित्तगरणिब्रत्तियं सभं अणुपविसित्तए ? तए णं अम्मधार्ई मल्लदिन्नं कुमारं एवं व०-नो खलु पुत्ता ! एस मल्ली, एस णं मल्ली विदे० चित्तगरएणं तयाणुरूवे रूवे णिब्रत्तिए, तते णं मल्लदिन्ने अम्मधार्ईए एयमट्ठं सोच्चा आसुरुत्ते एवं वयासी-केस भो णं चित्तयरए अपत्थियपत्थिए जाव परिवज्जिए जे णं मम जेट्टाए भगिणीए गुरुदेवयभूयाए जाव निब्रत्तिएत्तिकट्ठु तं चित्तगरं वज्झं आणवेइ, तए णं सा चित्तगरस्सेणी इमीसे कहाए लद्धट्ठा समाणा जेणेव मल्ल-दिन्ने कुमारे तेणेव उवागच्छइ ता करयलपरिग्गहियं जाव वद्धावेइ ता एवं वयासी-एवं खलु सामी ! तस्स चित्तगरस्स इमेयारूवा चित्तकरलद्धी लद्धा पत्ता अभिसमन्नागया जस्स णं दुपयस्स वा जाव णिब्रत्तेति तं मा णं सामी ! तुब्भे तं चित्तगरं वज्झं आणवेइ, तं तुब्भे णं सामी ! तस्स चित्तगरस्स अन्नं तयाणुरूवं दंडं निब्रत्तेइ, तए णं से मल्लदिन्ने तस्स चित्त-गरस्स संडासगं छिंदावेइ ता निब्रिसयं आणवेइ, तए णं से चित्तगरए मल्लदिन्नेणं णिब्रिसिए आणत्ते समाणे सभंडमत्तोवगरणमायाए मिहिलाओ णयरीओ णिक्खमइ (प्र०य) विदेहं जणवयं मज्झंमज्झेणं जेणेव कुरुजणवए जेणेव हत्थिणाउरे नयरे जेणेव अदीणसत्तू राया तेणेव उवा० ता भंडणिकखेवं करेइ ता चित्तफलं सज्जेइ ता मल्लीए विदेह० पायंगुट्टाणु-सारेण रूवं णिब्रत्तेइ ता कक्खंतंरसिं लुब्भइ ता महत्थं जाव पाहुडं गेण्हइ ता हत्थिणापुरं नयरं मज्झंमज्झेणं जेणेव अदीणसत्तू राया तेणेव उवागच्छति ता तं करयल जाव वद्धावेइ ता पाहुडं उवणेति ता एवं वयासी-एवं खलु अहं सामी ! मिहिलाओ रायहाणीओ कुंभगस्स रन्नो पुत्तेणं पभावतीए देवीए अत्तएणं मल्लदिन्नेणं कुमारेणं निब्रिसिए आणत्ते समाणे इह हव्वमागए, तं इच्छामि णं सामी ! तुब्भं बाहुच्छायापरिग्गहिए जाव परिवसित्तए, तते णं से अदीणसत्तू राया तं चित्तगरदारयं एवं वदासी-किन्नं तुमं देवाणुप्पिया ! मल्लदिणेणं निब्रिमए आणत्ते ? तए णं से चित्तयरदारए अदीणसत्तुरायं एवं वदासी-एवं खलु सामी ! मल्लदिन्ने कुमारे अण्णया कयार्ई चित्तगरसेणिं सद्दावेइ ता एवं व०-तुब्भे णं देवाणुप्पिया ! मम चित्तसभं तं चेव सव्वं भाणियव्वं जाव मम संडासगं छिंदावेइ ता निब्रिसयं आणवेइ, तं एवं खलु अहं सामी ! मल्लदिन्ने कुमारेणं निब्रिसिए आणत्ते, तते णं अदीणसत्तू राया तं चित्तगरं एवं वदासी-से केरिसिए देवाणुप्पिया ! तुमे मल्लीए तदाणुरूवे रूवे निब्रत्तिए ?, तते णं से चित्त० कक्खंतंराओ चित्तफलं णीणेति ता अदीणसत्तुस्स उवणेइ ता एवं व०-एस णं सामी ! मल्लीए वि० तयाणुरूवस्स रूवस्स केई आगारभावपडोयारे निब्रत्तिए णो खलु सका केणइ देवेण वा जाव मल्लीए विदेहरायवरकण्णगाए तयाणुरूवे रूवे निब्रत्तित्तए, तते णं अदीणसत्तू पडिरूवजणितहासे दूयं सद्दावेति २ एवं वदासी-तहेव जाव पहारेत्थ गमणाए । ७९ । तेणं कालेणं० पंचाले जणवए कंपिल्लपुरे नयरे जियसत्तू नाम राया पंचाला-हिवई, तस्स णं जितसत्तुस्स धारिणीपामोक्खं देवीसहस्सं ओरोहे होत्था, तत्थ णं मिहिलाए चोक्खा नामं परिब्राइया रिउबेद जाव परिणिट्ठिया यावि होत्था, तते णं सा चोक्खा परिब्राइया मिहिलाए बहूणं राईसर जावसत्थवाहपभित्तीं पुरतो दाणधम्मं च सोयधम्मं च तित्थाभिसेयं च आघवेमाणी पण्णवेमाणी परूवेमाणी उवदंसेमाणी विहरति, तते णं सा चोक्खा परिब्राइया अन्नया कयार्ई तिदंडं च कुंडियं च जाव धाउरत्ताओ य गेण्हइ ता परिब्राइगावसहाओ पडिनिक्खमइ ता पविरलपरिब्राइयाहिं सद्धिं संपरिवुडा मिहिलं रायहाणिं मज्झंमज्झेणं जेणेव कुंभगस्स रन्नो भवणे जेणेव कण्णंतेउरे जेणेव मल्ली विदेह० तेणेव उवागच्छइ ता उदयपरिफोसियाए दब्भोवरि पच्चत्थुयाए भिसियाए निसीयति ता मल्लीए विदेह० पुरतो दाणधम्मं च जाव विहरति, तते णं मल्ली विदेह० चोक्खं परिब्राइयं एवं वयासी-तुब्भे णं चोक्खे ! किंमूलए धम्मे पन्नत्ते ?, तते णं सा चोक्खा परिब्राइया मल्ली विदेह० एवं वदासी-अहं णं देवाणुप्पिए ! सोयमूलए धम्मे पण्णवेमि, जण्णं अम्मं किंचि असुई भवइ तण्णं उदएण य मट्ठियाए जाव अविग्घेणं सग्गं गच्छामो, तए णं मल्ली विदेह० चोक्खं परिब्राइयं एवं वदासी-चोक्खा ! से जहानामए केई पुरिसे रुहिरकयं वत्थं रुहिरेण चेव धोवेज्जा अत्थि णं चोक्खा ! तस्स रुहिरकयस्स वत्थस्स रुहिरेणं धोवमाणस्स काई सोही ? नो इणट्ठे समट्ठे, एवामेव चोक्खा ! तुब्भे णं पाणाइवाएणं जाव मिच्छादंसणसल्लेणं० नत्थि काई सोही जहा व तस्स रुहिरकयस्स वत्थस्स रुहिरेणं चेव धोवमाणस्स, तए णं सा चोक्खा परिब्राइया मल्लीए विदेह० एवं वुत्ता समाणा संकिया कंखिया विइगिच्छिया भेयसमावण्णा जाया यावि होत्था, मल्लीए णो संचाएति किंचिवि पामोक्खम्मइक्खित्तए तुसिणीया संचिट्ठति, तते णं तं चोक्खं मल्लीए बहुओ दासचेडीओ हीलेंति निंदंति खिसंति गरहंति अप्पेगतिया हेरुयालंति अप्पे० मुहमक्कडिया करेंति अप्पे० वग्घाडीओ करेंति अप्पे० तज्जेमाणीओ तालेमाणीओ निच्छुभंति, तए णं सा चोक्खा मल्लीए विदेह० दासचेडियाहिं जाव गरहिज्जमाणी हीलिज्जमाणी आसुरुत्ता जाव मिसिमिसेमाणी मल्लीए विदे-हरायवरकण्णाए पओसमावज्जति, भिसियं गेण्हति ता कण्णंतेउराओ पडिनिक्खमति ता मिहिलाओ निग्गच्छति ता परिब्राइयासंपरिवुडा जेणेव पंचालजणवए जेणेव कंपिल्लपुरे बहूणं राईसर जाव परूवेमाणी विहरति, तए णं से जियसत्तू अन्नदा कदाई अंतो अंतोउरपरियाल सद्धिं संपरिवुडे एवं जाव विहरति, तते णं सा चोक्खा परिब्राइयासंपरिवुडा जेणेव जितसत्तुस्स

रणो भवणे जेणेव जितसत्तू तेणेव उवागच्छइ ता अणुपविसति ता जियसत्तुं जएणं विजएणं वद्धावेति, तते णं से जितसत्तू चोक्खं परि० एज्जमाणं पासति ता सीहासणाओ अब्भुट्टेति ता चोक्खं सक्कारेति ता आसणेणं उवणिमंतेति, तते णं सा चोक्खा (प्र० चोक्खि) उदगपरिफोसियाए जाव भिसियाए निविसइ, जियसत्तुं रायं रज्जे य जाव अंतेउरे य कुसलोदंतं पुच्छइ, तते णं सा चोक्खा जियसत्तुस्स रन्नो दाणधम्मं च जाव विहरति, तते णं से जियसत्तू अप्पणो ओरोहंसि जाव विम्हिए चोक्खं एवं वदासी-तुमं णं देवाणुप्पिया ! बहूणि गामागर जाव अडह बहूण य रातीसर० गिहाति अणुपविससि तं अत्थियाइं ते कस्सवि रन्नो वा जाव एरिसए ओरोहे दिट्ठपुत्रे जारिसए णं इमे मह उवरोहे ?, तए णं सा चोक्खा परिवाइया ईसिं अवहसियं करेइ ता एवं वयासी-एवं च सरिसए णं तुमं देवाणुप्पिया ! तस्स अगडददुदुरस्स ?, के णं देवाणुप्पिए ! से अगडददुदुरे ?, जियसत्तू ! से जहानामए अग-डददुदुरे सिया, से णं तत्थ जाए तत्थेव वुड्ढे अण्णं अगडं वा तलागं वा दहं वा सरं वा सागरं वा अपासमाणे चेवं मण्णइ-अयं चेव अगडे वा जाव सागरे वा, तए णं तं कूवं अण्णे सामुहए ददुदुरे हवमागए, तए णं से कूवददुदुरे तं सामुहददुदुरं एवं वदासी-से केस णं तुमं देवाणुप्पिया ! कत्तो वा इह हवमागए ?, तए णं से सामुहए ददुदुरे तं कूवददुदुरं एवं वयासी-एवं खलु देवाणुप्पिया ! अहं सामुहए ददुदुरे, तए णं से कूवददुदुरे तं सामुहयं ददुदुरं एवं वयासी-केमहालए णं देवाणुप्पिया ! से समुहे ?, तए णं से सामुहए ददुदुरे तं कूवददुदुरं एवं वयासी-महालए णं देवाणुप्पिया ! समुहे, तए णं से ददुदुरे पाएणं लीहं कड्ढेइ ता एवं वयासी-एमहालए णं देवाणुप्पिया ! से समुहे ?, णो इणट्ठे समट्ठे, महालए णं से समुहे, तए णं से कूवददुदुरे पुरच्छिमिल्लाओ तीराओ उप्पिडित्ताणं गच्छइ ता एवं वयासी-एमहालए णं देवाणुप्पिया ! से समुहे ?, णो इणट्ठे समट्ठे, तहेव एवामेव तुमं पि जियसत्तू अन्नेसिं बहूणं राईसरजावसत्थवाहपभिईणं भज्जं वा भगिणीं वा धूयं वा सुण्हं वा अपासमाणे जाणेसि जारिसए मम चेव णं ओरोहे तारिसए णो अण्णस्स, तं एवं खलु जियसत्तू ! मिहिलाए नयरीए कुंभगस्स धूता पभावतीए अत्तिया मल्ली नामंति रूवेण य जुवणेण जाव नो खलु अण्णा काई देवकन्ना वा जारिसिया मल्ली, मल्लीए विदेहवररायकण्णाए छिण्णस्सवि पायंगुट्ठगस्स इमे तवोरोहे सयसहस्सतिमं पि कलं न अग्घइत्तिकट्ठु जामेव दिसं पाउब्भूया तामेव दिसं पडिगया, तते णं से जितसत्तू परिवाइयाजणितहासे दूयं सदावेति ता जाव पहारेत्थ गम-णाए । ८० । तते णं तेसिं जियसत्तुपामोक्खाणं छण्हं राईणं दूया जेणेव मिहिला तेणेव पहारेत्थ गमणाए, तते णं छप्पिय दूतका जेणेव मिहिला तेणेव उवाग० ता मिहिलाए अग्गुज्जाणंसि पत्तेयं २ खंधावारनिवेसं करेति ता मिहिलं रायहाणीं अणुपविसंति ता जेणेव कुंभए तेणेव उवा० पत्तेयं २ करयल० साणं २ राईणं वयणातिं निवेदंति, तते णं से कुंभए तेसिं दूयाणं अंतिए एयमट्ठं सोच्चा आसुरुत्ते जाव तिवलियं भिउडिं० एवं वयासी-न देमि णं अहं तुब्भं मल्लीं विदेहवरकण्णंतिकट्ठु ते छप्पि दूते असक्कारिय असम्माणिय अवदारेणं णिच्छुभावेति, तते णं जितसत्तुपामोक्खाणं छण्हं राईणं दूया कुंभएणं रन्ना असक्कारिया असम्माणिया अवदारेणं णिच्छुभाविया समाणा जेणेव सगा २ जणवया जेणेव सयातिं २ णगराइं जेणेव सगा २ रायाणो तेणेव उवा० करयलपरि० एवं वयासी-एवं खलु सामी ! अम्हे जितसत्तुपामोक्खाणं छण्हं राईणं दूया जमगसमगं चेव जेणेव मिहिला जाव अवदारेणं निच्छुभावेति, ण देइ णं सामी ! कुंभए मल्लीं वि०, साणं २ राईणं एयमट्ठं निवेदंति, तते णं ते जियसत्तुपामोक्खा छप्पि रायाणो तेसिं दूयाणं अंतिए एयमट्ठं सोच्चा निसम्म आसुरुत्ता अण्णमण्णस्स दूयसंपेसणं करेति ता एवं वदासी-एवं खलु देवाणुप्पिया ! अम्हं छण्हं राईणं दूया जमगसमगं चेव जाव निच्छुढा तं सेयं खलु देवाणुप्पिया ! अम्हं कुंभगस्स जत्तं गेण्हि-त्तएत्तिकट्ठु अण्णमण्णस्स एतमट्ठं पडिसुणेति ता ण्हाया सण्णद्धा हत्थिखंधवरगया सकोरंटमल्लदामा जाव सेयवरचामराहिं० महयाहयगयरहपवरजोहकलियाए चाउरंगिणीए सेणाए सद्धिं संपरिवुढा सव्विड्ढीए जाव रवेणं सएहिं २ जाव निग्गच्छंति नगरेहिंतो० ता एगयओ मिलायंति ता जेणेव मिहिला तेणेव पहारेत्थ गमणाए, तते णं कुंभए राया इमीसे कहाए लद्धट्ठे समाणे बलवाउयं सदावेति ता एवं वदासी-खिप्पामेव० हय जाव सेण्णं सन्नाहेइ जाव पच्चप्पिणंति, तते णं कुंभए ण्हाते सण्णद्धे हत्थिखंध० सकोरंट० सेयवरचामरए महया० मिहिलं मज्झमंज्जेणं णिज्जाति ता विदेहं जणवयं मज्झमंज्जेणं जेणेव देसअंते तेणेव उवा० ता खंधावारनिवेसं करेति ता जियसत्तुपा० छप्पिय रायाणो पडिवालेमाणे जुज्झसज्जे पडिचिट्ठति, तते णं ते जियसत्तुपामोक्खा छप्पिय रायाणो जेणेव कुंभए तेणेव उवा० ता कुंभएणं रन्ना सद्धिं संपलग्गा यावि होत्था, तते णं ते जियसत्तुपामोक्खा छप्पि रायाणो कुंभयं रायं हयमहियपवरवीरघाइयनिवडियचिंधद्वयप्पडागं किच्छप्पाणोवगयं दिसो दिसिं पडिसेहिंति, तते णं से कुंभए जितसत्तुपामोक्खेहिं छहिं राईहिं हयमहित जाव पडिसेहिए समाणे अत्थामे अबले अवीरिए जाव आधारणिज्जमितिकट्ठु सिग्घं तुरियं जाव वेइयं जेणेव मिहिला तेणेव उवा० ता मिहिलं अणुपविसति ता मिहिलाए दुवारातिं पिहेइ ता रोहसंज्जे चिट्ठति, तते णं ते जितसत्तुपामोक्खा छप्पि रायाणो जेणेव० उवागच्छंति ता मिहिलं रायहाणिं णिस्संचारं णिरुच्चारं सव्वतो समंता ओरुंभित्ताण चिट्ठंति, तते णं से कुंभए मिहिलं रायहाणिं रुद्धं जाणित्ता अब्भंतरियाए उवट्ठाणसालाए सीहासणवरगए तेसिं जितसत्तुपामोक्खाणं छण्हं रातीणं छिदाणि य विवराणि य मम्माणि य अलभमाणे बहूहिं (१११)

आएहि य उवाएहि य उप्पत्तियाहि य ४ बुद्धीहिं परिणामेमाणे २ किंचि आयं वा उवायं वा अलभमाणे ओहतमणसंकप्पे जाव झियायति, इमं च णं मल्ली वि० ण्हाया जाव बहुहिं
 खुज्जाहिं परिवुडा जेणेव कुंभए तेणेव उ० ता कुंभगस्स पायग्गहणं करेति, तते णं कुंभए मल्लिं विदेह० णो आढाति नो परियाणाइ तुसिणीए संचिट्ठति, तते णं मल्ली वि० कुंभगं
 एवं वयासी-तुब्भे णं ताओ ! अण्णदा ममं एज्जमाणं जाव निवेसेह, किण्णं तुब्भे अज्ज ओहत० झियायह ? तते णं कुंभए मल्लिं वि० एवं व०-एवं खलु पुत्ता ! तव कज्जे जितसत्तुपा-
 मुक्खेहिं छहिं रातीहिं दूया संपेसिया, ते णं मए असक्कारिया जाव निच्छूढा, तते णं ते जितसत्तुपामुक्खा तेसिं दूयाणं अंतिए एयमट्ठं सोच्चा परिकुविया समाणा मिहिलं रायहाणिं
 निस्संचारं जाव चिट्ठति, तते णं अहं पुत्ता तेसिं जितसत्तुपामोक्खाणं छण्हं राईणं० अंतराणि अलभमाणे जाव झियामि, तते णं सा मल्ली वि० कुंभयं रायं एवं वयासी-मा णं तुब्भे ताओ !
 ओहयमणसंकप्पा जाव झियायह, तुब्भे णं ताओ ! तेसिं जियसत्तुपामोक्खाणं छण्हं राईणं पत्तेयं २ रहसियं दूयसंपेसं करेह, एगमेगं एवं वदह-तव देमि मल्लिं विदेहवररायकण्णंति-
 कट्ठु संझाकालसमयंसि पविरलमणूसंसि निसंतंसि पडिनिसंतंसि पत्तेयं २ मिहिलं रायहाणिं अणुप्पवेसेह ता गम्भघरएसु अणुप्पवेसेह मिहिलाए रायहाणीए दुवाराइं पिधेह ता
 रोहसज्जे चिट्ठह, तते णं कुंभए एवं० तं चेव जाव पवेसेति रोहसज्जे चिट्ठति, तते णं ते जियसत्तुपामोक्खा छप्पिय रायाणो कल्लं पाउब्भूया जाव जालंतरेहिं कणगमयं मत्थयल्लिइडं
 पउमुप्पलपिहाणं पडिमं पासति, एस णं मल्ली विदेहरायवरकण्णत्तिकट्ठु मल्लीए विदेह० रूवे य जोव्वणे य लावण्णे य मुच्चिया गिद्धा जाव अज्झोववण्णा अणिमिसाए दिट्ठीए पेह-
 माणा २ चिट्ठति, तते णं सा मल्ली वि० ण्हाया जाव पायच्छित्ता सव्वालंकार० बहुहिं खुज्जाहिं जाव परिक्खित्ता जेणेव जालघरए जेणेव कणयपडिमा तेणेव उवाग० ता तीसे
 कणगपडिमाए मत्थयाओ तं पउमं अवणेति, तते णं गंधे णिद्धावति से जहानामए अहिमडेति वा जाव असुभतराए चेव, तते णं ते जियसत्तुपामोक्खा तेणं असुभेणं गंधेणं अभि-
 भूया समाणा सएहिं २ उत्तरिज्जिएहिं आसातिं पिहेंति ता परम्महा चिट्ठति, तते णं सा मल्ली वि० ते जितसत्तुपामोक्खे एवं वयासी-किण्णं तुब्भे देवाणुप्पिया ! सएहिं २ उत्तरिज्जेहिं
 जाव परम्महा चिट्ठह ? तते णं ते जितसत्तुपामोक्खा मल्लीं वि० एवं वयंति-एवं खलु देवाणुप्पिए ! अम्हं इमेणं असुभेणं गंधेणं अभिभूया समाणा सएहिं २ जाव चिट्ठामो, तते णं
 मल्ली वि० ते जितसत्तुपामोक्खे छप्पि रायाणो एवं वदासी-जइ ता देवाणुप्पिया ! इमीसे कणग० जाव पडिमाए कल्लाकल्लिं ताओ मणुण्णाओ असण ४ एगमेगे पिंडे पक्खिप्पमाणे
 २ इमेयारूवे असुभे पोग्गलपरिणामे इमस्स (किमंग पा०) पुण ओरालियसरीरस्स खेलासवस्स वंतासवस्स पित्तासवस्स सुक्कसोणियपूयासवस्स दुरूवउसासनीसासस्स दुरूवमुत्तपूति-
 यपुरीसपुण्णस्स सडण जाव धम्मस्स केरिसए परिणामे भविस्सति ?, तं मा णं तुब्भे देवाणु० ! माणुस्सएसु कामभोगेसु सज्जह रज्जह गिज्झह मुज्झह अज्झोववज्जह, एवं खलु देवाणु० !
 तुम्हे अम्हे इमाओ तच्चे भवग्गहणे अवरविदेहवासे सलिलावतिसि विजए वीयसोगाए रायहाणीए महब्बलपामोक्खा सत्तवि य बालवयंसया रायाणो होत्था सहजायया जाव पव्व-
 तिता, तए णं अहं देवाणुप्पिया ! इमेणं कारणेणं इत्थीनामगोयं कम्मं निव्वत्तेमि-जति णं तुब्भे चोत्थं उवसंपज्जित्ताणं विहरह तते णं अहं छट्ठं उवसंपज्जित्ताणं विहरामि सेसं तहेव
 सव्वं, तते णं तुब्भे देवाणुप्पिया ! कालमासे कालं किच्चा जयंते विमाणे उववण्णा तत्थ णं तुब्भे देसूणातिं बत्तीसातिं सागरोवमाइं ट्टिती, तते णं तुब्भे ताओ देवलोयाओ अणंतरं चयं
 चइत्ता इहेव जंबुदीवे दीवे जाव साइं २ रज्जातिं उवसंपज्जित्ताणं विहरह, तते णं अहं देवाणु० ! ताओ देवलोयाओ आउक्खएणं जाव दारियत्ताए पच्चायाया, ' किं थ तयं पम्हुट्ठं जं
 थ तया भो जयंत पवरंमि । वुत्था समयनिबद्धं देवा ! तं संभरह जातिं ॥ ९ ॥ तते णं तेसिं जियसत्तुपामोक्खाणं छण्हं रायाणं मल्लीए विदेहराय० अंतिए एतमट्ठं सोच्चा णिसम्म सुभेणं
 परिणामेणं पसत्थेणं अज्झवसाणेणं लेसाहिं विसुज्झमाणीहिं तयावरणिज्जाणं० ईहावूह० जाव सण्णिजाइस्सरणे समुप्पन्ने, एयमट्ठं सम्मं अभिसमागच्छंति, तए णं मल्ली अरहा
 जितसत्तुपामोक्खे छप्पि रायाणो समुप्पण्णजाइसरणे जाणित्ता गम्भघराणं दाराइं विहाडावेति, तते णं ते जितसत्तुपामोक्खा जेणेव मल्ली अरहा तेणेव उवागच्छंति २ तते णं मह-
 ब्बलपामोक्खा सत्तविय बालवयंसा एगयओ अभिसमन्नागया यावि होत्था, तते णं मल्ली णं अरहा जितसत्तुपामोक्खे छप्पिय रायाणो एवं व०-एवं खलु अहं देवा० ! संसारभय-
 उव्विग्गो जाव पव्वयामि तं तुब्भे णं किं करेह किं च ववसह जाव किं भे हियसामत्थे ? जियसत्तु० मल्लिं अरहं एवं वयासी-जति णं तुब्भे देवा० ! संसार जाव पव्वयह अम्हं णं देवा० !
 के अण्णे आलंबणे वा आहारे वा पडिबंधे वा जह चेव णं देवा० ! तुब्भे अम्हे इओ तच्चे भवग्गहणे बहुसु कज्जेसु य मेढी पमाणं जाव धम्मधुरा होत्था तहा चेव णं देवा० ! इण्हिपि
 जाव भविस्सह, अम्हेविय णं देवाणु० ! संसारभउव्विग्गा जाव भीया जम्मणमरणाणं देवाणुप्पियाणं सद्धिं मुंढा भवित्ता जाव पव्वयामो, तते णं मल्ली अरहा ते जितसत्तुपामोक्खे एवं
 वयासी-जण्णं तुब्भे संसार जाव मए सद्धिं पव्वयह तं गच्छह णं तुब्भे देवा० ! सएहिं २ रज्जेहिं जेट्ठे पुत्ते रज्जे ठावेह ता पुरिससहस्सवाहिणीओ सीयाओ दुरूहह दुरूढा समाणा

मम अंतियं पाउब्भवह, तते णं ते जितसत्तुपामुक्खा मल्लिस्स अरहवो एतमट्टं पडिसुणेंति, तते णं मल्ली अरहा ते जितसत्तु० गहाय जेणेव कुंभए तेणेव उवागच्छइ ता कुंभगस्स पाएसु पाडेति, तते णं कुंभए जितसत्तु० विपुलेणं असण ४ पुप्फवत्थगंधमल्लालंकारेणं सक्कारेति जाव पडिविसज्जेति, तते णं ते जियसत्तुपामोक्खा कुंभएणं रण्णा विसज्जिया समाणा जेणेव साइं २ रज्जातिं जेणेव नगरातिं तेणेव उवा० ता सगाइं रज्जातिं उवसंपज्जित्ता विहरंति, तते णं मल्ली अरहा संवच्छरावसाणे निक्खमिस्सामित्ति मणं पहारेति । ८१ । तेणं कालेणं० सक्कस्सासणं चलति, तते णं सक्के देविंदे० आसणं चलयं पासदि ता ओहिं पउंजति मल्लिं अरहं ओहिणा आभोएति ता इमेयारूवे अब्भत्थिए जाव समुप्पज्जित्था-एवं खलु जंबुदीवे दीवे भारहे वासे मिहिलाए कुंभगस्स० मल्ली अरहा निक्खमिसामित्ति मणं पहारेति, तं जीयमेयं तीयपच्चुप्पन्नमणागयाणं सक्काणं० अरहंताणं भगवंताणं निक्खममाणाणं इमे-यारूवं अत्थसंपयाणं दलित्तए, तं०-तिण्णेव य कोडिसया अट्टासीतिं च होंति कोडीओ । असितिं च सयसहस्सा इंदा दलयंति अरहाणं ॥ १० ॥ एवं संपेहेति ता वेसमणं देवं सदावेति ता० एवं खलु देवाणु० ! जंबुदीवे दीवे भारहे वासे जाव असीतिं च सयसहस्साइं दलइत्तए, तं गच्छह णं देवाणुप्पिया ! जंबु० भारहे० कुंभगस्स रन्नो भवणंसि इमेयारूवं अत्थ-संपदाणं साहराहि खिप्पामेव मम एयमाणत्तियं पच्चप्पिणाहि, तते णं से वेसमणे देवे सक्केणं देविंदेणं० एवं वुत्ते० हट्टे करयल जाव पडिसुणेइ ता जंभए देवे सदावेइ ता एवं वयासी-गच्छह णं तुब्भे देवाणु० ! जंबुदीवं दीवं भारहं वासं मिहिलं रायहाणिं कुंभगस्स रन्नो भवणंसि तिस्सेव य कोडिसया अट्टासीयं च कोडीओ असियं च सयसहस्साइं अयमेयारूवं अत्थ-संपयाणं साहरह ता मम एयमाणत्तियं पच्चप्पिणह, तते णं ते जंभगा देवा वेसमणेणं जाव सुणेत्ता उत्तरपुरच्छिमं दिसीभागं अवक्कमंति ता जाव उत्तरवेउच्चियाइं रूवाइं विउच्चंति ता ताए उक्किट्टाए जाव वीइवयमाणा जेणेव जंबुदीवे दीवे भारहे वासे जेणेव मिहिला रायहाणी जेणेव कुंभगस्स रण्णो भवणे तेणेव उवागच्छंति ता कुंभगस्स रन्नो भवणंसि तिस्सि कोडि-सया जाव साहरंति ता जेणेव वेसमणे देवे तेणेव उवा० ता करयल जाव पच्चप्पिणंति, तते णं से वेसमणे देवे जेणेव सक्के देविंदे देवराया तेणेव उवागच्छइ ता करयल जाव पच्चप्पिणति, तते णं मल्ली अरहा कल्लाकल्लिं जाव मागहओ पायगसोत्ति बहूणं सणाहाण य अणाहाण य पंथियाण य पहियाण य करो(कायको पा०)डियाण य उप्पडियाण य एगमेगं हिरण्ण-कोडिं (हत्थमासं पा०) अट्ट य अणूणातिं सयसहस्सातिं इमेयारूवं अत्थसंपदाणं दलयति, तए णं से कुंभए मिहिलाए राय० तत्थ २ तहिं २ देसे २ बहूओ महाणससालाओ करेति, तत्थ णं बहवे मणुया दिण्णभइभत्तवेयणा विपुलं असण ४ उवक्खडेंति ता जे जहा आगच्छंति तं०-पंथिया वा पहिया वा करोडिया वा कप्पडिया वा पासंडत्था वा गिहत्था वा तस्स य तहा आसत्थस्स वीसत्थस्स सुहासणवरगत० तं विपुलं असणं ४ परिभाएमाणा परिवेसेमाणा विहरंति, तते णं मिहिलाए सिंघाडग जाव बहुजणो अण्णमण्णस्स एवमातिक्ख-ति०-एवं खलु देवाणु० ! कुंभगस्स रण्णो भवणंसि सव्वकामगुणियं किमिच्छियं विपुलं असणं ४ बहूणं समणाण य जाव (सुरासुरियं पा०) परिवेसिज्जति, 'वरवरिया घोसिज्जति किमि-च्छियं दिज्जए बहुविहीयं । सुरअसुरदेवदाणवनरिंदमहियाण निक्खमणे ॥ ११ ॥ तते णं मल्ली अरहा संवच्छरेणं तिस्सि कोडिसया अट्टासीतिं च होंति कोडीओ असितिं च सयसहस्साइं इमेयारूवं अत्थसंपदाणं दलइत्ता निक्खमामित्ति मणं पहारेति । ८२ । तेणं कालेणं० लोगंतिया देवा बंभलोए कप्पे रिट्टे विमाणपत्थडे सएहिं २ विमाणेहिं सएहिं २ पासायवडिं-सएहिं पत्तेयं २ चउहिं सामाणियसाहस्सीहिं तीहिं परिसाहिं सत्तहिं अणिएहिं सत्तहिं अणियाहिबईहिं सोलसहिं आयरक्खदेवसाहस्सीहिं अब्भेहि य बहूहिं लोगंतिएहिं देवेहिं सद्धिं संपरिवुडा महयाहयनट्टगीयवाइयजावरवेणं भुंजमाणा विहरंति, तं० सारस्सयमाइच्चा वण्ही वरुणा य गदतोया य । तुसिया अब्बावाहा अग्गिच्चा चेव रिट्टा य ॥ १२ ॥ तते णं तेसिं लोगंतियाणं देवाणं पत्तेयं २ आसणातिं चलंति तहेव जाव अरहंताणं निक्खममाणाणं संबोहणं करेत्तएत्ति तं गच्छामो णं अम्हेवि मल्लिस्स अरहतो संबोहणं करेमिच्चिकट्टु एवं संपेहेति ता उत्तरपुरच्छिमं दिसीभायं० वेउच्चियसमुग्धाएणं समोहणंति ता संखिज्जाइं जोयणाइं एवं जहा जंभगा जाव जेणेव मिहिला रायहाणी जेणेव कुंभगस्स रन्नो भवणे जेणेव मल्ली अरहा तेणेव उवागच्छंति ता अंतलिक्खपडिवच्चा सखिखिणियाइं जाव वत्थातिं पवरपरिहिया करयल० ताहिं इट्टा० एवं वयासी-बुज्झाहि भगवं ! लोगनाहा पवत्तेहि धम्मतित्थं जीवाणं हियसुहनिस्सेयसकरं भविस्सतिच्चिकट्टु दोच्चं पि तच्चं पि एवं वयंति ता मल्लिं अरहं वंदंति नमंसंति ता जामेव दिसिं पाउब्भूआ तामेव दिसिं पडिगया, तते णं मल्ली अरहा तेहिं लोगंतिएहिं देवेहिं संबोहिए समाणे जेणेव अम्मापियरो तेणेव उवा० ता करयल० इच्छामि णं अम्मयाओ ! तुब्भेहिं अब्भणुणाते मुंडे भवित्ता जाव पवत्तित्तए, अहासुहं देवा० ! मा पडिबंधं करेहि, तते णं कुंभए कोटुंबियपुरिसे सदावेति ता एवं वदासी-खिप्पामेव अट्टसहस्सं सोवणियाणं जाव भोमेज्जाणंति, अण्णं च महत्थं जाव तित्थयराभिसेयं उवट्टवेह जाव उवट्टवेति, तेणं कालेणं० चमरे असुरिंदे जाव अच्चुयपज्जवसाणा आगया, तते णं सक्के० आभिओगिए देवे सदावेति ता एवं वदासी-खिप्पामेव अट्टसहस्सं सोवणियाणं जाव

अण्णं च तं विउलं उवट्टवेह जाव उवट्टवेति, तेवि कलसा ते चेव कलसे अणुपविट्ठा, तते णं से सक्के देविंदे देवराया कुंभए य राया मल्लिं अरहं सीहासणंसि पुरत्थाभिमुहं निवेसेइ अट्ट-
सहस्सेणं सोवणियाणं जाव अभिसिंचति, तते णं मल्लिस्स भगवओ अभिसेए वट्टमाणे अप्पेगतिया देवा मिहिलं च सन्भितरं बाहिं जाव सव्वतो समन्ता परिधावन्ति, तए णं कुंभए
राया दोच्चं पि उत्तरावक्कमणं जाव सव्वालंकारविभूसियं करेति ता कोटुंबियपुरिसे सहावेइ ता एवं वयासी-खिप्पामेव मणोरमं सीयं उवट्टवेह ते उवट्टवेति, तते णं सक्के० आभिओगिए०
खिप्पामेव अणेगखंभ० जाव मणोरमं सीयं उवट्टवेह जाव सावि सीया तं चेव सीयं अणुपविट्ठा, तते णं मल्ली अरहा सीहासणाओ अब्भुट्टेति ता जेणेव मणोरमा सीया तेणेव उवा०
ता मणोरमं सीयं अणुपयाहिणीकरेमाणे मणोरमं सीयं दुरूहति ता सीहासणवरगए पुरत्थाभिमुहे सन्निसन्ने, तते णं कुंभए अट्टारस सेणिप्पसेणीओ सहावेति ता एवं वदासी-तुम्भे
णं देवाणुप्पिया ! णहाया जाव सव्वालंकारविभूसिया मल्लिस्स सीयं परिवहह जाव परिवहन्ति, तते णं सक्के देविंदे देवराया मणोरमाए दक्खिणिछं उवरिछं बाहं गेण्हति ईसाणे उत्तरिछं
उवरिछं बाहं गेण्हति चमरे दाहिणिछं हेट्टिछं० बली उत्तरिछं हेट्टिछं० अवसेसा देवा जहारिहं मनोरमं सीयं परिवहन्ति, पुंविं उक्खित्ता माणुस्सेहिं तो हट्टरोमकुवेहिं । पच्छा वहन्ति
सीयं असुरिंदसुरिंदनागिंदा ॥ १३ ॥ चलचवलकुंडल(प्र० भूसण) धरा सच्छंदविउच्चियाभरणधारी । देविंददाणविंदा वहन्ति सीयं जिणिंदस्स ॥ १४ ॥ तते णं मल्लिस्स अरहओ मणोरमं
सीयं दुरूहस्स इमे अट्टमंगलगा पुरतो अहाणु० एवं निग्गमो जहा जमालिस्स, तते णं मल्लिस्स अरहतो निक्खममाणस्स अप्पे० देवा मिहिलं आसिय० अब्भितरवासविहि० गाहा
जाव परिधावन्ति, तते णं मल्ली अरहा जेणेव सहस्संबवणे उज्जाणे जेणेव असोगवरपायवे तेणेव उवा० सीयाओ पच्चोरुभति ता आभरणालंकारं पभावती पडिच्छति, तते णं मल्ली
अरहा सयमेव पंचमुट्ठियं लोयं करेति, तते णं सक्के देविंदे० मल्लिस्स केसे पडिच्छति, खीरोदगसमुहे पक्खिवइ (प्र० साहरइ), तते णं मल्ली अरहा णमोऽत्थु णं सिद्धाणंतिकट्टु सामा-
इयचरित्तं पडिवज्जति, जंसमयं च णं मल्ली अरहा चरित्तं पडिवज्जति तंसमयं च णं देवाणं माणुस्साण य णिग्घोसे तुरियनिणायगीयवातियनिग्घोसे य सक्कस्स वयणसंदेसेणं णिलुक्के
यावि होत्था, जंसमयं च णं मल्ली अरहा सामातियं चरित्तं पडिवज्जे तंसमयं च णं मल्लिस्स अरहतो माणुसधम्माओ उत्तरिए मणपज्जवनाणे समुप्पन्ने, मल्ली णं अरहा जे से हेमंताणं
दोच्चे मासे चउत्थे पक्खे पोससुद्धे तस्स णं पोससुद्धस्स एक्कारसीपक्खेणं पुव्वण्हकालसमयंसि अट्टमेणं भत्तेणं अपाणएणं अस्सिणीहिं नक्खत्तेणं जोगमुवागएणं तिहिं इत्थीसएहिं
अब्भितरियाए परिसाए तिहिं पुरिससएहिं बाहिरियाए परिसाए सद्धिं मुंडे भवित्ता पव्वइए, मल्लिं अरहं इमे अट्ट रा(प्र० णा)यकुमारा अणुपव्वइंसु तं०-‘णंदे य णंदिमित्ते सुमित्त
बलमित्त भाणुमित्ते य । अमरवति अमरसेणे महसेणे चेव अट्टमए ॥ १५ ॥ तए णं से भवणवई ४ मल्लिस्स अरहतो निक्खमणमहिमं करेति ता जेणेव नंदीसरवरे० अट्टाहियं करेति
ता जाव पडिगया, तते णं मल्ली अरहा जंचेव दिवसं पव्वतिए तस्सेव दिवसस्स पच्चा(पुव्वा)वरण्हकालसमयंसि असोगवरपायवस्स अहे पुढवीसिलापट्टयंसि सुहासणवरगयस्स सुहेणं
परिणामेणं पसत्थेहिं अज्झवसाणेहिं पसत्थाहिं लेसाहिं विसुज्झमाणीहिं तयावरणकम्मरयविकरणकरं अपुव्वकरणं अणुपविट्टस्स अणंते जाव केवलवरनाणदंसणे समुप्पन्ने । ८३ । तेणं
कालेणं० सव्वदेवाणं आसणातिं चलन्ति समोसढा सुणेति अट्टाहियमहा० नंदीसरं जामेव दिसं पाउ० कुंभएवि निग्गच्छति, तते णं ते जितसत्तुपा० छप्पि० जेट्टपुत्ते रज्जे ठावेत्ता पुरि-
ससहस्सवाहिणीयाओ दुरूढा सद्धिइदीए जेणेव मल्ली अ० जाव पज्जुवासति, तते णं मल्ली अ० तेसिं महालियाए कुंभगस्स तेसिं च जियसत्तुपामुक्खाणं धम्मं कहेति परिसा जामेव
दिसिं पाउब्भूया तामेव दिसिं पडिगया कुंभए समणोवासए जाते, पडिगए, पभावती य, तते णं जितसत्तू छप्पि राया धम्मं सोच्चा आलित्तए णं भंते ! जाव पव्वइया, चोहसपुव्विणो०
अणंते केवले सिद्धा, तते णं मल्ली अरहा सहस्संबवणाओ निक्खमति ता बहिया जणवयविहारं विहरइ, मल्लिस्स णं० भिसगपामोक्खा अट्टावीसं गणा अट्टावीसं गणहरा होत्था,
मल्लिस्स णं अरहओ चत्तालीसं समणसाहस्सीओ उक्को० बंधुमतिपामोक्खाओ पणपणं अज्जियासाहस्सीओ उक्को० सावयाणं एगा सतसाहस्सी चुलसीती सहस्सा० सावियाणं तिन्नि
सयसाहस्सीओ पण्णट्ठिं च सहस्सा छस्सया चोहसपुव्वीणं वीससया ओहिनाणीणं बत्तीसं सया केवलणाणीणं पणतीसं सया वेउच्चियाणं अट्ट सया मणपज्जवनाणीणं चोहस सया वाईणं
वीसं सया अणुत्तरोववातियाणं, मल्लिस्स अरहओ दुविहा अंतगडभूमी होत्था तं०-जुयंतकरभूमी परियायंतकरभूमी य जाव वीसतिमाओ पुरिसजुगाओ जुयंतकरभूमी दुवासपरियाए
अंतमकासी, मल्ली णं अरहा पणुवीसं धणूतिमुट्टंडउच्चत्तेणं वण्णेणं पियंगुसामे समचउरंससंठाणे वज्जरिसभणारायसंघयणे मज्झदेसे सुहंसुहेणं विहरित्ता तेणेव सम्मेयसेलसिहरे पव्वए
तेणेव उवागच्छइ ता संमेयसेलसिहरे पाओवगमणुवण्णे, मल्ली य० एगं वाससतं आगारवासं पणपणं वाससहस्सातिं वाससयउणातिं केवलपरियागं पाउणित्ता पणपणं वाससहस्साइं
सव्वाउयं पालइत्ता जे से गिम्हाणं पढमे मासे दोच्चे पक्खे चित्तसुद्धे तस्स णं चेत्तसुद्धस्स चउत्थीए भरणीए णक्खत्तेणं अट्टरत्तकालसमयंसि पंचहिं अज्जियासएहिं अब्भितरियाए

परिसाए पंचहिं अणगारसएहिं बाहिरियाए परिसाए मासिएणं भत्तेणं अपाणएणं वग्धारियपाणी खीणे वेयणिजे आउए नामे गोए सिद्धे एवं परिनिब्रानमहिमा जहा जंबुदीवपण-
 तीए, नंदीसरे अट्टाहियाओ पडिगयाओ, एवं खलु जंबू! समणेणं भगवया महावीरेणं अट्टमस्स नायज्झयणस्स अयमट्ठे पण्णत्तेत्तिबेमि । ८४ ॥ मल्लीअज्झयणं ८ ॥ जइ णं भंते!
 समणेणं जाव संपत्तेणं अट्टमस्स नायज्झयणस्स अयमट्ठे पण्णत्ते नवमस्स णं भंते! नायज्झयणस्स समणेणं जाव संपत्तेणं के अट्ठे पण्णत्ते?, एवं खलु जंबू! तेणं कालेणं० चंपा नामं
 नयरी० पुण्णभदे० तत्थ णं माकंदी नामं सत्थवाहे परिवसति, अट्ठे०, तस्स णं भदा नामं भारिया, तीसे णं भदाए अत्तया दुवे सत्थवाहदारया होत्था, तं०-जिणपालिए य जिण-
 रक्खिए य, तते णं तेसिं मागंदियदारगाणं अण्णया कयाई एगयओ इमेयारूवे मिहो कहासमुल्लावे समुप्पजित्था-एवं खलु अम्हे लवणसमुहं पोयवहणेणं एक्कारस वारा ओगाढा
 सत्थविय णं लद्धट्ठा कयकज्जा अणहसमग्गा पुणरवि निययघरं हव्वमागया तं सेयं खलु अम्हं देवाणुप्पिया! दुवालसमं पि लवणसमुहं पोतवहणेणं ओगाहित्तएत्तिकट्ठु अण्णमण्ण-
 स्सेतमट्ठं पडिसुणेंति ता जेणेव अम्मापियरो तेणेव उवा० एवं वदासी-एवं खलु अम्हे अम्मयाओ! एक्कारस वारा तं चेव जाव निययं घरं हव्वमागया, तं इच्छामो णं अम्मयाओ!
 तुम्हेहि अब्भणुण्णाया समाणा दुवालसमं लवणसमुहं पोयवहणेणं ओगाहित्तए, तते णं ते मागंदियदारया अम्मापियरो एवं वदासी-इमे भे (प्र० भो) जाया! अज्जग जाव परि-
 भाएत्तए तं अणुहोह ताव जाया! विउले माणुस्सए इइढीसक्कारसमुदए, किं भे सपच्चवाएणं निरालंबणेणं लवणसमुदोत्तारेणं?, एवं खलु पुत्ता! दुवालसमी जत्ता सोवसग्गा यावि
 भवति, तं मा णं तुम्हे दुवे पुत्ता! दुवालसमं पि लवण० जाव ओगाहेह, मा हु तुम्भं सरीरस्स वावत्ती भविस्सति, तते णं मागंदियदारगा अम्मापियरो दोब्बं पि तच्चं पि एवं वदासी-एवं
 खलु अम्हे अम्मयाओ! एक्कारस वारा लवणं० ओगाहित्तए, तते णं ते मागंदीयदारए अम्मापियरो जाहे नो संचाएति बहूहिं आघवणाहिं पण्णवणाहि य आघवित्तए वा पन्नवित्तए वा
 ताहे अकामा चेव एयमट्ठं अणुजाणित्था (प्र० अणुमण्णित्था), तते णं ते मागंदियदारगा अम्मापिऊहिं अब्भणुण्णाया समाणा गणिमं च धरिमं च मेज्जं च पारिच्छेज्जं च जहा अर-
 हण्णगस्स जाव लवणसमुहं बहूइं जोअणसयाइं ओगाढा । ८५ । तते णं तेसिं मागंदियदारगाणं अणेगाइं जोयणसयाइं ओगाढाणं समाणाणं अणेगाइं उप्पाइयसयातिं पाउब्भूयातिं,
 तं०-अकाले गज्जियं जाव थणियसदे कालियवाते तत्थ समुट्ठिए, तते णं सा णावा तेणं कालियवातेणं आहुणिज्जमाणी २ संचालिज्जमाणी २ संखोभिज्जमाणी २ सलिलतिक्खवेगेहिं
 आयट्ठिज्जमाणी २ कोट्ठिमंसि करतलाहतेविव तेंदूसए तत्थेव २ ओवयमाणी य उप्पयमाणी य उप्पयमाणीविव धरणीयलाओ सिद्धविज्जाहरकन्नगा ओवयमाणीविव गगणतलाओ
 भट्टविज्जा विज्जाहरकन्नगाविव पलायमाणीविव महागरुलवेगवित्तासिया भुयगवरकन्नगा धावमाणीविव महाजणरसियसदवित्तत्था ठाणभट्टा आसकिसोरी णिभुंजमाणीविव गुरुजण-
 दिट्ठावराहा सुयणकुलकन्नगा घुम्ममाणीविव वीचीपहारसततालिया गलियलंबणाविव गगणतलाओ रोयमाणीविव सलिलगंथिविप्पइरमाणघोरंसुवाएहिं णववहू उवरतभत्तुया विलव-
 माणीविव परचक्करायाभिरोहिया परममहब्भयाभिद्दुया महापुरवरी झायमाणीविव कवडच्छोम(प्र० मण)प्पओगजुत्ता जोगपरिवाइया णीसासमाणीविव महाकंतरविणिग्गयप-
 रिस्संता परिणयवया अम्मया सोयमाणीविव तवचरणखीणपरिभोगा चयणकाले देववरवहू संचुण्णियकट्ठकूवरा भग्गमेढिमोडियसहस्समाला सूलाइय(त्त पा०)वंकपरिमासा फलहंत-
 रतडतडेंतफुट्तंसंधिवियलंतलोहकीलिया सव्वंगवियंभिया परिसडियरज्जुविसरंतसव्वगत्ता आमगमल्लगभूया अकयपुण्णजणमणोरहोविव चिंतिज्जमाणगुरुई हाहाकयकणधारणावियवा-
 णियगजणकम्मगारविलविया णाणाविहरयणपडियसंपुण्णा बहूहिं पुरिससएहिं रोयमाणेहिं कंद० सोय० तिप्प० विलवमाणेहिं एगं महं अंतो जलगयं गिरिसिहरमासायइत्ता संभग्ग-
 कूवतोरणा मोडियझयदंडा वलयसयखंडिया करकरस्स तत्थेव विहवं उवगया, तते णं तीए णावाए भिज्जमाणीए बहवे पुरिसा विपुलपडियं भंडमायाए अंतो जलंमि णिमज्जावियावि
 होत्था । ८६ । तते णं ते मागंदियदारगा लेया दक्खा पत्तट्ठा कुसला मेहावी णिउणसिप्पोवगया बहूसु पोतवहणसंपराएसु कयकरणलद्धविजया अमूढा अमूढहत्था एगं महं फलगखंडं
 आसादेति, जंसिं च णं पदेसंसि से पोयवहणे विवच्चे तंसिं च णं पदेसंसि एगे महं रयणदीवे णामं दीवे होत्था अणेगाइं जोअणातिं आयामविक्खंभेणं अणेगाइं परिक्खेवेणं णाणा-
 दुमसंडमंडिउदेसे सस्सिरीए पासातीए ४, तस्स णं बहुमज्झदेसभाए तत्थ णं महं एगे पासायवडेंसए होत्था अब्भुग्गयमूसियए जाव सस्सिरीयरूवे पासातीए ४, तत्थ णं पासायव-
 डेंसए रयणदीवदेवया नामं देवया परिवसति पावा चंडा खुहा साहसिया, तस्स णं पासायवडिंसयस्स चउदिसिं चत्तारि वणसंडा किण्हा किण्होभासा०, तते णं ते मागंदियदारगा तेणं
 फलयखंडेणं उब्बुडमाणा (प्र० उवुज्झमाणा) २ रयणदीवंतेणं संवूढा (प्र० संछूढा) यावि होत्था, तते णं ते मागंदियदारगा थाहं लभंति ता मुहुत्तंतरं आससंति ता फलगखंडं विस-
 ज्जेति ता रयणदीवं उत्तरंति ता फलाणं मग्गणगवेसणं करंति ता फलातिं गिण्हंति ता आहारंति ता णालिएराणं मग्गणगवेसणं करंति ता नालिएराइं फोडेंति ता नालिएरतेल्लेणं
 अण्णमण्णस्स गत्ताइं अब्भंगेंति ता पोक्खरिणीतो ओगाहित्ति ता जलमज्जणं करंति ता जाव पच्चुत्तरंति ता पुढवीसिलापट्ठयंसि निसीयंति ता आसत्था वीसत्था सुहासणवरगया (११२)

चंपानयरि अम्मापिउआपुच्छणं च लवणसमुद्दोत्तारं च कालियवायसमुत्थाणं च पोतवहणविवर्त्ति च फलयखंडस्स आसायणं च रयणदीवुत्तारं च अणुचितेमाणा २ ओहतमणसंकप्पा जाव झियायेन्ति, तते णं सा रयणदीवदेवया ते मागंदियदारए ओहिणा आभोएति असिफलगवग्गहत्था सत्तट्टवलप्पमाणं उड्डं वेहासं उप्पयति ता ताते उक्किट्ठाए देवगईए वीइवय-
 माणी २ जेणेव मागंदियदारए तेणेव आगच्छति ता आसुरुत्ता ते मागंदियदारए खरफरुसनिट्ठुरवयणेहिं एवं वदासी-हंभो मागंदियदारया ! अप्पत्थियपत्थिया जति णं तुब्भे मए सद्धिं विउलाति भोगभोगाइं भुंजमाणा विहरह तो भे अत्थि जीविअं, अहणं तुब्भे मए सद्धिं विउलाति नो विहरह तो भे इमेणं नीलुप्पलगवल्लुगुलियजावखुरधारेणं असिणा रत्तगंडमं-
 सुयाइं माउयाहिं उवसोहियाइं तालफलाणीव सीसाइं एगंते एडेमि, तते णं ते मागंदियदारया रयणदीवदेवयाए अंतिए सोच्चा० भीया करयल० एवं० जणं देवाणुप्पिया ! वतिस्ससि तस्स आणाउववायवयणनिहंसे चिट्ठिस्सामो, तते णं सा रयणदीवदेवया ते मागंदियदारए गेण्हति ता जेणेव पासायवडिंसए तेणेव उवागच्छइ ता असुभपोग्गलावहारं करेति ता सुभ-
 पोग्गलपक्खेवं करेति ता पच्छा तेहिं सद्धिं विउलाति भोगभोगाइं भुंजमाणी विहरति कल्लाकल्लिं च अमयफलाति उवणेति । ८७ । तते णं सा रयणदीवदेवया सक्कवयणसंदेसेणं सुट्ठि-
 एणं लवणाहिवइणा लवणसमुद्दे तिसत्तखुत्तो अणुपरियट्ठियव्वेत्ति जंकिंचि तत्थ तणं वा पत्तं वा कट्ठं वा कयवरं वा असुइं पूतियं दुरभिगंधमचोक्खं तं सव्वं आहुणिय २ तिसत्तखुत्तो एगंते एडेयव्वंतिकट्ठु णिउत्ता, तते णं सा रयणदीवदेवया ते मागंदियदारए एवं वदासी-एवं खलु अहं देवाणुप्पिया ! सक्क० सुट्ठिय० तं चेव जाव णिउत्ता, तं जाव अहं देवा० ! लव-
 णसमुद्दे जाव एडेमि ताव तुब्भे इहेव पासायवडिंसए सुहंसुहेणं अभिरममाणा २ चिट्ठह, जति णं तुब्भे एयंसि अंतरंसि उव्विग्गा वा उस्सुया (उप्पिच्छा उप्पुया पा०) वा भवेज्जाह तो णं तुब्भे पुरच्छिमिल्लं वणसंडं गच्छेज्जाह, तत्थ णं दो ऊऊ सया साहीणा तं०-पाउसे य वासारत्ते य, 'तत्थ उ कंदलसिलिंधदंतो णिउरवरपुप्फपीवरकरो । कुडयज्जुणणीवसुरभिदाणो पाउसउऊगयवरो साहीणो ॥ १६ ॥ तत्थ य सुरगोवमणिविचित्ता ददुदुरकुलसियउज्झररवो । बरहिणविंदपरिणद्धसिहरो वासारत्तो उऊपव्वतो साहीणो ॥ १७ ॥ तत्थ णं तुब्भे देवाणु-
 प्पिया ! बहुसु वावीसुं य जाव सरसरपंतियासु बहूसु आलीघरएसु य मालीघरएसु य जाव कुसुमघरएसु य सुहंसुहेणं अभिरममाणा विहरेज्जाह, जति णं तुब्भे एत्थवि उव्विग्गा वा उस्सुया वा उप्पुया वा भवेज्जाह तो णं तुब्भे उत्तरिल्लं वणसंडं गच्छेज्जाह, तत्थ णं दो ऊऊ सया साहीणा तं०-सरदो य हेमंतो य, 'तत्थ उ सणसत्तवण्णकउओ नीलुप्पलपउमनलिण-
 सिंगो । सारसचक्कवायरवितघोसो सरयऊऊगोवती साहीणो ॥ १८ ॥ तत्थ य सियकुंदधवल(विमल पा०)जोण्हो कुसुमितलोद्धवणसंडमंडलतलो । तुसारदगधारपीवरकरो हेमंतऊऊ-
 ससी सया साहीणो ॥ १९ ॥ तत्थ णं तुब्भे देवाणुप्पिया ! वावीसुं य जाव विहरेज्जाह, जति णं तुब्भे तत्थवि उव्विग्गा वा जाव उस्सुया वा भवेज्जाह तो णं तुब्भे अवरिल्लं वणसंडं गच्छेज्जाह, तत्थ णं दो ऊऊ साहीणा, तं०-वसंते य गिम्हे य, 'तत्थ उ सहकारचारुहारो किंसुयकणियारासोगमउडो । ऊसिततिलगबउलायवत्तो वसंतउऊणरवती साहीणो ॥ २० ॥ तत्थ य पाडलसिरीससलिलो मल्लियावासंतियधवलवेलो । सीयलसुरभिअनिलमगरचरिओ गिम्ह ऊऊसागरो साहीणो ॥ २१ ॥ तत्थ णं बहुसु जाव विहरेज्जाह, जति णं तुब्भे देवा० ! तत्थवि उव्विग्गा उस्सुया भवेज्जाह तओ तुब्भे जेणेव पासायवडिंसए तेणेव उवागच्छेज्जाह, ममं पडिवालेमाणा २ चिट्ठेज्जाह, मा णं तुब्भे दक्खिणिं वणसंडं गच्छेज्जाह, तत्थ णं महं एगे उग्गविसे चंडविसे घोर(भोग पा०) विसे महाविसे अइकायमहाकाए जहा तेयनिसग्गे मसिमहिसामूसाकालए नयणविसरोसपुण्णे अंजणपुंजनियरप्पगासे रत्तच्छे जमलजुय-
 लचंचलचलंतजीहे धरणियलवेणिभूए उक्कडफुडकुडिलजडिलकक्खडवियडफडाडोवकरणदच्छे लोहागारधम्ममाणधमधमंतघोसे अणागलियचंडतिव्वरोसे समुहिं तुरियं चवलं धम-
 धमंतदिट्ठीविसे सप्पे य परिवसति, मा णं तुब्भं सरीरगस्स वावत्ती भविस्सइ, ते मागंदियदारए दोचंपि तच्चंपि एवं वदति ता वेउव्वियसमुग्घाएणं समोहणति ता ताए उक्किट्ठाए लवण-
 समुद्दं तिसत्तखुत्तो अणुपरियट्ठेउं पयत्ता यावि होत्था । ८८ । तए णं ते मागंदियदारया तओ मुहुत्तंतरस्स पासायवडिंसए सइं वा रतिं वा धितिं वा अलभमाणा अण्णमण्णं एवं वदासी-
 एवं खलु देवा० ! रयणदीवदेवया अम्हे एवं वदासी-एवं खलु अहं सक्कवयणसंदेसेणं सुट्ठिएणं लवणाहिवइणा जाव वावत्ती भविस्सइ, तं सेयं खलु अम्हं देवाणुप्पिया ! पुरच्छिमिल्लं वणसंडं गमित्तए, अण्णमण्णस्स एयमट्ठं पडिसुणेंति ता जेणेव पुरच्छिमिल्ले वणसंडे तेणेव उवागच्छंति ता तत्थ णं वावीसुं य जाव अभिरममाणा आलीघरएसु य जाव विहरंति, तते णं ते मागंदियदारया तत्थवि सइं वा जाव अलभमाणा जेणेव उत्तरिल्ले वणसंडे तेणेव उवा० ता तत्थ णं वावीसुं य जाव जालीघरएसु य विहरंति, तते णं ते मागंदियदारया तत्थवि सतिं वा जाव अलभ० जेणेव पच्चत्थिमिल्ले वणसंडे तेणेव उवा० ता जाव विहरंति, तते णं ते मागंदिय० तत्थवि सतिं वा जाव अलभ० अण्णमण्णं० एवं वदासी-एवं खलु देवा० ! अम्हे रयणदीवदेवया एवं वयासी-एवं खलु अहं देवाणुप्पिया ! सक्कस्स वयणसंदेसेणं सुट्ठिएण लवणाहिवइणा जाव मा णं तुब्भं सरीरगस्स वावत्ती भविस्सति तं भवियं

एत्थ कारणेणं, तं सेयं खलु अम्हं दक्खिणिहं वणसंडं गमिच्चएत्तिकट्टु अण्णमण्णस्स एतमट्ठं पडिसुणेंति ता जेणेव दक्खिणिहं वणसंडे तेणेव पहारेत्थ गमणाए, तते णं गंधे निद्धाति से जहानामए अहिमडेति वा जाव अणिट्ठतराए चेव, तते णं ते मागंदियदारया तेणं असुभेणं गंधेणं अभिभूया समाणा सएहिं २ उत्तरिज्जेहिं आसातिं पिहेंति ता जेणेव दक्खिणिहं वणसंडे तेणेव उवागया तत्थ णं महं एगं आघातणं पासंति ता अट्ठियरासिसतसंकुलं भीमदरिसणिज्जं एगं च तत्थ सूलाइतयं पुरिसं कलुणातिं विस्सरातिं कट्ठातिं कुबमाणं पासंति, भीता जाव संजातभया जेणेव से सूलातियपुरिसे तेणेव उवागच्छंति ता तं सूलाइयं एवं वदासी-एस णं दे०! कस्साघयणे तुमं च णं के कओ वा इहं हव्वमागए केण वा इमेया-रूवं आवतिं पाविए?, तते णं से सूलातियए पुरिसे मागंदियदारए एवं वदासी-एस णं देवाणु०! रयणदीवदेवयाए आघयणे अहण्णं देवाणुप्पिया! जंबुदीवाओ दीवाओ भारहाओ वासाओ कागंदीए आसवाणियए विपुलं पणियभंडमायाए पोतवहणेणं लवणसमुहं ओयाए, तते णं अहं पोयवहणविवत्तीए निब्बुड्डभंडसारे एगं फलगखंडं आसाएमि, तते णं अहं उवुज्झमाणे २ रयणदीवतेणं संबूढे, तते णं सा रयणदीवदेवया ममं ओहिणा पासइ ता ममं गेण्हइ ता मए सद्धिं विपुलातिं भोगभोगातिं भुंजमाणा विहरति, तते णं सा रयणदीवदेवया अण्णदा कयाई अहालहुसगंसि अवराहंसि परिकुविया समाणी ममं एतारूवं आवतिं पावेइ, तं णं जज्जति णं देवा०! तुम्हंपि इमीसे(मेसिं)सरीरगाणं का मण्णे आवती भविस्सइ?, तते णं ते मागंदियदारया तस्स सूलाइयगस्स अंतिए एयमत्थं सोच्चा णिसम्म बलियतरं भीया जाव संजायभया सूलाइतयं पुरिसं एवं व०-कहण्णं देवाणु०! अम्हे रतणदीवदेवयाए हत्थाओ साहत्थि णित्थरिज्जामो?, तते णं से सूलाइयए पुरिसे ते मागंदिय० एवं वदासी-एस णं देवाणु०! पुरच्छिमिल्ले वणसंडे सेलगस्स जक्खस्स जक्खाययणे सेलए नामं आसरूवधारी जक्खे परिवसति, तए णं से सेलए जक्खे चोदसट्टमुद्धिपुण्णमासिणीसु आगयसमए पत्तसमये महया २ सहेणं एवं वदति-कं तारयामि कं पालयामि?, तं गच्छह णं तुम्हे देवा०! पुरच्छिमिल्लं वणसंडं सेलगस्स जक्खस्स महरिहं पुप्फच्चणियं करेह ता जण्णुपायवडिया पंजलिउडा विणएणं पज्जुवासमाणा चिट्ठह, जाहे णं से सेलए जक्खे आगतसमए पत्तसमए एवं वदेज्जा-कं तारयामि कं पालयामि?, ताहे णं तुम्हे वदह-अम्हे तारयाहि अम्हे पालयाहि, सेलए से जक्खे परं रयणदीवदेवयाए हत्थाओ साहत्थि णित्थारेज्जा, अण्णहा भे न याणामि इमेसिं सरीरगाणं का मण्णे आवई भविस्सइ?। ८९। तते णं ते मागंदिय० तस्स सूलाइयस्स अंतिए एयमट्ठं सोच्चा निसम्म सिग्घं चंडं चवलं तुरियं चेइयं जेणेव पुरच्छिमिल्ले वणसंडे जेणेव पोक्खरिणी तेणेव उवा० पोक्खरिणिं गाहंति ता जलमज्जणं करेन्ति ता जाइं तत्थ उप्पलाइं जाव गेण्हंति ता जेणेव सेलगस्स जक्खस्स जक्खाययणे तेणेव उ० ता आलोए पणामं करेंति ता महरिहं पुप्फच्चणियं करेंति ता जण्णुपायवडिया सुस्सूसमाणा णमंसमाणा पज्जुवासंति, तते णं से सेलए जक्खे आगतसमए पत्तसमए एवं वदासी-कं तारयामि कं पालयामि?, तते णं ते मागंदियदारया उट्ठाए उट्ठेंति करयल० एवं व०-अम्हे तारयाहि अम्हे पालयाहि, तए णं से सेलए जक्खे ते मागंदिय० एवं वया०-एवं खलु देवाणुप्पिया! तुम्हं मए सद्धिं लवणसमुहेणं मज्झंमज्झेणं वीइवयमाणेणं सा रयणदीवदेवया पावा चंडा रुद्धा खुद्धा साहसिया बहूहिं खरएहि य मउएहि य अणुलोमेहि य पडिल्लो-मेहि य सिंगारेहि य कलुणेहि य उवसग्गेहि य उवसग्गं करेहिति, तं जति णं तुम्हे देवा०! रयणदीवदेवयाए एतमट्ठं आढाह वा परियाणह वा अवयक्खह वा तो भे अहं पिट्ठातो विधुणामि, अहं णं तुम्हे रयणदीवदेवयाए एतमट्ठं णो आढाह णो परियाणह णो अवे(प्र० वय)क्खह तो भे रयणदीवदेवयाहत्थातो साहत्थि णित्थारेमि, तए णं ते मागंदियदारया सेलगं जक्खं एवं वदासी-जण्णं देवाणु०! वइस्संति तस्स णं उववायवयणणिहेसे चिट्ठिस्सामो, तते णं से सेलए जक्खे उत्तरपुरच्छिमं दिसीभागं अवक्कमति ता वेउव्वियसमुग्घाएणं समोहणति ता संखेज्जातिं जोयणाइं दंडं निस्सिरइ दोच्चंपि वेउव्वियसमु० ता एगं महं आसरूवं विउव्वइ ता ते मागंदियदारए एवं वदासी-हंभो मागंदिया! आरूह णं देवाणुप्पिया! मम पिट्ठंसि, तते णं ते मागंदिय० हट्ठ० सेलगस्स जक्खस्स पणामं करेंति ता सेलगस्स पिट्ठिं दुरूढा, तते णं से सेलए ते मागंदिय० दुरूढे जाणित्ता सत्तट्ठतालप्पमाणमेत्तातिं उड्ढं वेहासं उप्पयति, उप्पइत्ता य ताए उक्किट्ठाए तुरियाए देवयाए लवणसमुहं मज्झंमज्झेणं जेणेव जंबुदीवे दीवे जेणेव भारहे जेणेव चंपा नयरी तेणेव पहारेत्थ गमणाए। ९०। तते णं सा रयणदीवदेवया लवणसमुहं तिसत्तखुत्तो अणुपरियट्ठति जं तत्थ तणं वा जाव एडेति, जेणेव पासायवडेंसए तेणेव उवागच्छति ता ते मागंदिया पासायवडेंसए अपासमाणी जेणेव पुरच्छिमिल्ले वणसंडे जाव सब्बतो समंता मग्गणगवेसणं करेति ता तेसिं मायंदियदारगाणं कत्थइ सुतिं वा० अलभमाणी जेणेव उत्तरिल्ले एवं चेव पच्चत्थिमिल्लेवि जाव अपासमाणी ओहिं पउंजति, ते मागंदियदारए सेलएणं सद्धिं लवणसमुहं मज्झंमज्झेणं वीइवयमाणे २ पासति ता आसुरुत्ता असिखेडगं गेण्हति ता सत्तट्ठ जाव उप्पयति ता ताए उक्किट्ठाए जेणेव मागंदिय० तेणेव उवा० ता एवं व०-हंभो मागंदिय० अप्पत्थियपत्थिया किण्णं तुम्हे जाणह ममं विप्पजहाय सेलएणं जक्खेणं सद्धिं लवणसमुहं मज्झंमज्झेणं वीतीवयमाणा?, तं

एवमवि गए जइ णं तुम्हे ममं अवयक्खह तो भे अत्थि जीवियं, अहण्णं णावयक्खह तो भे इमेणं नीलुप्पलगवल जाव एडेमि. तते णं ते मागंदियदारया रयणदीवदेवयाए अंतिए एयमट्टं सोणा णिसम्म अभीया अतत्था अणुव्विग्गा अक्खुभिया असंभंता रयणदीवदेवयाए एयमट्टं नो आढंति नो परि० णो अवयक्खंति. अणाढायमाणा अपरि० अणवयक्खमाणा सेलएण जक्खेण सद्धिं लवणसमुहं मज्झंमज्झेणं वीतिवयंति, तते णं सा रयणदीवदेवया ते मागंदिया जाहे नो संचाएति बहूहिं पडिलोमेहि य उवसग्गेहि य चालित्तए वा खोभित्तए वा विपरिणामित्तए वा लोभित्तए वा ताहे महुरेहिं सिंगारेहि य कलुणेहि य उवसग्गेहि य उवसग्गेउं पयत्ता यावि होत्था, हंभो मागंदियदारगा ! जति णं तुम्हेहिं देवाणुप्पिया ! मए सद्धिं हसियाणि य रमियाणि य ललियाणि य कीलियाणि य हिंडियाणि य मोहियाणि य ताहे णं तुम्हे सद्धातिं अगणेमाणा ममं विप्पजहाय सेलएणं सद्धिं लवणसमुहं मज्झंमज्झेणं वीइवयह तते ण सा रयणदीवदेवया जिणरक्खियस्स मणं ओहिणा आभोएति त्ता एवं वदासी-णिच्चंऽपिय णं अहं जिणपालियस्स अणिट्टा० निच्चं मम जिणपालिए अणिट्टे० निच्चं-पिय णं अहं जिणरक्खियस्स इट्टा० निच्चंपिय णं ममं जिणरक्खिए इट्टे०, जति णं ममं जिणपालिए रोयमाणीं कंदमाणीं सोयमाणीं तिप्पमाणीं विलवमाणीं णावयक्खति किण्णं तुमं जिणरक्खिया ! ममं रोयमाणीं जाव णावयक्खसि ? तते णं-‘सा पवररयणदीवस्स देवया ओहिणा उ जिणरक्खियस्स मणं । नाऊण वधनिमित्तं उवरि मागंदियदारगाण दोण्हं पि ॥ २२ ॥ दोसकलिया सललियं णाणाविहचुण्णवासमीसं (सियं) दिव्वं । घाणमणनिव्वुइकरं सबोउयसुरभिकुसुमवुट्ठिं पमुंचमाणी ॥ २३ ॥ णाणामणिकणगरयणघंटियखिखिणिणेऊरमे-हलभूसणरवेणं । दिसाओ विदिसाओ पूरयंती वयणमिणं बेति सा सकलुसा ॥ २४ ॥ होल वसुल गोल णाह दइत पिय रमण कंत सामिय णिग्घिण णित्थक्क । छि(प्र० थि)ण्ण णिक्खिव अकयण्णुय सिढिलभाव निहज्ज लुक्ख अकलुण जिणरक्खिय मज्झं हिययरक्खगा ! ॥ २५ ॥ णहु जुज्जसि एक्कियं अणाहं अबंधवं तुज्झ चलणओवायकरियं उज्झिउं महण्णं । गुण-संकर ! अहं तुमे विहूणा ण समत्थावि जीविउं खणंपि ॥ २६ ॥ इमस्स उ अणेगझसमगरविविधसावयसयाउलघरस्स । रयणागरस्स मज्झे अप्पाणं वहेमि तुज्झ पुरओ एहि णियत्ताहि जइ सि कृविओ खमाहि एक्कावराहं मे ॥ २७ ॥ तुज्झ य विगयघणविमलससिमंडलगार(लोवम पा०)सस्सिरीयं सारयनवकमलकुमुदकुवलय(विमल)दलनिकर(विमउलविगसिय पा०) सरिसनिभं । नयणं वयणं पिवासागयाए सद्धा मे पेच्छिउं जं अवलोएहि ता इओ ममं णाह जा ते पेच्छामि वयणकमलं ॥ २८ ॥ एवं सप्पणयसरलमहुरातिं पुणो २ कलुणाइं वयणातिं । जंपमाणी सा पावा मग्गओ समण्णेइ पावहियया ॥ २९ ॥ तते णं से जिणरक्खिए चलमणे तेणेव भूसणरवेणं कण्णसुहमणोहरेणं तेहि य सप्पणयसरलमहुरभणिएहिं संजायबिउणराए रयणदीवस्स देवयाए तीसे सुंदरथणजहणवयणकरचरणनयणलावन्नरूवजोव्वणसिरिं च दिव्वं सरभसउवगूहियाइं जातिं विब्बोयविलसियाणि य विहसियसकडक्खदिट्ठिनिस्ससियम-लि(णि पा०)यउवललियठियगमणपणयखिज्जियपासादीयाणि य सरमाणे रागमोहियमई अवसे कम्मवसगए(वेगनडिए पा०) अवयक्खति मग्गतो सविलियं, तते णं जिणरक्खियं समुप्पन्नकलुणभावं मच्चुगलत्थल्लणोल्लियमइं अवयक्खंतं तहेव जक्खे य सेलए जाणिऊण सणियं २ उव्विहति नियगपिट्ठाहिं विगयसत्थं (प्र० सड्डं, सहं पा०), तते णं सा रयणदी-वदेवया निस्संसा कलुणं जिणरक्खियं सकलुसा सेलगपिट्ठाहिं उवयंतं दास ! मओ सान्त चंपमाणी अप्पत्तं सागरसलिलं गेण्हिय बाहाहिं आरसंतं उड्डं उव्विहति अंबरतले ओवयमाणं च मंडलगणेणं पडिच्छित्ता नीलुप्पलगवलअयसिप्पगासेण असिवरेणं खंडाखंडिं करेति त्ता तत्थ विलवमाणं तस्स य सरसवहियस्स घेत्तूण अंगमंगातिं सरुहिराइं उक्खित्तबलिं चउ-हिसिं सा पंजली पहिट्ठा । ९१ । एवामेव समणाउसो ! जो अम्हं निग्गंथाण वा० अंतिए पव्वतिए समाने पुणरवि माणुस्सए कामभोगे आसायति पत्थयति पीहेति अभिलसति से णं इहभवे चेव बहूणं समणाणं० जाव संसारं अणुपरियट्ठिस्सति, जहा वा से जिणरक्खिए-‘ल्लओ अवयक्खंतो निरावयक्खो गओ अविग्घेणं । तम्हा पवयणसारे निरावयक्खेण भवियव्वं ॥ ३० ॥ भोगे अवयक्खंता पडंति संसारसायरे घोरे । भोगेहिं निरवयक्खा तरंति संसारकतारं ॥ ३१ ॥ ९२ । तते णं सा रयणदीवदेवया जेणेव जिणपालिए तेणेव उवा० बहूहिं अणुलोमेहि य पडिलोमेहि य खरमहुरसिंगारेहिं कलुणेहि य उवसग्गेहि य जाहे नो संचाएइ चालित्तए वा खोभि० विप्प० ताहे संता तंता परितंता निव्विण्णा समाणा जामेव दिसिं पाउ० तामेव दिसिं पडिगया, तते णं से सेलए जक्खे जिणपालिएणं सद्धिं लवणसमुहं मज्झंमज्झेणं वीतीवयति त्ता जेणेव चंपानयरी तेणेव उवागच्छति त्ता चंपाए नयरीए अग्गु-जाणंसि जिणपालियं पट्टातो ओयारेति त्ता एवं व०-एस णं देवा० ! चंपानयरी दीसतित्तिकट्टु जिणपालियं आपुच्छति त्ता जामेव दिसिं पाउब्भूए तामेव दिसिं पडिगए । ९३ । तते णं जिणपालिए चंपं अणुपविसति त्ता जेणेव सए गिहे जेणेव अम्मापियरो तेणेव उवागच्छइ त्ता अम्मापिऊणं रोयमाणे जाव विलवमाणे जिणरक्खियवावत्ति निवेदेति, तते णं जिण-पालिए अम्मापियरो मित्तणातिजावपरियणेणं सद्धिं रोयमाणातिं बहूइं लोइयाइं मयकिच्चाइं करेति त्ता कालेणं विगतसोया जाया, तते णं जिणपालियं अन्नया कयाई सुहासणवरगतं

अम्मापियरो एवं वदासी-कहणं पुत्ता ! जिणरक्खिए कालगए ?, तते णं से जिणपालिए अम्मापिऊणं लवणसमुद्दोत्तारं च कालियवायसमुत्थाणं पोतवहणविवत्तिं च फलहखंडआ-
 सातणं च रयणदीवदेवयागिहं च भोगविभूहं च रयणदीवदेवयाअप्पाहणं च सूलाइयपुरिसदरिसणं च सेलगजक्खआरुहणं च रयणदीवदेवयाउवसगं च जिणरक्खियविवत्तिं च लवण-
 समुद्दउत्तरणं च चंपागमणं च सेलगजक्खआपुच्छणं च जहाभूयमवितहमसंदिद्धं परिकहेति, तते णं जिणपालिए जाव अप्पसोगे जाव विपुलातिं भोगभोगाइं भुंजमाणे विहरति । ९४ ।
 तेणं कालेणं० समणे० समोसढे, धम्मं सोच्चा पव्वतिए एक्कारसंगवी मासिएणं सोहम्मे कप्पे दो सागरोवमे, महाविदेहे सिज्झिहिति । एवामेव समणाउसो ! जाव माणुस्सए कामभोए
 णो पुणरवि आसायति से णं जाव वीतिवतिस्सति जहा वा से जिणपालिए । एवं खलु जंबू ! समणेणं भगवया० नवमस्स नायज्झयणस्स अयमट्टे पण्णत्तेत्तिबेमि । ९५ ॥ इति माकन्दी-
 अज्झयणं ९ ॥ जति णं भंते ! समणेणं० णवमस्स नायज्झयणस्स अयमट्टे पण्णत्ते दसमस्स के अट्टे० ?, एवं खलु जंबू ! तेणं कालेणं० रायगिहे नगरे सामी समोसढे गोयमसामी एवं
 वदासी-कहणं भंते ! जीवा वड्ढंति वा हायन्ति वा ?, गो० ! से जहानामए बहुलपक्खस्स पाडिवयाचंदे पुण्णिमाचंदं पणिहाय हीणे वण्णेणं हीणे सोम्मयाए हीणे निद्धयाए हीणे
 कंतीए एवं दित्तीए जुत्तीए छायाए पभाए ओयाए लेस्साए मंडलेणं तयाणंतरं च णं वीयाचंदे पाडिवयं चंदं पणिहाय हीणतराए वण्णेणं जाव मंडलेणं तयाणंतरं च णं ततिआचंदे
 बितियाचंदं पणिहाय हीणतराए वण्णेणं जाव मंडलेणं, एवं खलु एएणं कमेणं परिहायमाणे २ जाव अमावस्साचंदे चाउहसिचंदं पणिहाय नट्टे वण्णेणं जाव नट्टे मंडलेणं, एवामेव
 समणाउसो ! जो अम्हं निग्गंथो वा निग्गंथी वा जाव पव्वइए समाणे हीणे खंतीए एवं मुत्तीए गुत्तीए अज्जवेणं महवेणं लाघवेणं सच्चेणं तवेणं चियाए अकिंचण्याए बंभचेरवासेणं,
 तयाणंतरं च णं हीणे हीणतराए खंतीए जाव हीणतराए बंभचेरवासेणं, एवं खलु एएणं कमेणं परिहायमाणे २ णट्टे खंतीए जाव णट्टे बंभचेरवासेणं, से जहा वा सुक्कपक्खस्स पाडि-
 बयाचंदे अमावासं चंदं पणिहाय अहिए वण्णेणं जाव अहिए मंडलेणं तयाणंतरं च णं बिइयाचंदे पाडिवयाचंदं पणिहाय अहिययराए वण्णेणं जाव अहियतराए मंडलेणं एवं खलु
 एएणं कमेणं परिवुड्ढेमाणे २ जाव पुण्णिमाचंदे चाउहसिं चंदं पणिहाय पडिपुण्णे वण्णेणं जाव पडिपुण्णे मंडलेणं, एवामेव समणाउसो ! जाव पव्वतिए समाणे अहिए खंतीए जाव
 बंभचेरवासेणं, तयाणंतरं च णं अहिययराए खंतीए जाव बंभचेरवासेणं, एवं खलु एएणं कमेणं परिवुड्ढेमाणे २ जाव पडिपुण्णे बंभचेरवासेणं, एवं खलु जीवा वड्ढंति वा हायंति वा,
 एवं खलु जंबू ! समणेणं भगवता महावीरेणं दसमस्स नायज्झयणस्स अयमट्टे पण्णत्तेत्तिबेमि । ९६ ॥ इति चंदज्झयणं १० ॥ जति णं भंते ! दसमस्स नायज्झयणस्स अयमट्टे एक्कार-
 समस्स के अट्टे० ?, एवं खलु जंबू ! तेणं कालेणं० रायगिहे गोयमे एवं वदासी-कह णं भंते ! जीवा आराहगा वा विराहगा वा भवंति ?, गो० ! से जहाणामए एगंसि समुद्दकूलंसि
 दावहवा नामं रुक्खा पण्णत्ता किण्हा जाव निउरुंबभूया पत्तिया पुप्फिया फलिया हरियगरेरिज्जमाणा सिरीए अतीव उवसोभेमाणा २ चिट्ठंति, जया णं दीविच्चगा ईसिं पुरेवाया
 पच्छावाया मंदावाया महावाया वायंति तदा णं बहवे दावहवा रुक्खा पत्तिया जाव चिट्ठंति अप्पेगतिया दावहवा रुक्खा जुन्ना झोडा परिसडियपंडुपत्तपुप्फफला सुक्करुक्खओ विव
 मिलायमाणा २ चिट्ठंति, एवामेव समणाउसो ! जे अम्हं निग्गंथो वा निग्गंथी वा जाव पव्वतिते समाणे बहूणं समणाणं० सम्मं सहति जाव अहियासेति बहूणं अण्णउत्थियाणं बहूणं
 गिहत्थाणं नो सम्मं सहति जाव नो अहियासेति एस णं मए पुरिसे देसविराहए पण्णत्ते समणाउसो !, जया णं सामुद्दगा ईसिं पुरेवाया पच्छावाया मंदावाया महावाया वायंति तदा
 णं बहवे दावहवा रुक्खा जुण्णा झोडा जाव मिलायमाणा २ चिट्ठंति अप्पेगइया दावहवा रुक्खा पत्तिया पुप्फिया जाव उवसोभेमाणा २ चिट्ठंति, एवामेव समणाउसो ! जो अम्हं निग्गं-
 थो वा निग्गंथी वा पव्वतिए समाणे बहूणं अण्णउत्थियाणं बहूणं गिहत्थाणं सम्मं सहति बहूणं समणाणं० नो सम्मं सहति एस णं मए पुरिसे देसाराहए पण्णत्ते समणाउसो !, जया णं नो
 दीविच्चगा णो समुद्दगा ईसिं पुरेवाया पच्छावाया जाव महावाया तते णं सव्वे दावहवा रुक्खा जुण्णा झोडा० एवामेव समणाउसो ! जाव पव्वतिए समाणे बहूणं समणाणं० बहूणं
 अण्णउत्थियगिहत्थाणं नो सम्मं सहति एस णं मए पुरिसे सव्वविराहए पण्णत्ते समणाउसो !, जया णं दीविच्चगावि सामुद्दगावि ईसिं पुरेवाया पच्छावाया जाव वायंति तदा णं सव्वे
 दावहवा रुक्खा पत्तिया जाव चिट्ठंति, एवामेव समणाउसो ! जे अम्हं पव्वतिए समाणे बहूणं समणाणं बहूणं अण्णउत्थियगिहत्थाणं सम्मं सहति एस णं मए पुरिसे सव्वाराहए पं० !,
 एवं खलु गो० ! जीवा आराहगा वा विराहगा वा भवंति, एवं खलु जंबू ! समणेणं भगवया एक्कारसमस्स अयमट्टे पण्णत्तेत्तिबेमि । ९७ ॥ इति दावहवज्झयणं ११ ॥ जति णं भंते !
 समणेणं जाव संपत्तेणं एक्कारसमस्स नायज्झयणस्स अयम० बारसमस्स णं नायज्झयणस्स के अट्टे पं० ?, एवं खलु जंबू ! तेणं कालेणं० चंपा नाम नयरी पुण्णभदे जितसत्तू राया
 धारिणी देवी, अदीणसत्तू नामं कुमारं जुवराया यावि होत्था, सुबुद्धी अमच्चे जाव रज्जधुराचिंतए समणोवासए, तीसे णं चंपाए नयरीए बहिया उत्तरपुरच्छिमेणं एगे परिहोदए यावि
 होत्था, मेयवसामंसरुहिरपूयपडलपोच्चडे मयगकलेवरसंछण्णे अमणुण्णे वण्णेणं जाव फासेणं, से जहानामए अहिमडेति वा गोमडेति वा जाव मयकुहियविणद्रकिमिणवाव- (११३)

ण्णदुरभिगंधे किमिजालाउले संसत्ते असुइविगयबीभत्थदरिसणिज्जे, भवेयारूवे सिया ?, णो इणट्टे समट्टे, एत्तो चेव जाव गंधेणं पण्णत्ते । ९८ । तते णं से जितसत्तू राया अण्णदा कदाई
 ण्हाए कयबलिकम्मे जाव अप्पमहग्घाभरणांलंकियसरीरे बहूहिं राईसरजावसत्थवाहपभितिहिं सद्धिं भोयणवेलाए सुहासणवरगए विपुलं असणं जाव विहरति, जिमितभुत्तुत्तरायए
 जाव सुइभूते तंसि विपुलंसि असणं जाव जायविम्हए ते बहवे ईसरजावपभित्तीए एवं वयासी-अहो णं देवा ! इमे मणुण्णे असणे वण्णेणं उववेए जाव फासेणं उववेते अस्साय-
 णिज्जे विस्सायणिज्जे पीणणिज्जे दीवणिज्जे दप्पणिज्जे मयणिज्जे बिंहणिज्जे सद्धिंदियगायपल्हायणिज्जे, तते णं ते बहवे ईसरजावपभियओ जितसत्तुं एवं व०-तहेव णं सामी ! जण्णं तुब्भे
 वदह अहो णं इमे मणुण्णे असणे वण्णेणं उववेए जाव पल्हायणिज्जे, तते णं जितसत्तू सुबुद्धिं अमच्चं एवं व०-अहो णं सुबुद्धी ! इमे मणुण्णे असणे जाव पल्हायणिज्जे, तए णं
 सुबुद्धी जितसत्तुस्सेयमट्टं नो आढाइ जाव तुसिणीए संचिट्ठति, तते णं जितसत्तुणा सुबुद्धी दोच्चंपि तच्चंपि एवं वुत्ते समाणे जितसत्तुं रायं एवं वदासी-नो खलु सामी ! अम्हं एयंसि मणु-
 ण्णंसि असणं केई विम्हए, एवं खलु सामी ! सुब्भिसद्दावि पुग्गला दुब्भिसद्दाए परिणमंति दुब्भिसद्दावि पोग्गला सुब्भिसद्दाए परिणमंति सुरूवावि पोग्गला दुरूवत्ताए परिणमंति
 दुरूवावि पोग्गला सुरूवत्ताए परिणमंति सुब्भिगंधावि पोग्गला दुब्भिगंधत्ताए परिणमंति दुब्भिगंधावि पोग्गला सुब्भिगंधत्ताए परिणमंति सुरसावि पोग्गला दुरसत्ताए परिणमंति
 दुरसावि पोग्गला सुरसत्ताए परिणमंति सुहफासावि पोग्गला दुहफासत्ताए परिणमंति दुहफासावि पोग्गला सुहफासत्ताए परिणमंति, पओगवीससापरिण्यावि णं सामी ! पोग्गला
 पण्णत्ता, तते णं से जितसत्तू सुबुद्धिस्स अमच्चस्स एवमातिक्खमाणस्स० एयमट्टं नो आढाति नो परियाणइ तुसिणीए संचिट्ठइ, तए णं से जितसत्तू अण्णदा कदाई ण्हाए आसखं-
 धवरगते महया भडचडगररहआसवाहणियाए निज्जायमाणे तस्स फरिहोदगस्स अदूरसामंतेणं वीतीवयइ, तते णं जितसत्तू तस्स फरिहोदगस्स असुभेणं गंधेणं अभिभूते समाणे सएणं
 उत्तरिज्जगेणं आसगं पीहेइ, एगंतं अवक्कमति, ते बहवे ईसरजावपभितिओ एवं वदासी-अहो णं देवाणुप्पिया ! इमे फरिहोदए अमणुण्णे वण्णेणं० से जहानामए अहिमडेति वा जाव
 अमणामतराए चेव, तए णं ते बहवे राईसरपभिई जाव एवं व०-तहेव णं तं सामी ! जं णं तुब्भे एवं वयह, अहो णं इमे फरिहोदए अमणुण्णे वण्णेणं० से जहानामए अहिमडेइ वा
 जाव अमणामतराए चेव, तए णं से जियसत्तू सुबुद्धिं अमच्चं एवं वदासी-अहो णं सुबुद्धी ! इमे फरिहोदए अमणुण्णे वण्णेणं० से जहानामए अहिमडेइ वा जाव अमणामतराए चेव,
 तए णं सुबुद्धी अमच्चे जाव तुसिणीए संचिट्ठइ, तए णं से जियसत्तू राया सुबुद्धिं अमच्चं दोच्चंपि तच्चंपि एवं व०-अहो णं तं चेव, तए णं से सुबुद्धी अमच्चे जियसत्तुणा रत्ता दोच्चंपि तच्चंपि
 एवं वुत्ते समाणे एवं व०-नो खलु सामी ! अम्हं एयंसि फरिहोदगंसि केई विम्हए, एवं खलु सामी ! सुब्भिसद्दावि पोग्गला दुब्भिसद्दाए परिणमंति तं चेव जाव पओगवीससाप-
 रिण्या य णं सामी ! पोग्गला पण्णत्ता, तते णं जितसत्तू सुबुद्धिं एवं वयासी-मा णं तुमं देवाणु० ! अप्पाणं च परं च तदुभयं वा बहूहिं य असब्भावुब्भावणाहिं मिच्छत्ताभिणिवेसेण
 य वुग्गाहेमाणे वुप्पाएमाणे विहराहि, तते णं सुबुद्धिस्स इमेयारूवे अब्भत्थिए० समुप्पज्जित्था-अहो णं जितसत्तू संते तच्चे तहिए अवितहे सब्भूते जिणपण्णत्ते भावे णो उवलभति,
 तं सेयं खलु मम जितसत्तुस्स रण्णो संताणं तच्चाणं तहियाणं अवितहाणं सब्भूताणं जिणपण्णत्ताणं भावाणं अभिगमणट्टयाए एयमट्टं उवाइणावेत्तए, एवं संपेहेति त्ता पच्चतिएहिं
 पुरिसेहिं सद्धिं अंतरावणाओ नवए घडयपडए पगेण्हति त्ता संझाकालसमयंसि पविरलमणुस्संसि णिसंतपडिनिसंतंसि जेणेव फरिहोदए तेणेव उवागए त्ता तं फरिहोदगं गेण्हावेति त्ता
 नवएसु घडएसु गालावेति त्ता नवएसु घडएसु पक्खिवावेति त्ता सज्जक्खारं पक्खिवावेइ लंछियमुद्धिते करावेति त्ता सत्तरत्तं परिवसावेति त्ता दोच्चंपि नवएसु घडएसु गालावेति नवएसु
 घडएसु पक्खिवावेति त्ता सज्जक्खारं पक्खिवावेइ लंछियमुद्धिते कारवेति त्ता सत्तरत्तं परिवसावेति त्ता तच्चंपि नवएसु घडएसु जाव संवसावेति एवं खलु एएणं उवाएणं अंतरा गला-
 वेमाणे अंतरा पक्खिवावेमाणे अंतरा य विपरिवसावेमाणे सत्त २ रातिंदिया विपरिवसावेति, तते णं से फरिहोदए सत्तमसत्तयंसि परिणममाणंसि उदगरयणे जाए यावि होत्था
 अच्छे पत्थे जच्चे तणुए फलिहवण्णाभे वण्णेणं उववेते० आसायणिज्जे जाव सद्धिंदियगायपल्हायणिज्जे, तते णं सुबुद्धी अमच्चे जेणेव से उदगरयणे तेणेव उवा० त्ता करयलंसि आसा-
 देति त्ता तं उदगरयणं वण्णेणं उववेयं० आसायणिज्जं जाव सद्धिंदियगायपल्हायणिज्जं जाणित्ता हट्टतुट्टे बहूहिं उदगसंभारणिज्जेहिं संभारेति त्ता जितसत्तुस्स रण्णो पाणियघरियं
 सहावेति त्ता एवं व०-तुमं च णं देवाणुप्पिया ! इमे उदगरयणं गेण्हाहि त्ता जितसत्तुस्स रत्तो भोयणवेलाए उवणेज्जासि, तते णं से पाणियघरिए सुबुद्धियस्स एतमट्टं पडिसुणेति त्ता
 उदगरयणं गिण्हाति त्ता जियसत्तुस्स रण्णो भोयणवेलाए उवट्टवेति, तते णं से जितसत्तू राया तं विपुलं असणं० आसाएमाणे जाव विहरइ, जिमियभुत्तुत्तरायएवि य णं जाव परम-
 सुइभूए तंसि उदगरयणे जायविम्हए ते बहवे राईसर जाव एवं व०-अहो णं देवाणु० ! इमे उदगरयणे अच्छे जाव सद्धिंदियगायपल्हायणिज्जे, तते णं बहवे राईसर जाव एवं व०-तहेव

णं सामी ! जणं तुम्हे वदह जाव एवं चेव पल्हायणिज्जे, तते णं जितसत्तू राया पाणियघरियं सदावेति त्ता एवं व०-एस णं तुम्हे देवा० ! उदगरयणे कओ आसादिते ?, तते णं से पाणियघरिए जितसत्तु एवं वदासी-एस णं सामी ! मए उदगरयणे सुबुद्धिस्स अंतियाओ आसादिते, तते णं जितसत्तू सुबुद्धिं अमच्चं सदावेति त्ता एवं व०-अहो सुबुद्धी ! केणं कारणेणं अहं तव अणिट्टे० जेणं तुमं मम कल्लाकल्लिं भोयणवेलाए इमं उदगरयणं न उवट्टवेसि ?, तए णं (प्र० तं एस णं) तुमे देवा० ! उदगरयणे कओ उवलद्धे ?, तते णं सुबुद्धी जितसत्तु एवं व०-एस णं सामी ! से फरिहोदए, तते णं से जितसत्तू सुबुद्धिं एवं व०-केणं कारणेणं सुबुद्धी ! एस से फरिहोदए ?, तते णं सुबुद्धी जितसत्तु एवं व०-एवं खलु सामी ! तुम्हे तया मम एवमातिक्खमाणस्स० एतमट्टं नो सदहह तते णं मम इमेयारूवे अब्भत्थिते० अहो णं जितसत्तू संते जाव भावे नो सदहति नो पत्तियति नो रोएति तं सेयं खलु ममं जियसत्तुस्स रओ संताणं जाव सम्भूताणं जिणपन्नत्ताणं भावाणं अभिगमणट्टयाए एतमट्टं उवाइणावेत्तए, एवं संपेहेमि त्ता तं चेव जाव पाणियघरियं सदावेमि त्ता एवं वदामि-तुमं णं देवाणु० ! उदगरतणं जितसत्तुस्स रओ भोयणवेलाए उवणेहि, तं एएणं कारणेणं सामी ! एस से फरिहोदए, तते णं जितसत्तू राया सुबुद्धिस्स अमच्चस्स एवमातिक्खमाणस्स० एतमट्टं नो सदहति० असदहमाणे० अब्भितरट्टाणिज्जे पुरिसे सदावेति त्ता एवं वदासी-गच्छह णं तुम्हे देवाणुप्पिया ! अंतरावणाओ नवघडए पडए य गेण्हह जाव उदगसंहारणिज्जेहिं दब्वेहिं संभारेह तेऽवि तहेव संभारेति त्ता जितसत्तुस्स उवणेति, तते णं जितसत्तू राया तं उदगरयणं करयलंसि आसाएति आसातणिज्जं जाव सव्विंदियगायपल्हायणिज्जं जाणित्ता सुबुद्धिं अमच्चं सदावेति त्ता एवं व०-सुबुद्धी ! एए णं तुमे संता तच्चा जाव सम्भूया भावा कतो उवलद्धा ?, तते णं सुबुद्धी जितसत्तु एवं वदासी-एए णं सामी ! मए संता जाव भावा जिणवयणातो उवलद्धा, तते णं जितसत्तू सुबुद्धिं एवं व०-तं इच्छामि णं देवाणु० ! तव अंतिए जिणवयणं निसामेत्तए, तते णं सुबुद्धी जितसत्तुस्स विचित्तं केवल्लिपन्नत्तं चाउज्जामं धम्मं परिकहेइ, तमा इक्खति जहा जीवा बज्झंति जाव पंच अणुवयातिं, तते णं जितसत्तू सुबुद्धिस्स अंतिए धम्मं सोच्चा णिसम्म हट्टे० सुबुद्धिं अमच्चं एवं व०-सदहामि णं देवाणुप्पिया ! निग्गंथं पावयणं जाव से जहेयं तुम्हे वयह, तं इच्छामि णं तव अंतिए पंचाणुवइयं सत्तसिक्खावइयं जाव उवसंपजित्ताणं विहरित्तए, अहासुहं देवा० मा पडिबंथं०, तए णं से जियसत्तू सुबुद्धिस्स अमच्चस्स अंतिए पंचाणुवइयं जाव दुवालसविहं सावयधम्मं पडिवज्जइ, तते णं जितसत्तू समणोवासए जाए अभिगयजीवाजीवे जाव पडिलाभेमाणे विहरति । तेणं कालेणं० थेरागमणं जियसत्तू राया, सुबुद्धी धम्मं सोच्चा जं णवरं जियसत्तु आपुच्छामि जाव पव्वयामि, अहासुहं देवा०, तते णं सुबुद्धी जेणेव जितसत्तू तेणेव उवा० त्ता एवं व०-एवं खलु सामी ! मए थेराणं अंतिए धम्मं निसन्ते सेऽविय धम्मं० इच्छियपडिच्छिए, तए णं अहं सामी ! संसारभउव्विग्गे भीए जाव इच्छामि णं तुम्हेहिं अब्भणुन्नाए स० जाव पव्वइत्तए, तते णं जितसत्तू सुबुद्धिं एवं व०-अच्छासु (प्र० मु) ताव देवाणु० ! कतिवयातिं वासाइं उरालातिं जाव भुंजमाणा ततो पच्छा एगयओ थेराणं अंतिए मुंडे भवित्ता जाव पव्वइस्सामो, तते णं सुबुद्धी जितसत्तुस्स एयमट्टं पडिसुणेति, तते णं तस्स जितसत्तुस्स रण्णो सुबुद्धिणा सद्धिं विपुलाइं माणुस्स० पच्चणुब्भवमाणस्स दुवालस वासाइं वीतिकंताइं, तेणं कालेणं० थेरागमणं तते णं जितसत्तू धम्मं सोच्चा एवं जं नवरं देवा० ! सुबुद्धिं अमच्चं आमंतेमि जेट्टपुत्तं रज्जे ठवेमि, तए णं तुम्हं जाव पव्वयामि, अहासुहं०, तते णं जितसत्तू जेणेव सए गिहे तेणेव उवा० त्ता सुबुद्धिं सदावेति त्ता एवं वयासी-एवं खलु मए थेराणं जाव पव्वयामि, तुमं णं किं करेसि ?, तते णं सुबुद्धी जितसत्तु एवं व०-जाव के अन्ने आहारे वा जाव पव्वयामि, तं जति णं देवा० जाव पव्वयह गच्छह णं देवाणु० ! जेट्टपुत्तं कुडुंवे ठावेहि त्ता सीयं दुरुहित्ताणं ममं अंतिए सीया जाव पाउब्भवेति, तते णं सुबुद्धी सीया जाव पाउब्भवइ, तते णं जितसत्तू कोडुंबि-यपुरिसे सदावेति त्ता एवं व०-गच्छह णं तुम्हे देवा० ! अदीणसत्तुस्स कुमारस्स रायाभिसेयं उवट्टवेह जाव अभिसिंचंति जाव पव्वतिए, तते णं जितसत्तू एक्कारस अंगाइं अहिज्जति बहूणि वासाणि परियाओ मासियाए सिद्धे, तते णं सुबुद्धी एक्कारस अंगाइं अ० बहूणि वासाणि जाव सिद्धे । एवं खलु जंबू ! समणेणं भगवया महावीरेणं० बारसमस्स० अयमट्टे पण्णत्तेत्तिबेमि । ९९ । इति उदयज्झयणं १२ ॥ जति णं भंते ! समणेणं० बारसमस्स० अयमट्टे पण्णत्ते तेरसमस्स णं भंते ! नाय० के० अट्टे पन्नत्ते ?, एवं खलु जंबू ! तेणं कालेणं० रायगिहे गुणसिलए चेतिए, समोसरणं, परिसा निग्गया, तेणं कालेणं० सोहम्मं कप्पे दददुरवडिंसए विमाणे सभाए सुहम्माए दददुरंसि सीहासणंसि दददुरे देवे चउहिं सामाणियसाहस्सीहि चउहिं अग्गमहिंसीहिं सपरिसाहिं एवं जहा सूरियाभो जाव दिव्वातिं भोगभोगाइं भुंजमाणो विहरइ, इमं च णं केवल्लकप्पं जंबुहीवं दीवं विपुलेणं ओहिणा आभोएमाणे २ जाव नट्टविहिं उवदंसित्ता पडिगते जहा सूरियाभे ! भंतेति भगवं गोयमे समणं भगवं महावीरं वंदइ नमंसति त्ता एवं व०-अहो णं भंते ! दददुरे देवे महिड्ढिए २ दददुरस्स णं भंते ! देवस्स सा दिव्वा दिविड्ढी० कहिं गया० ?, गो० ! सरीरं गया सरीरं अणुपविट्ठा कूडागारदिट्ठंतो, दददुरेणं भंते ! देवेणं सा दिव्वा देविड्ढी० किण्णा लद्धा जाव अभिसमन्नागया ?, एवं खलु

गो० ! इहेव जंबुदीवे दीवे भारहे वासे रायगिहे गुणसिलए चेतिए सेणिए राया, तत्थ णं रायगिहे णंदे णामं मणियारसेट्टी अइढे दित्ते०, तेणं कालेणं० अहं गोयमा ! समोसदे परिसा णिग्गया, सेणिए राया निग्गए, तते णं से नंदे मणियारसेट्टी इमीसे कहाए लद्धे समणे ण्हाए पायचारेणं जाव पज्जुवासति, णंदे धम्मं सोच्चा समणोवासए जाते, तते णं अहं राय गिहाओ पडिनिक्खन्ते बहिया जणवयविहारं विहरामि, तते णं से णंदे मणियारसेट्टी अन्नया कदाई असाहुदंसणेण य अपज्जुवासणाए य अणुसासणाए य असुस्सुसणाए य सम्म- त्तपज्जवेहिं परिहायमाणेहिं २ मिच्छत्तपज्जवेहिं परिवड्ढमाणेहिं २ मिच्छत्तं विप्पडिवन्ने जाए यावि होत्था, तते णं नंदे मणियारसेट्टी अन्नता गिम्हकालसमयंसि जेट्टामूलंसि मासंसि अट्टमभत्तं परिणेहति ता पोसहसालाए जाव विहरति, तते णं णंदस्स अट्टमभत्तंसि परिणममाणंसि तण्हाए छुहाए य अभिभूतस्स समणस्स इमेयारूवे अब्भत्थिते०-धन्ना णं ते जाव ईसरपभितओ जेसिं णं रायगिहस्स बहिया बहूओ वावीतो पोक्खरिणीओ जाव सरसरपंतियाओ जत्थ णं बहुजणो ण्हाति य पियति य पाणियं च संवहति, तं सेयं खलु ममं कल्लं पाउ० सेणियं आपुच्छित्ता रायगिहस्स बहिया उत्तरपुरच्छिमे दिसिभाए वेभारपद्यस्स अदूरसामंते वत्थुपाढगरोइतंसि भूमिभागंसि जाव णंदं पोक्खरिणिं खणावेत्तएत्तिकट्टु एवं संपेहेति ता कल्लं पा० जाव पोसहं पारेति ता ण्हाते कयबलिकम्मे मित्तणाइजावसंपरिवुडे महत्थं जाव पाहुडं रायारिहं गेण्हति ता जेणेव सेणिए राया तेणेव उवा० ता जाव पाहुडं उवट्टवेति ता एवं व०-इच्छामि णं सामी ! तुब्भेहिं अब्भणुन्नाए समणे रायगिहस्स बहिया जाव खणावेत्तए, अहासुहं देवाणुप्पिया !, तते णं णंदे सेणिएणं रत्ता अब्भणुण्णाते समणे हट्ट० रायगिहं मज्झमज्झेणं निग्गच्छति ता वत्थुपाढयरोइयंसि भूमिभागंसि णंदं पोक्खरिणिं खणाविउं पयत्ते यावि होत्था, तते णं सा णंदा पोक्खरिणी अणुपुब्बेणं खणमाणा २ पोक्खरिणी जाया यावि होत्था चाउक्कोणा समतीरा अणुपुब्बसुजायवप्पसीयलजला संलण्णपत्तविसमुणाला बहुप्पलपउमकुमुदनलिणसुभगसोगंधियपुंडरीयमहापुंडरीयसयपत्तस- हस्सपत्तपप्फुल्लकेसरोववेया परिहत्थभमंतमच्छल्लप्पयअणेगसउणगणमिहुणवियरियसदुन्नइयमहुरसरनाइया पासाईया०, तते णं से णंदे मणियारसेट्टी णंदाए पोक्खरिणीए चउदिसिं चत्तारि वणसंडे रोवावेति, तए णं ते वणसंडा अणुपुब्बेणं सारक्खिज्जमाणा य संगोविज्जमाणा य संवड्ढिज्जमाणा य ते वणसंडा जाया किण्हा जाव निकुरुंबभूया पत्तिया पुप्फिया जाव उवसोभेमाणा २ चिट्ठंति, तते णं नंदे पुरच्छिमिल्ले वणसंडे एगं महं चित्तसभं करावेति अणेगखंभसयसंनिविट्ठं पा०, तत्थ णं बहूणि किण्हाणि य जाव सुक्खिहाणि य कट्टकम्माणि य पोत्थकम्माणि चित्त० लिप्प० गंधिमवेढिमपूरिमसंघातिम० उवदंसिज्जमाणाइं २ चिट्ठंति, तत्थ णं बहूणि आसणाणि य सयणाणि य अत्थुयपच्चत्थुयाइं चिट्ठंति, तत्थ णं बहवे णडा य जाव णट्टा य जाव दिन्नभइभत्तवेयणा तालायरकम्मं करेमाणा विहरंति, रायगिहविणिग्गओ य जत्थ बहू जणो तेसु पुब्बन्नत्थेसु आसणसयणेसु संनिसन्नो य संतुयट्टो य सुणमाणो य पेच्छमाणो य साहेमाणो य सुहंसुहेणं विहरइ, तते णं णंदे दाहिणिह्ले वणसंडे एगं महं महाणससालं करावेति अणेगखंभ० जाव रूवं तत्थ णं बहवे पुरिसा दिन्नभइभत्तवेयणा विपुलं असणं० उवक्खडेंति बहूणं समणमाहणअतिहीकिवणवणीमगाणं परिभाएमाणा २ विहरंति, तते णं णंदे मणियारसेट्टी पच्चत्थिमिल्ले वणसंडे एगं महं तेगिच्छियसालं करेति, अणेगखंभसय० जाव रूवं, तत्थ णं बहवे वेज्जा य वेज्जपुत्ता य जाणुया य जाणुयपुत्ता य कुसला य कुसलपुत्ता य दिन्नभइभत्तवेयणा बहूणं वाहियाणं गिलाणाण य रोगियाण य दुब्बलाण य तेइच्छकम्मं करेमाणा विहरंति, अण्णे य एत्थ बहवे पुरिसा दिन्न० तेसिं बहूणं वाहियाण य रोगि० गिला० दुब्बला० ओसहभेसज्जभत्तपाणेणं पडियारकम्मं करेमाणा विह- रंति, तते णं णंदे उत्तरिल्ले वणसंडे एगं महं अलंकारियसभं करेति अणेगखंभसत० जाव पडिरूवं, तत्थ णं बहवे अलंकारियपुरिसा दिन्नभइभत्त० बहूणं समणाण य अणाहाण य गिलाणाण य रोगि० दुब्ब० अलंकारियकम्मं करेमाणा २ विहरंति। तते णं तीए णंदाए पोक्खरिणीए बहवे सणाहा य अणाहा य पंथिया य पहिया करोडिया कारवा० तणहार० पत्त० कट्ट० अप्पेगतिया ण्हायंति अप्पेगतिया पाणियं पियंति अप्पेगतिया पाणियं संवहंति अप्पे० विसज्जितसेयजल्लमलपरिस्समनिद्वखुप्पिवासा सुहंसुहेणं विहरंति, रायगिहविणिग्गओवि जत्थ बहुजणो किं ते जलरमणविविहमज्जणकयलिलयाधरयकुसुमसत्थरयअणेगसउणगणरुयरिभितसंकुलेसु सुहंसुहेणं अभिरममाणो २ विहरति। तते णं णंदाए पोक्खरिणीए बहु- जणो ण्हायमाणो पाणियं च संवहमाणो य अन्नमन्नं एवं वदासी-धण्णे णं देवा० ! णंदे मणियारसेट्टी कयत्थे जाव जम्मजीवियफले जस्स णं इमेयारूवा णंदा पोक्खरिणी चाउक्कोणा जाव पडिरूवा, जस्स णं पुरत्थिमिल्ले तं चेव सव्वं चउसुवि वणसंडेसु जाव रायगिहविणिग्गओ जत्थ बहुजणो आसणेसु य सयणेसु य सन्निसन्नो य संतुयट्टो य पेच्छमाणो य साहे- माणो य सुहंसुहेणं विहरति, तं धन्ने कयत्थे कयपुब्बे कया णं लोया सुलद्धे माणुस्सए जम्मजीवियफले नंदस्स मणियारस्स, तते णं रायगिहे संघाडग जाव बहुजणो अन्नमन्नस्स एव- मातिक्खति०-धन्ने णं देवाणुप्पिया ! णंदे मणियारे सो चेव गमओ जाव सुहंसुहेणं विहरति, तते णं से णंदे मणियारे बहुजणस्स अंतिए एतमट्ठं सोच्चा० हट्ट० धाराहयकलंबुगंपिव

४५५ ज्ञातधर्मकथांगं, - ३५६१२१७-१३

समूससियरोमकूवे परं सायासोक्खमणुभवमाणे विहरति । १०० । तते णं तस्स नंदस्स मणियारसेट्टिस्स अन्नया कयाई सरीरगंसि सोलस रोयायंका पाउब्भूया तं०-“सासे कासे जरे दाहे, कुच्छिसूले भगंदरे । अरिसा अजीरए दिट्ठि मुद्धसूले १० अगारए ॥ ३२ ॥ अच्छिवेयणा कन्नवेयणा कंडू दउदरे कोढे १६ । तते णं से णंदे मणियारसेट्टी सोलसहिं रोयायंकेहिं अभिभूते समाणे कोटुंभियपुरिसे सदावेति ता एवं व०-गच्छह णं तुब्भे देवा० ! रायगिहे सिंघाडगजावपहेसु महया सहेणं उग्घोसेमाणा २ एवं व०-एवं खलु देवाणु० ! णंदस्स मणि-यारसेट्टिस्स सरीरगंसि सोलस रोयायंका पाउब्भूता तं०-“सासे जाव कोढे” तं जो णं इच्छति देवाणुप्पिया ! वेज्जो वा वेज्जपुत्तो वा जाणुओ वा० कुसलो वा० नंदस्स मणियारस्स तेसिं च णं सोलसण्हं रोयायंकाणं एगमवि रोयायंकं उवसामेत्तए तस्स णंदे मणियारे विउलं अत्थसंपदाणं दलयत्तित्तिकट्टु दोच्चं पि तच्चं पि घोसणं घोसेह ता पच्चप्पिणह, तेवि तहेव पच्चप्पिणंति, तते णं रायगिहे इमेयारूवं घोसणं सोच्चा णिसम्म बहवे वेज्जा य वेज्जपुत्ता य जाव कुसलपुत्ता सत्थकोसहत्थगया य कोसगपायहत्थगया य सिलियाहत्थगया य गुलिया० य ओसहभेसज्जहत्थगया य सएहिं २ गिहेहिंतो निक्खमंति ता रायगिहं मज्झंमज्झेणं जेणेव णंदस्स मणियारसेट्टिस्स गिहे तेणेव उवा० ता णंदस्स सरीरं पासंति, तेसिं रोयायंकाणं णियाणं पुच्छंति णंदस्स मणियार० बहूहिं उव्वलणेहि य उव्वट्टणेहि य सिणेहपाणेहि य वमणेहि य विरेयणेहि य सेयणेहि य अवदहणेहि य अवण्हाणेहि य अणुवासणेहि य वत्थिकम्महेहि य निरूहेहि य सिरावेहेहि य तच्छणाहि य पच्छणाहि य सिरावेहेहि य तप्पणाहि य पुढवाएहि य छल्लीहि य वल्लीहि य मूलेहि य कंदेहि य पत्तेहि य पुप्फेहि य फलेहि य बीएहि य सिलि(प्र० ला०)याहि य गुलियाहि य ओसहेहि य भेसज्जेहि य इच्छंति तेसिं सोलसण्हं रोयायंकाणं एगमवि रोयायंकं उवसामित्तए, नो चेव णं संचाएंति उव-सामेत्तए, तते णं ते बहेवे वेज्जा य० जाहे नो संचाएंति तेसिं सोलसण्हं रोगायंकाणं एगमवि रोगा० उव० ताहे संता तंता जाव पडिगया, तते णं नंदे तेहिं सोलसहिं रोयायंकेहिं अभिभूते समाणे णंदापोक्खरिणीए मुच्छिए० तिरिक्खजोणिएहिं निबद्धाउते बद्धपएसिए अट्टदुहट्टवसट्टे कालमासे कालं किच्चा नंदाए पोक्खरिणीए दददुराए कुच्छिसि दददुरत्ताए उववन्ने, तए णं णंदे दददुरे गम्भाओ विणिम्मक्के समाणे उम्मक्कबालभावे विन्नायपरिणयमित्ते जोवणगमणुपत्ते नंदाए पोक्खरिणीए अभिरममाणे २ विहरति, तते णं णंदाए पोक्खरिणीए बहू जणो ण्हायमाणो य पियइ य पाणियं च संवहमाणो अन्नमन्नस्स एवमातिक्खति०-धन्ने णं देवाणुप्पिया ! णंदे मणियारे जस्स णं इमेयारूवा णंदा पुक्खरिणी चाउक्कोणा जाव पडिरूवा, जस्स णं पुरत्थिमिल्ले वणसंडे चित्तसभा अणेगखंभ० तहेव चत्तारि सहाओ जाव जम्मजीवियफले, तते णं तस्स दददुरस्स तं अभिक्खणं २ बहुजणस्स अंतिए एयमट्टं सोच्चा णिसम्म इमेयारूवे अब्भत्थिए०-से कहिं मन्ने मए इमेयारूवे सहे णिसंतपुव्वेत्तिकट्टु सुभेणं परिणामेणं जाव जाइसरणे समुप्पन्ने, पुव्वजातिं मम्मं समागच्छति, तते णं तस्स दददुरस्स इमेयारूवे अब्भत्थिए०-एवं खलु अहं इहेव रायगिहे नगरे णंदे णामं मणियारे अड्ढे०, तेणं कालेणं० समणे भगवं म० समोसढे, तए णं समणस्स भगवओ० अंतिए पंचाणु-ब्वइए सत्तसिक्खावइए जाव पडिवन्ने, तए णं अहं अन्नया कयाई असाहुदंसणेण य जाव भिच्छत्तं विप्पडिवन्ने, तए णं अहं अन्नया कयाई गिम्हे कालसमयंसि जाव उपसंपज्जित्ता णं विहरामि, एवं जहेव चिंता आपुच्छणा नंदापुक्ख० वणसंडा सहाओ तं चेव सब्बं जाव नंदाए पु० दददुरत्ताए उववन्ने, तं अहो णं अहं अहन्ने अपुन्ने अकयपुन्ने निग्गंथाओ पावयणाओ नट्टे भट्टे परिब्भट्टे तं सेयं खलु ममं सयमेव पुव्वपडिवन्नातिं पंचाणुव्वयातिं० उवसंपज्जित्ताणं विहरित्तए, एवं संपेहेति ता पुव्वपडिवन्नातिं पंचाणुव्वयाइ० आरुहेति ता इमेयारूवं० अभिग्गहं अभिगिण्हति-कप्पइ मे जावजीवं छट्ठंलट्टेणं अणि० अप्पाणं भावेमाणस्स विहरित्तए, छट्ठस्सविय णं पारणगंसि कप्पइ मे णंदाए पोक्खरिणीए परिपेरंतेसु फासु-एणं ण्हाणोदएणं उम्महणोत्तोलियाहि य वित्तिं कप्पेमाणस्स विहरित्तए, इमेयारूवं अभिग्गहं अभिगिण्हति, जावजीवाए छट्ठंलट्टेणं जाव विहरति, तेणं कालेणं० अहं गो० ! गुण-सिलए समोसढे, परिसा निग्गया, तए णं नंदाए पुक्खरिणीए बहुजणो ण्हाय० अन्नमन्नं० जाव समणे० इहेव गुणसिलए०, तं गच्छामो णं देवाणु० समणं भगवं० वंदामो जाव पज्जुवासामो एयं मे इहभवे परभवे य हियाए जाव अणुगामियत्ताए भविस्सइ, तए णं तस्स दददुरस्स बहुजणस्स अंतिए एयमट्टं सोच्चा निसम्म० अयमेयारूवे अब्भत्थिए० समु-प्पज्जित्था-एवं खलु समणे० तं गच्छामि णं वंदामि० एवं संपेहेति ता णंदाओ पुक्खरिणीओ सणियं २ उत्तरइ जेणेव रायमग्गे तेणेव उवा० ता ताए उक्किट्टाए० दददुरगईए वीति-वयमाणे जेणेव ममं अंतिए तेणेव पहरेत्थ गमणाए, इमं च णं सेणिए राया भंभसारे ण्हाए कयकोउय० जाव सवालंकारविभूसिए हत्थिखंधवरगए सकोरंटमह्ददामेणं लत्तेणं० सेयवरचामरा० हयगयरह० महया भडचडगर० चाउरंगिणिए सेणाए सद्धिं संपरिवुडे मम पायवंदते हव्वमागच्छति, तते णं से दददुरे सेणियस्स रन्नो एगेणं आसकिसोरएणं वाम-पाएणं अक्कंते समाणे अंतनिग्घातिए कते यावि होत्था, तते णं से दददुरे अत्थामे अबले अवीरिए अपुरिसकारपरक्कमे अधारणिज्जमित्तिकट्टु एगंतमवक्कमति० करयलपरिग्गहियं० नमोऽत्थु णं जाव संपत्ताणं नमोऽत्थु णं मम धम्मायरियस्स जाव संपाविउकामस्स पुव्विंपिय णं मए समणस्स भगवतो महावीरस्स अंतिए थूलए पाणातिवाए पच्चक्खाए (११४)

जाव थूलए परिगहे पच्चक्खाए तं इयाणिंपि तस्सेव अंतिए सव्वं पाणातिवायं पच्चक्खामि जाव सव्वं परि० पच्च० जावजीवं सव्वं असणं० पच्च० जावजीवं जंपिय इमं सरीरं इट्ठं कंतं जाव मा फुसंतु एयंपि णं चरिमेहिं ऊसासनीसासेहिं वोसिरामित्तिकट्ठु, तए णं से ददुदुरे कालमासे कालं किच्चा जाव सोहम्मे कप्पे ददुदुरवडिंसए विमाणे उववायसभाए ददुदुरदे-वत्ताए उववन्ने, एवं खलु गो० ! ददुदुरेणं सा दिव्वा देविड्ढी लद्धा०, ददुदुरस्स णं भंते ! देवस्स केवतिकालं ठिई पं०?, गो० ! चत्तारि पलिओवमाइं ठिती पं०, से णं ददुदुरे देवे० महाविदेहे वासे सिज्झिहिति बुज्झि० जाव अंतं करेहिइ। एवं खलु समणेणं भग० महावीरेणं तेरसमस्स नायज्झयणस्स अयमट्ठे पण्णत्तेत्तिवेमि। १०१॥ इति ददुदुरज्झयणं १३॥

जति णं भंते ! तेरसमस्स ना० अयमट्ठे पं० चोदसमस्स के अट्ठे पन्नत्ते?, एवं खलु जंबू ! तेणं कालेणं० तेयलिपुरं नाम नगरं पमयवणे उज्जाणे कणगरहे राया तस्स णं कणगरहस्स पउमावती देवी तस्स णं कणगरहस्स तेयलिपुत्ते णामं अमच्चे सामदंड०, तत्थ णं तेयलिपुरे कलादे नामं मूसियारदारए होत्था अड्ढे जाव अपरिभूते, तस्स णं भदा नामं भारिया, तस्स णं कलायस्स मूसियारदारयस्स धूया भदाए अत्तया पोट्टिला नामं दारिया होत्था रूवेण जोव्वणेण य लावन्नेण उक्किट्ठा०, तते णं पोट्टिला दारिया अन्नदा कदाई ण्हाता सव्वा-लंकारविभूसिया चेडियाचक्कवालसंपरिवुडा उप्पिं पासायवरगया आगासतलगंसि कणगमएणं तिंदूसएणं कीलमाणी २ विहरति, इमं च णं तेयलिपुत्ते अमच्चे ण्हाए आसखंधवरगए महया भडचडगरआसवाहणियाए णिज्जायमाणे कलायस्स मूसियारदारगस्स गिहस्स अदूरसामंतेणं वीतिवयति, तते णं से तेयलिपुत्ते मूसियारदारगगिहस्स अदूरसामंतेणं वीतीवय-माणे २ पोट्टिलं दारियं उप्पिं पासायवरगयं आगासतलगंसि कणगतिंदूसएणं कीलमाणीं पासति ता पोट्टिलाए दारियाए रूवे य जाव अज्झोववन्ने कोडुंबियपुरिसे सदावेति ता एवं व० एस णं देवा० ! कस्स दारिया किं नामधेज्जा?, तते णं कोडुंबियपुरिसा तेयलिपुत्तं एवं वदासी-एस णं सामी ! कलायस्स मूसियारदारयस्स धूता भदाए अत्तया पोट्टिला नामं दा-रिया रूवेण य जाव सरीरा, तते णं से तेयलिपुत्ते आसवाहणियाओ पडिनिन्यत्ते समाणे अब्भितरट्ठाणिज्जे पुरिसे सदावेति ता एवं व०-गच्छह णं तुब्भे देवाणुप्पिया ! कलादस्स मूसि-यार० धूयं भदाए अत्तयं पोट्टिलं दारियं मम भारियत्ताए वरेह, तते णं ते अब्भितरट्ठाणिज्जा पुरिसा तेतलिणा एवं वुत्ता समाणा हट्ठ० करय० तहत्ति जेणेव कलायस्स मूसि० गिहे तेणेव उवागया, तते णं से कलाए मूसियारदारते पुरिसे एज्जमाणे पासति ता हट्ठतुट्ठे आसणाओ अब्भुट्ठेति ता सत्तट्ठ पदातिं अणुगच्छति ता आसणेणं उवणिमंतेति ता आसत्थे वीसत्थे सुहासणवरगए एवं व०-संदिसंतु णं देवाणु० ! किमागमणपओयणं?, तते णं ते अब्भितरट्ठाणिज्जा पुरिसा कलायमूसिय० एवं व०-अम्हे णं देवाणु० ! तव धूयं भदाए अत्तयं पोट्टिलं दारियं तेयलिपुत्तस्स भारियत्ताए वरेमो, तं जति णं जाणसि देवाणु० जुत्तं वा पत्तं वा सलाहणिज्जं वा सरिसो वा संजोगो ता दिज्जउ णं पोट्टिला दारिया तेयलिपुत्तस्स, ता भण देवाणु० ! किं दलामो सुक्कं?, तते णं कलाए मूसियारदारए ते अब्भितरट्ठाणिज्जे पुरिसे एवं वदासी-एस चेव णं दे० ! मम सुक्के जन्नं तेतलिपुत्ते मम दारियानिमित्तेणं अणुग्गहं करेति, ते ठाणिज्जे पुरिसे विपुलेणं असण० पुप्फवत्थजावमल्लालंकारेणं सक्कारेइ ता पडिविसज्जेइ, तए णं ते कलायस्स मूसि० गिहाओ पडिनि० ता जेणेव तेयलिपुत्ते अ० तेणेव उवा० ता तेयलिपु० एयमट्ठं निवेयंति, तते णं कलादे मूसियारदारए अन्नया कयाई सोहणंसि तिहिनक्खत्तमुहुत्तंसि पोट्टिलं दारियं ण्हायं सव्वालंकारविभूसियं सीयं दुरूहेइ ता मित्तणाइ० संपरिवुडे सातो गिहातो पडिनिक्खमति ता सव्विड्ढीए तेयलीपुरं मज्झमज्झेणं जेणेव तेतलिस्स गिहे तेणेव उवा० ता पोट्टिलं दारियं तेतलिपुत्तस्स सयमेव भारियत्ताए दलयति, तते णं तेत-लिपुत्ते पोट्टिलं दारियं भारियत्ताए उवणीयं पासति ता पोट्टिलाए सद्धिं पट्ठयं दुरूहति ता सेतापीतएहिं कलसेहिं अप्पाणं मज्जावेति ता अग्गिहोमं करेति ता पाणिग्गहणं करेति ता पोट्टिलाए भारियाए मित्तणातिजावपरिजणं विपुलेणं असणपाणखातिमसातिमेणं पुप्फ जाव पडिविसज्जेति, तते णं से तेतलिपुत्ते पोट्टिलाए भारियाए अणुरत्ते अविरत्ते उरालाइं जाव विहरति। १०२। तते णं से कणगरहे राया रज्जे य रट्ठे य बले य वाहणे य कोसे य कोट्टागारे य अंतेउरे य मुच्छिते० जाते २ पुत्ते वियंगेति, अप्पेगइयाणं हत्थंगुलियाओ छिंदति अप्पेगइयाणं हत्थंगुट्ठए छिंदति एवं पायंगुलियाओ पायंगुट्ठएवि कन्नसक्कुलीएवि नासापुडाइं फालेति अंगमंगातिं वियंगेति, तते णं तीसं पउमावतीए देवीए अन्नया पुव्वरत्ताव० अयमेयारूवे अब्भत्थिए० समुप्पज्जित्था-एवं खलु कणगरहे राया रज्जे य जाव पुत्ते वियंगेति जाव अंगमंगाइं वियंगेति, तं जति अहं दारयं पयायामि सेयं खलु ममं तं दारगं कण-गरहस्स रहस्सियं चेव सारक्खमाणीए संगोवेमाणीए विहरित्तएत्तिकट्ठु एवं संपेहेति ता तेयलिपुत्तं अमच्चं सदावेति ता एवं व०-एवं खलु देवा० ! कणगरहे राया रज्जे य जाव वियं-गेति तं जति णं अहं देवाणु० ! दारगं पयायामि तते णं तुमं कणगरहस्स रहस्सियं चेव अणुपुव्वेणं सारक्खमाणे संगोवेमाणे संवड्ढेहि, तते णं से दारए उम्मुक्कबालभावे जोव्वणगमणु-प्पत्ते तव य मम य भिक्खाभायणे भविस्सति, तते णं से तेयलिपुत्ते पउमावतीए एयमट्ठं पडिसुणेति ता पडिगए, तते णं पउमावती य देवी पोट्टिला य अमच्ची एए सममेव गब्भं गेण्हंति

सममेव परिवहति, तते णं सा पउमावती नवण्हं मासाणं जाव पियदंसणं सुरूवं दारगं पयाया, जं रयणिं च पउमावती दारयं पयाया तं रयणिं च णं पोट्टिलावि अमच्ची नवण्हं मासाणं विणिहायमावन्नं दारियं पयाया, तते णं सा पउमावती देवी अम्मधाइं सदावेति ता एवं व०-गच्छाहि णं तुमे अम्मो! तेयलिगिहे तेयलिपुत्तं रहस्सियं चैव सदावेहि, तते णं सा अम्मधाइं तहत्ति पडिसुणेति ता अंतेउरस्स अवदारेणं निग्गच्छति ता जेणेव तेयलिस्स गिहे जेणेव तेयलिपुत्ते तेणेव उवा० ता करयल जाव एवं वदासी-एवं खलु देवा०! पउमावती देवी सदावेति, तते णं तेयलिपुत्ते अम्मधातीए अंतिए एयमट्टं सोच्चा हट्ट० अम्मधातीए सद्धिं सातो गिहाओ निग्गच्छति ता अंतेउरस्स अवदारेणं रहस्सियं चैव अणुपविसति ता जेणेव पउमावती तेणेव उवाग० करयल० एवं व०-संदिसंतु णं देवाणुप्पिया! जं मए कायव्वं?, तते णं पउमावती तेयलीपुत्तं एवं व०-एवं खलु कणगरहे राया जाव वियंगेति अहं च णं देवा०! दारगं पयाया तं तुमं णं देवाणु०! तं दारगं गेण्हाहि जाव तव मम य भिक्खाभायणे भविस्सतित्तिकट्टु तेयलिपुत्तं दलयति, तते णं तेयलिपुत्ते पउमावतीए हत्थातो दारगं गेण्हति ता उत्तरिज्जेणं पिहेति ता अंतेउरस्स रहस्सियं चैव अवदारेणं निग्गच्छति ता जेणेव सए गिहे जेणेव पोट्टिला भारिया तेणेव उवा० ता पोट्टिलं एवं व०-एवं खलु देवाणु०! कणगरहे राया रज्जे य जाव वियंगेति अयं च णं दारए कणगरहस्स पुत्ते पउमावईए अत्तए तेणं तुमं देवा०! इमं दारगं कणगरहस्स रहस्सियं चैव अणुपुत्तेणं सारक्खाहि य संगोवेहि य संवहदेहि य, तते णं एस दारए उम्मुक्कबालभावे तव य मम य पउमावतीए य आहारे भविस्सतित्तिकट्टु पोट्टिलाए पासे णिक्खिवति पोट्टिलाए य पासाओ तं विणिहायमावन्नियं दारियं गेण्हति ता उत्तरिज्जेणं पिहेति ता अंतेउरस्स अवदारेणं अणुपविसति ता जेणेव पउमावती देवी तेणेव उवा० ता पउमावतीए देवीए पासे ठावेति ता जाव पडिनिग्गते, तते णं तीसे पउमावतीए अंगपडियारियाओ पउमावइं देविं विणिहायमावन्नियं च दारियं पयायं पासंति ता जेणेव कणगरहे राया तेणेव उवा० ता करयल० एवं व०-एवं खलु सामी! पउमावती देवी मइल्लियं दारियं पयाया, तते णं कणगरहे राया तीसे मइल्लियाए दारियाए नीहरणं करेति बहूणि लोइयाइं मयकिच्चाइं० कालेणं विगयसोए जाते, तते णं से तेतलि-पुत्ते कट्ठे कोडुंबियपुरिसे सदावेति ता एवं व०-खिप्पामेव चारगसो० जाव ठितिपडियं जम्हा णं अम्हं एस दारए कणगरहस्स रज्जे जाए तं होउ णं दारए नामेणं कणगज्जए जाव भोगसमत्थे जाते । १०३। तते णं सा पोट्टिला अन्नया कयाई तेतलिपुत्तस्स अणिट्टा० जाया यावि होत्था णेच्छइ य तेयलिपुत्ते पोट्टिलाए नामगोत्तमवि सवणयाए किं पुण दरिसणं वा परिभोगं वा?, तते णं तीसे पोट्टिलाए अन्नया कयाई पुव्वरत्त० इमेयारूवे० जाव समुप्पज्जित्था-एवं खलु अहं तेतलिस्स पुब्बिं इट्टा० आसि इयाणिं अणिट्टा० जाया नेच्छइ य तेय-लिपुत्ते मम नामं जाव परिभोगं वा ओहयमणसंकप्पा जाव झियायति, तए णं तेतलिपुत्ते पोट्टिलं ओहयमणसंकप्पं जाव झियायमाणिं पासति ता एवं व०-मा णं तुमं दे०! ओहयम-णसं० तुमं णं मम महाणसंसि विपुलं असणं ४ उवक्खडावेहि ता बहूणं समणमाहणजाववणीमगाणं देयमाणी य दवावेमाणी य विहराहि, तते णं सा पोट्टिल्ला तेयलिपुत्तेणं एवं वुत्ता समाणा हट्ट० तेयलिपुत्तस्स एयमट्टं पडिसुणेति ता कल्लकल्लिं महाणसंसि विपुलं असणं० जाव दवावेमाणी विहरति । १०४। तेणं कालेणं० सुव्वयाओ नामं अज्जाओ ईरियासमिताओ जाव गुत्तबंभयारिणीओ बहुस्सुयाओ बहुपरिवाराओ पुव्वानुपुब्बिं जेणामेव तेयलिपुरे नयरे तेणेव उवा० ता अहापडिरूवं उग्गहं उग्गिण्हंति ता संजमेण तवसा अप्पाणं भावेमाणीओ विह-रंति, तते णं तासिं सुव्वयाणं अज्जाणं एगे संघाडए पढमाए पोरसीए सज्जायं करेति जाव अडमाणीओ तेतलिस्स गिहं अणुपविट्टाओ, तते णं सा पोट्टिला ताओ अज्जाओ एज्जमाणीओ पासति ता हट्ट० आसणाओ अब्भुट्ठेति ता वंदति नमंसति ता विपुलं असणं ४ पडिलाभेति ता एवं व०-एवं खलु अहं अज्जाओ! तेयलिपुत्तस्स पुब्बिं इट्टा० आसी इयाणिं अणिट्टा० जाव दंसणं वा परिभोगं वा०, तं तुम्हे णं अज्जातो सिक्खियाओ बहुनायाओ बहुपडियाओ बहूणि गामागर जाव आहिंडह बहूणं राईसर जाव गिहातिं अणुपविसह तं अत्थि याइं भे (प्र० भो) अज्जाओ! केई कहंचि चुन्नजोए वा मंतजोगे वा कम्मण (प्र० कम्म)जोए वा हियउड्डावणे वा काउड्डावणे वा आभिओगिए वा वसीकरणे वा कोउयकम्मे वा भूइ० मूले कंदे छल्ली वल्ली सिलिया वा गुलिया वा ओसहे वा भेसज्जे वा उवल्लपुव्वे जेणाहं तेयलिपुत्तस्स पुणरवि इट्टा० भवेज्जामि?, तते णं ताओ अज्जाओ पोट्टिलाए एवं वुत्ताओ समा-णीओ दोवि कप्पे ठाइंति ता पोट्टिलं एवं वदासी-अम्हे णं देवा०! समणीओ निग्गंथीओ जाव गुत्तबंभचारिणीओ नो खलु कप्पइ अम्हे एयप्पयारं कप्पेहिवि णिसामेत्तए, किमंग पुण उवदिसित्तए वा आयरित्तए वा?, अम्हे णं तव देवा०! विचित्तं केवलपन्नत्तं धम्मं पडिकहिज्जामो, तते णं सा पोट्टिला ताओ अज्जाओ एवं व०-इच्छामि णं अज्जाओ! तुम्हं अंतिए केवलपन्नत्तं धम्मं निसामित्तए, तते णं ताओ अज्जाओ पोट्टिलाए विचित्तं धम्मं परिकहेति, तते णं सा पोट्टिला धम्मं सोच्चा निसम्म हट्ट० एवं व०-सहहामि णं अज्जाओ! निग्गंथं पावयणं जाव से जहेयं तुम्हे वयह, इच्छामि णं अहं तुम्हं अंतिए पंचाणुव्वयाइं जाव धम्मं पडिवज्जित्तए, अहासुहं, तए णं सा पोट्टिला तासिं अज्जाणं अंतिए पंचाणुव्वयं जाव धम्मं

पडिवज्जइ ताओ अज्जाओ वंदति नमंसति ता पडिविसज्जेति, तए णं सा पोद्विला समणोवासिया जाया जाव पडिलाभेमाणी विहरइ । १०५ । तते णं तीसे पोद्विलाए अन्नया कयाई पुव्वरत्तावरत्तकालस० कुटुंबजागरियं० अयमेयारूवे अब्भत्थिते० एवं खलु अहं तेतलि० पुव्विं इट्ठा० आसि इयाणिं अणिट्ठा० जाव परिभोगं वा तं सेयं खलु मम सुव्वयाणं अज्जाणं अंतिए पव्वतित्तए, एवं संपेहेति ता कल्लं पाउ० जेणेव तेतलिपुत्ते तेणेव उवा० ता करयलपरि० एवं व०-एवं खलु देवाणुप्पिया ! मए सुव्वयाणं अज्जाणं अंतिए धम्मं णिसंते जाव अब्भ-
 णुन्नाया पव्वइत्तए, तते णं तेयलिपुत्ते पोद्विलं एवं व०-एवं खलु तुमं देवाणुप्पिए ! मुंडा पव्वइया समाणी कालमासे कालं किच्चा अन्नतरेसु देवलोएसु देवत्ताए उववज्जिहिसि तं जति णं तुमं देवा० ! मम ताओ देवलोयाओ आगम्म केवलपन्नत्ते धम्मं बोहिहि तोऽहं विसज्जेमि, अहं णं तुमं ममं ण संबोहेसि तो ते ण विसज्जेमि, तते णं सा पोद्विला तेयलिपुत्तस्स एयमट्ठं पडिसुणेति, तते णं तेयलिपुत्ते विपुलं असणं० उवक्खडावेति ता मित्तणातिजाव आमंतेइ ता जाव सम्माणेइ ता पोद्विलं ण्हायं जाव पुरिससहस्सवाहणीयं सीअं दुरूहित्ता मित्तणातिजावपरिवुडे सव्विड्ढिए जाव रवेणं तेतलीपुरस्स मज्झमज्झेणं जेणेव सुव्वयाणं उवस्सए तेणेव उवा० ता सीयाओ पच्चोरुहति ता पोद्विलं पुरतो कट्टु जेणेव सुव्वया अज्जा तेणेव उवागच्छति ता वंदति नमंसति ता एवं व०-एवं खलु देवा० ! मम पोद्विला भारिया इट्ठा० एस णं संसारभउव्विग्गा जाव पव्वतित्तए पडिच्छंतु णं देवा० ! सिस्सिणिभिक्खं दल-
 यामि, अहासुहं मा० प०, तते णं सा पोद्विला सुव्वयाहिं अज्जाहिं एवं वुत्ता समाणा हट्ठ० उत्तरपुर० सयमेव आभरणमल्लालंकारं ओमुयति ता सयमेव पंचमुट्ठियं लोयं करेइ ता जेणेव सुव्वयाओ अज्जाओ तेणेव उवागच्छइ ता वंदति नमंसति ता एवं व०-आलिच्चे णं भंते ! लोए एवं जहा देवाणंदा जाव एक्कारस अंगाई बहूणि वासाणि सामन्नपरियागं पाउणइ ता मासियाए संलेहणाए अत्ताणं झोसेत्ता सट्ठिं भत्ताइं अण० आलोइयपडि० समाहिपत्ता कालमासे कालं किच्चा अन्नतरेसु देवलोएसु देवत्ताए उववन्ना । १०६ । तते णं से कणगरहे राया अन्नया कयाई कालधम्मणा संजुत्ते यावि होत्था, तते णं राईसर जाव णीहरणं करेति ता अन्नमन्नं० एवं व०-एवं खलु देवाणु० ! कणगरहे राया रज्जे य जाव पुत्ते वियंगित्था, अम्हे णं देवा० ! राया-
 हीणा रायाहिट्ठिया रायाहीणकज्जा अयं च णं तेतली अमच्चे कणगरहस्स रन्नो सव्वट्ठाणेसु सव्वभूमियासु लद्धपच्चए दिन्नवियारे सव्वकज्जवट्ठावए यावि होत्था, तं सेयं खलु अम्हं तेतलिपुत्तं अ-
 मच्चं कुमारं जातित्तएत्तिकट्टु अन्नमन्नस्स एयमट्ठं पडिसुणेति ता जेणेव तेयलिपुत्ते अमच्चे तेणेव उवा० ता तेयलिपुत्तं एवं व०-एवं खलु देवाणु० ! कणगरहे राया रज्जे य रट्ठे य जाव वियंगेइ, अम्हे य णं देवाणु० ! रायाहीणा जाव रायाहीणकज्जा, तुमं च णं देवा० ! कणगरहस्स रन्नो सव्वट्ठाणेसु जाव रज्जधुराचित्तए, तं जइ णं देवाणु० ! अत्थि केई कुमारे रायलक्खणसंपन्ने अभिसे-
 यारिहे तण्णं तुमं अम्हे दलाहि जा णं अम्हे महया २ रायाभिसेएणं अभिसिंचामो, तए णं तेतलिपुत्ते तेसिं ईसर० एतमट्ठं पडिसुणेति ता कणगज्झयं कुमारं ण्हायं जाव सस्सिरीयं करेइ ता तेसिं ईसर जाव उवणेति ता एवं व०-एस णं देवा० ! कणगरहस्स रन्नो पुत्ते पउमावतीए देवीए अत्तए कणगज्झए नामं कुमारे अभिसेयारिहे रायलक्खणसंपन्ने मए कणगरहस्स रन्नो रह-
 स्सिययं संवड्ढिए, एयं णं तुम्हे महया २ रायाभिसेएणं अभिसिंचह, सव्वं च तेसिं उट्ठाणपरियावणियं परिकहेइ । तते णं ते ईसर० कणगज्झयं कुमारं महया २ अभिसिंचति, तते णं से कणग-
 ज्झए कुमारे राया जाए महया हिमवंतमलय० वण्णओ जाव रज्जं पसासेमाणे विहरइ । तते णं सा पउमावती देवी कणगज्झयं रायं सदावेति ता एवं व०-एस णं पुत्ता ! तव० रज्जे जाव अंतेउरे य० तुमं च तेतलिपुत्तस्स अमच्चस्स पहावेणं, तं तुमं णं तेतलिपुत्तं अमच्चं आढाहि परिजाणाहि सक्कारेहि सम्माणेहि इंतं अब्भुट्ठेहि ठियं पज्जुवासाहि वच्चंतं पडिसंसाहेहि अद्दासणेणं उव-
 णिमंतेहि भोगं च से अणुवड्ढेहि, तते णं से कणगज्झए पउमावतीए तहत्ति पडि० जाव भोगं च से वड्ढेति । १०७ । तते णं से पोद्विले देवे तेतलिपुत्तं अभिक्खणं २ केवलपन्नत्ते धम्मं संबोहेति, नो चेव णं से तेतलिपुत्ते संबुज्झति, तते णं तस्स पोद्विलदेवस्स इमेयारूवे अब्भत्थिते०-एवं खलु कणगज्झए राया तेयलिपुत्तं आढाति जाव भोगं च संवड्ढेति, तते णं से तेतली अभिक्खणं २ संबोहिज्जमाणेवि धम्मं नो संबुज्झति तं सेयं खलु कणगज्झयं तेतलिपुत्तातो विप्परिणामेत्तएत्तिकट्टु एवं संपेहेति ता कणगज्झयं तेतलिपुत्तातो विप्परिणामेइ ।
 तते णं तेतलिपुत्ते कल्लं ण्हाते जाव पायच्छित्ते आसखंधवरगए बहूहिं पुरिसेहिं सट्ठिं संपरिवुडे सातो गिहातो निग्गच्छति ता जेणेव कणगज्झए राया तेणेव पहारेत्थ गमणाए, तते णं तेतलिपुत्तं अमच्चं जे जहा बहवे राईसरतलवरजाव पभियओ पासंति ते तहेव आढायंति परिजाणंति अब्भुट्ठेति ता अंजलिपरिग्गहं करेति इट्ठाहिं कंताहिं जाव वग्गूहिं आलवेमाणा य संलवेमाणा य पुरतो य पिट्ठतो य पासतो य मग्गतो य समणुगच्छंति, तते णं से तेतलिपुत्ते जेणेव कणगज्झए तेणेव उवागच्छति, तते णं कणगज्झए तेतलिपुत्तं एज्जमाणं पासति ता नो आढाति नो परियाणाति नो अब्भुट्ठेति अणाढायमाणे० परम्मूहे संचिट्ठति, तते णं तेतलिपुत्ते कणगज्झयस्स रन्नो अंजलिं करेइ, तते णं से कणगज्झए राया अणाढायमाणे तुसिणीए परम्मूहे संचिट्ठति, तते णं तेतलिपुत्ते कणगज्झयं विप्परिणयं जाणित्ता भीते जाव संजातभए एवं व०-रुट्ठे णं ममं कणगज्झए राया हीणे मम कणगज्झए राया अव(दु-

पा०) ज्झाए णं कणगज्झए, तं ण नज्झइ णं मम केणइ कुमारेण मारेहितित्तिकट्टु भीते तत्थे य जाव सणियं २ पच्चोसकेति ता तमेव आसखं दुल्लहेति ता तेतलिपुरं मज्झमज्झेणं जेणेव सए गिहे तेणेव पहारेत्थ गमणाए, तते णं तेयलिपुत्तं जे जहा ईसर जाव पासंति ते तहा नो आढायंति नो परियाणंति नो अम्भुट्टेति नो अंजलि० इट्ठाहिं जाव णो संलवंति नो पुरओ य पिट्ठओ य पासओ य (मग्गतो य) समणुगच्छंति, तते णं तेतलिपुत्ते जेणेव सए गिहे तेणेव उवागच्छति, जावि य से तत्थ बाहिरिया परिसा भवति. तं०-दासेति वा पेसेति वा भाइएति वा सावि य णं नो आढाइ०, जाविय से अम्भितरिया परिसा भवति, तं०-पियाइ वा माताति वा जाव सुण्हाति वा साविय णं वा नो आढाइ०. तते णं से तेतलिपुत्ते जेणेव वासघरे जेणेव सए सयणिज्जे तेणेव उवागच्छति ता सयणिज्जं सि णिसीयति ता एवं व०-एवं खलु अहं सयातो गिहातो निग्गच्छामि तं चेव जाव अम्भितरिया परिसा नो आढाति नो परियाणाति नो अम्भुट्टेति. तं सेयं खलु मम अप्पाणं जीवियातो ववरोवित्तएत्तिकट्टु एवं संपेहेति ता तालउडं विसं आसगंसि पक्खिवति से य विसे णो संकमति, तते णं मे तेतलिपुत्ते नीलुप्पल जाव असिं खंधे ओहरति, तत्थवि य से धारा ओपट्ठा (प्र० ओइल्ला). तते णं से तेतलिपुत्ते जेणेव असोगवणिया तेणेव उवागच्छति ता पासगं गीवाए बंधति ता रुक्खं दुल्लहति ता पासं रुक्खे बंधति ता अप्पाणं मुयति तत्थवि य से रज्जू लिन्ना, तते णं से तेतलिपुत्ते महतिमहालयं सिलं गीवाए बंधति ता अत्थाहमतारमपोरिसियंसि उदगंसि अप्पाणं मुयति, तत्थवि से थाहे जाते. तते णं से तेतलि० सुक्कंसि तणकुटंसि अगणिकायं पक्खिवति ता अप्पाणं मुयति तत्थविय से अगणिकाए विज्झाए. तते णं से तेतली एवं व०-सद्धेयं खलु भो समणा वयंति सद्धेयं खलु भो माहणा वयंति सद्धेयं खलु भो समणा माहणा वयंति. अहं एगो असद्धेयं वयामि. एवं खलु अहं सह पुत्तेहिं अपुत्ते को मेदं सहहिस्सति? सह मित्तेहिं अमित्ते को मेदं सहहिस्सति? एवं अत्थेणं दारेणं दासेहिं परिजणेणं, एवं खलु तेयलिपुत्ते णं अ० कणगज्झएणं रत्ता अवज्झाएणं समाणेणं तेयलिपुत्ते तालपुडगे विसे आसगंसि पक्खित्ते सेविय णो कमति को मेयं सहहिस्सति?, तेतलिपुत्ते नीलुप्पल जाव खंधंसि ओहरिए तत्थविय से धारा ओपट्ठा (प्र० ओइल्ला) को मेदं सहहिस्सति?. तेतलिपुत्तस्स पासगं गीवाए बंधेत्ता जाव रज्जू लिन्ना को मेदं सहहिस्सति?. तेतलिपुत्ते महासिलयं जाव बंधित्ता अत्थाह जावउदगंसि अप्पा मुक्के तत्थविय णं थाहे जाए को मेयं सहहिस्सति?, तेतलिपुत्ते सुक्कंसि तणकुडे अग्गी विज्झाए को मेदं सहहिस्सति?. ओहतमणसंकप्पे जाव झियाइ. तते णं से पोट्टिले देवे पोट्टिलारूवं विउच्चति ता तेतलिपुत्तस्स अदूर-सामंते ठिच्चा एवं व०-हंभो! तेतलिपुत्ता! पुरतो पवाए पिट्ठओ हत्थिभयं दुहओ अचक्खुफासे मज्झे सरा णिवयंति गामे पलित्ते रत्ते झियाति रन्ने पलित्ते गामे झियाति आउसो! तेतलिपुत्ता! कओ वयामो?. तते णं से तेतलिपुत्ते पोट्टिलं एवं वयासी-भीयस्स खलु भो! पव्वज्जा सरणं उक्कट्टियस्स सहेसगमणं छुहियस्स अन्नं तिसियस्स पाणं आउरस्स भेसज्जं माइयस्स रहस्सं अभिजुत्तस्स पच्चयकरणं अद्धानपरिसंतस्स वाहणगमणं तरिउकामस्स पवहणं किच्चं परं अभिओजितुकामस्स सहायकिच्चं खंतस्स दंतस्स जित्तिदियस्स एत्तो एगमवि ण भवति. तते णं से पोट्टिले देवे तेयलिपुत्तं अमच्चं एवं व०-सुट्ठु २ णं तुमं तेतलिपुत्ता! एयमट्ठं आयाणिहित्तिकट्टु दोच्चं पि तच्चं पि एवं वयइ ता जामेव दिसिं पाउब्भूए तामेव दिसिं पडिगए । १०८। तते णं तस्स तेतलिपुत्तस्स सुभेणं परिणामेणं जाइसरणे समुप्पन्ने. तते णं तस्स तेयलिपुत्तस्स अयमेयारूदे अम्भत्थिते० समु०-एवं खलु अहं इहेव जंबुदीवे २ महाविदेहे वासे पोक्खलावतीविजये पोंडरीणिणीते रायहाणीए महापउमे नामं राया होत्था, तते णं अहं थेराणं अंतिए मुंडे भवित्ता जाव चोहस पुट्ठातिं० बहूणि वासाणि सामन्नपरियाए मासियाए संलेहणाए महासुक्के कप्पे देवे. तते णं अहं ताओ देवलोयाओ आउक्खएणं० इहेव तेयलिपुरे तेयलिस्स अमच्चस्स भदाए भारियाए दारगत्ताए पच्चायाते तं सेयं खलु मम पुट्ठादिट्ठाइं महब्रयाइं सयमेव उवसंपज्जित्ताणं विहरित्तए. एवं संपेहेति ता सयमेव महब्रयाइं आरुहेति ता जेणेव पमयवणे उज्जाणे तेणेव उवा० ता असोगवरपायवस्स अहे पुट्ठीसिलापट्टयंसि सुहनिसन्नस्स अणुचित्तमाणस्स पुट्ठाहीयाति सामाइयमातियाइं चोहसपुट्ठाइं सयमेव अभिसमन्नागयाइं. तते णं तस्स तेयलिपुत्तस्स अणगारस्स सुभेणं परिणामेणं जाव तयावगणिज्जाणं कम्माणं खओवसमेणं कम्मरयविकरणकरं अपुव्वकरणं पविट्ठस्स केवलवरणाणदंसणे समुप्पन्ने । १०९। तए णं तेतलिपुरे नगरे अहासन्निहिहिएहिं वाणमंतरेहिं देवेहिं देवीहि य देवदुंदुभीओ समाहयाओ दसद्ववन्ने कुसुमे निवाइए दिव्वे गीयगंधवनिनाए कए यावि होत्था, तते णं से कणगज्झए गया इमीसे कहाए लद्धट्टे एवं व०-एवं खलु तेतली मए अवज्झाते मुंडे भवित्ता पव्वतिते तं गच्छामि णं तेयलिपुत्तं अणगारं वंदामि नमंसामि ता एयमट्ठं विणएणं भुज्जो २ खामेमि. एवं संपेहेति ता ण्हाए चाउरंगिणीए सेणाए जेणेव पमयवणे उज्जाणे जेणेव तेतलिपुत्ते अणगारे तेणेव उवागच्छति ता तेतलिपुत्तं अणगारं वंदति नमंसति ता एयमट्ठं च विणएणं भुज्जो २ खामेइ नच्चासन्ने जाव पज्जुवासइ. तते णं से तेयलिपुत्ते अणगारे कणगज्झयस्स रन्नो तीसे य महइ० धम्मं परिकहेइ, तते णं से कणगज्झए राया तेतलिपुत्तस्स केवलस्स अंतिए धम्मं सोच्चा णिसम्म पंचाणुव्वइयं सत्तसिक्खावइयं सावगधम्मं पडिवज्झइ ता समणोवासए जाते जाव अहिगयजीवाजीवे, तते णं तेतलिपुत्ते केवली बहूणि वासाणि केवलपरियागं पाउणित्ता जाव सिद्धे। एवं खलु जंबू! भग- (११५)

वया समणेणं महावीरेणं चोदसमस्स नायज्झयणस्स अयमट्ठे पन्नत्तेत्तिबेमि । ११० ॥ इति तेतलिपुत्तज्झयणं १४ ॥ जति णं भंते ! चोदसमस्स नायज्झयणस्स अयमट्ठे पण्णत्ते पन्न-
रसमस्स० के अट्ठे पन्नत्ते ? , एवं खलु जंबू ! तेणं कालेणं० चंपा नाम नयरी होत्था, पुन्नभदे चेइए जियसत्तू राया, तत्थ णं चंपाए नयरीए धण्णे णामं सत्थवाहे होत्था अइठे जाव
अपरिभूए, तीसे णं चंपाए नयरीए उत्तरपुरच्छिमे दिसिभाए अहिच्छत्ता नाम नयरी होत्था, रिद्धत्थिमियसमिद्धा वन्नओ, तत्थ णं अहिच्छत्ताए नयरीए कणगकेउ नामं राया
होत्था, महया वन्नओ, तस्स धण्णस्स सत्थवाहस्स अन्नदा कदाई पुव्वरत्तावरत्तकालसमयंसि इमेयारूवे अब्भत्थिते चित्तिए पत्थिए मणोगए संकप्पे समुप्पज्जित्था-सेयं खलु मम
विपुलं पणियभंडमायाए अहिच्छत्तं नगरं वाणिज्जाए गमित्तए, एवं संपेहेति ता गणिमं च० चउव्विहं भंडं गेण्हइ ता सगडीसागडं सज्जेइ ता सगडीसागडं भरेति ता कोडुंबियपुरिसे
सदावेति ता एवं व०-गच्छह णं तुब्भे देवा० ! चंपाए नगरीए सिंघाडगजावपहेसु० एवं खलु देवाणु० ! धण्णे सत्थवाहे विपुलं पणिय० इच्छति अहिच्छत्तं नगरं वाणिज्जाए गमित्तते,
तं जो णं देवाणु० ! चरए वा चीरिए वा चम्मखंडिए वा भिच्छुंडे वा पंडुरगे वा गोतमे वा गोवतीते वा गिहिधम्मं वा गिहिधम्मचित्तए वा अविरुद्धविरुद्धवुड्ढसावगरत्तपडनिग्गंथप्पभि-
ति पासंडत्थे वा गिहत्थे वा तस्स णं धण्णेणं सद्धिं अहिच्छत्तं नगरं गच्छइ तस्स णं धण्णे अच्छत्तगस्स छत्तं दलाइ अणुवाहणस्स उवाहणाउ दलयइ अकुंडियस्स कुंडियं दलयइ
अपत्थयणस्स पत्थयणं दलयइ अपक्खेवगस्स पक्खेवं दलयइ अंतराऽविय से पडियस्स वा भग्ग० लुग्ग० साहेज्जं दलयति सुहंसुहेण य अहिच्छत्तं संपावेतित्तिकट्ठु दोच्चं पि तच्चं पि घोसेह
ता मम एयमाणत्तियं पच्चप्पिणह, तते णं ते कोडुंबियपुरिसा जाव एवं व०-हंदि सुणंतु भगवंतो चंपानगरीवत्थवा बहवे चरगा य जाव पच्चप्पिणंति, तते णं से कोडुंबियघोसणं सुच्चा
चंपाए नयरीए बहवे चरगा य जाव गिहत्था य जेणेव धण्णे सत्थवाहे तेणेव उवागच्छन्ति तते णं धण्णे तेसिं चरगाण य जाव गिहत्थाण य अच्छत्तगस्स छत्तं दलयइ जाव पत्थयणं
दलाति, गच्छह णं तुब्भे देवाणुप्पिया ! चंपाए नयरीए बहिया अग्गुज्जाणंसि ममं पडिवालेमाणा चिट्ठह, तते णं चरगा य० धण्णेणं सत्थवाहेणं एवं वृत्ता समाणा जाव चिट्ठंति, तते
णं धण्णे सत्थवाहे सोहणंसि तिहिकरणनक्खत्तंसि विपुलं असणं० उवक्खडावेइ ता मित्तनाइ० आमंतेति ता भोयणं भोयावेति ता सगडीसागडं जोयावेति ता चंपानगरीओ निग्ग-
च्छति णाइविप्पगिट्ठेहिं अद्धानेहिं वसमाणे २ सुहेहिं वसहिपायरासेहिं अंगं जणवयं मज्झमज्झेणं जेणेव देसग्गं तेणेव उवागच्छति ता सगडीसागडं मोयावेति ता मत्थणिवेसं करेति
कोडुंबियपुरिसे सदावेति ता एवं व०-तुब्भे णं देवा० ! मम सत्थनिवेसंसि महया २ सहेणं उग्घोसेमाणा २ एवं वदह-एवं खलु देवाणु० ! इमीसे आगामियाए छिन्नावायाए दीहमद्वाए
अडवीए बहुमज्झदेसभाए बहवे णंदिफला नामं रुक्खा पं० किण्हा जाव पत्तिया पुप्फिया फलिया हरियरेरिज्जमाणा सिरीए अईव २ उवसोभेमाणा चिट्ठंति मणुण्णा वन्नेणं जाव
मणुन्ना फासेणं मणुन्ना छायाए, तं जो णं देवाणुप्पिया ! तेसिं नंदिफलाणं रुक्खाणं मूलाणि वा कंदा तथा पत्ता पुप्फा फला वीयाणि वा हरियाणि वा आहारेति छायाए वा वीसमंति
तस्स णं आवाए भद्दए भवति ततो पच्छा परिणममाणा २ अकाले चेव जीवियातो ववरोवेति, तं मा णं देवाणुप्पिया ! केई तेसिं नंदिफलाणं मूलाणि वा जाव छायाए वा वीसमउ, मा
णं सेऽवि अकाले चेव जीवियातो ववरोविज्जिस्सति, तुब्भे णं देवाणु० ! अन्नेसिं रुक्खाणं मूलाणि य जाव हरियाणि य आहारेथ छायासु वीसमहत्ति घोसणं घोसेह जाव पच्चप्पिणंति,
तते णं धण्णे सत्थवाहे सगडीसागडं जोएति ता जेणेव नंदिफला रुक्खा तेणेव उवागच्छति ता तेसिं नंदिफलाणं अदूरसामंते सत्थणिवेसं करेति ता दोच्चं पि तच्चं पि कोडुंबियपुरिसे
सदावेति ता एवं व०-तुब्भे णं देवाणु० ! मम सत्थनिवेसंसि महता सहेणं उग्घोसेमाणा २ एवं वयह-एए णं देवाणु० ! ते णंदिफला किण्हा जाव मणुन्ना छायाए तं जो णं देवाणु० !
एएसिं णंदिफलाणं रुक्खाणं मूलाणि वा कंदा पुप्फा तथा पत्ता फला जाव अकाले चेव जीवियाओ ववरोवेति, तं मा णं तुब्भे जाव दूरंदूरेणं परिहरमाणा वीसमह, मा णं अकाले
जीवित्तातो ववरोविस्संति, अन्नेसिं रुक्खाणं मूलाणि य जाव वीसमहत्तिकट्ठु घोसणं पच्चप्पिणंति, तत्थ णं अत्थेगइया पुरिसा धण्णस्स सत्थवाहस्स एयमट्ठं सहहंति जाव रोयंति एय-
मट्ठं सहहमाणं० तेसिं नंदिफलाणं दूरंदूरेण परिहरमाणा २ अन्नेसिं रुक्खाणं मूलाणि य जाव वीसमंति, तेसिं णं आवाए नो भद्दए भवति, ततो पच्छा परिणममाणा २ सुहरूवत्ताए०
भुज्जो २ परिणमंति, एवामेव समणाउसो ! जो अम्हं निग्गंथो वा जाव पंचसु कामगुणेषु नो सज्जेति नो रज्जेति० से णं इहभवे चेव बहूणं समणाणं० अच्चणिज्जे० परलोए नो आगच्छति
जाव वीतीवतिस्सति, तत्थ णं जे से अप्पेगतिया पुरिसा धण्णस्स एयमट्ठं नो सहहंति० धण्णस्स एतमट्ठं असहहमाणा० जेणेव ते नंदिफला तेणेव उवागच्छंति तेसिं नंदिफलाणं मूलाणि
य जाव वीसमंति तेसिं णं आवाए भद्दए भवति ततो पच्छा परिणममाणा जाव ववरोवेति, एवामेव समणाउसो ! जो अम्हं निग्गंथो वा निग्गंथी वा पव्वतिए पंचसु कामगुणेषु सज्जे-
ति जाव अणुपरियट्ठिस्सति जहा व ते पुरिसा, तते णं से धण्णे सगडीसागडं जोयावेति ता जेणेव अहिच्छत्ता नगरी तेणेव उवागच्छति ता अहिच्छत्ताए नयरीए बहिया अग्गुज्जाणे

४६१ ज्ञातधर्मकथांगं, ३५२१२१०१-१५

मुनि दीपरत्तसागर

सत्यनिवेसं करेति ता सगडीसागडं मोयावेइ, तए णं से धण्णे सत्यवाहे महत्थं० रायरिहं पाहुडं गेण्हइ ता बहुपुरिसेहिं सद्धिं संपरिवुडे अहिच्छत्तं नयरं मज्झमज्झेणं अणुप्पविसइ जेणेव कणगकेऊ राया तेणेव उवागच्छति करयल जाव वद्धावेइ, तं महत्थं० पाहुडं उवणेइ, तए णं से कणगकेऊ राया हट्टुट्टु० धण्णस्स सत्यवाहस्स तं महत्थं० जाव पडिच्छइ ता धण्णं सत्यवाहं सक्कारेइ सम्माणेइ ता उस्सुकं वियरति ता पडिविसजेइ भंडविणिमयं करेइ ता पडिभंडं गेण्हति ता सुहंसुहेणं जेणेव चंपानयरी तेणेव उवागच्छति ता मित्तनाति० अभिसमन्नागते विपुलाइं माणुस्सगाइं जाव विहरति, तेणं कालेणं० थेरागमणं धण्णे धम्मं सोच्चा जेट्टपुत्तं कुडुंबे ठावेत्ता पव्वइए एक्कारस सामाइयाइयातिं अंगातिं बहूणि वासाणि जाव मासियाए सं० अन्नतरेसु देवलोएसु देवत्ताए उववन्ने महाविदेहे वासे सिज्झिहिति जाव अंतं करेति, एवं खलु जंबू ! समणेणं भगवया महावीरेणं पन्नरसमस्स नायज्झयणस्स अयमट्ठे पण्णत्तेत्तिबेमि । ११ ॥ इति नंदिफलज्झयणं १५ ॥ जति णं भंते ! म० भ० म० पन्नरसमस्स नायज्झयणस्स अयमट्ठे प० सोलसमस्स णं नायज्झयणस्स णं सम० भग० महा० के अट्ठे पं०?, एवं खलु जंबू ! तेणं कालेणं० चंपा नाम नयरी होत्था, तीसे णं चंपाए नयरीए बहिया उत्तरपुरच्छिमे दिमिभाए सुभूमिभागे उज्जाणे होत्था, तत्थ णं चंपाए नयरीए तओ माहणा भातरो परिवसंति, तं०-सोमे सोमदत्ते सोमभूती अड्ढा जाव रिउब्बेद जाव सुपरिनिट्ठिया, तेसिं णं माहणाणं तओ भारियातो होत्था, तं०-नागसिरी भूयसिरी जक्खसिरी सुकुमाल जाव तेसिं णं माहणाणं इट्ठाओ० विपुले माणुस्सए जाव विहरंति, तते णं तेसिं माहणाणं अन्नया कयाइ एगयओ समुवागयाणं जाव इमेयारूवे मिहो कहासमुल्लावे समुप्प-जित्था-एवं खलु देवाणुप्पिया ! अम्हं इमे विपुले धणे जाव सावतेज्जे अल्लाहि जाव आसत्तमाओ कुलवंसाओ पकामं दाउं पकामं भोत्तुं पकामं परिभाएउं तं सेयं खलु अम्हं देवाणु० अन्नमन्नस्स गिहेसु कल्लाकल्लिं विपुलं असणं० उवक्खडेउं २ परिभुंजमाणाणं विहरित्तए, अन्नमन्नस्स एयमट्ठं पडिसुणेंति, कल्लाकल्लिं अन्नमन्नस्स गिहेसु विपुलं असणं० उव-क्खडावेति ता परिभुंजमाणा विहरंति, तते णं तीसे नागसिरीए माहणीए अन्नदा भोयणवारए जाते यावि होत्था, तते णं सा नागसिरी विपुलं असणं ४ उवक्खडेति ता एगं महं सालतियं तित्तालाउअं बहुसंभारसंजुत्तं नेहावगाढं उवक्खडावेति, एगं बिंदुयं करयलंसि आसाएइ तं खारं कडुयं अक्खज्जं अभोज्जं विसम्भूयं जाणित्ता एवं व०-धिरत्थु णं मम नाग-सिरीए अहन्नाए अपुण्णाए दूभगाए दूभगसत्ताए दूभगणिबोलियाए जीए णं मए सालइए बहुसंभारसंभिए नेहावगाढे उवक्खडिए सुबहुदक्खवएणं, नेहक्खए य कए, तं जति णं मम जाउयाओ जाणिस्संति तो णं मम खिसिस्संति तं जावताव मम जाउयाओ ण जाणंति ताव मम मेयं एयं सालतियं तित्तालाउ बहुसंभारणेहकयं एगंते गोवेत्तए अन्नं सालइयं महुरा-लाउयं जाव नेहावगाढं उवक्खडेत्तए, एवं संपेहेति ता तं सालतियं जाव गोवेइ, अन्नं सालतियं महुरालाउयं उवक्खडेइ, तेसिं माहणाणं ण्हायाणं जाव सुहासणवरगयाणं तं विपुलं असणं० परिवेसेति, तते णं ते माहणा जिमित्तभुत्तुत्तरागया समाणा आयंता चोक्खा परमसुइभूया मकम्मसंपउत्ता जाया यावि होत्था, तते णं ताओ माहणीओ ण्हायाओ जाव विभू-सियाओ तं विपुलं असणं० आहारेंति ता जेणेव मयाइं २ गेहाइं तेणेव उवा० ता सककम्मसंपउत्तातो जायातो । ११२ । तेणं कालेणं० धम्मघोसा नाम थेरा बहुपरिवारा जेणेव चंपा नामं नगरी जेणेव सुभूमिभागे उज्जाणे तेणेव उवा० ता अहापडिरूवं जाव विहरंति, परिसा निग्गया, धम्मो कहिओ, परिसा पडिगया, तए णं तेसिं धम्मघोसाणं थेराणं अंतेवासी धम्मरूई नाम अणगारे ओराले जाव तेउलेस्से मासंमासेणं खममाणे विहरति, तते णं से धम्मरूई अणगारे मासखमणपारणगंमि पढमाए पोरिसीए सज्झायं करेइ ता बीयाए पोर-सीए एवं जहा गोयमसामी तहेव उग्गाहेति ता तहेव धम्मघोसं थेरं आपुच्छइ जाव चंपाए नयरीए उच्चनीयमज्झिमकुलाइं जाव अट्ठमाणे जेणेव नागसिरीए माहणीए गिहे तेणेव अणुपविट्ठे, तते णं सा नागसिरी माहणी धम्मरूई एज्जमाणं पासति ता तस्स सालइयस्स तित्तकडुयस्स बहु० नेहा० निसिरणट्ठयाए हट्टुट्टा उट्ठेति ता जेणेव भत्तघरे तेणेव उवा० ता तं सालतियं तित्तकडुयं च बहु० नेह० धम्मरूईस्स अणगारस्स पडिग्गहंमि सद्धमेव निमिग्गइ, तते णं से धम्मरूई अणगारे अहापज्जत्तमित्तकट्टु नागसिरीए माहणीए गिहातो पडि-निक्खमति ता चंपाए नगरीए मज्झमज्झेणं पडिनिक्खमति ता जेणेव सुभूमिभागे उज्जाणे तेणेव उवागच्छति ता जेणेव धम्मघोसा थेरा तेणेव उवागच्छइ ता धम्मघोसस्स अदूर-सामंते अन्नपाणं पडिदंसेइ ता अन्नपाणं पडिलेहेइ ता अन्नपाणं करयलंसि पडिदंसेति, तते णं ते धम्मघोसा थेरा तस्स सालइतस्स नेहावगाढस्स गंधेणं अभिभूया समाणा ततो साल-इयातो नेहावगाढाओ एगं बिंदुगं गहाय करयलंसि आसादेति, तित्तगं खारं कडुयं अक्खज्जं अभोज्जं विसम्भूयं जाणित्ता धम्मरूई अणगारं एवं वदासी-जति णं तुमं देवाणु० ! एयं साल-यं जाव नेहावगाढं आहारेसि तो णं तुमं अकाले चेव जीवितातो ववरोविज्जमि तं मा णं तुमं देवाणु० ! इमं सालतियं जाव आहारेमि, मा णं तुमं अकाले चेव जीविताआ ववरोविज्जमि, तं गच्छ णं तुमं देवाणु० ! इमं सालतियं एगंतमणावाए अच्चित्ते थंडिले परिट्ठवेहि ता अन्नं फासुयं एसणिज्जं असणं० पडिगाहेत्ता आहारं आहारेहि, तते णं से धम्मरूई अणगारे

धम्मघोसेण थेरेण एवं वृत्ते समाने धम्मघोसस्स थेरस्स अंतियाओ पडिनिक्खमति ता सुभूमिभागउज्जाणाओ अदूरसामंते थंडिलं पडिलेहेति ता ततो सालइयातो एगं बिंदुगं गहे-
 ता थंडिलंसि निसिरति, तते णं तस्स सालतियस्स तित्तकडुयस्स बहु० नेहावगाढस्स गंधेणं बहूणि पिपीलियासहस्साणि पाउ० जा जहा य णं पिपीलिया आहारेति सा तहा अकाले
 चेव जीवितातो ववरोविज्जति, तते णं तस्स धम्मरुइस्स अणगारस्स इमेयारूवे अब्भत्थिए० जइ ताव इमस्स सालतियस्स जाव एगंमि बिंदुगंमि पक्खित्तंमि अणेगातिं पिपीलिका-
 सहस्साइं ववरोविज्जंति तं जति णं अहं एयं सालइयं थंडिलंसि सव्वं निसिरामि तते णं बहूणं पाणाणं० वहकरणं भविस्सति तं सेयं खलु ममेयं सालइयं जाव गाढं सयमेव आहारेत्तए,
 मम चेव एएणं सरीरेणं णिज्जाउत्तिकट्टु एवं संपेहेति ता मुहपोत्तियं पडिलेहेति ता ससीसोवरियं कायं पमज्जेति ता तं सालइयं तित्तकडुयं बहु० नेहावगाढं बिलमिव पन्नगभूतेणं
 अप्पाणेणं सव्वं सरीरकोट्टंसि पक्खिवति, तते णं तस्स धम्मरुइस्स तं सालइयं जाव नेहावगाढं आहारियस्स समानस्स मुहुत्तंतरेणं परिणममाणंसि सरीरगंसि वेयणा पाउब्भूता उज्जला
 जाव दुरहियासा, तते णं से धम्मरुची अणगारे अथामे अबले अवीरिए अपुरिसक्कारपरक्कमे अधारणिज्जमितिकट्टु आयारभंडगं एगंते ठवेइ ता थंडिलं पडिलेहेति ता दब्भसंधारगं
 संधारेइ ता दब्भसंधारगं दुरुहति ता पुरत्थाभिमुहे संपलियंकनिसत्ते करयत्तपरिग्गहियं० एवं व०-नमोऽत्थु णं अरहंताणं जाव संपत्ताणं णमोऽत्थु णं धम्मघोसाणं थेराणं मम धम्मा-
 यरियाणं धम्मोवएसगाणं, पुब्बिं पि णं मए धम्मघोसाणं थेराणं अंतिए सव्वे पाणातिवाए पच्चक्खाए जावज्जीवाए जाव परिग्गहे, इयाणिं पि णं अहं तेसिं चेव भगवंताणं अंतियं सव्वं
 पाणाति० पच्चक्खामि जाव परिग्गहं पच्चक्खामि जावजीवाए, जहा खंदओ जाव चरिमेहिं उस्सासनीसासेहिं वोसिरामित्तिकट्टु आलोइयपडिक्कंते समाहिपत्ते कालगए, तते णं ते
 धम्मघोसा थेरा धम्मरुइं अणगारं चिरंगयं जाणित्ता समणे निग्गंथे सदावेति ता एवं व०-एवं खलु देवाणु०! धम्मरुइस्स अणगारस्स मासखमणपारणगंसि सालइयस्स जाव गाढस्स
 णिसिरणट्टयाए बहिया निग्गते चिरावेति तं गच्छह णं तुब्भे देवाणु०! धम्मरुइस्स अणगारस्स सव्वतो समंता मग्गणगवेसणं करेह, तते णं ते समणा निग्गंथा जाव पडिसुणेंति ता
 धम्मघोसाणं थेराणं अंतियाओ पडिनिक्खमंति ता धम्मरुइस्स अणगारस्स सव्वओ समंता मग्गणगवेसणं करेमाणा जेणेव थंडिलं तेणेव उवागच्छंति ता धम्मरुइयस्स अणगारस्स
 सरीरगं निप्पाणं निच्चेट्टं जीवविप्पजट्टं पासंति ता हा हा अहो अकज्जमितिकट्टु धम्मरुइस्स अणगारस्स परिनिव्वानवत्तियं काउस्सग्गं करेंति, धम्मरुइयस्स आयारभंडगं गेण्हति ता
 जेणेव धम्मघोसा थेरा तेणेव उवागच्छंति ता गमणागमणं पडिक्कमंति ता एवं व०-एवं खलु अम्हे तुब्भं अंतियाओ पडिनिक्खमामो ता सुभूमिभागस्स उ० परिपेरंतेणं धम्मरुइस्स
 अणगारस्स सव्वं जाव करेमाणा जेणेव थंडिलं तेणेव उवा० ता जाव इहं हव्वमागया, तं कालगए णं भंते! धम्मरुइं अणगारे इमे से आयारभंडए, तते णं ते धम्मघोसा थेरा पुव्वगए
 उवओगं गच्छंति ता समणे निग्गंथे निग्गंथीओ य सदावेति ता एवं व०-एवं खलु अज्जो! मम अंतेवासी धम्मरुची नाम अणगारे पगइभइए जाव विणीए मासंमासेणं अणिक्खत्तेणं
 तवोकम्मेणं जाव नागसिरीए माहणीए गिहे अणुपविट्टे, तए णं सा नागसिरी माहणी जाव निमिरइ, तए णं से धम्मरुइं अणगारे अहापज्जत्तमितिकट्टु जाव कालं अणवकंखमाणे
 विहरति, से णं धम्मरुइं अणगारे बहूणि वासाणि मामन्नपरियागं पाउणित्ता आलोइयपडिक्कंते समाहिपत्ते कालमासे कालं किच्चा उड्ढं सोहम्मजाव सव्वट्टसिद्धे महाविमाणे देवत्ताए
 उववन्ने, तत्थ णं अजहण्णमणुक्कोसेणं तेत्तीसं सागरोवमाइं ठिती पन्नत्ता, तत्थ धम्मरुइस्सवि देवस्स तेत्तीसं सागरोवमाइं ठिती पण्णत्ता, से णं धम्मरुइं देवे ताओ देवलोगाओ जाव
 महाविदेहे वासे सिज्झिहिति । ११३। तं धिरत्थु णं अज्जो! नागसिरीए माहणीए अधन्नाए अपुन्नाए जाव णिंबोलियाए जाए णं तहारूवे साहू० धम्मरुइं अणगारे मासखमणपारणगंसि
 सालइएणं जाव गाढेणं अकाले चेव जीवितातो ववरोविए, तते णं ते समणा निग्गंथा धम्मघोसाणं थेराणं अंतिए एतमट्टं सोच्चा णिसम्म चंपाए सिंघाडगतिगजाव बहुजणस्स एवमा-
 तिक्खंति-धिरत्थु णं देवा०! नागसिरीए माहणीए जाव णिंबोलियाए जाए णं तहारूवे साहू साहूरूवे सालतिएणं जीवियाओ ववरोविए, तए णं तेसिं समणाणं अंतिए एयमट्टं सोच्चा
 णिसम्म बहुजणो अन्नमन्नस्स एवमातिक्खति एवं भासति-धिरत्थु णं नागसिरीए माहणीए जाव जीवियाओ ववरोविते, तते णं ते माहणा चंपाए नयरीए बहुजणस्स अंतिए
 एतमट्टं सोच्चा निसम्म आसुरुत्ता जाव मिसिमिसेमाणा जेणेव नागसिरी माहणी तेणेव उवागच्छंति ता नागसिरी माहणी एवं वदासी-हंभो! नागसिरी! अपन्थियपन्थिए दुरंतपंतल-
 क्खणे हीणपुण्णचाउद्दसे धिरत्थु णं तव अधन्नाए जाव णिंबोलियाते जाए णं तुवे तहारूवे साहू साहूरूवे मासखमणपारणगंसि सालतिएणं जाव ववरोविते, उच्चावएहिं अक्कोसणाहिं
 अक्कोसंति उच्चावयाहिं उद्धंसणाहिं उद्धंसंति उच्चावयाहिं णिब्भत्थणाहिं णिब्भत्थंति उच्चावयाहिं णिच्छोडणाहिं निच्छोडेंति तज्जेति तालेंति ता सयातो गिहातो निच्छुभंति, तते णं
 सा नागसिरी सयातो गिहातो निच्छुढा समानी चंपाए नगरीए सिंघाडगतियच्चउक्कच्चरचउम्मुह० बहुजणेणं हीलिज्जमाणी त्विसिज्जमाणी निदिज्जमाणी गरहिज्जमाणी तज्जिज्ज-

माणी पद्महिजमाणी धिकारिजमाणी थुकारिजमाणी कथई ठाणं वा निलयं वा अलभमाणी २ दंडीखंडनिवसणा खंडमल्लयखंडघडगहत्थगया फुट्टहडाहडसीसा मच्छियाचडगरेणं
 अभिजमाणमग्गा गेहंगेहेणं देहंबलियाए वित्ति कप्पेमाणी विहरति, तते णं तीसे नागसिरीए माहणीए तब्भवंसि चेव सोलस रोयायंका पाउब्भूया, तं०-सासे कासे जोणिसूले जाव
 कोडे, तए णं सा नागसिरी माहणी सोलसहिं रोयायंकेहिं अभिभूता समाणी अट्टदुहट्टवसट्टा कालमासे कालं किच्चा छट्ठीए पुढवीए उक्कोसेणं बावीससागरोवमट्ठितीएसु नरएसु नेरइ-
 यत्ताते उववजा, सा णं तओऽणंतरंसि उव्वट्ठित्ता मच्छेसु उववजा, तत्थ णं सत्थवज्झा दाहवक्कंतिए कालमासे कालं किच्चा अहेसत्तमीए पुढवीए उक्कोसाए तित्तीससागरोवमट्ठितीएसु
 नेरइएसु उववजा, सा णं ततोऽणंतरं उव्वट्ठित्ता दोच्चंपि मच्छेसु उववज्जति, तत्थविय णं सत्थवज्झा दाहवक्कंतीए दोच्चंपि अहेसत्तमीए पुढवीए उक्कोसं तेत्तीससागरोवमट्ठितीएसु नेरइ-
 एसु उववज्जति, सा णं तओहिंतो जाव उव्वट्ठित्ता तच्चंपि मच्छेसु उववजा, तत्थविय णं सत्थवज्झा जाव कालं किच्चा दोच्चंपि छट्ठीए पुढवीए उक्कोसेणं० तओऽणंतरं उव्वट्ठित्ता नरएसु एवं
 जहा गोसाले तहा नेयवं जाव रयणप्पभाए, सत्तसु उववन्ना, ततो उव्वट्ठित्ता जाव इमाइं खहयरविहाणाइं जाव अदुत्तरं च णं खरबायरपुढविकाइयत्ताते० तेसु अणेगसतसहस्सखुत्तो
 । ११४ । सा णं तओऽणंतरं उव्वट्ठित्ता इहेव जंबुदीवे दीवे भारहे वासे चंपाए नयरीए सागरदत्तस्स सत्थवाहस्स भदाए भारियाए कुच्छिसि दारियत्ताए पच्चायाया, तते णं सा भदा
 सत्थवाही नवण्हं मासाणं दारियं पयाया सुकुमालकोमलियं गयतालुयसमाणं, तीसे दारियाए निव्वत्ते बारसाहियाए अम्मापियरो इमं एतारूवं गोच्चं गुणनिप्फन्नं नामधेज्जं करेंति-
 जम्हा णं अम्हं एसा दारिया सुकुमाला गयतालुयसमाणा तं होउ णं अम्हं इमीसे दारियाए नामधेजे सुकुमालिया, तते णं तीसे दारियाए अम्मापितरो नामधेज्जं करेंति सूमालियत्ति,
 तए णं सा सूमालिया दा० पंचधाईपरिग्गहीया तं०-खीरधाईए जाव गिरिकंदरमट्ठीणा इव चंपकलया निव्वाए निव्वाघायंसि जाव परिवड्ढइ, तते णं सा सूमालिया दारिया उम्मुक्क-
 बालभावा जाव रूवेण य जोवणेण य लावणेण य उक्किट्ठा उक्किट्ठसरीरा जाता यावि होत्था । ११५ । तत्थ णं चंपाए नयरीए जिणदत्ते नाम सत्थवाहे अड्ढे०, तस्स णं जिणदत्तस्स
 भदा भारिया सूमाला इट्ठा जाव माणुस्सए कामभोए पच्चणुब्भवमाणा विहरति, तस्स णं जिणदत्तस्स पुत्ते भदाए भारियाए अत्तए सागरए नामं दारए सुकुमाले जाव सुरूवे, तते
 णं से जिणदत्ते सत्थवाहे अन्नदा कदाई सातो गिहातो पडिनिक्खमति त्ता सागरदत्तस्स गिहस्स अदूरसामंतेणं वीतीवयइ इमं च णं सूमालिया दारिया ण्हाया चेडियासंघपरिवुडा उप्पि
 आगासतलंसि कणगतेंदूसएणं कीलेमाणी २ विहरति, तते णं से जिणदत्ते सत्थवाहे सूमालियं दारियं पासति त्ता सूमालियाए दारियाए रूवे य० जायविम्हए कोडुंबियपुरिसे सदावेति
 त्ता एवं व०-एस णं देवा०! कस्म दारिया किं वा णामधेज्जं से?, तते णं ते कोडुंबियपुरिसा जिणदत्तेण सत्थवाहेणं एवं वुत्ता समाणा हट्ठ० करयल जाव एवं वयासी-एस णं देवाणु०!
 सागरदत्तस्स सत्थवाहस्स धूया भदाए अत्तया सूमालिया नाम दारिया सुकुमालपाणिपाया जाव उक्किट्ठा०, तते णं से जिणदत्ते सत्थवाहे तेसिं कोडुंबियाणं अंतिए एयमट्ठं सोच्चा
 जेणेव सए गिहे तेणेव उवा०त्ता ण्हाए जाव मित्तनाइपरिवुडे चंपाए० जेणेव सागरदत्तस्स गिहे तेणेव उवागच्छइ, तए णं सागरदत्ते सत्थवाहे जिणदत्तं सत्थवाहं एज्जमाणं पासइ त्ता
 आसणाओ अच्चुट्टेइ त्ता आसणेणं उवणिमंतेति त्ता आसत्थं वीसत्थं मुहासणवरगयं एवं वयासी-भण देवाणुप्पिया! किमागमणपओयणं?, तते णं से जिणदत्ते सत्थवाहे सागरदत्तं
 सत्थवाहं एवं वयासी-एवं खलु अहं देवा०! तव धूयं भदाए अत्तियं सूमालियं सागरस्स भारियत्ताए वरेमि, जति णं जाणाह देवा०! जुत्तं वा पत्तं वा सत्ताहणिज्जं वा सरिसो वा संजोगो
 ता दिज्जउ णं सूमालिया सागरस्स, तते णं देवा०! किं दलयामो सुकं सूमालियाए?, तए णं से सागरदत्ते तं जिणदत्तं एवं वयासी-एवं खलु देवा०! सूमालिया दारिया मम एगा
 एगजाया इट्ठा जाव किमंग पुण पासणयाए? तं नो खलु अहं इच्छामि सूमालियाए दारियाए खणमवि विप्पओगं, तं जति णं देवाणुप्पिया! सागरदारए मम घरजामाउए भवति तो
 णं अहं सागरस्स दारगस्स सूमालियं दलयामि, तते णं से जिणदत्ते सत्थवाहे सागरदत्तेणं सत्थवाहेणं एवं वुत्ते समाणे जेणेव सए गिहे तेणेव उवागच्छइ त्ता सागरदारगं सदावेति त्ता
 एवं व०-एवं खलु पुत्ता! सागरदत्ते स० मम एवं वयासी-एवं खलु देवा०! सूमालिया दारिया इट्ठा तं चेव तं जति णं सागरदारए मम घरजामाउए भवइ ता दलयामि, तते णं से
 सागरए दारए जिणदत्तेणं सत्थवाहेणं एवं वुत्ते समाणे तुसिणीए०, तते णं जिणदत्ते स० अन्नदा कदाई सोहणंसि तिहिकरणे विउलं असणं० उवक्खडावेति त्ता मित्तणाइ० आमंतेइ
 जाव सम्माणित्ता सागरं दारगं ण्हायं जाव सच्चालंकारविभूसियं करेइ त्ता पुरिमसहस्सवाहिणिं सीयं दुरूहावेति त्ता मित्तणाइ जाव संपरिवुडे सच्चिइटीए सातो गिहाओ निग्गच्छति त्ता
 चंपानयरिं मज्झमज्जेणं जेणेव सागरदत्तस्स गिहे तेणेव उवागच्छति त्ता सीयाओ पच्चोरुहति त्ता सागरगं दारगं सागरदत्तस्स मत्थ० उवणेति, तते णं सागरदत्ते सत्थवाहे विपुलं अस-
 णं० उवक्खडावेइ त्ता जाव सम्माणित्ता सागरगं दारगं सूमालियाए दारियाए सद्धिं पट्टयं दुरूहावेइ त्ता सेयापीतएहिं कल्लसेहिं मज्जावेति त्ता होमं करावेति त्ता सागरं दारयं सूमालि-
 याए दारियाए पाणिं गेण्हाविति । ११६ । तते णं सागरदारए सूमालियाए दारि० इमं एयारूवं पाणिफासं पडिसंवेदेति से जहानामए असिपत्तेइ वा जाव मुम्मुरेइ वा इतो (११६)

अणिट्तराए चेव पाणिफासे पडिसंवेदेति, तते णं सागरए अकामए अवसवसे तं मुहुत्तमित्तं संचिट्ति, तते णं से सागरदत्ते सत्थवाहे सागरस्स दारगस्स अम्मापियरो मित्तणाइ विउलं असणं० पुप्फवत्थ जाव सम्माणेत्ता पडिविसज्जति, तते णं सागरए दारए सूमालियाए सद्धिं जेणेव वासघरे तेणेव उवा० त्ता सूमालियाए दारियाए सद्धिं तलिंगंसि निवज्जइ, तते णं ते सागरए दा० सूमालियाए दा० इमं एयारूवं अंगफासं पडिसंवेदेति, से जहानामए असिपत्तेइ वा जाव अमणामयरागं चेव अंगफासं पच्चणुब्भवमाणे विहरति, तते णं से सागरए अंगफासं असहमाणे अवसवसे मुहुत्तमित्तं संचिट्ति, तते णं से सागरदारए सूमालियं दारियं सुहपसुत्तं जाणित्ता सूमालियाए दारियाए पासाउ उट्टेति त्ता जेणेव सए सयणिज्जे तेणेव उवा० त्ता सयणीयंसि निवज्जइ, तते णं सूमालिया दारिया तओ मुहुत्तंतरस्स पडिबुद्धा समाणी पतिंवया पइमणुरत्ता पतिं पासे अपस्समाणी तलिगाउ उट्टेति त्ता जेणेव से सयणिज्जे तेणेव उवागच्छति त्ता सागरस्स पासे णुवज्जइ, तते णं से सागरदारए सूमालियाए दारि० दुच्चंपि इमं एयारूवं अंगफासं पडिसंवेदेति जाव अकामए अवसवसे मुहुत्तमित्तं संचिट्ति, तते णं से सागरदारए सूमालियं दारियं सुहपसुत्तं जाणित्ता सयणिज्जाओ उट्टेइ त्ता वासघरस्स दारं विहाडेति त्ता मारामुक्केविव काए जामेव दिसिं पाउब्भूए तामेव दिसिं पडिगए । ११७। तते णं सूमालिया दारिया ततो मुहुत्तंतरस्स पडिबुद्धा पतिंवया जाव अपासमाणी सयणिज्जाओ उट्टेति सागरस्स दा० सब्रतो समंता मग्गणगवेसणं करेमाणी २ वासघरस्स दारं विहाडियं पासइ त्ता एवं व०-गए से सागरेत्तिकट्ठु ओहयमणसंकप्पा जाव झियायइ, तते णं सा भद्दा सत्थवाही कल्लं पाउ० दासचेडियं सद्दावेति त्ता एवं व०-गच्छह णं तुमं देवाणुप्पिए ! बहुवरस्स मुहसोहणियं उवणेहि, तते णं सा दासचेडी भद्दाए एवं वुत्ता समाणी एयमट्ठं तहत्ति पडिसुणेंति, मुहधोवणियं गेण्हति त्ता जेणेव वासघरे तेणेव उवागच्छति त्ता सूमालियं दारियं जाव झियायमाणिं पासति त्ता एवं व०-किणं तुमं देवाणु० ! ओहयमणसंकप्पा जाव झियाहिसि ? तते णं सा सूमालिया दारिया तं दासचेडीयं एवं व०-एवं खलु देवा० ! सागरए दारए मम सुहपसुत्तं जाणित्ता मम पासाओ उट्टेति त्ता वासघरदुवारं अवगुण्डति जाव पडिगए, तते णं ततो अहं मुहुत्तंतरस्स जाव विहाडियं पासामि, गए णं से सागरएत्तिकट्ठु ओहयमण जाव झियायामि, तते णं सा दासचेडी सूमालियाए दारि० एयमट्ठं सोच्चा जेणेव सागरदत्ते तेणेव उवागच्छइ त्ता सागरदत्तस्स एयमट्ठं निवेएइ, तते णं से सागरदत्ते दासचेडीए अंतिए एयमट्ठं सोच्चा निसम्म आसुरुत्ते जेणेव जिणदत्तसत्थवाहगिहे तेणेव उवा० त्ता जिणदत्तं एवं व०-किणं देवाणुप्पिया ! एवं जुत्तं वा पत्तं वा कुलाणुरूवं वा कुलसरिसं वा जन्नं सागरदारए सूमालियं दारियं अदिट्ठदोसं पइवयं० विप्पजहाय इहमागओ, बहूहिं खिज्जणियाहि य रुंणियाहि य उवालभति, तए णं जिणदत्ते सागरदत्तस्स एयमट्ठं सोच्चा जेणेव सागरए दारए तेणेव उवा० त्ता सागरयं दारयं एवं व०-दुट्ठु णं पुत्ता ! तुमे कयं सागरदत्तस्स गिहाओ इहं हव्वमागते, तेणं गच्छह णं तुमं पुत्ता ! एवमवि गते सागरदत्तस्स गिहं, तते णं से सागरए जिणदत्तं एवं व०-अवियातिं अहं ताओ ! गिरिपडणं वा तरुपडणं वा मेरुपडणं वा जलप्पवेसं वा विसभक्खणं वा वेहाणसं वा सत्थोवाडणं वा गिद्धापिट्ठं वा पव्वज्जं वा विदेसगमणं वा अब्भुवगच्छिज्जामि नो खलु अहं सागरदत्तस्स गिहं गच्छिज्जा, तते णं से सागरदत्ते सत्थवाहे कुड्डंतरिए सागरस्स एयमट्ठं निसामेति त्ता लज्जिए विलीए विड्डे जिणदत्तस्स गिहातो पडिनिक्खमइ जेणेव सए गिहे तेणेव उवा० त्ता सुकुमालियं दारियं सद्दावेइ त्ता अंके निवेसेइ त्ता एवं व०-किणं तव पुत्ता ! सागरएणं दारएणं मुक्का ?, अहं णं तुमं तस्स दाहामि जस्स णं तुमं इट्ठा जाव मणामा भविस्ससित्ति सूमालियं दारियं ताहिं इट्ठाहिं वग्गूहिं समासासेइ त्ता पडिविसज्जेइ, तए णं से सागरदत्ते सत्थ० अन्नया उप्पि आगासतलंगंसि सुहनिसण्णे रायमग्गं ओलोएमाणे २ चिट्ति, तते णं से सागरदत्ते एगं महं दमगपुरिसं पासइ दंडिखंडनिवसणं खंडगमल्लगघडगहत्थगयं मच्छि-यासहस्सेहिं जाव अभिज्जमाणमग्गं, तते णं से सागरदत्ते कोडुंबियपुरिसे सद्दावेति त्ता एवं व०-तुब्भे णं देवा० ! एयं दमगपुरिसं विउलेणं असण० पलोभेहि त्ता गिहं अणुप्पवेसेह त्ता खंडगमल्लगं खंडघडगं तं एगंते एडेह त्ता अलंकारियकम्मं कारेह त्ता ण्हायं कयबलि० जाव सद्दालंकारविभूसियं करेह त्ता मणुणं असण० भोयावेह त्ता मम अंतियं उवणेह, तए णं कोडुंबियपुरिसा जाव पडिसुणेंति त्ता जेणेव से दमगपुरिसे तेणेव उवा० त्ता तं दमगं असण० उवप्पलोभेंति त्ता सयं गिहं अणुप्पवेसित्ति त्ता तं खंडगमल्लगं खंडगघडगं च तस्स दमगपुरिस्स एगंते एडंति, तते णं से दमगे तं खंडमल्लगंसि खंडघडगंसि य एगंते एडिज्जमाणंसि महया २ सद्देणं आरसति, तए णं से सागरदत्ते तस्स दमगपुरिस्स तं महया २ आर-सियसहं सोच्चा निसम्म कोडुंबियपुरिसे एवं व०-किणं देवाणु० ! एस दमगपुरिसे महया २ सद्देणं आरसति ?, तते णं ते कोडुंबियपुरिसा एवं व०-एस णं सामी ! तंसि खंडमल्लगंसि खंडघडगंसि य एगंते एडिज्जमाणंसि महया २ सद्देणं आरसइ, तते णं से सागरदत्ते सत्थ० ते कोडुंबियपुरिसे एवं व०-मा णं तुब्भे देवा० ! एयस्स दमगस्स तं खंड जाव एडेह पासे ठवेह जहा णं पत्तियं भवति, तेवि तहेव ठावेंति, तए णं ते कोडुंबियपुरिसा तस्स दमगस्स अलंकारियकम्मं करेंति त्ता सयपागसहस्सपागेहिं तिह्सेहिं अब्भंगेंति अब्भंगिए समाणे सुर-

भिगंधुब्रह्मणेणं गायं उब्रह्मिति ता उसिणोदगगंधोदएणं सीतोदगेणं ण्हारोति पम्हलसुकुमालगंधकासाईए गायार्इ लूहंति ता हंसलक्खणं पट्ट(प्र० पडग)साडगं परिहंति ता सञ्चालंकारवि-
भूसियं करेति ता विउलं असणं० भोयार्वेति ता सागरदत्तस्स उवणेन्ति, तए णं सागरदत्ते सूमालियं दारियं ण्हार्यं जाव सञ्चालंकारभूसियं करित्ता तं दमगपुरिसं एवं व०-एस णं देवा० मम
धूया इट्ठा० एयं णं अहं तव भारियत्ताए दलामि भदियाए भदतो भविज्जासि, तते णं से दमगपुरिसे सागरदत्तस्स एयमट्टं पडिसुणेति ता सूमालियाए दारियाए सद्धिं वासघरं अणुप-
विसति सूमालियाए दा० सद्धिं तलिंगंसि निवज्जइ, तते णं से दमगपुरिसे सूमालियाए इमं एयारूवं अंगफासं पडिसंवेदेति, सेसं जहा सागरस्स जाव सयणिज्जाओ अब्भु(प्र० पच्चु)ट्टेति
ता वासघराओ निग्गच्छति ता खंडमल्लगं खंडघडं च गहाय मारामुक्केविव काए जामेव दिसिं पाउब्भूए तामेव दिसिं पडिगए, तते णं सा सूमालिया जाव गए णं से दमगपुरिसेत्ति-
कट्टु ओहयमण जाव झियायति । ११८ । तते णं सा भद्दा कल्लं पाउ० दासचेडिं सद्दावेति ता एवं वयासी जाव सागरदत्तस्स एयमट्टं निवेदेति, तते णं से सागरदत्ते तहेव संभंते समाणे
जेणेव वासहरे तेणेव उवा० ता सूमालियं दारियं अंके निवेसेति ता एवं व०-अहो णं तुमं पुत्ता ! पुरापोराणाणं जाव पच्चणुब्भवमाणी विहरसि तं मा णं तुमं पुत्ता ! ओहयमण० झियाहि
तुमं पुत्ता ! मम महाणसंसि विपुलं असणं० जहा पुट्टिला जाव परिभाएमाणी विहराहि, तते णं सा सूमालिया दारिया एयमट्टं पडिसुणेति ता महाणसंसि विपुलं असणं जाव दवावे-
माणी विहरइ । तेणं कालेणं० गोवालियाओ अज्जाओ बहुस्सुयाओ एवं जहेव तेयलिणाए सुब्रयाओ तहेव समोसइटाओ तहेव संघाडओ जाव अणुपविट्टे तहेव जाव सूमालिया पडि-
लाभित्ता एवं वदासी-एवं खलु अज्जाओ ! अहं सागरस्स अणिट्ठा जाव अमणामा नेच्छइ णं सागरए मम नामं वा जाव परिभोगं वा, जस्स२विय णं दिज्जामि तस्स२विय णं अणिट्ठा
जाव अमणामा भवामि, तुब्भे य णं अज्जाओ ! बहुनायाओ एवं जहा पुट्टिला जाव उवलद्धे जे णं अहं सागरस्स दार० इट्ठा कंता जाव भवेज्जामि, अज्जाओ ! तहेव भणंति तहेव साविया
जाया तहेव चिंता तहेव सागरदत्तं सत्थवाहं आपुच्छति जाव गोवालियाणं अंतिए पब्रइया, तते णं सा सूमालिया अज्जा जाया ईरियासमिया जाव बंभयारिणी बहूहिं चउत्थल्लट्टट्टम
जाव विहरति, तते णं सा सूमालिया अज्जा अन्नया कयार्इ जेणेव गोवालियाओ अज्जाओ तेणेव उवा० ता वंदति नमंसति ता एवं व०-इच्छामि णं अज्जाओ ! तुब्भेहिं अब्भणुन्नाया
समाणी चंपाओ बाहिं सुभूमिभागस्स उज्जाणस्स अदूरसामंते छट्ठंछट्टेणं अणिक्खत्तेणं तवोकम्मणं सूराभिमुही आयावेमाणी विहरित्ते, तते णं ताओ गोवालियाओ अज्जाओ सूमा-
लियं एवं व०-अम्हे णं अज्जे ! समणीओ निग्गंथीओ ईरियासमियाओ जाव गुत्तबंभचारिणीओ नो खलु अम्हं कप्पति बहिया गामस्स जाव सण्णिवेसस्स वा लट्ठं जाव विहरित्ते,
कप्पति णं अम्हं अंतो उवस्सयस्स वतिपरिक्खत्तस्स संघाडिबद्धियाए णं समतलपतियाए आयावित्ते, तते णं सा सूमालिया गोवालिया एयमट्टं नो सहहति नो पत्तियइ नो रोएति
एयमट्टं अ० सुभूमिभागस्स उज्जाणस्स अदूरसामंते छट्ठंछट्टेणं जाव विहरति । ११९ । तत्थ णं चंपाए ललिया नाम गोट्टी परिवसति, नरवइदिण्णवि(प)यारा अम्मापिइनिययनि-
प्पिवासा वेसविहारकयनिकेया नाणाविहअविणयप्पहाणा अइटा जाव अपरिभूया, तत्थ णं चंपाए देवदत्ता नामं गणिया होत्था सुकुमाला जहा अंडणाए, तते णं तीसे ललियाए
गोट्टीए अन्नया पंच गोट्टिल्लगपुरिसा देवदत्ताए गणियाए सद्धिं सुभूमिभागस्स उज्जाणस्स उज्जाणसिं पच्चणुब्भवमाणा विहरंति, तत्थ णं एगे गोट्टिल्लगपुरिसे देवदत्तं गणियं उच्छंगे
धरति एगे पिट्टओ आयवत्तं धरेइ एगे पुप्फपूरयं रएइ एगे पाए रएइ एगे चामरूक्खेवं करेइ, तते णं सा सूमालिया अज्जा देवदत्तं गणियं तेहिं पंचहिं गोट्टिल्लपुरिसेहिं सद्धिं उरालाई
माणुस्सगाई भोगभोगाई भुंजमाणीं पासति ता० इमेयारूवे संकप्पे समुप्पज्जित्था-अहो णं इमा इत्थिया पुरापोराणाणं कम्माणं जाव विहरइ, तं जति णं केई इमस्स सुचरियस्स तव-
नियमबंभचेरवासस्स कल्लाणे फलवित्तिविसेसे अत्थि तो णं अहमवि आगमिस्सेणं भवग्गहणेणं इमेयारूवाई उरालाई जाव विहरिज्जामित्ति कट्टु नियाणं करेति ता आयावणभूमिओ
पच्चोरुहति । १२० । तते णं सा सूमालिया अज्जा सरीरबउसा जाया यावि होत्था, अभिक्खणं २ हत्थे धोवेइ पाए धोवेइ सीसं धोवेइ मुहं धोवेइ थणंतराई धोवेइ कक्खंतराई धोवेइ
गोज्झंतराई धोवेइ जत्थ णं ठाणं वा सेज्जं वा निसीहियं वा चेएति तत्थवि य णं पुत्रामेव उदएणं अब्भुक्खइत्ता ततो पच्छा ठाणं वा० चेएति, तते णं तातो गोवालियाओ अज्जाओ
सूमालियं अज्जं एवं व०-एवं खलु देवा० ! अज्जे अम्हे समणीओ निग्गंथीओ ईरियासमियाओ जाव बंभचेरधारिणीओ नो खलु कप्पति अम्हं सरीरबाउसियाए होत्ते, तुमं च णं अज्जे !
सरीरबाउसिया अभिक्खणं २ हत्थे धोवसि जाव चेदेसि, तं तुमं णं देवाणुप्पिए ! तस्स ठाणस्स आलोएहि जाव पडिवज्जाहि, तते णं सूमालिया गोवालियाणं अज्जाणं एयमट्टं नो
आढाइ नो परिजाणति अणाढायमाणी अपरिजाणमाणी विहरति, तए णं ताओ अज्जाओ सूमालियं अज्जं अभिक्खणं २ हीलंति जाव परिभवंति, अभिक्खणं २ एयमट्टं निवारंति,
तते णं तीए सूमालियाए समणीहिं निग्गंथीहिं हीलिज्जमाणीए जाव वारिज्जमाणीए इमेयारूवे अब्भत्थिए जाव समुप्पज्जित्था-जया णं अहं अगारवासमज्झे वसामि तया णं अहं

अप्पवसा, जया णं अहं मुंढे भवित्ता पवइया तथा णं अहं परवसा, पुबिं च णं ममं समणीओ आढायंति० इयाणि नो आढंति तं सेयं खलु मम कलं पाउ० गोवालियाणं अंतियाओ पडि-
निक्खमिन्ता पाडिएकं उवस्सगं उवसंपज्जित्ताणं विहरित्तएत्तिकट्टु एवं संपेहेति ता कलं पा० गोवालियाणं अज्जाणं अंतियाओ पडिनिक्खमति ता पाडिएकं उवस्सगं उवसंपज्जित्ताणं
विहरति, तते णं सा सूमालिया अज्जा अणोहट्टिया अनिवारिया सच्छंदमई अभिक्खणं २ हत्थे धोवेइ जाव चेएति तत्थविय णं पासत्था पासत्थविहारी ओसण्णा ओसण्णविहारी
कुसीला० संसत्ता० बहूणि वासाणि सामण्णपरियागं पाउणति अद्धमासियाए संलेहणाए तस्स ठाणस्स अणालोइयअपडिक्कंता कालमासे कालं किच्चा ईसाणे कप्पे अण्णयरंसि विमा-
णंसि देवगणियत्ताए उववण्णा, तत्थेगतियाणं देवीणं नव पलिओवमाइं ठिती पण्णत्ता, तत्थ णं सूमालियाए देवीए नव पलिओवमाइं ठिती पन्नत्ता । १२१। तेणं कालेणं० इहेव जंबु-
दीवे दीवे भारहे वासे पंचालेसु जणवएसु कंपिल्लपुरे नामं नगरे होत्था वन्नओ, तत्थ णं दुवए नामं राया होत्था वन्नओ, तस्स णं चुल्लणी देवी धट्टज्जुणे कुमारे जुवराया, तए णं सा
सूमालिया देवी ताओ देवलोयाओ आउक्खएणं जाव चइत्ता इहेव जंबुदीवे० भारहे वासे पंचालेसु जणवएसु कंपिल्लपुरे नयरे दुपयस्स रण्णो चुल्लणीए देवीए कुच्छिसि दारियत्ताए
पच्चायाया, तते णं सा चुल्लणी देवी नवण्हं मांसाणं जाव दारियं पयाया, तते णं तीसे दारियाए निवत्तबारसाहियाए इमं एयारूवं० नाम० जम्हा णं एस दारिया दुवयस्स रण्णो धूया
चुल्लणीए देवीए अत्तिया तं होउ णं अम्हं इमीसे दारियाए नामधिज्जे दोवई, तए णं तीसे अम्मापियरो इमं एयारूवं गुणं गुणनिप्फन्नं नामधेज्जं करिति दोवती, तते णं सा दोवई
दारिया पंचधाइपरिग्गहीया जाव गिरिकंदरमल्लीणा इव चंपगलया निवायनिवाघायंसि सुहंसुहेणं परिवड्ढइ, तते णं सा दोवई रायवरकन्ना उम्मुक्कबालभावा जाव उक्किट्टसरीरा जाया
यावि होत्था, तते णं तं दोवतिं रायवरकन्नं अण्णया कयाई अंतेउरियाओ ण्हायं जाव विभूसियं करेति ता दुवयस्स रण्णो पायवंदिउं पेसंति, तते णं सा दोवती राय० जेणेव दुवए राया
तेणेव उवागच्छइ ता दुवयस्स रण्णो पायग्गहणं करेति, तए णं से दुवए राया दोवतिं दारियं अंके निवेसेइ ता दोवईए रायवरकन्नाए रूवेण य जोवणेण य लावणेण य जायविम्हए
दोवइं रायवरकन्नं एवं व०-जस्स णं अहं पुत्ता ! रायस्स वा जुवरायस्स वा भारियत्ताए सयमेव दलइस्सामि तत्थ णं तुमं सुहिया वा दुक्खिया वा भविज्जासि तते णं ममं जावजीवाए
हिययडाहे भविस्सइ तं णं अहं तव पुत्ता ! अज्जयाए सयंवरं विरयामि, अज्जयाए णं तुमं दिण्णसयंवरा, जण्णं तुमं सयमेव रायं वा जुवरायं वा वरेहिसि से णं तव भत्तारे भविस्सइ-
त्तिकट्टु ताहिं इट्ठाहिं जाव आसासेइ ता पडिविसज्जेइ । १२२। तते णं से दुवए राया दूयं सदावेति ता एवं व०-गच्छह णं तुमं देवा० ! बारवइं नगरिं तत्थ णं तुमं कण्हं वासुदेवं
समुद्विजयपामोक्खे दस दसारे बलदेवपामोक्खे पंच महावीरे उग्गसेणपामोक्खे सोलस रायसहस्से पज्जुण्णपामोक्खाओ अद्धुट्ठाओ कुमारकोडीओ संबपामोक्खाओ सट्ठी दुहंतसा-
हस्सीओ वीरसेणपामोक्खाओ इक्कीसं वीरपुरिससाहस्सीओ महसेणपामोक्खाओ छप्पन्नं बलवगसाहस्सीओ अन्ने य बहवे राईसरतलवरमाडंबियकोडुंबियइब्भसिट्ठिसेणावइसत्थवा-
हपभिइओ करयलपरिग्गहियं दसनहं सिरसावत्तं मत्थए अंजलिं कट्टु जएणं विजएणं वद्धावेहि ता एवं वयाहि-एवं खलु देवाणुप्पिया ! कंपिल्लपुरे नयरे दुवयस्स रण्णो धूयाए चुल्ल-
णीए देवीए अत्तयाए धट्टज्जुणकुमारस्स भगिणीए दोवईए रायवरकण्णाए सयंवरे भविस्सइ तं णं तुम्हे देवा० ! दुवयं रायं अणुगिण्हेमाणा अकालपरिहीणं चेव कंपिल्लपुरे नयरे
समोसरह, तए णं से दूए करयल जाव कट्टु दुवयस्स रण्णो एयमट्ठं पडिसुणेति ता जेणेव सए गिहे तेणेव उवागच्छइ ता कोडुंबियपुरिसे सदावेइ ता एवं व०-खिप्पामेव भो देवाणु-
प्पिया ! चाउग्घंटं आसरहं जुत्तामेव उवट्टवेह जाव उवट्टवेति, तए णं से दूए ण्हाते जाव अलंकार० सरीरे चाउग्घंटं आसरहं दुरुहइ ता बहूहिं पुरिसेहिं सन्नद्धजावगहियाऽऽउहपहरणेहिं
सद्धिं संपरिवुडे कंपिल्लपुरं नगरं मज्झंमज्झेणं निग्गच्छति ता पंचालजणवयस्स मज्झंमज्झेणं जेणेव देसपंपते तेणेव उवागच्छइ, सुरट्टाजणवयस्स मज्झंमज्झेणं जेणेव बारवती नगरी
तेणेव उवागच्छइ ता बारवइं नगरिं मज्झंमज्झेणं अणुपविसइ ता जेणेव कण्हस्स वासुदेवस्स बाहिरिया उवट्टाणसाला तेणेव उवागच्छइ ता चाउग्घंटं आसरहं ठवेइ ता रहाओ
पच्चोरुहति ता मणुस्सवग्गुरापरिक्खित्ते पायविहारचारेणं जेणेव कण्हे वासुदेवे तेणेव उवा० ता कण्हं वासुदेवं समुद्विजयपामोक्खे य दस दसारे जाव बलवगसाहस्सीओ करयल तं
चेव जाव समोसरह, तते णं से कण्हे वासुदेवे तस्स दूयस्स अंतिए एयमट्ठं सोच्चा निसम्म हट्ट जाव हियए तं दूयं सक्कारेइ सम्माणेइ ता पडिविसज्जेइ, तए णं से कण्हे वासुदेवे कोडुं-
बियपुरिसं सदावेइ एवं व०-गच्छाहि णं तुमं देवाणुप्पिया ! सभाए सुहम्माए सामुदाइयं भेरिं तालेहि, तए णं से कोडुंबियपुरिसे करयल जाव कण्हस्स वासुदेवस्स एयमट्ठं पडिसुणेति
ता जेणेव सभाए सुहम्माए सामुदाइया भेरी तेणेव उवागच्छइ ता सामुदाइयं भेरिं महया २ सहेणं तालेइ, तए णं ताए सामुदाइयाए भेरीए तालियाए समाणीए समुद्विजयपामो
क्खा दस दसारा जाव महसेणपामोक्खाओ छप्पणं बलवगसाहस्सीओ ण्हाया जावविभूसिया जहाविभवइडिढसक्कारसमुदएणं अप्पेगइया हयगया जाव पायविहारचारेणं जेणेव

कण्हे वासुदेवे तेणेव उवागच्छन्ति करयल जाव कण्हं वासुदेवं जएणं विजएणं वद्धावेंति, तए णं से कण्हे वासुदेवे कोडुंबियपुरिसे सहावेति ता एवं व०-खिप्पामेव भो ! देवाणुप्पिया ! अभिसेकं हत्थिरयणं पडिकप्पेह हयगय जाव पच्चप्पिणंति, तते णं से कण्हे वासुदेवे जेणेव मज्जणघरे तेणेव उवाग० समुत्तजालाकुलाभिरामे जाव अंजणगिरिकूडसन्निभं गयवरं नरवई दुरुढे, तते णं से कण्हे वासुदेवे समुद्विजयपामुक्खेहिं दसहिं दसारेहिं जाव अणंगसेणापामुक्खेहिं अणेगाहिं गणियासाहस्सीहिं सद्धिं संपरिवुडे सद्धिइटीए जाव रवेणं बारवइनयरिं मज्झमज्जेणं निग्गच्छइ ता सुरट्टाजणवयस्स मज्झमज्जेणं जेणेव देसप्पंते तेणेव उवागच्छइ ता पंचालजणवयस्स मज्झमज्जेणं जेणेव कंपिल्लपुरे नयरे तेणेव पहारेत्थ गमणाए, तए णं से दुवए राया दोब्बं दूयं सहावेइ ता एवं व०-गच्छ णं तुमं देवाणुप्पिया ! हत्थिणाउरं नगरं तत्थ णं तुमं पंडुरायं सपुत्तयं जुहिट्टिहं भीमसेणं अज्जुणं नउलं सहदेवं दुजोइणं भाइसय-समग्गं गंगेयं विदुरं दोणं जयदहं सउणीं कीवं आसत्थामं करयल जाव कट्टु तहेव समोसरह, तए णं से दूए० एवं व०-जहा वासुदेवे नवरं भेरी नत्थि जाव जेणेव कंपिल्लपुरे नयरे तेणेव पहारेत्थ गमणाए, एएणेव कमेणं तच्चं दूयं चंपानयरिं, तत्थ णं तुमं कण्हं अंगरायं सेल्लं नंदिरायं करयल तहेव जाव समोसरह, चउत्थं दूयं सुत्तिमइं नयरिं, तत्थ णं तुमं सिसुपालं दमघोससुयं पंचभाइसयसंपरिवुडं करयल तहेव जाव समोसरह, पंचमगं दूयं हत्थमीसनयरं, तत्थ णं तुमं दमदंतं रायं करयल तहेव जाव समोसरह, छट्ठं दूयं महुरं नयरिं, तत्थ णं तुमं धरं रायं करयल जाव समोसरह, सत्तमं दूयं रायगिहं नगरं, तत्थ णं तुमं सहदेवं जगसिंधुमुयं करयल जाव समोसरह, अट्ठमं दूयं कोडिणं नयरं, तत्थ णं तुमं रूपिं भेसगमुयं करयल तहेव जाव समोसरह, नवमं दूयं विराडनयरं, तत्थ णं तुमं कियगं भाउमयममग्गं करयल जाव समोसरह, दसमं दूयं अवसेसेसु य गामागरनगरेसु अणेगाइं रायसहस्माइं जाव समोसरह, तए णं से दूए तहेव निग्गच्छइ जेणेव गामागर जाव समोसरह, तए णं ताइं अणेगाइं रायसहस्माइं तस्म दूयस्स अंतिए एयमट्ठं सोच्चा निमम्म इट्ठ० तं दूयं सक्कारेंति ता सम्माणेंति ता पडिविसज्जिति, तए णं ते वासुदेवपामुक्खा बहवे गयसहस्मा पत्तेयं २ ण्हाया सन्नद्धहत्थिगंधवरगया हयगयरह० महया भडचडगररहपहकर० सएहिं २ नगरेहिं तो अ-भिनिग्गच्छन्ति ता जेणेव पंचाले जणवए तेणेव पहारेत्थ गमणाए । १२३ । तए णं से दुवए राया कोडुंबियपुरिसे सहावेइ ता एवं व०-गच्छ णं तुमं देवाणु० ! कंपिल्लपुरे नयरे बहिया गंगाए महानदीए अदूरमामंते एगं महं सयंवरमंडवं करेह अणेगवंभसयसन्निविट्ठं लीलट्टियसालभंजिआगं जाव पच्चप्पिणंति, तए णं से दुवए राया कोडुंबियपुरिसे सहावेइ ता एवं वयासी-खिप्पामेव भो देवाणुप्पिया ! वासुदेवपामुक्खाणं बहूणं रायसहस्माणं आवासे करेह तेवि करेत्ता पच्चप्पिणंति, तए णं दुवए वासुदेवपामुक्खाणं बहूणं रायसहस्माणं आगमं जाणेत्ता पत्तेयं २ हत्थिखंधजावपरिवुडे अग्घं च पज्जं च गहाय सद्धिइटीए कंपिल्लपुराओ निग्गच्छइ ता जेणेव ते वासुदेवपामुक्खा बहवे रायसहस्मा तेणेव उवागच्छइ ता ताइं वासुदेवपामुक्खाइं अग्घेण य पज्जेण य सक्कारेंति सम्माणेइ ता तेसिं वासुदेवपामुक्खाणं पत्तेयं २ आवासे वियरति, तए णं ते वासुदेवपामुक्खा जेणेव मया २ आवासा तेणेव उवा० ता हत्थिगंधाहिं तो पच्चोरुहन्ति ता पत्तेयं खंधावागनिवेमं करेंति ता सए २ आवासे अणुपविमंति ता मएसु २ आवासेसु आसणेसु य सन्निमन्ना य संतुयट्ठा य बहूहिं गंधवेहिं य नाडएहिं य उवगिज्जमाणा य उवणच्चिज्जमाणा य विहरंति, तते णं से दुवए राया कंपिल्लपुरं नगरं अणुपविसति ता विउलं असणं० उवक्खडावेइ ता कोडुंबियपुरिसे सहावेइ ता एवं व०-गच्छ णं तुम्हे देवाणुप्पिया ! विउलं असणं० सुरं च मज्जं च मंसं च सीधुं च पसण्णं च सुबहुपुप्फवत्थगंधमट्ठालंकारं च वासुदेवपामुक्खाणं रायसहस्माणं आवासेसु साहरह, तेवि साहरंति, तते णं ते वासुदेवपामुक्खा तं विउलं असणं जाव पमच्चं च आसाएमाणा० विहरंति, जिमियभुत्तुत्तरागयाविय णं समाणा आयंता जाव सुहामणवरगया बहूहिं गंध-वेहिं जाव विहरंति, तते णं से दुवए राया पुद्दावरणहकालसमयंसि कोडुंबियपुरिसे सहावेइ ता एवं व०-गच्छ णं तुम्हे देवाणुप्पिया ! कंपिल्लपुरे संधाडगजावपहे वासुदेवपामुक्खाणं य रायसहस्माणं आवासेसु हत्थिखंधवरगया महया २ सहेणं जाव उग्घोसेमाणा २ एवं वद्ध-एवं खलु देवाणु० कट्ठं पाउ० दुवयस्स रण्णो धूयाए च्छुट्ठणीए देवीए अत्तयाए धट्टज्जुणस्स भगिणीए दोवईए रायवरकण्णाए सयंवरे भविस्सइ तं तुम्हे णं देवा० ! दुवयं रायाणं अणुगिण्हमाणा ण्हाया जाव विभूमिया हत्थिखंधवरगया सधे सकोरं० सेयवरचामर० हयगय-रह० महया भडचडगरेणं जाव परिक्खत्ता जेणेव मयवरगमंडवे तेणेव उवा० ता पत्तेयं नामंकेसु आसणेसु निसीयह ता दोवइं गयकण्णं पडिवालेमाणा २ चिट्ठह, घोमणं घोसेह ता मम एयमाणत्तियं पच्चप्पिणह, तए णं ते कोडुंबिया तहेव जाव पच्चप्पिणंति, तए णं से दुवए राया कोडुंबियपुरिसे सहा० ता एवं व०-गच्छ णं तुम्हे देवाणु० ! सयंवरमंडपं आमि-यसंमज्जिओवलित्तं सुगंधवरगंधियं पंचवण्णपुप्फपुंजोवयारकलियं कालागरुपवरकुंदुरुक्कतुरुक्कजावगंधवट्ठिभूयं मंचाइमंचकलियं करेह ता वासुदेवपामुक्खाणं बहूणं रायसहस्माणं पत्तेयं २ नामंकाइं आसणाइं अत्थुयपच्चत्थुयाइं रएह ता एयमाणत्तियं पच्चप्पिणह, तेवि जाव पच्चप्पिणंति, तते णं ते वासुदेवपामुक्खा बहवे गयसहस्मा कट्ठं पाउ० ण्हाया जाव विभूमिया हत्थिखंधवरगया सकोरं० सेयवरचामराहिं० हयगय जाव परिवुडा सद्धिइटीए जाव रवेणं जेणेव सयंवरे तेणेव उवा० ता अणुपविसंति ता पत्तेयं २ नामंकेसु निसी- (११७)

यंति दोवई रायवरकण्णं पडिवालेमाणा चिट्ठंति, तए णं से पंडुए राया कल्लं ण्हाए जाव विभूसिए हत्थिखंधवरगए सकोरंट० हयगय० कंपिल्लपुरं मज्झंमज्झेणं निग्गच्छंति जेणेव सयंवरामंडवे जेणेव वासुदेवपामोक्खा बहवे रायसहस्सा तेणेव उवा० ता वासुदेवपामोक्खाण करयल० वद्धावेत्ता कण्हस्स वासुदेवस्स सेयवरचामरं गहाय उववीयमाणे चिट्ठंति । १२४ । तए णं सा दोवई रायवरकन्ना (जेणेव मज्जणघरे तेणेव उवागच्छइ ता ण्हाया कयबलिकम्मा कयकोउयमंगलपायच्छित्ता सुद्धप्पावेसाइं मंगल्लाइं वत्थाइं पवर परिहिया जाव सव्वालं-कारविभूसिया मज्जणघराओ पडिनिक्खमइ ता जेणेव जिणघरे तेणेव उवागच्छइ ता जिणघरं अणुपविसइ ता जिणपडिमाणं आलोए पणामं करेइ ता लोमहत्थयं परामुसइ एवं जहा सूरियाभो जिणपडिमाओ अच्छेइ ×) तहेव भाणियव्वं जाव धूवं डहइ ता जेणेव जिणघरे तेणेव उवागच्छइ ता जिणपडिमाणं अच्छणं करेइ वामं जाणुं अच्चेति दाहिणं जाणुं धर-णियलंसि णिवेसेति ता तिकखुत्तो मुद्धाणं धरणियलंसि नमेइ ता ईसिं पच्चुण्णमति करयल जाव कट्टु एवं वयासी-नमोऽत्थु णं अरिहंताणं भगवंताणं जाव संपत्ताणं वंदइ नमंसइ ता जिणघराओ पडिनिक्खमति ता जेणेव अंतेउरे तेणेव उवागच्छइ । १२५ । तते णं तं दोवई रायवरकन्नं अंतेउरियाओ सव्वालंकारविभूसियं करेति, किं ते ? वरपायपत्तणेउरा जाव चेडियाच-क्कवालमयहरगविंदपरिक्खित्ता अंतेउराओ पडिणिक्खमति ता जेणेव बाहिरिया उवट्ठाणसाला जेणेव चाउग्घंटे आसरहे तेणेव उवा० ता किड्डावियाए लेहियाए सद्धिं चाउग्घंटे आसरहं दुरुहति, तते णं से धट्टज्जुणे कुमारे दोवतीए कण्णाए सारत्थं करेति, तते णं सा दोवती रायवरकण्णा कंपिल्लपुरं नयरं मज्झंमज्झेणं जेणेव सयंवरमंडवे तेणेव उवा० रहं ठवेति रहाओ पच्चोरुहति किड्डावियाए लेहियाए य सद्धिं सयंवरं मंडपं अणुपविसति करयल तेसिं वासुदेवपामोक्खाणं बहूणं रायवरसहस्साणं पणामं करेति, तते णं सा दोवती रायवर० एगं महं सिरिदामगंडं, किं ते ? पाडलमल्लियचंपयजावसत्तच्छयाईहिं गंधद्वणिं मुयंतं परमसुहफासं दरिसणिज्जं० गिण्हति, तते णं सा किड्डाविया जाव सुरूवा जाव वामहत्थेणं चिल्ललगदप्पणं गहेऊण सललियं दप्पणसंकंतबिंबसंदंसिए य से दाहिणेणं हत्थेणं दरिसिए पवररायसीहे, फुडविसयविसुद्धरिभियगंभीरमहुरभणिया सा तेसिं सव्वेसिं पत्थिवाणं अम्मा-पिऊणं वंससत्तसामत्थगोत्तविकंतिकंतिकित्तिबहुविहआगममाहप्परूवजोव्वणगुणलावण्णकुलसीलजाणिया कित्ठणं करेइ, पढमं ताव वणिहपुंगवाणं दसदसारवीरपुरिसाणं तेलोक्कवलव-गाणं सत्तुसयसहस्समाणावमइगाणं भवसिद्धिपवरपुंडरीयाणं चिल्लगाणं बलवीरियरूवजोव्वणगुणलावन्नकित्तिया कित्ठणं करेति, ततो पुणो उग्गसेणमाईणं जायवाणं, भणति य-सो-हग्गरूवकलिए वरेहि वरपुरिस गंधहत्थीणं, जो हु ते होइ हिययदइओ, तते णं सा दोवई रायवरकन्नगा बहूणं रायवरसहस्साणं मज्झंमज्झेणं समतिच्छमाणी २ पुव्वकयणियाणेणं चोइज्जमाणी २ जेणेव पंच पंडवा तेणेव उवा० ता ते पंच पंडवे तेणं दसद्ववण्णेणं कुसुमदामेणं आवेडियपरिवेडियं करेति ता एवं वयासी-एए णं मए पंच पंडवा वरिया, तते णं तेसिं वासुदेवपामोक्खाणं बहूणि रायसहस्साणि महया २ सद्देणं उग्घोसेमाणा २ एवं वयंति-सुवरियं खलु भो ! दोवईए रायवरकन्नाए २त्तिकट्टु सयंवरमंडवाओ पडिनिक्खमंति ता जेणेव सया २ आवासा तेणेव उवा०, तते णं धट्टज्जुणे कुमारे पंच पंडवे दोवतिं रायवरकण्णं च चाउग्घंटे आसरहं दुरुहति ता कंपिल्लपुरे मज्झंमज्झेणं जाव सयं भवणं अणुपविसति, तते णं दुवए राया पंच पंडवे दोवई रायवरकण्णं च पट्टयं दुरुहेति ता सेयापीएहिं कलसेहिं मज्जावेति ता अग्गिहोमं कारवेति पंचणं पंडवाणं दोवतीए य पाणिग्गहणं करावेइ, तते णं से दुवए राया दोवतीए रायवरकण्णयाए इमं एयारूवं पीतिदाणं दलयति, तंजहा-अट्ट हिरण्णकोडीओ जाव अट्ट पेसणकारीओ दासचेडीओ, अण्णे च विपुलं धणकणग दलयति, तते णं से दुवए राया ताइं वासुदेवपामोक्खाइं विपुलेणं असण० वत्थगंध जाव पडिविसज्जेति । १२६ । तते णं से पंडू राया तेसिं वासुदेवपामोक्खाणं बहूणं रा० करयल एवं व०-एवं खलु देवा० ! हत्थिणाउरे नयरे पंचणं पंडवाणं दोवतीए य देवीए कल्लाणकरे भविस्सति तं तुब्भे णं देवा० ! ममं अणुगिण्हमाणा अकालपरिहीणं (प्र० अकालए) समोसरह, तते णं वासुदेवपामोक्खा पत्तेयं २ जाव पहारेत्थ गमणाए, तते णं से पंडुराया कोडुंबियपुरिसे सदा० ता एवं व०-गच्छह णं तुब्भे देवा० ! हत्थिणाउरे पंचणं पंडवाणं पंच पासायवडिसिए कारेइ अब्भुग्गयभू-सिय वण्णओ जाव पडिरूवे, तते णं ते कोडुंबियपुरिसा पडिसुणेंति जाव करावेंति, तते णं से पंडुए पंचहिं पंडवेहिं दोवईए देवीए य सद्धिं हयगयसंपरिवुडे कंपिल्लपुराओ पडिनिक्खमइ ता जेणेव हत्थिणाउरे तेणेव उवागए, तते णं से पंडुराया तेसिं वासुदेवपामोक्खाणं आगमणं जाणित्ता कोडुंबि० सदावेइ ता एवं व०-गच्छह णं तुब्भे देवाणुप्पिया ! हत्थिणाउरस्स नयरस्स बहिया वासुदेवपामोक्खाणं बहूणं रायसहस्साणं आवासे कारेइ अणेगखंभसय तहेव जाव पच्चप्पिणंति, तते णं ते वासुदेवपामोक्खा बहवे रायसहस्सा जेणेव हत्थिणाउरे तेणेव उवागच्छन्ति, तते णं से पंडुराया तेसिं वासुदेवपामोक्खाणं आगमणं जाणित्ता हट्टतुट्टे ण्हाए कयबलि० जहा दुपए जाव जहारिहं आवासे दलयति, तते णं ते वासुदेवपा० बहवे रायसहस्सा जेणेव सयाइं २ आवासाइं तेणेव उवा० तहेव जाव विहरंति, तते णं से पंडुराया हत्थिणाउरं नयरं अणुपविसति ता कोडुंबिय० सदावेति ता एवं व०-तुब्भे णं देवा० !

विउलं असणं० तहेव जाव उवणेंति, तते णं ते वासुदेवपामोक्खा बहवे राया ण्हाया कयबलिकम्मा तं विपुलं असणं० तहेव जाव विहरंति, तते णं से पंडुराया पंच पंडवे दोवतिं च देविं पट्टयं दुरूहेति ता सीयापीएहिं कलसेहिं ण्हावेंति ता कल्लाणकारं करेति ता ते वासुदेवपामोक्खे बहवे रायसहस्से विपुलेणं असणं० पुप्फवत्थेणं सक्कारेति सम्माणेति जाव पडिविसज्जेति, तते णं ताइं वासुदेवपामोक्खाइं बहूइं जाव पडिगयातिं । १२७ । तते णं ते पंच पंडवा दोवतीए देवीए सद्धिं अंतो अंतेउर परियाल सद्धिं कल्लाकल्लिं वारंवारें ओरालातिं भोगभोगाइं जाव विहरति, तते णं से पंडू राया अन्नया कयाई पंचहिं पंडवेहिं कौंतिए देवीए दोवतीए य सद्धिं अंतो अंतेउर परियाल सद्धिं संपरिवुडे सीहासणवरगते यावि विहरति, इमं च णं कच्छुल्लणारए दंसणेणं अइभइए विणीए अंतो २ य कलुसहियए मज्झत्थोवत्थिए य अल्लीणसोमपियदंसणे सुरूवे अमइलसगलपरिहिए कालमियचम्मउत्तरासंगरइयवच्छे दण्डक-मण्डलुहत्थे जडामउडदित्तसिए जन्नोवइयगणेत्तियमुंजमेहलवागलधरे हत्थकयकच्छभीए पियगंधवे धरणिगोयरप्पहाणे संवरणावरणओवयणउप्पयणिलेसणीसु य संकामणिअभि-ओगपणत्तिगमणीथंभणीसु य बहुसु विज्जाहरीसु विज्जासु विस्सुयजसे इट्ठे रामस्स य केसवस्स य पज्जुन्नपईवसंबअनिरुद्धणिसठउम्मुयसारणगयसुमुहदुम्मुहातीण जायवाणं अद्धु-ट्टाण कुमारकोडीणं हिययदइए संथवए कलहजुद्धकोलाहलप्पिए भंडणाभिलासी बहुसु य समरसयसंपराएसु दंसणरए समंतओ कलहं सदक्खिणं अणुगवेसमाणे असमाहिकरे दसार-वरवीरपुरिसतिलोक्कबलवगाणं आमंतेऊण तं भगवतीं एक्क(संका)मणिं गगणगमणदच्छं उप्पइओ गगणमभिलंघयंतो गामागरनगरखेडकब्बडमडंबदोणमुहपट्टणसंबाहसहस्समंडियं थि-मियमेइणीतलं वसुहं ओलोइंतो रम्मं हत्थिणाउरं उवागए, पंडुरायभवणंसि अइवेगेण समोवइए, तते णं से पंडुराया कच्छुल्लनारयं एज्जमाणं पासति ता पंचहिं पंडवेहिं कुंतीए य देवीए सद्धिं आसणातो अब्भुट्ठेति ता कच्छुल्लनारयं सत्तट्टपयाइं पच्चुग्गच्छइ ता तिक्खुत्तो आयाहिणपयाहिणं करेति ता वंदति णमंसति महरिहेणं आसणेणं उवणिमंतेति, तते णं से कच्छु-ल्लनारए उदगपरिफोसियाए दब्भोवरिपच्चत्थुयाए भिसियाए णिसीयति ता पंडुरायं रज्जे जाव अंतेउरे य कुसलोदंतं पुच्छइ, तते णं से पंडुराया कौंतीदेवी पंच य पंडवा कच्छुल्लणारयं आढंति जाव पज्जुवासंति, तए णं सा दोवई देवी कच्छुल्लनारयं असंजयं अविरयं अपडिहयपच्चक्खायपावकम्मंतिकट्टु नो आढाति नो परियाणइ नो अब्भुट्ठेति नो पज्जुवासति । १२८ । तते णं तस्स कच्छुल्लणारयस्स इमेयारूवे अब्भत्थिए चित्तिए पत्थिए मणोगए संकप्पे समुप्पज्जित्था-अहो णं दोवती देवी रूवेणं जाव लावण्णेण य पंचहिं पंडवेहिं अणुबद्धा समाणी ममं णो आढाति जाव नो पज्जुवासइ तं सेयं खलु मम दोवतीए देवीए विप्पियं करित्तएत्तिकट्टु एवं संपेहेति ता पंडुरायं आपुच्छइ ता उप्पयणिं विज्जं आवाहेति ता ताए उक्किट्ठाए जाव विज्जाहरगईए लवणसमुहं मज्झंमज्झेणं पुरत्थाभिमुहे वीइवतिउं पयत्ते यावि होत्था, तेणं कालेणं० धायइसंडे दीवे पुरत्थिमद्धदाहिणइडभरहवासे अवरकंका णामं रायहाणी होत्था, तते णं अमरकंकाए रायहाणीए पउमणाभे णामं राया होत्था महया हिमवंतं० वण्णओ, तस्स णं पउमनाभस्स रन्नो सत्त देवीसयातिं ओरोहे होत्था, तस्स णं पउमनाभस्स रण्णो सुनाभे नामं पुत्ते जुवराया यावि होत्था, तते णं से पउमणाभे राया अंतो अंतेउरंसि ओरोहसंपरिवुडे सिंहासणवरगए विहरति, तए णं से कच्छुल्लणारए जेणेव अमरकंका राय-हाणी जेणेव पउमनाहस्स भवणे तेणेव उवागच्छति ता पउमनाभस्स रन्नो भवणंसि झत्तिं वेगेणं समोवइए, तते णं से पउमनाभे राया कच्छुल्लं नारयं एज्जमाणं पासति ता आसणातो अब्भुट्ठेति ता अग्घेणं जाव आसणेणं उवणिमंतेति, तए णं से कच्छुल्लनारए उदयपरिफोसियाए दब्भोवरिपच्चत्थुयाते भिसियाए निसीयइ जाव कुसलोदंतं आपुच्छइ, तते णं से पउ-मनाभे राया णियगओरोहे जायविम्हए कच्छुल्लणारयं एवं व०-तुब्भं देवाणुप्पिया ! बहूणि गामाणि जाव गेहातिं अणुपविससि, तं अत्थि याइं ते कहिंचि देवाणुप्पिया ! एरिसए ओरोहे दिट्ठपुब्बे जारिसए णं मम ओरोहे ?, तते णं से कच्छुल्लनारए पउमनाभेणं रन्ना एवं वुत्ते समाणे ईसिं विहसियं करेइ ता एवं व०-सरिसे णं तुमं पउमणाभा ! तस्स अगडद-दुदुरस्स, के णं देवाणुप्पिया ! से अगडददुदुरे ?, एवं जहा मल्लिणाए एवं खलु देवा० ! जंबुदीवे दीवे भारहे वासे हत्थिणाउरे दुपयस्स रण्णो धूया चुल्लणीए देवीए अत्तया पंडुस्स सुण्हा पंचण्हं पडवाणं भारिया दोवती देवी रूवेण य जाव उक्किट्टसरीरा दोवईए णं देवीए छिन्नस्सवि पायंगुट्टयस्स अयं तव ओरोहे सतिमं पि कलं ण अग्घतित्तिकट्टु, पउमणाभं आपुच्छति ता जाव पडिगए, तते णं से पउमनाभे राया कच्छुल्लनारयस्स अंतिए एयमट्टं सोच्चा णिसम्म दोवतीए देवीए रूवे य० मुच्छिणं० दोवईए अज्झोववन्ने जेणेव पोस-हसाला तेणेव उवा० ता पोसहसालं जाव पुब्वसंगतियं देवं एवं व०-एवं खलु देवा० ! जंबुदीवे दीवे भारहे वासे हत्थिणाउरे जाव सरीरा तं इच्छामि णं देवा० ! दोवतीं देवीं इहमाणियं, तते णं पुब्वसंगतिए देवे पउमनाभं एवं व०-नो खलु देवा० ! एयं भूयं वा भव्वं वा भविस्सं वा जण्णं दोवती देवी पंच पंडवे मोत्तूण अन्नेणं पुरिसेणं सद्धिं ओरालातिं जाव विहरिस्सति, तहाविय णं अहं तव पियट्टतयाए दोवतीं देविं इहं हव्वमाणेमिक्किट्टु पउमणाभं आपुच्छइ ता ताए उक्किट्ठाए जाव लवणसमुहं मज्झंमज्झेणं जेणेव हत्थिणाउरे णयरे तेणेव पहारेत्थ

गमणाए, तेणं कालेणं० हत्थिणाउरे जुहिद्विल्ले राया दोवतीए सद्धिं उप्पि आगासतलंगंसि सुहपसुत्ते यावि होत्था, तए णं से पुव्वसंगतिए देवे जेणेव जुहिद्विल्ले राया जेणेव दोवती देवी तेणेव उवा० त्ता दोवतीए देवीए ओसोवणियं दलयइ त्ता दोवतिं देविं गिण्हइ त्ता ताए उक्किट्ठाए जाव जेणेव अमरकंका जेणेव पउमणाभस्स भवणे तेणेव उवा० त्ता पउमणाभस्स भवणंसि असोगवणियाए दोवतिं देवीं ठावेइ त्ता ओसोवणिं अवहरति त्ता जेणेव पउमणाभे तेणेव उ० त्ता एवं व०-एस णं देवा० ! मए हत्थिणाउराओ दोवती इह हव्वमाणीया तव असोगवणियाए चिट्ठति, अतो परं तुमं जाणसित्तिकट्ठु जामेव दिसिं पाउब्भूए तामेव दिसिं पडिगए, तते णं सा दोवई देवी ततो मुहुत्तंतरस्स पडिबुद्धा समाणी तं भवणं असोगवणियं च अपच्चभिजाणमाणी एवं व०- नो खलु अम्हं एसे सए भवणे णो खलु एसं अम्हं सगा असोगवणिया, तं ण णज्जति णं अहं केणइ देवेण वा दाणवेण वा किंपुरिसेण वा किन्नरेण वा महोरगेण वा गंधवेण वा अन्नस्स रण्णो असोगवणियं साहरियत्तिकट्ठु ओहयमणसंकप्पा जाव झियायति, तते णं से पउमणाभे राया ण्हाए जाव सब्बालंकारविभूसिए अंतेउरपरियाल-संपरिवुडे जेणेव असोगवणिया जेणेव दोवती देवी तेणेव उवा० त्ता दोवतीं देवीं ओहय० जाव झियायमाणीं पासति त्ता एवं व०-किण्णं तुमं देवा० ! ओहय जाव झियाहिसि ?, एवं खलु तुमं देवा० ! मम पुव्वसंगतिएणं देवेणं जंबुदीवाओ दीवाओ भारहाओ वासाओ हत्थिणापुराओ नयराओ जुहिद्विल्लस्स रण्णो भवणाओ साहरिया तं मा णं तुमं देवा० ! ओहय० जाव झियाहि, तुमं मए सद्धिं विपुलाइं भोगभोगाइं भुंजमाणी विहराहि, तते णं सा दोवती देवी पउमणाभं एवं व०-एवं खलु देवा० ! जंबुदीवे दीवे भारहे वासे बारवतीए णयरीए कण्हे णामं वासुदेवे मम पियभाउए परिवसति, तं जति णं से छण्हं मासाणं ममं कूवं नो हव्वमागच्छइ तते णं अहं देवा० ! जं तुमं वदसि तस्स आणाओवायवयणणिदेसे चिट्ठिस्सामि, तते णं से पउमे दोवतीए एयमट्ठं पडिसुणेत्ता दोवतिं देविं कण्णंतेउरे ठवेति, तते णं सा दोवती देवी छट्ठंछट्ठेणं अनिक्खित्तेणं आयंबिलपरिग्गहिएणं तवोकम्मेणं अप्पाणं भावेमाणी विहरति । १२९ । तते णं से जुहिद्विल्ले राया तओ मुहुत्तंतरस्स पडिबुद्धे समाणे दोवतिं देविं पासे अपासमाणो सयणिज्जाओ उट्टेइ त्ता दोवतीए देवीए सब्बओ समंता मग्गणगवेसणं करेइ त्ता दोवतीए देवीए कत्थइ सुइं वा खुइं वा पवत्तिं वा अलभमाणे जेणेव पंडुराया तेणेव उवा० त्ता पंडुरायं एवं व०-एवं खलु ताओ ! ममं आगासतलंगंसि पसुत्तस्स पासातो दोवती देवी ण णज्जति केणइ देवेण वा दाणवेण वा किन्नरेण वा महोरगेण वा गंधवेण वा हिया वा णीया वा अवक्खित्ता वा ?, इच्छामि णं ताओ ! दोवतीए देवीए सब्बतो समंता मग्गणगवेसणं कयं, तते णं से पंडुराया कोटुंबियपुरिसे सदावेइ त्ता एवं व०-गच्छह णं तुम्भे देवा० ! हत्थिणाउरे नयरे सिंघाडगतियचउक्कचच्चरमहापहपहेसु महया २ सदेणं उग्घोसमाणा २ एवं व०-एवं खलु देवा० ! जुहिद्विल्लस्स रण्णो आगासतलंगंसि सुहपसुत्तस्स पासातो दोवती देवी ण णज्जति केणइ देवेण वा दाणवेण वा किंपुरिसेण वा किन्नरेण वा महोरगेण वा गंधवेण वा हिया वा नीया वा अवक्खित्ता वा, तं जो णं देवाणुप्पिया ! दोवतीए देवीए सुतिं वा जाव पवित्तिं वा परिकहेति तस्स णं पंडुराया विउलं अत्थसंपयाणं दाणं दलयतित्तिकट्ठु घोसणं घोसावेह त्ता एयमाणत्तियं पच्चप्पिणह, तते णं ते कोटुंबियपुरिसा जाव पच्चप्पिणंति, तते णं से पंडुराया दोवतीए देवीए कत्थति सुइं वा जाव अलभमाणे कौंतीं देवीं सदावेति त्ता एवं व०-गच्छह णं तुमं देवाणु० ! बारवतिं णयरीं कण्हस्स वासुदेवस्स एयमट्ठं णिवेदेहि, कण्हे णं परं वासुदेवे दोवतीए मग्गणगवेसणं करेज्जा. अन्नहा न नज्जइ दोवतीए देवीए सुतीं वा खुतीं वा पवत्तिं वा उवलभेज्जा, तते णं सा कौंती देवी पंडुरण्णा एवं वुत्ता समाणी जाव पडिसुणेइ त्ता ण्हाया कयबलिकम्मा हत्थिखंधवरगया हत्थिणाउरं मज्झंमज्झेणं णिग्गच्छइ त्ता कुरु-जणवयं मज्झंमज्झेणं जेणेव सुरट्ठाजणवए जेणेव बारवती णयरी जेणेव अग्गुज्जाणे तेणेव उवा० त्ता हत्थिखंधाओ पच्चोरुहति त्ता कोटुंबियपुरिसे सदा० त्ता एवं व०-गच्छह णं तुम्भे देवा० ! जेणेव बारवई णयरी० णयरीं बारवतिं अणुपविसह त्ता कण्हं वासुदेवं करयल एवं वयह-एवं खलु सामी ! तुम्भं पिउच्छा कौंती देवी हत्थिणाउराओ नयराओ इह हव्वमागया तुम्भं दंसणं कंखति, तते णं ते कोटुंबियपुरिसा जाव कहेंति, तते णं कण्हे वासुदेवे कोटुंबियपुरिसाणं अंतिए सोच्चा णिसम्म हत्थिखंधवरगए हयगय० बारवतीए य मज्झंमज्झेणं जेणेव कौंती देवी तेणेव उ० त्ता हत्थिखंधातो पच्चोरुहति त्ता कौंतीए देवीए पायग्गहणं करेति त्ता कौंतीए देवीए सद्धिं हत्थिखंधं दुरुहति त्ता बारवतीए णयरीए मज्झंमज्झेणं जेणेव सए गिहे तेणेव उवा० त्ता सयं गिहं अणुपविसति, तते णं से कण्हे वासुदेवे कौंतीं देविं ण्हायं कयबलिकम्मं जिमियभुत्तुत्तरागयं जाव सुहासणवरगयं एवं व०-संदिसउ णं पिउच्छा ! किमा-गमणपओयणं ?, तते णं सा कौंती देवी कण्हं वासुदेवं एवं व०-एवं खलु पुत्ता ! हत्थिणाउरे नयरे जुहिद्विल्लस्स आगासतले सुहपसुत्तस्स पासाओ दोवती देवी ण णज्जति केणइ अव-हिया जाव अवक्खित्ता वा, तं इच्छामि णं पुत्ता ! दोवतीए देवीए मग्गणगवेसणं कयं, तते णं से कण्हे वासुदेवे कौंतीं पिउच्छि एवं व०-जं णवरं पिउच्छा ! दोवतीए देवीए कत्थइ सुइं वा जाव लभामि तो णं अहं पायालाओ वा भवणाओ वा अद्धभरहाओ वा समंतओ दोवतिं साहत्थि उवणेमित्तिकट्ठु कौंतीं पिउच्छि सक्कारेति सम्माणेति जाव पडिविसज्जेति, तते

णं सा कौंती देवी कण्हेणं वासुदेवेणं पडिविसज्जिया समाणा जामेव दिमिं पाउ० तामेव दिसिं पडि०, तते णं से कण्हे वासुदेवे कोडुंबियपुरिसे सहा० ता एवं व०-गच्छह णं तुम्हे देवा० ! बारवति एवं जहा पंडू तहा घोसणं घोसावेति जाव पच्चप्पिणंति पंडुस्स जहा, तते णं से कण्हे वासुदेवे अन्नया अंतो अंतेउरगए ओरोहे जाव विहरति, इमं च णं कच्छुल्लए जाव समोवइए जाव णिसीइत्ता कण्हं वासुदेवं कुसलोदंतं पुच्छइ. तते णं से कण्हे वासुदेवे कच्छुल्लं एवं व०-तुमं णं देवा० ! बहूणि गामा जाव अणुपविससि तं अत्थि याइं ते कहिंषि दोवतीए देवीए सुती वा जाव उवलद्धा ?, तते णं से कच्छुल्ले कण्हं वासुदेवं एवं व०-एवं खलु देवा० ! अन्नया धायतीसंडे दीवे पुरत्थिमदं दाहिणइडभरहवासं अवरकंकारायहाणिं गए, तत्थ णं मए पउमनाभस्स रन्नो भवणंसि दोवती देवी जागिसिया दिट्ठपुद्वा यावि होत्था, तते णं कण्हे वासुदेवे कच्छुल्लं एवं व०-तुम्भं चेव णं देवाणु० ! एयं पुबकम्मं, तते णं से कच्छुल्लनारए कण्हेणं वासुदेवेणं एवं वुत्ते समाणे उप्पयणिं विज्जं आवाहेति ता जामेव दिसिं पाउम्भूए तामेव दिसिं पडिगए, तते णं से कण्हे वासुदेवे दूयं सहावेइ ता एवं व०-गच्छह णं तुमं देवा० ! हत्थिणाउरं पंडुस्स रन्नो एयमट्ठं निवेदेहि-एवं खलु देवाणु० ! धायइसंडे दीवे पुरच्छिमद्वे अवरकंकाए रायहाणीए पउमणाभभवणंसि दोवतीए देवीए पउत्ती उवल-द्धा, तं गच्छंतु पंच पंडवा चाउरंगिणीए सेणाए सद्धिं संपरिवुडा पुरत्थिमवेयालीए ममं पडिवालेमाणा चिट्ठंतु, तते णं से दूए जाव भणति पडिवालेमाणा चिट्ठह, तेवि जाव चिट्ठति, तते णं से कण्हे वासुदेवे कोडुंबियपुरिसे सहावेइ ता एवं व०-गच्छह णं तुम्हे देवा० ! सन्नाहियं भेरिं ताडेह, तेवि तालेन्ति, तते णं तीसे सण्णाहियाए भेरीए सहं सोच्चा समुहविजयपा-मोक्खा दसदसारा जाव छप्पणं बलवयसाहस्सीओ सन्नद्धज्ज जाव गहियाउहपहरणा अप्पेगतिया हयगया गयगया जाव वग्गुरापरिक्खित्ता जेणेव सभा सुधम्मा जेणेव कण्हे वासु-देवे तेणेव उवा० करयल जाव वद्धावेति, तते णं कण्हे वासुदेवे हत्थिखंधवरगए सकोरेंटमल्लदामेणं लत्तेणं० सेयवर० हयगय० महया भडचडगरपहकरणं बारवतीं णयरीं मज्झमज्झेणं णिग्गच्छति, जेणेव पुरत्थिमवेयाली तेणेव उवा० ता पंचहिं पंडवेहिं सद्धिं एगयओ मिलइ ता खंधावारणिवेसं करेति ता पोसहसालं अणुपविससि ता सुट्ठियं देवं मणसि करेमाणे २ चिट्ठति, तते णं कण्हस्स वासुदेवस्स अट्ठमभत्तंसि परिणममाणंसि सुट्ठिओ आगतो, भणह देवा० ! जं मए कायबं ?, तते णं से कण्हे वासुदेवे सुट्ठियं एवं व०-एवं खलु देवा० दोवती देवी जाव पउमनाभस्स भवणंसि साहरिया तण्णं तुमं देवा० ! मम पंचहिं पंडवेहिं सद्धिं अप्पच्छट्ठस्स छण्हं रहाणं लवणसमुहे मग्गं वियरेहि, जण्णं अहं अमरकंकारायहाणीं दोवतीए कूवं गच्छामि, तते णं से सुट्ठिए देवे कण्हं वासुदेवं एवं वयासी-किण्णं देवा० ! जहा चेव पउमणाभस्स रन्नो पुबसंगतिएणं देवेणं दोवती जाव संहरिया तहा चेव दोवतिं देविं धायतीसंडाओ दीवाओ भारहाओ जाव हत्थिणापुरं साहरामि उदाहु पउमणाभं गयं सपुरबलवाहणं लवणसमुहे पक्खिवामि ?, तते णं कण्हे वासुदेवे सुट्ठियं देवं एवं व०-मा णं तुमं देवा० ! जाव साहराहि तुमं देवा० ! लवणसमुहे अप्पच्छट्ठस्स छण्हं रहाणं मग्गं वियराहि, सयमेव णं अहं दोवतीए कूवं गच्छामि, तए णं से सुट्ठिए देवे कण्हं वासुदेवं एवं वयासी-एवं होउ, पंचहिं पंडवेहिं सद्धिं अप्पच्छट्ठस्स छण्हं रहाणं लवणसमुहे मग्गं वितरति, तते णं से कण्हे वासुदेवे चाउरंगिणीं सेणं पडिविसज्जेति ता पंचहिं पंडवेहिं सद्धिं अप्पच्छट्ठे ल्हिं रहेहिं लवणसमुहे मज्झमज्झेणं वीतीवयति जेणेव अमरकंका रायहाणी जेणेव अमरकंकाए अग्गुज्जाणे तेणेव उवागच्छइ ता रहं ठवेइ ता दारुयं सारहिं सहावेति एवं व०-गच्छह णं तुमं देवा० ! अमर-कंकारायहाणीं अणुपविसाहि ता पउमणाभस्स रण्णो वामेणं पाएणं पायपीढं अक्कमित्ता कुंतग्गेणं लेहं पणामेहि तिवलियं भिउडिं णिडाले साहट्ठु आसुरुत्ते रुट्ठे कुद्धे कुविए चंडि-क्खिए एवं व०-हंभो पउमणाहा ! अपत्थियपत्थिया दुरंतपंतलक्खणा हीणपुन्नचाउहसा सिरीहिरिधीपरिवज्जिया अज्ज ण भवसि, किंत्तु तुमं ण याणासि कण्हस्स वासुदेवस्स भगिणिं दोवतिं देविं इहं दृष्टं आणमाणे ?, तं एयमवि गए पच्चप्पिणाहि णं तुमं दोवतिं देविं कण्हस्स वासुदेवस्स अहवणं जुद्धसज्जे णिग्गच्छाहि, एस णं कण्हे वासुदेवे पंचहिं पंडवेहिं अप्पच्छट्ठे दोवतीदेवीए कूवं हव्वमागए, तते णं से दारुए सारही कण्हेणं वासुदेवेणं एवं वुत्ते समाणे हट्ठतुट्ठे जाव पडिसुणेइ ता अमरकंकारायहाणिं अणुपविससि ता जेणेव पउमनाहे तेणेव उवा० ता करयल जाव वद्धावेत्ता एवं व०-एस णं सामी ! मम विणयपडिवत्ती, इमा अन्ना मम सामिस्स समुहाणत्तित्तिकट्ठु आसुरुत्ते वामपाएणं पायपीढं अणुक्कमति ता कौंतग्गेणं लेहं पणामति ता जाव कूवं हव्वमागए, तते णं से पउमणाभे दारुणेणं सारहिणा एवं वुत्ते समाणे आसुरुत्ते तिवलिं भिउडिं निडाले साहट्ठु एवं व०-णो अप्पिणामि णं अहं देवा० ! कण्हस्स वासुदेवस्स दोवतिं, एस णं अहं सयमेव जुद्धसज्जो णिग्गच्छामित्तिकट्ठु दारुयं सारहिं एवं व०-केवलं भो ! रायमत्थेसु दूये अवज्जेत्तिकट्ठु अमक्कारिय अमम्माणिय अव-हारेणं णिच्छुभावेति, तते णं से दारुए सारही पउमणाभेणं असक्कारिय जाव णिच्छुटे समाणे जेणेव कण्हे वासुदेवे तेणेव उ० ता करयल० कण्हं जाव एवं व०-एवं खलु अहं सामी ! तुम्भं वयणेणं जाव णिच्छुभावेति, तते णं से पउमणाभे बलवाउयं सहावेति ता एवं व०-खिप्पामेव भो देवाणु० ! आभिसेक्कं हत्थिरयणं पडिकप्पेह, तयाणंतरं च णं छेयायरियउव-देसमइविकप्पणाविगप्पेहिं जाव उवणेति, तते णं से पउमनाहे सन्नद्ध० अभिसेयं० दुरूहति ता हयगय जेणेव कण्हे वासुदेवे तेणेव पहारेत्थ गमणाए, तते णं से कण्हे वासुदेवे (११८)

पउमणाभं रायाणं एज्जमाणं पासति ता ते पंच पंडवे एवं व०-हंभो दारगा ! किञ्चं तुब्भे पउमनाभेणं सद्धिं जुज्झहिह उयाहु पेच्छहिह ?, तते णं ते पंच पंडवा कण्हं वासुदेवं एवं व०-अम्हे णं सामी ! जुज्झामो तुब्भे पेच्छह, तते णं पंच पंडवे सण्णद्ध जाव पहरणा रहे दुरूहंति ता जेणेव पउमनाभे राया तेणेव उ० ता एवं व०-अम्हे वा पउमणाभे वा रायत्ति-कट्टु पउमनाभेणं सद्धिं संपलग्गा यावि होत्था, तते णं से पउमनाभे राया ते पंच पंडवे खिप्पामेव हयमहियपवरविवडियचिन्धयपढागा जाव दिसोदिसिं पडिसेहित्थत्ति, तते णं ते पंच पंडवा पउमनाभेणं रन्ना हयमहियपवरविवडिय जाव पडिसेहिया समाणा अत्थामा जाव आधारणिज्जत्तिकट्टु जेणेव कण्हे वासुदेवे तेणेव उवा०, तते णं से कण्हे वासुदेवे ते पंच पंडवे एवं व०-कहणं तुब्भे देवाणु० ! पउमणाभेण रन्ना सद्धिं संपलग्गा ?, तते णं ते पंच पंडवा कण्हं वासुदेवं एवं व०-एवं खलु देवा० ! अम्हे तुब्भेहिं अब्भणुन्नाया समाणा सन्नद्ध रहे दुरूहामो ता जेणेव पउमनाभे जाव पडिसेहेति, तते णं से कण्हे वासुदेवे ते पंच पंडवे एवं व०-जति णं तुब्भे देवा० ! एवं वयंता अम्हे णो पउमनाभे रायत्तिकट्टु पउमनाभेणं सद्धिं संपलग्गंता तो णं तुब्भे णो पउमणाहे हयमहियपवर जाव पडिसेहिया, तं पेच्छह णं तुब्भे देवा० ! अहं नो पउमनाभे रायत्तिकट्टु पउमनाभेणं रन्ना सद्धिं जुज्झामि रहं दुरूहति ता जेणेव पउमनाभे राया तेणेव उवाग० ता सेयं गोखीरहारधवलं तणसोल्लियसिंदुवारकुंदेंदुसन्निगासं निययबलस्स हरिसज्जणं रिउसेण्णविणासकरं पंचवण्णं संखं परामुसति ता मुहवायपूरियं करेति, तते णं तस्स पउमणाहस्स तेणं संखसद्देणं बलतिभाए हते जाव पडिसेहिए, तते णं से कण्हे वासुदेवे धणुं परामुसति वेढो, धणुं पूरेति ता धणुसहं करेति, तते णं तस्स पउमनाभस्स दोच्चे बलतिभाए तेणं धणुसद्देणं हयमहिय जाव पडिसेहिए, तते णं से पउमनाभे राया तिभागबलावसेसे अत्थामे अबले अवीरिए अपुरिसक्कारपरक्कमे आधार-णिज्जत्तिकट्टु सिग्घं तुरियं जेणेव अमरकंका तेणेव उ० ता अमरकंका रायहाणिं अणुपविसति ता दारातिं पिहेति ता रोहसज्जे चिट्ठति, तते णं से कण्हे वासुदेवे जेणेव अमरकंका तेणेव उ० ता रहं ठवेति ता रहातो पच्चोरुहति ता वेउच्चियसमुग्घाएणं समोहणति, एगं महं णरसीहरूवं विउच्चति ता महया २ सद्देणं पाददहरियं करेति, तते णं से कण्हेणं वासुदेवेणं महया २ सद्देणं पाददहरणं कएणं समाणेणं अमरकंका रायहाणीं संभग्गपागारगोपुराट्टालयचरियतोरणपल्हत्थियपवरभवणसिरिधरा सरसरस्स धरणियले सन्निवइया, तते णं से पउमनाभे राया अमरकंका रायहाणिं संभग्ग जाव पासित्ता भीए दोवतिं देविं सरणं उवेति, तते णं सा दोवई देवी पउमनाभं रायं एवं व०-किण्णं तुमं देवा० ! न जाणसि कण्हस्स वासुदेवस्स उत्तमपुरिसस्स विप्पियं करेमाणे ममं इह हव्वमाणेसि ?, तं एवमवि गए गच्छह णं तुमं देवा० ! ण्हाए उल्लपडसाडए अवचूलगवत्थणियत्थे अंतेउरपरियालसंपरिवुडे अग्गाइं वराइं रयणाइं गहाय ममं पुरतो काउं कण्हं वासुदेवं करयलपायपडिए सरणं उवेहि, पणिवइयवच्छला णं देवाणुप्पिया ! उत्तमपुरिसा, तते णं से पउमनाभे दोवतीए देवीए एयमट्टं पडिसुणेति ता ण्हाए जाव सरणं उवेति ता करयल० एवं व०-दिट्ठा णं देवाणुप्पियाणं इड्ढी जाव परक्कमे तं खामेमि णं देवाणुप्पिया ! जाव खमंतु णं जाव णाहं भुज्जो २ एवंकरणयाएत्तिकट्टु पंजलिवुडे पायवडिए कण्हस्स वासुदेवस्स दोवतिं देविं साहत्थि उवणेति, तते णं से कण्हे वासुदेवे पउमनाभं एवं व०-हंभो पउमनाभा ! अपत्थियपत्थिया० किण्णं तुमं ण जाणसि मम भगिणिं दोवतीं देवीं इह हव्वमाणमाणे ? तं एवमवि गए णत्थि ते ममाहिंतो इयाणिं भयमत्थित्तिकट्टु पउमनाभं पडिविसज्जेति, दोवतिं गिण्हति ता रहं दुरूहेति ता जेणेव पंच पंडवा तेणेव उवा० ता पंचण्हं पंडवाणं दोवतिं देविं साहत्थि उवणेति, तते णं से कण्हे पंचहिं पंडवेहिं सद्धिं अप्पच्छट्टे छहिं रहेहिं लवणसमुहं मज्झंमज्झेणं जेणेव जंबुदीवे दीवे जेणेव भारहे वासे तेणेव पहरेत्य गमणाए । १३० । तेणं कालेणं० धायतिसंडे दीवे पुरच्छिमद्धे भरहे वासे चंपा णामं णयरी होत्था, पुण्णभद्दे चेतिए, तत्थ णं चंपाए नयरीए कविले णामं वासुदेवे राया होत्था, महया हिमवंत० वण्णओ, तेणं कालेणं० मुणिसुव्वए अरहा चंपाए पुण्णभद्दे समोसडे, कपिले वासुदेवे धम्मं सुणेति, तते णं से कविले वासुदेवे मुणिसुव्वयस्स अरहतो धम्मं सुणेमाणे कण्हस्स वासुदेवस्स संखसहं सुणेति, तते णं तस्स कविलस्स वासुदेवस्स इमेयारूवे अब्भत्थिए० समुप्पज्जित्था-किं मण्णे धायइसंडे दीवे भारहे वासे दोच्चे वासुदेवे समु-प्पण्णे ? जस्स णं अयं संखसद्दे ममंपिव मुहवायपूरिते वियंभति, मुणिसुव्वए अरहा कविलं वासुदेवं एवं व०-से णूणं ते कविला वासुदेवा ! मम अंतिए धम्मं णिसामेमाणस्स संखसहं आकणित्ता इमेयारूवे अब्भत्थिए०-किं मन्ने जाव वियंभइ, से णूणं कविला वासुदेवा ! अयमट्टे समट्टे ?, हंता ! अत्थि, नो खलु कविला ! एवं भूयं वा० जन्नं एगे खेत्ते एगे जुगे एगे समए दुवे अरहंता वा चक्कवट्ठी वा बलदेवा वा वासुदेवा वा उप्पज्जिसु उप्पज्जिति उप्पज्जिस्संति वा, एवं खलु वासुदेवा ! जंबुदीवाओ भारहाओ वासाओ हत्थिणाउरणयराओ पंडुस्स रण्णो सुण्हा पंचण्हं पंडवाणं भारिया दोवती देवी तव पउमनाभस्स रण्णो पुव्वसंगतिएणं देवेणं अमरकंकाणयरिं साहरिया, तते णं से कण्हे वासुदेवे पंचहिं पंडवेहिं सद्धिं अप्पच्छट्टे छहिं रहेहिं अमरकंका रायहाणिं दोवतीए देवीए कूवं हव्वमागए, तते णं तस्स कण्हस्स वासुदेवस्स पउमनाभेणं रण्णा सद्धिं संगामं संगामेमाणस्स अयं संखसद्दे तव मुहवाया० इव इट्ठे कंते

इहेव वियंभति, तए णं से कविले वासुदेवे मुणिसुब्रयं वंदति० त्ता एवं व०-गच्छामि णं अहं भंते ! कण्हं वासुदेवं उत्तमपुरिसं सरिसपुरिसं पासामि, तए णं मुणिसुब्रए अरहा कविलं वासुदेवं एवं व०-नो खलु देवा० ! एवं भूयं वा० जण्णं अरहंता वा अरहंतं पासंति चक्कवट्ठी वा चक्कवट्ठिं पासंति बलदेवा वा बलदेवं पासंति वासुदेवा वा वासुदेवं पासंति, तहविय णं तुमं कण्हस्स वासुदेवस्स लवणसमुदं मज्झंमज्झेणं वीतिवयमाणस्स सेयापीयाइं धयग्गातिं पासिहिसि, तते णं से कविले वासुदेवे मुणिसुब्रयं वंदति० त्ता हत्थिखंधं दुरूहति त्ता सिग्घं २ जेणेव वेलाउले तेणेव उ० त्ता कण्हस्स वासुदेवस्स लवणसमुदं मज्झंमज्झेणं वीतिवयमाणस्स सेयापीयाइं धयग्गातिं पासति त्ता एवं वयइ-एस णं मम सरिसपुरिसे उत्तमपुरिसे कण्हे वासुदेवे लवणसमुदं मज्झंमज्झेणं वीतिवयतिक्किट्ठु पंचयन्नं संखं परामुसति मुहवायपूरियं करेति, तते णं से कण्हे वासुदेवे कविलस्स वासुदेवस्स संखसइं आयन्नेति त्ता पंचयन्नं जाव पूरियं करेति, तते णं दोवि वासुदेवा संखसइसामायारिं करेति, तते णं से कविले वासुदेवे जेणेव अमरकंका तेणेव उ० अमरकंकां रायहाणिं संभग्गतोरणं जाव पासति त्ता पउम-णाभं एवं व०-किन्नं देवाणुप्पिया ! एसा अमरकंका संभग्ग जाव सन्निवइया ?, तते णं से पउमणाहे कविलं वासुदेवं एवं व०-एवं खलु सामी ! जंबुदीवाओ दीवाओ भारहाओ वासाओ इह हव्वमागम्म कण्हेणं वासुदेवेणं तुब्भे परिभूय अमरकंका जाव सन्निवाडिया, तते णं से कविले वासुदेवे पउमणाहस्स अंतिए एयमट्ठं सोच्चा पउमणाहं एवं व०-हंभो ! पउमणाभा ! अपत्थियपत्थिया किन्नं तुमं न जाणसि मम सरिसपुरिसस्स कण्हस्स वासुदेवस्स विप्पियं करेमाणे ?, आसुरुत्ते जाव पउमणाहं णिबिसयं आणवेति, पउमणाहस्स पुत्तं अमरकंकारायहाणीए महया २ रायाभिसेएणं अभिसिंचति जाव पडिगते । १३१ । तते णं से कण्हे वासुदेवे लवणसमुदं मज्झंमज्झेणं वीतिवयति, ते पंच पंडवे एवं व०-गच्छह णं तुब्भे देवा० ! गंगामहानदिं उत्तरह जावताव अहं सुट्ठियं लवणाहिवइं पासामि, तते णं ते पंच पंडवा कण्हेणं वासुदेवेणं एवं वुत्ता समाणा जेणेव गंगामहानदी तेणेव उ० त्ता एगट्ठि-याए णावाए मग्गणगवेसणं करेति त्ता एगट्ठियाए नावाए गंगामहानदिं उत्तरंति त्ता अण्णमण्णं एवं वयन्ति-फहू णं देवा० ! कण्हे वासुदेवे गंगामहाणदिं बाहाहिं उत्तरित्तए उदाहु णो पभू उत्तरित्तएत्तिकट्ठु एगट्ठियाओ नावाओ णूमेति त्ता कण्हं वासुदेवं पडिवालेमाणा २ चिट्ठंति, तते णं से कण्हे वासुदेवे सुट्ठियं लवणाहिवइं पासति त्ता जेणेव गंगा महाणदी तेणेव उ० त्ता एगट्ठियाए सब्बओ समंता मग्गणगवेसणं करेति त्ता एगट्ठियं अपासमाणे एगाए बाहाए रहं सतुरगं ससारहिं गेण्हइ एगाए बाहाए गंगं महाणदिं बासट्ठिं जोयणातिं अद्वजोयणं च विच्छिन्नं उत्तरिउं पयत्ते यावि होत्था, तते णं से कण्हे वासुदेवे गंगामहाणदीए बहुमज्झदेसभागं संपत्ते समाणे संते तंते परितंते बद्धसेए जाए यावि होत्था, तते णं कण्हस्स वासुदेवस्स इमे एयारूवे अब्भत्थिए जाव समुप्पजित्था-अहो णं पंच पंडवा महाबलवगा जेहिं गंगामहाणदी बासट्ठिं जोयणाइं अद्वजोयणं च विच्छिण्णा बाहाहिं उत्ति-ण्णा, इच्छंतएहिं णं पंचहिं पंडवेहिं पउमणाभे राया जाव णो पडिसेहिए, तते णं गंगा देवी कण्हस्स वासुदेवस्स इमं एयारूवं अब्भत्थियं जाव जाणित्ता थाहं वितरति, तते णं से कण्हे वासुदेवे मुहुत्तंतरं समासासति त्ता गंगामहाणदिं बावट्ठिं जाव उत्तरति त्ता जेणेव पंच पंडवा तेणेव उवा० पंच पंडवे एवं व०-अहो णं तुब्भे देवा० ! महाबलवगा जेणं तुब्भेहिं गंगामहाणदी बासट्ठिं जाव उत्तिण्णा, इच्छंतएहिं तुब्भेहिं पउम जाव णो पडिसेहिए, तते णं ते पंच पंडवा कण्हेणं वासुदेवेणं एवं वुत्ता समाणा कण्हं वासुदेवं एवं व०-एवं खलु देवा० ! अम्हे तुब्भेहिं विसजिया समाणा जेणेव गंगा महाणदी तेणेव उवा० त्ता एगट्ठियाए मग्गणगवेसणं तं चेव जाव णूमेमो तुब्भे पडिवालेमाणा चिट्ठामो, तते णं से कण्हे वासुदेवे तेसिं पंचण्हं पंडवाणं एयमट्ठं सोच्चा णिसम्म आसुरुत्ते जाव तिवलियं० एवं व०-अहो णं जया मए लवणसमुदं दुवे जोयणसयसहस्साविच्छिण्णं वीतीवइत्ता पउमणाभं हयमहिय जाव पडिसेहित्ता अमरकंका संभग्ग० दोवती साहत्थि उवणीया तया णं तुब्भेहिं मम माहप्पं ण विण्णायं इयाणिं जाणिस्सहत्तिकट्ठु लोहदंडं परामुसति, पंचण्हं पंडवाणं रहे चूरेति त्ता णिबिसए आणवेति त्ता तत्थ णं रहमइणे णामं कोड्डे णिविट्ठे, तते णं से कण्हे वासुदेवे जेणेव सए खंधावारे तेणेव उवागच्छइ त्ता सएणं खंधावारेणं सद्धिं अभिसमन्नागए यावि होत्था, तते णं से कण्हे वासुदेवे जेणेव बारवई णयरी तेणेव उवा० त्ता अणुपविसति । १३२ । तते णं ते पंच पंडवा जेणेव हत्थिणाउरे तेणेव उवागच्छन्ति त्ता जेणेव पंडू तेणेव उ० त्ता करयल एवं व०-एवं खलु ताओ ! अम्हे कण्हेणं णिबिसया आणत्ता, तते णं पंडुराया ते पंच पंडवे एवं व०-कहण्णं पुत्ता ! तुब्भे कण्हेणं वासुदेवेणं णिबिसया आणत्ता ?, तते णं ते पंच पंडवा पंडुरायं एवं व०-एवं खलु ताओ ! अम्हे अमरकंकातो पडिणियत्ता लवणसमुदं दोभि जोयणसयसहस्साइं वीतिवतित्ता(त्था), तए णं से कण्हे अम्हे एवं वयासी-गच्छह णं तुब्भे देवा० ! गंगामहाणदिं उत्तरह जाव चिट्ठह ताव अहं एवं तहेव जाव चिट्ठामो, तते णं से कण्हे वासुदेवे सुट्ठियं लवणाहिवइं दद्धूण तं चेव सब्बं नवरं कण्हस्स चित्ता ण जुज्ज(वुच्च)ति जाव अम्हे णिबिसए आणवेति, तए णं से पंडुराया ते पंच पंडवे एवं व०-दुट्ठु णं पुत्ता ! कयं कण्हस्स वासुदेवस्स विप्पियं करेमाणेहिं, तते णं से पंडू राया कौंतिं देविं सहावेति त्ता

एवं व०-गच्छ णं तुमं देवा० ! बारवतिं कण्हस्स वासु० णिवेदेहि-एवं खलु देवा० ! तुम्हे पंच पंडवा णिविसया आणत्ता तुमं च णं देवा० ! दाहिणड्ढभरहस्स सामी तं संदिसंतु णं देवा० ! ते पंच पंडवा कयरं दिसिं वा विदिसं वा गच्छंतु ? , तते णं सा कौंती पंडुणा एवं वुत्ता समाणी हत्थिखंधं दुरूहति ता जहा हेट्ठा जाव संदिसंतु णं पिउत्था ! किमागमणपओ-यणं ? , तते णं सा कौंती कण्हं वासुदेवं एवं व०-एवं खलु पुत्ता ! तुम्हे पंच पंडवा णिविसया आणत्ता तुमं च णं दाहिणड्ढभरह जाव विदिसं वा गच्छंतु ? , तते णं से कण्हे वासुदेवे कौंतिं देविं एवं व०-अपूर्ववयणा णं पिउत्था ! उत्तमपुरिसा वासुदेवा बलदेवा चक्रवट्ठी तं गच्छंतु णं देवाणु० ! पंच पंडवा दाहिणिहं वेयालिं तत्थ पंडुमहुरं णिवेसंतु ममं अदिट्ठसेवगा भवंतुत्तिकट्ठ कौंतिं देविं सक्कारेति सम्माणेति जाव पडिविसज्जेति, तते णं सा कौंती देवी जाव पंडुस्स एयमट्ठं णिवेदेति, तते णं पंडू पंच पंडवे सदावेति ता एवं व०-गच्छह णं तुम्हे पुत्ता ! दाहिणिहं वेयालिं तत्थ णं तुम्हे पंडुमहुरं णिवेसेह, तते णं पंच पंडवा पंडुस्स रण्णो जाव तहत्ति पडिसुणेंति सबलवाहणा हयगय० हत्थिणाउराओ पडिणिक्खमंति ता जेणेव दक्खिणिह्ठा वेयाली तेणेव उवा० ता पंडुमहुरं नगरिं निवेसेति ता तत्थ णं ते विपुलभोगसमितिसमण्णागयां यावि होत्था । १३३ । तते णं सा दोवई देवी अन्नया कयाई आवण्ण-सत्ता जाया यावि होत्था, तते णं सा दोवती देवी णवण्हं मासाणं जाव सुरूवं दारगं पयाया सूमालं णिवत्तबारसाहस्स इमं एयारूवं० जम्हा णं अम्हं एस दारए पंचण्हं पंडवाणं पुत्ते दोवतीए अत्तए तं होउ अम्हं इमस्स दारगस्स णामधेज्जं पंडुसेणे, तते णं तस्स दारगस्स अम्मापियरो णामधेज्जं करेन्ति पंडुसेणेत्ति, बावत्तरिं कलाओ जाव भोगसमत्थे जाए जुवराया जाव विहरति, थेरा समोसठा परिसा निग्गया पंडवा निग्गया धम्मं सोच्चा एवं व०-जं णवरं देवा० ! दोवतिं देविं आपुच्छामो पंडुसेणं च कुमारं रज्जे ठावेमो ततो पच्छा देवा० अंतिए मुंडे भवित्ता जाव पव्वयामो, अहासुहं देवा० !, तते णं ते पंच पंडवा जेणेव सए गिहे तेणेव उवा० ता दोवतिं देविं सदावेति ता एवं व०-एवं खलु देवा० ! अम्हेहिं थेराणं अंतिए धम्मे णिसंते जाव पव्वयामो तुमं देवाणुप्पिए ! किं करेसि ? , तते णं सा दोवती देवी ते पंच पंडवे एवं व०-जति णं तुम्हे देवा० ! संसारभउव्विग्गा पव्वयह ममं के अण्णे आलंवे वा जाव भवि-स्सति ? , अहंपि य णं संसारभउव्विग्गा देवाणुप्पिएहिं सद्धिं पव्वतिस्सामि, तते णं ते पंच पंडवा० पंडुसेणस्स अभिसेओ जाव राया जाए रज्जं पसाहेमाणे विहरति, तते णं ते पंच पंडवा दोवती य देवी अन्नया कयाई पंडुसेणं रायाणं आपुच्छंति, तते णं से पंडुसेणे राया कोडुंबियपुरिसे सदावेति ता एवं वयासी-खिप्पामेव भो ! देवाणु० ! निक्खमणाभिसेयं जाव उवट्ठ-वेह पुरिससहस्सवाहणीओ सिबियाओ उवट्ठवेह जाव पच्चोरुहंति जेणेव थेरा तेणेव आलित्ते णं जाव समणा जाया चोदस पुव्वाइं अहिज्जंति ता बहूणि वासाणि छट्ठमदसमदुवालसेहिं मासद्धमासखमणेहिं अप्पाणं भावेमाणा विहरंति । १३४ । तते णं सा दोवती देवी सीयातो पच्चोरुहति जाव पव्वतिया सुव्वयाए अज्जाए सिस्सिणीयत्ताए दलयति, इक्कारस अंगाइं अहि-ज्जइ बहूणि वासाणि छट्ठमदसमदुवालसेहिं जाव विहरति । १३५ । तते णं थेरा भगवंतो अन्नया कयाई पंडुमहुरातो णयरीतो सहसंबवणाओ उज्जाणाओ पडिणिक्खमंति ता बहिया जणवयविहारं विहरंति, तेणं कालेणं० अरिहा अरिट्ठनेमी जेणेव सुरट्ठाजणवए तेणेव उवा० ता सुरट्ठाजणवयंसि संजमेणं तवसा अप्पाणं भावेमाणे विहरति, तते णं बहुजणो अन्नम-न्नस्स एवमातिकवइ०-एवं खलु देवाणुप्पिया ! अरिहा अरिट्ठनेमी सुरट्ठाजणवए जाव वि०, तते णं से जुहिट्ठिल्लपामोक्खा पंच अणगारा बहुजणस्स अंतिए एयमट्ठं सोच्चा अन्नमन्नं सदावेति ता एवं व०-एवं खलु देवाणु० ! अरहा अरिट्ठनेमी पुव्वाणु० जाव विहरइ, तं सेयं खलु अम्हं थेरा आपुच्छित्ता अरहं अरिट्ठनेमिं वंदणाए गमित्तए, अन्नमन्नस्स एयमट्ठं पडि-सुणेंति ता जेणेव थेरा भगवंतो तेणेव उवा० ता थेरे भगवंते वंदंति नमंसंति ता एवं व०-इच्छामो णं तुम्हेहिं अब्भणुन्नाया समाणा अरहं अरिट्ठनेमिं जाव गमित्तए, अहासुहं देवा० !, तते णं ते जुहिट्ठिल्लपामोक्खा पंच अणगारा थेरेहिं अब्भणुन्नाया समाणा थेरे भगवंते वंदंति णमंसंति ता थेराणं अंतियाओ पडिणिक्खमंति मासंमासेणं अणिक्खित्तेणं तवोकम्मेणं० गामाणुगामं दूईज्जमाणा जाव जेणेव हत्थकप्पे नयरे तेणेव उवा० हत्थकप्पस्स बहिया सहसंबवणे उज्जाणे जाव विहरंति, तते णं ते जुहिट्ठिल्लवज्जा चत्तारि अणगारा मासखमणपारणए पढमाए पोरसीए सज्झायं करेंति बीयाए एवं जहा गोयमसामी णवरं जुहिट्ठिल्लं आपुच्छंति जाव अडमाणा बहुजणसदं णिसामंति-एवं खलु देवा० ! अरहा अरिट्ठनेमी उज्जितसेल-सिहरे मासिएणं भत्तेणं अपाणएणं पंचहिं छत्तीसेहिं अणगारसएहिं सद्धिं कालगए जाव पहीणे, तते णं ते जुहिट्ठिल्लवज्जा चत्तारि अणगारा बहुजणस्स अंतिए एयमट्ठं सोच्चा हत्थ-कप्पाओ पडिणिक्खमंति ता जेणेव सहसंबवणे उज्जाणे जेणेव जुहिट्ठिल्ले अणगारे तेणेव उवा० ता भत्तपाणं पच्चुवेक्खंति ता गमणागमणस्स पडिक्कमंति ता एसणमणेसणं आलो-एंति ता भत्तपाणं पडिदंसेंति ता एवं व०-एवं खलु देवाणुप्पिया ! जाव कालगए तं सेयं खलु अम्हं देवाणुप्पिया ! इमं पुव्वगहियं भत्तपाणं परिट्ठवेत्ता सेत्तुज्जं पव्वयं सणियं सणियं दुरूहित्तए संलेहणाए झूसणाझूसियाणं कालं अणवकंखमाणाणं विहरित्तएत्तिकट्ठु अण्णमण्णस्स एयमट्ठं पडिसुणेंति ता तं पुव्वगहियं भत्तपाणं एगंते परिट्ठवेत्ति ता जेणेव सेत्तुज्जे पव्वए

तेणेव उवागच्छइ ता सेत्तुअं पव्वयं दुरूहंति ता जाव कालं अणवकंखमाणा विहरंति, तते णं ते जुहिद्विहपामोक्खा पंच अणगारा सामाइयमातियातिं चोदस पुद्वाइं० बहूणि वासाणि दोमासियाए संलेहणाए अत्ताणं झोसित्ता जस्सट्टाए कीरति णग्गभावे जाव तमट्टमाराहंति ता अणंते जाव केवलवरणाणदंसणे समुप्पन्ने जाव सिद्धा । १३६ । तते णं दोवती अज्जा सुवयाणं अज्जियाणं अंतिए सामाइयमाइयाइं एक्कारस अंगातिं अहिज्जति ता बहूणि वासाणि मासियाए संलेहणाए० आलोइयपडिक्कंता कालमासे कालं किच्चा बंभलोए उववन्ना, तत्थ णं अत्थेगतियाणं देवाणं दस सागरोवमाइं ठिती प० तत्थ णं दुवतिस्स देवस्स दस सागरोवमाइं ठिती पन्नत्ता, से णं भंते ! दुवए देवे ततो जाव महाविदेहे वासे जाव अंतं का- हिति, एवं खलु जंबू ! समणेणं० सोलसमस्स० अयमट्टे पण्णत्तेत्तिबेमि । १३७ ॥ इति अवरकंज्झयणं १६ ॥ जति णं भंते ! समणेणं भगवया महावीरेण जाव संपत्तेणं सोलसमस्स णायज्झयणस्स अयमट्टे पण्णत्ते सत्तरसमस्स णं णायज्झयणस्स के अट्टे पन्नत्ते ?, एवं खलु जंबू ! तेणं कालेणं० हत्थिसीसे नयरे होत्था वण्णओ, तत्थ णं कणगकेऊ णामं राया होत्था वण्णओ, तत्थ णं हत्थिसीसे णयरे बहवे संजुत्ताणावावाणियगा परिवसंति अड्ढा जाव बहुजणस्स अपरिभूया यावि होत्था, तते णं तेसिं संजुत्ताणावावाणियगाणं अन्नया एगयओ जहा अरहण्णओ जाव लण्णसमुहं अणेगाइं जोयणसयाइं ओगाढा यावि होत्था, तते णं तेसिं जाव बहूणि उप्पातियसयातिं जहा मागंदियदारगाणं जाव कालियवाए य तत्थ समु- त्थिए, तते णं सा णावा तेणं कालियवाएणं आघोलिज्जमाणी २ संचालिज्जमाणी २ संखोहिज्जमाणी २ तत्थेव परिभमति, तते णं से णिज्जामए णट्टमतीते णट्टसुतीते णट्टसण्णे मूढदि- साभाए जाए यावि होत्था, ण जाणइ कयरं देसं वा दिसं वा विदिसं वा पोयवहणे अवहितत्तिकट्टु ओहयमणसंकप्पे जाव झियायति, तते णं ते बहवे कुच्छिधारा य कण्णधारा य गम्भिह्ठगा य संजुत्ताणावावाणियगा य जेणेव से णिज्जामए तेणेव उवा० ता एवं व०-किञ्चं तुमे देवा० ! ओहयमणसंकप्पा जाव झियायह ?, तते णं से णिज्जामए ते बहवे कुच्छिधारा य० एवं व०-एवं खलु देवा० ! णट्टमतीते जाव अवहिएत्तिकट्टु ततो ओहयमणसंकप्पे जाव झियामि, तते णं कण्णधारा० तस्स णिज्जामयस्स अंतिए एयमट्टं सोच्चा णिसम्म भीया० ण्हाया कयबलिकम्मा करयल० बहूणं इंदाण य खंधाण य जहा मल्लिनाए जाव उवायमाणा २ चिट्ठंति, तते णं से णिज्जामए ततो मुहुत्तंतरस्स लद्धमतीते० अमूढदिसाभाए जाए यावि होत्था, तते णं से बहवे कुच्छिधारा य० एवं व०-एवं खलु अहं देवा० ! लद्धमतीए जाव अमूढदिसाभाए जाए, अम्हे णं देवा० ! कालियदीवंतेणं संवूढा, एस णं कालियदीवे आलो- क्कति, तते णं ते कुच्छिधारा य० तस्स णिज्जामगस्स अंतिए सोच्चा हट्टतुट्टा पयक्खिणाणुकूलेणं वाएणं जेणेव कालियदीवे तेणेव उवागच्छंति ता पोयवहणं लंबंति ता एगट्टियाहिं कालियदीवं उत्तरंति, तत्थ णं बहवे हिरण्णागरे य सुवण्णागरे य रयणागरे य वइरागरे य, बहवे तत्थ आसे पासंति, किं ते ?, हरिरेणुसोणिसुत्तगा आईण० वेढो, तते णं ते आसा ते वाणि- यए पासंति तेसिं गंधं अग्घायंति ता भीया तत्था उव्विग्गा उव्विग्गमणा ततो अणेगाइं जोइणातिं उब्भमंति, ते णं तत्थ पउरगोयरा पउरतणपाणिया निब्भया निरुव्विग्गा सुहंसुहेणं विहरंति, तए णं संजुत्तानावावाणियगा अण्णमण्णं एवं व०-किण्हं अम्हे देवा० ! आसेहिं ?, इमे य णं बहवे हिरण्णागरा य सुवण्णागरा य रयणागरा य वइरागरा य तं सेयं खलु अम्हे हिरण्णस्स य सुवण्णस्स य रयणस्स य वइरस्स य पोयवहणं भरित्तएत्तिकट्टु अन्नमन्नस्स एयमट्टं पडिसुणेंति ता हिरण्णस्स य सुवण्णस्स य रयणस्स य वइरस्स य तणस्स य अण्ण- स्स य कट्टस्स य पाणियस्स य पोयवहणं भरेंति ता पयक्खिणाणुकूलेणं वाएणं जेणेव गंभीरपोयवहणपट्टणे तेणेव उ० ता पोयवहणं लंबंति ता सगडीसागडं सज्जेति ता तं हिरण्णं जाव वइरं च एगट्टियाहिं पोयवहणाओ संचारेंति ता सगडीसागडं संजोइंति ता तेणेव हत्थिसीसए नयरे तेणेव उवा० ता हत्थिसीसयस्स नयरस्स बहिया अग्गुज्जाणे सत्थणिवेसं करेंति ता सगडीसागडं मोएंति ता महत्थं जाव पाहुडं गेण्हंति ता हत्थिसीसं च नगरं अणुपविसंति ता जेणेव कणगकेऊ तेणेव उ० ता जाव उवणेंति, तते णं से कणगकेऊ तेसिं संजुत्ताणावावाणियगाणं तं महत्थं जाव पडिच्छति । १३८ । ते संजुत्ताणावावाणियगा एवं व०-तुब्भे णं देवा० ! गामागर जाव आहिंडह लवणसमुहं च अभिक्खणं० पोयवहणेणं ओगाहह तं अत्थि याइं केइ भे कहिंचि अच्छेरए दिट्ठपुव्वे ?, तते णं ते संजुत्ताणावावाणियगा कणगकेऊ एवं व०-एवं खलु अम्हे देवा० ! इहेव हत्थिसीसे नयरे परिवसामो तं चेव जाव कालियदीवंतेणं संवूढा, तत्थ णं बहवे हिरण्णागरा य जाव बहवे तत्थ आसे, किं ते ?, हरिरेणु जाव अणेगाइं जोयणाइं उब्भमंति, तते णं सामी ! अम्हेहिं कालियदीवे ते आसा अच्छे- रए दिट्ठपुव्वे, तते णं से कणगकेऊ तेसिं संजत्तगाणं अंतिए एयमट्टं सोच्चा ते संजुत्तए एवं व०-गच्छह णं तुब्भे देवा० ! मम कोडुंबियपुरिसेहिं सद्धिं कालियदीवाओ ते आसे आणेह, तते णं से संजुत्ता० कणगकेऊ एवं व०-एवं सामित्तिकट्टु आणाए विणएणं वयणं पडिसुणेंति, तते णं कणगकेऊ कोडुंबियपुरिसे सहावेति ता एवं व०-गच्छह णं तुब्भे देवा० ! संजु- त्तएहिं सद्धिं कालियदीवाओ मम आसे आणेह, तेवि पडिसुणेंति, तते णं ते कोडुंबिय० सगडीसागडं सज्जेति ता तत्थ णं बहूणं वीणाण य वल्लकीण य भामरीण य कच्छभीण य भंभाण य छब्भामरीण य विचित्तवीणाण य अच्चेसिं च बहूणं सोतिंदियपाउग्गाणं दब्बाणं सगडीसागडं भरेंति ता बहूणं किण्हाण य जाव सुक्किह्ठाण य कट्टकम्माण य० गंथि- (११९)

माण य जाव संघाडमाण य अन्नेसिं च बहूणं चक्खिदियपाउग्गाणं दब्बाणं सगडीसागडं भरेति ता बहूणं कोट्टपुडाण य केयडपुडाण य जाव अन्नेसिं च बहूणं घाणिंदियपाउग्गाणं दब्बाणं सगडीसागडं भरेति ता बहुस्स य खंडस्स य गुलस्स य सक्कराए य मच्छंडियाए य पुप्फुत्तरपउमुत्तर० अन्नेसिं च जिब्भिंदियपाउग्गाणं दब्बाणं भरेति ता बहूणं कोयवयाण य कंबलाण य पावरणाण य नवतयाण य मलया(सगा पा०)ण य मसूराण य सिलावट्टाण जाव हंसगम्भाण य अन्नेसिं च फासिंदियपाउग्गाणं दब्बाणं जाव भरेति ता सगडीसागडं जोएंति ता जेणेव गंभीरए पोयट्टाणे तेणेव य उवा० ता सगडीसागडं मोएंति ता पोयवहणं सज्जेति ता तेसिं उक्किट्टाणं सहफरिसरसरूवगंधाणं कट्टस्स य तणस्स य पाणियस्स य तंदुलाण य समियस्स य गोरसस्स य जाव अन्नेसिं च बहूणं पोयवहणपाउग्गाणं पोयवहणं भरेति ता दक्खिणाणुकूलेणं वाएणं जेणेव कालियदीवे तेणेव उवा० ता पोयवहणं लंबेति ता ताइं उक्किट्टाइं सहफरिसरसरूवगंधाइं एगट्टियाहिं कालियदीवं उत्तारेंति ता जहिं २ च णं ते आसा आसयंति वा सयंति वा चिट्ठंति वा तुयट्ठंति वा तहिं २ च ते कोडुंबियपुरिसा ताओ वीणाओ य जाव विचित्तवीणातो य अन्नाणि बहूणि सोइंदियपाउग्गाणि य दब्बाणि समुदीरेमाणा चिट्ठंति, तेसिं परिपेरंतेणं पासए ठवेंति ता णिच्चला णिप्फंदा तुसिणीया चिट्ठंति, जत्थ २ ते आसा आसयंति वा जाव तुयट्ठंति वा तत्थ तत्थ णं ते कोडुंबिय० बहूणि किण्हाणि य० कट्टकम्माणि य जाव संघाडमाणि य अन्नाणि य बहूणि चक्खिदियपाउग्गाणि य दब्बाणि ठवेंति तेसिं परिपेरंतेणं पासए ठवेंति ता णिच्चला णिप्फंदा० चिट्ठंति, जत्थ २ ते आसा आसयंति० तत्थ २ णं तेसिं बहूणं कोट्टपुडाण य अन्नेसिं च घाणिंदियपाउग्गाणं दब्बाणं पुंजे य णियरे य करेंति ता तेसिं परिपेरंते जाव चिट्ठंति, जत्थ २ णं ते आसा आसयंति० तत्थ २ गुलस्स जाव अन्नेसिं च बहूणं जिब्भिंदियपाउग्गाणं दब्बाणं पुंजे य निकरे य करेंति ता वियरए खणंति ता गुलपाणगस्स खंडपाणगस्स पा(प्र० पो)रपाणस्स अन्नेसिं च बहूणं पाणगाणं वियरे भरेति ता तेसिं परिपेरंतेणं पासए ठवेंति जाव चिट्ठंति, जहिं २ च णं ते आसा आस० तहिं २ च ते बहवे कोयवया य जाव सिलावट्टया अण्णाणि य फासिंदियपाउगाइं अत्थुयपच्चत्थुयाइं ठवेंति ता तेसिं परिपेरंतेणं जाव चिट्ठंति, तते णं ते आसा जेणेव एते उक्किट्टा सहफरिसरसरूवगंधा तेणेव उवा० ता तत्थ णं अत्थेगतिया आसा अपुट्ठा णं इमे सहफरिसरसरूवगंधा इतिकट्टु तेसु उक्किट्टेसु सहफरिसरसरूवगंधेसु अमुच्छिया० तेसिं उक्किट्टाणं सहजावगंधाणं दूरंदूरेणं अवक्कमंति, ते णं तत्थ पउरगोयरा पउरतणपाणिया णिब्भया णिरुव्विग्गा सुहंसुहेणं विहरंति, एवामेव समणाउसो ! जो अम्हं णिग्गंथो वा० सहफरिसरसरूवगंधा० णो सज्जति० से णं इहलोए चेव बहूणं समणाणं० अच्चणिज्जे जाव वीतिवइस्सति । १३९ । तत्थ णं अत्थेगतिया आसा जेणेव उक्किट्टसहफरिसरसरूवगंधा तेणेव उवा० ता तेसु उक्किट्टेसु सहफरिस० मुच्छिया जाव अज्झोववण्णा आसेविउं पयत्ते यावि होत्था, तते णं ते आसा एए उक्किट्टे सह० आसेवमाणा तेहिं बहूहि य कूडेहि य पासेहि य गलएसु य पाएसु य बज्झंति, तते णं ते कोडुंबिया एए आसे गिण्हंति ता एगट्टियाहिं पोयवहणे संचारेंति ता तणस्स कट्टस्स जाव भरेति, तते णं ते संजुत्ता दक्खिणाणुकूलेणं वाएणं जेणेव गंभीरपोयपट्टणे तेणेव उवा० ता पोयवहणं लंबेति ता ते आसे उत्तारेंति ता जेणेव हत्थिसीसे णयरे जेणेव कणगकेऊ राया तेणेव उवागच्छन्ति ता करयल जाव वट्ठावेंति ता ते आसे उवणेंति, तते णं से कणगकेऊ तेसिं संजुत्ताणावावाणियगाणं उस्सुक्कं वितरति ता सक्कारेति संमाणेति ता पडिविसज्जेति, तते णं से कणगकेऊ कोडुंबियपुरिसे सदावेइ ता सक्कारेति० पडिविसज्जेति, तते णं से कणगकेऊ आसमदए सदावेति ता एवं व०-तुब्भे णं देवा० ! मम आसे विणएह, तते णं ते आसमदगा तहत्ति पडिसुणंति ता ते आसे बहूहिं मुहबंधेहि य कण्णबंधेहि य णासाबंधेहि य खुरबंधेहि य कडगबंधेहि य खल्लिणबंधेहि य कवीलणेहि (अहिलाणेहि पा०) य पडियाणेहि य अंकणाहि य वेल्प्पहारेहि य च(प्र० वि) तप्पहारेहि य लयप्पहारेहि य कसप्पहारेहि य छिवप्पहारेहि य विणयंति ता कणगकेऊस्स रत्तो उवणेंति, तते णं से कणगकेऊ ते आसमदए सक्कारेति ता पडिविसज्जेति, तते णं ते आसा बहूहिं मुहबंधेहि य जाव छिवप्पहारेहि । बहूणि सारीरमाणसाणि दुक्खातिं पावेंति, एवामेव समणाउसो ! जो अम्हं णिग्गंथो वा० पव्वइए समाणे इट्टेसु सहफरिसजावगंधेसु य सज्जंति रज्जंति गिज्झंति मुज्झंति अज्झोववज्जंति से णं इहलोए चेव बहूणं समणाण य जाव सावियाण य हीलणिज्जे जाव अणुपरियट्ठिस्सति । १४० । 'कलरिभियमहुरतंतीतलतालवंसकउहाभिरामेसु । सहेसु रज्जमाणा रमती सोइंदियवसट्टा ॥ ३३ ॥ सोइंदियदुइन्तत्तणस्स अह एत्तिओ हवति दोसो । दीविगरुयमसहंतो वहबंधं तित्तिरो पत्तो ॥ ३४ ॥ थणजहणवयणकरचरणणयणगव्वियविलासियगतीसु । रूवेसु रज्जमाणा रमंति चक्खिदियवसट्टा ॥ ३५ ॥ चक्खिदियदुइन्तत्तणस्स अह एत्तिओ भवति दोसो । जं जलणंमि जलंते पडति पयंगो अबुद्धीओ ॥ ३६ ॥ अगुरुवरपवरधूवणउउयमल्लाणुलेवणविहीसु । गंधेसु रज्जमाणा रमंति घाणिंदियवसट्टा ॥ ३७ ॥ घाणिंदियदुइन्तत्तणस्स अह एत्तिओ हवइ दोसो । जं ओसहिगंधेणं बिलाओ निद्धावती उरगो ॥ ३८ ॥ तित्तकडुयं कसायंबमहुरं बहुखज्जपेज्जलेज्जेसु । आसायंमि उ गिद्धा रमंति जिब्भिंदियवसट्टा ॥ ३९ ॥ जिब्भिंदियदुइन्तत्तणस्स अह एत्तिओ हवइ दोसो । जं गललग्गुखित्ता फुलइ थलविरल्लिओ मच्छो

॥ ४० ॥ उउभयमाणसुहेहि य सविभवहिययगमणनिव्वुइकरेसु । फासेसु रज्जमाणा रमंति फासिंदियवसट्ठा ॥ ४१ ॥ फासिंदियदुहंतत्तणस्स अह एत्तिओ हवइ दोसो । जं खणइ मत्थयं कुंजरस्स लोहंकुसो तिक्खो ॥ ४२ ॥ कलरिभियमहुरतंतीतलतालवंसकउहाभिरामेसु । सहेसु जे न गिद्धा वसट्ठमरणं न ते मरए ॥ ४३ ॥ थणजहणवयणकरचरणनयणगच्चियविलासियग- तीसु । रूवेसु जे न रत्ता वसट्ठमरणं न ते मरए ॥ ४४ ॥ अगरुवरपवरधूवणउउयमल्लाणुलेवणविहीसु । गंधेसु जे न गिद्धा वसट्ठमरणं न ते मरए ॥ ४५ ॥ तित्तकडुयं कसायंबमहुरं बहु- स्वज्जपेज्जलेज्जेसु । आसाये जे न गिद्धा वसट्ठमरणं न ते मरए ॥ ४६ ॥ उउभयमाणसुहेसु य सविभवहिययमणनिव्वुइकरेसु । फासेसु जे न गिद्धा वसट्ठमरणं न ते मरए ॥ ४७ ॥ सहेसु य भइयपावएसु सोयविसयं उवगएसु । तुट्ठेण व रुट्ठेण व समणेण सया ण होयव्वं ॥ ४८ ॥ रूवेसु य भइयपावएसु चक्खुविसयं उवगएसु । तुट्ठेण व रुट्ठेण व समणेण सया ण होयव्वं ॥ ४९ ॥ गंधेसु य भइयपावएसु घाणविसयं उवगएसु । तुट्ठेण व रुट्ठेण व समणेण सया ण होयव्वं ॥ ५० ॥ रसेसु य भइयपावएसु जिब्भविसयं उवगएसु । तुट्ठेण व रुट्ठेण व समणेण सया ण होयव्वं ॥ ५१ ॥ फासेसु य भइयपावएसु कायविसयं उवगएसु । तुट्ठेण व रुट्ठेण व समणेण सया ण होयव्वं ॥ ५२ ॥ एवं खलु जंबू ! समणेणं भगवया महावीरेणं जाव संपत्तेणं सत्त- रसमस्स णायज्झयणस्स अयमट्ठे पन्नत्तेत्तिवेमि । १४१ ॥ इति आसज्झयणं १७ ॥ जति णं भंते ! समणेणं० सत्तरसमस्स० अयमट्ठे पण्णत्ते अट्ठारसमस्स के अट्ठे पं० ? । एवं खलु जंबू ! तेणं कालेणं० रायगिहे णामं नयरे होत्था वण्णओ, तत्थ णं धण्णे सत्थवाहे भदा भारिया, तस्स णं धण्णस्स सत्थवाहस्स पुत्ता भदाए अत्तया पंच सत्थवाहदारगा होत्था तं० धणे धणपाले धणदेवे धणगोवे धणरक्खिए, तस्स णं धण्णस्स सत्थवाहस्स धूया भदाए अत्तया पंचण्हं पुत्ताणं अणुमग्गजातीया सुंसुमा णामं दारिया होत्था सुमालपाणिपाया०, तस्स णं धण्णस्स सत्थवाहस्स चिलाए नामं दासचेडे होत्था अहीणपंचिंदियसरीरे मंसोवचिए बालकीलावणकुसले यावि होत्था, तते णं से दासचेडे सुंसुमाए दारियाए बालग्गाहे जाए यावि होत्था, सुंसुमं दारियं कडीए गिण्हति त्ता बहूहिं दारएहि य दारियाहि य डिंभएहि य डिंभियाहि य कुमारएहि य कुमारियाहि य सद्धिं अभिरममाणे २ विहरति, तते णं से चिलाए दासचेडे तेसिं बहूणं दारियाण य० अप्पेगतियाणं खल्लए अवहरति, एवं वट्ठए आडोलियातो तेंदुसए पोत्तुल्लए साडोल्लए, अप्पेगतियाणं आभरणमल्लालंकारं अवहरति अप्पेगतिया आउस्सति एवं अवहसइ निच्छोडेति निब्भच्छेति तज्जेति अप्पे० तालेति, तते णं ते बहवे दारगा य० रोयमाणा य० साणं २ अम्मापिऊणं णिवेदेंति, तते णं तेसिं बहूणं दारगाण य० अम्मापियरो जेणेव धण्णे सत्थवाहे तेणेव उवा० धण्णं सत्थवाहं बहूहिं खेज्जणाहि य रुंटनाहि य उवलंभणाहि य खेज्जमाणा य रुंत्तमाणा य उवलंभमाणा य धण्णस्स एयमट्ठं णिवे- देंति, तते णं धण्णे सत्थवाहे चिलायं दासचेडं एयमट्ठं भुज्जो २ णिवारेति णो चेव णं चिलाए दासचेडे उवरमति, तते णं से चिलाए दासचेडे तेसिं बहूणं दारगाण य० अप्पेगतियाणं खल्लए अवहरति जाव तालेति, तते णं ते बहवे दारगा य० रोयमाणा य जाव अम्मापिऊणं णिवेदेंति, तते णं ते आसुरुत्ता० जेणेव धण्णे सत्थवाहे तेणेव उवा० त्ता बहूहिं ग्विज्ज जाव एयमट्ठं णिवेदेंति, तते णं से धण्णे सत्थवाहे बहूणं दारगाणं० अम्मापिऊणं अंतिए एयमट्ठं सोच्चा आसुरुत्ते चिलायं दासचेडं उच्चावयाहिं आउसणाहिं आउसति उद्धंसति निब्भच्छेति निच्छोडेति तज्जेति उच्चावयाहिं तालणाहिं तालेति सातो गिहातो णिच्छुभति । १४२ । तते णं से चिलाए दासचेडे सातो गिहातो निच्छूढे समाणे रायगिहे नयरे सिंघाडगजावपहेसु देवकुलेसु य सभासु य पवासु य जूयखलएसु य वेसाघरेसु य पाणघरएसु य सुहंसुहेणं परिवड्ढति, तते णं से चिलाए दासचेडे अणोहट्ठिए अणिवारिए सच्छंदमई सइरप्पयारी मज्ज- पसंगी चोज्जपसंगी मंसपसंगी जूयप्पसंगी वेसापसंगी परदारप्पसंगी जाए यावि होत्था, तते णं रायगिहस्स नगरस्स अदूरसामंते दाहिणपुरत्थिमे दिसिभाए सीहगुहा नामं चोरपल्ली होत्था विसमगिरिकडगकोडंबसंनिविट्ठा वंसीकलंक(कड पा०) पागारपरिक्खत्ता छिण्णसेलविसमप्पवायफरिहोवगूढा एगदुवारा अणेगखंडी विदितजणणिग्गमपवेसा अविंभतरपाणिया सुदुल्लभजलपेरंता (जत्थ चउरंगबलनिउत्तावि कूवियबला हयमहियपवरवीरघाइयनिवडियचिन्धयवडया कीरंति पा०) सुबहुस्सवि कूवियबलस्स आगयस्स दुप्पहंसा यावि होत्था, तत्थ णं सीहगुहाए चोरपल्लीए विजए णामं चोरसेणावती परिवसति अहम्मिए जाव अधम्मे केऊ समुट्ठिए बहुणगरणिग्गयजसे सूर दढप्पहारी सीहसारे सइवेही, से णं तत्थ सीहगुहाए चोरपल्लीए पंचण्हं चोरसयाणं आहेवच्चं जाव विहरति, तते णं से विजए तक्करे चोरसेणावती बहूणं चोराण य पारदारियाण य गंठिभेयगाण य संधिच्छेयगाण य खत्तखणगाण य राया- वगारीण य अणधारगाण य बालघायगाण य वीसंभघायगाण य जूयकाराण य खंडरक्खाण य अच्चेसिं च बहूणं छिन्नभिन्नबहिराहयाणं कुडंगे यावि होत्था, तते णं से विजए तक्करे चोरसेणावती रायगिहस्स दाहिणपुरच्छिमं जणवयं बहूहिं गामघाएहि य नगरघाएहि य गोग्गहणेहि य बंदिग्गहणेहि य पंथकुट्ठणेहि य खत्तखणणेहि य उब्बीलेमाणे २ विद्धंसेमाणे २ णित्थाणं णिद्धणं करेमाणे विहरति, तते णं से चिलाए दासचेडे रायगिहे बहूहिं अत्थाभिसंकीहि य चोच्चभिसंकीहि य दाराभिसंकीहि य धणिएहि य जूइकरेहि य परब्भवमाणे २

रायगिहाओ नगरीओ णिग्गच्छति ता जेणेव सीहगुहा चोरपट्टी तेणेव उवा० ता विजयं चोरसेणावती उवसंपजित्ताणं विहरति, तते णं से चिलाए दासवेडे विजयस्स चोरसेणावइस्स अग्गे असिलट्टिग्गाहे जाए यावि होत्था, जाहेविय णं से विजए चोरसेणावती गामघायं वा जाव पंथकोट्टिं वा काउं वच्चति ताहेविय णं से चिलाए दासवेडे सुबहुं पि हु कूषियबलं हयविमहिय जाव पडिसेहति, पुणरवि लद्धट्टे कयकज्जे अणहसमग्गे सीहगुहं चोरपट्टिं हव्वमागच्छति, तते णं से विजए चोरसेणावती चिलायं तक्करं बहूईओ चोरविज्जाओ य चोरमंते य चोरमायाओ य चोरनिगडीओ य सिक्खावेइ, तते णं से विजए चोरसेणावई अन्नया कयाई कालधम्मणा संजुत्ते यावि होत्था, तते णं ताइं पंच चोरसयातिं विजयस्स चोरसेणावइस्स महया २ इड्ढीसक्कारसमुदएणं णीहरणं करेति ता बहूई लोइयातिं मयकिच्चाइं करेइ ता जाव विगयसोया जाया यावि होत्था, तते णं ताइं पंच चोरसयातिं अन्नमन्नं सदावेति ता एवं व०-एवं खलु अम्हं देवा० ! विजए चोरसेणावई कालधम्मणा संजुत्ते अयं च णं चिलाए तक्करे विजएणं चोरसेणावइणा बहूईओ चोरविज्जाओ य जाव सिक्खाविए तं सेयं खलु अम्हं देवाणुप्पिया ! चिलायं तक्करं सीहगुहाए चोरपट्टीए चोरसेणावइत्ताए अभिसिंचित्तएत्तिकट्टु अन्नमन्नस्स एयमट्टं पडिसुणेंति ता चिलायं तीए सीहगुहाए चोरसेणावइत्ताए अभिसिंचति, तते णं से चिलाए चोरसेणावती जाए अहम्मिं जाव विहरति, तए णं से चिलाए चोरसेणावती चोरणायगे जाव कुडंगे यावि होत्था, से णं तत्थ सीहगुहाए चोरपट्टीए पंचण्हं चोरसयाण य एवं जहा विजओ तहेव सव्वं जाव रायगिहस्स दाहिणपुरच्छिमिहं जणवयं जाव णित्थाणं निद्धणं करेमाणे विहरति । १४३ । तते णं से चिलाए चोरसेणावती अन्नया कयाई विपुलं असण० उवक्खडावेत्ता पंच चोरसए आमंतेइ तओ पच्छा ण्हाए कयबलिकम्मा भोयणमंडवंसि तेहिं पंचहिं चोरसएहिं सद्धिं विपुलं असण० सुरं च जाव पसण्णं च आसाएमाणे० विहरति, जिमियभुत्तुत्तरागए ते पंच चोरसए विपुलेणं असण० धूवपुप्फगंधमट्टालंकारेणं सक्कारेति सम्माणेति ता एवं व०-एवं खलु देवा० ! रायगिहे णयरे धण्णे णामं सत्थवाहे अड्ढे०, तस्स णं धूया भद्दाए अन्नया पंचण्हं पुत्ताणं अणुमग्गजातिया सुंसुमा णामं दारिया यावि होत्था अहीणा जाव सुरूवा, तं गच्छामो णं देवा० ! धण्णस्स सत्थवाहस्स गिहं विलुं पामो तुब्भं विपुले धणकणग जाव सिलप्पवाले ममं सुंसुमा दारिया, तते णं ते पंच चोरसया चिलायस्स० पडिसुणेंति, तते णं से चिलाए चोरसेणावती तेहिं पंचहिं चोरसएहिं सद्धिं अल्लचम्मं दुरूहति ता पच्चावरण्हकालसमयंसि पंचहिं चोरसएहिं सद्धिं सण्णद्ध जाव गहियाउहपहरणा माइयगोमुहिएहिं फलएहिं णिकट्टाहिं असिलट्टीहिं अंसगएहिं तोणेहिं सजीवेहिं धणूहिं समुक्खित्तेहिं सरेहिं समुट्टालियाहिं दी(प्र० दा)हाहिं ओसारियाहिं उरुघंटियाहिं छिप्पतूरेहिं वज्जमाणेहिं महया २ उक्किट्ठसीहणायचोरकलकलरवं जाव समुहरवभूयं करेमाणा सीहगुहातो चोरपट्टीओ पडिनिक्खमंति ता जेणेव रायगिहे नगरे तेणेव उवा० ता रायगिहस्स अदूरसामंते एगं महं गहणं अणुपविसंति ता दिवसं खवेमाणा चिट्ठंति, तते णं से चिलाए चोरसेणावई अदूरत्तकालसमयंसि निसंतपडिनिसंतंसि पंचहिं चोरसएहिं सद्धिं माइयगोमुहितेहिं फलएहिं जाव मूइआहिं उरुघंटियाहिं जेणेव रायगिहे पुरत्थिमिल्ले दुवारे तेणेव उवा० ता उदगवत्थि परामुसति आयंते० तालुग्घाडणिविज्जं आवाहेइ ता रायगिहस्स दुवारकवाडे उदएणं अच्छोडेति कवाडं विहाडेति ता रायगिहं अणुपविसति ता महया २ सहेणं उग्घोसेमाणे २ एवं व०-एवं खलु अहं देवा० ! चिलाए णामं चोरसेणावई पंचहिं चोरसएहिं सद्धिं सीहगुहातो चोरपट्टीओ इह हव्वमागए धण्णस्स सत्थवाहस्स गिहं घाउकामे तं जो णं णवियाए माउयाए दुद्धं पाउकामे से णं निग्गच्छउत्तिकट्टु जेणेव धण्णस्स सत्थवाहस्स गिहे तेणेव उवा० ता धण्णस्स गिहं विहाडेति, तते णं से धण्णे चिलाएणं चोरसेणावतिणा पंचहिं चोरसएहिं सद्धिं गिहं घाइज्जमाणं पासति ता भीते तत्थे० पंचहिं पुत्तेहिं सद्धिं एगंतं अवक्कमति, तते णं से चिलाए चोरसेणावती धण्णस्स सत्थवाहस्स गिहं घाएत्ति ता सुबहुं धणकणगजावसावएज्जं सुंसुमं च दारियं गेण्हति ता रायगिहाओ पडिणिक्खमंति ता जेणेव सीहगुहा तेणेव पहारेत्थ गमणाए । १४४ । तते णं से धण्णे (प्र० धणे) सत्थवाहे जेणेव सए गिहे तेणेव उवा० ता सुबहुं धणकणग० सुंसुमं च दारियं अवहरियं जाणित्ता महत्थं० पाहुडं गहाय जेणेव णगरगुत्तिया तेणेव उवा० ता तं महत्थं पाहुडं जाव उवणेंति ता एवं व०-एवं खलु देवा० ! चिलाए चोरसेणावती सीहगुहातो चोरपट्टीओ इहं हव्वमागम्म पंचहिं चोरसएहिं सद्धिं मम गिहं घाएत्ता सुबहुं धणकणग० सुंसुमं च दारियं गहाय जाव पडिगए, तं इच्छामो णं देवा० ! सुंसुमादारियाए कूवं गमित्तए, तुब्भे णं देवाणुप्पिया ! से विपुले धणकणग० ममं सुंसुमा दारिया, तते णं ते णयरगुत्तिया धण्णस्स एयमट्टं पडिसुणेंति ता सन्नद्ध जाव गहियाउहपहरणा महया २ उक्किट्ठ० जाव समुहरवभूयंपिव करेमाणा रायगिहाओ णिग्गच्छति ता जेणेव चिलाए चोरे तेणेव उवा० ता चिलाएणं चोरसेणावतिणा सद्धिं संपलग्गा यावि होत्था, तते णं णगरगुत्तिया चिलायं चोरसेणावतिं हयमहिय जाव पडिसेहेंति, तते णं ते पंच चोरसया णगरगोत्तिएहिं हयमहिय जाव पडिसेहिया समाणा तं विपुलं धणकणग० विच्छड्ढेमाणा य विप्पकिरेमाणा य सव्वतो समंता विप्पलाइत्था, तते णं ते णयरगुत्तिया तं विपुलं धणकणग० गेण्हति ता जेणेव रायगिहे तेणेव

उवा०, तते णं से चिलाए तं चोरसेणं तेहिं णयरगुत्तिएहिं हयमहिय जाव भीते तत्थे० सुसुमं दारियं गहाय एगं महं अगामियं दीहमदं अडविं अणुपविट्ठे, तते णं धण्णे सत्थवाहे सुसुमं दारियं चिलाएणं अडवीमुहिं अवहीरमाणं पासित्ताणं पंचहिं पुत्तेहिं सद्धिं अप्पच्छट्ठे सन्नद्धबद्धं चिलायस्स पदमग्गविहिं अभिगच्छति, अणुगज्जेमाणे हक्कारेमाणे पुक्कारेमाणे अभि-
 तज्जेमाणे अभितासेमाणे पिट्ठओ अणुगच्छति, तते णं से चिलाए तं धण्णं सत्थवाहं पंचहिं पुत्तेहिं अप्पच्छट्ठं सन्नद्धबद्धं समणुगच्छमाणं पासति ता अत्थामे० जाहे णो संचाएति सुसुमं दारियं णिवाहित्तए ताहे संते तंते परितंते नीलुप्पलं असिं परामुसति ता सुसुमाए दारियाए उत्तमंगं छिंदति ता तं गहाय तं अगामियं अडविं अणुपविट्ठे, तते णं चिलाए तीसे अगामियाए अडवीए तण्हाते अभिभूते समाणे पम्हुट्ठदिसाभाए सीहगुहं चोरपल्लिं असंपत्ते अंतरा चेव कालगए, एवामेव समणाउसो ! जाव पव्वतिए समाणे इमस्स ओरालियसरीरस्स वंतासवस्स जाव विद्धंसणधम्मस्स वण्णहेउं जाव आहारं आहारेति से णं इहलोए चेव बहूणं समणाणं० हीलणिज्जे जाव अणुपरियट्ठिस्सति जहेव से चिलाए तक्करे, तते णं से धण्णे सत्थवाहे पंचहिं पुत्तेहिं अप्पच्छट्ठे चिलायं परिधाडेमाणे २ तण्हाए छुहाए य संते तंते परितंते नो संचाइए चिलातं चोरसेणावतिं साहत्थिं गिण्हित्तए, से णं तओ पडिनियत्तइ ता जेणेव सा सुसुमा दारिया चिलाएणं जीवियाओ ववरोविह्लिया तेणंतेणेव उवागच्छति ता सुसुमं दारियं चिलाएणं जीवियाओ ववरोवियं पासइ ता परसुनियंतेव चंपगपायवे०, तते णं से धण्णे सत्थवाहे अप्पच्छट्ठे आसत्थे कूवमाणे कंदमाणे विलवमाणे महया २ सदेणं कुह २ सुपरुत्ते सुचिरं कालं वाहमोक्खं करेति, तते णं से धण्णे पंचहिं पुत्तेहिं अप्पच्छट्ठे चिलायं तीसे अगामियाए० सब्बतो समंता परिधाडेमाणा तण्हाए छुहाए य परिब्भं (रद्धं) ते समाणे तीसे आगामियाए अडवीए सब्बतो समंता उदगस्स मग्गणगवेसणं करेति ता संते तंते परितंते णिच्चिं तीसे आगामियाए अडवीए उदगस्स मग्गणगवेसणं करेमाणे नो चेव णं उदगं आसादेति, तते णं उदगं अणासाएमाणे जेणेव सुसुमा जीवियातो ववरोए-
 ह्लिया तेणेव उवा० ता जेट्ठं पुत्तं धण्णे सदावेइ ता एवं वयासी-एवं खलु पुत्ता ! सुसुमाए दारियाए अट्ठाए चिलायं तक्करं सब्बतो समंता परिधाडेमाणा तण्हाए छुहाए य अभिभूया समाणा इमीसे आगामियाए अडवीए उदगस्स मग्गणगवेसणं करेमाणा णो चेव णं उदगं आसादेमो, ततो णं उदगं अणासाएमाणा णो संचाएमो रायगिहं संपावित्तए, तण्णं तुब्भे ममं देवा० ! जीवियाओ ववरोवेह मंसं च सोणियं च आहारेह ता तेणं आहारेणं अवहिट्ठा समाणा ततो पच्छा इमं आगामियं अडविं णित्थरिहिह रायगिहं च संपाविहिह मित्तणाइय० अभिसमागच्छिहिह अत्थस्स य धम्मस्स य पुण्णस्स य आभागीभविस्सह, तते णं से जेट्ठपुत्ते धण्णेणं एवं वुत्ते समाणे धण्णं सत्थवाहं एवं व०-तुब्भे णं ताओ ! अम्हं पिया गुरुज-
 णया देवयभूया ठावका पतिट्ठावका संरक्खगा संगोवगा तं कहण्णं अम्हे तातो ! तुब्भे जीवियाओ ववरोवेमो तुब्भं णं मंसं च सोणियं च आहारेमो ? तं तुब्भे णं तातो ! ममं जीवि-
 याओ ववरोवेह मंसं च सोणियं च आहारेह आगामियं अडविं णित्थरह तं चेव सब्बं भणइ जाव अत्थस्स जाव पुण्णस्स आभागीभविस्सह, तते णं धण्णं सत्थ० दोच्चे पुत्ते एवं व०-मा णं ताओ ! अम्हे जेट्ठं भायरं गुरुं देवयं जीवियाओ ववरोवेमो तुब्भे णं ताओ ! ममं जीवियाओ ववरोवेह जाव आभागीभविस्सह, एवं जाव पंचमे पुत्ते, तते णं से धण्णे सत्थवाहे पंच पुत्ताणं हियइच्छियं जाणित्ता ते पंच पुत्ते एवं व०-मा णं अम्हे पुत्ता ! एगमवि जीवियाओ ववरोवेमो एस णं सुसुमाए दारियाए सरीरए णिप्पाणे जाव जीवविप्पजडे तं सेयं खलु पुत्ता ! अम्हं सुसुमाए दारियाए मंसं च सोणियं च आहारेत्तए, तते णं अम्हे तेणं आहारेणं अवत्थद्धा समाणा रायगिहं संपाउणिस्सामो, तते णं ते पंच पुत्ता धण्णेणं सत्थवाहेणं एवं वुत्ता समाणा एयमट्ठं पडिसुणेंति, तते णं धण्णे सत्थ० पंचहिं पुत्तेहिं सद्धिं अरणिं करेति ता सरगं च करेति ता सरएणं अरणिं महेति ता अग्गिं पाडेति ता अग्गिं संधुक्खेति ता दारुयातिं परिक्खेवेति ता अग्गिं पज्जालेति ता सुसुमाए दारियाए मंसं च सोणियं च आहारेति, तेणं आहारेणं अवत्थद्धा समाणा रायगिहं नयरिं संपत्ता मित्तणाइ० अभिसमण्णागया तस्स य विउलस्स धणकणगरयण जाव आभागी जाया यावि होत्था, तते णं से धण्णे सत्थवाहे सुसुमाए दारियाए बहूइं लोइयातिं जाव विगयसोए जाए यावि होत्था । १४५ । तेणं कालेणं० समणे भगवं महावीरे गुणसिलए चेइए समोसढे, से णं धण्णे सत्थवाहे संपत्ते धम्मं सोच्चा पव्वतिए एक्कारसंगवी मासियाए संलेहणाए सोहंमे उववण्णो महाविदेहे वासे सिज्झिहिति, जहाविय णं जंबू ! धण्णेणं सत्थवाहेणं णो वण्णहेउं वा नो रूवहेउं वा णो बलहेउं वा नो विसयहेउं वा सुसुमाए दारियाए मंससोणिए आहारिए नन्नत्थ एगाए रायगिहं संपावणट्ठयाए एवामेव समणाउसो ! जो अम्हं निग्गंथो वा० इमस्स ओरालियसरीरस्स वंतासवस्स पित्तासवस्स सुक्कासवस्स सोणियासवस्स जाव अवस्सं विप्पजहियव्वस्स नो वण्णहेउं वा नो रूवहेउं वा नो बल० नो विसयहेउं वा आहारं आहारेति नन्नत्थ एगाए सिद्धिगमणसंपावणट्ठयाए से णं इहभवे चेव बहूणं समणाणं० बहूणं सावयाणं बहूणं साविगाणं अच्चणिज्जे जाव वीतीवतीस्सति, एवं खलु जंबू ! समणेणं भगवया० अट्ठारमस्स० अयमट्ठे पण्णत्तेत्तिबेमि । १४६ ॥ इति सुसुमज्झयणं १८ ॥ जति णं भंते ! समणेणं भग० म० जाव संपत्तेणं अट्ठा-
 रसमस्स नायज्झयणस्स अयमट्ठे पण्णत्ते एगूणवीसइमस्स नायज्झयणस्स के अट्ठे पण्णत्ते ?, एवं खलु जंबू ! समणेणं भगवया महावीरेणं तेणं कालेणं० इहेव जंबुदीवे दीवे (१२०)

पुषविदेहे सीयाए महाणदीए उत्तरिल्ले कूले नीलवंतस्स दाहिणेणं उत्तरिल्लस्स सीतामुहवणसंडस्स पच्छिमेणं एगसेलगस्स वक्खारपव्वयस्स पुरत्थिमेणं एत्थ णं पुक्खलावई णामं
 विजए पन्नत्ते, तत्थ णं पुंडरीगिणी णामं रायहाणी पं० णवजोयणविच्छिण्णा दुवालसजोयणायामा जाव पच्चक्खं देवलोयभूया पासात्तीया०, तीसे णं पुंडरीगिणीए णयरीए उत्तरपुर-
 च्छिमे दिसिभाए णलिणीवणे णामं उज्जाणे, तत्थ णं पुंडरीगिणीए रायहाणीए महापउमे णामं राया होत्था, तस्स णं पउमावती णामं देवी होत्था, तस्स णं महापउमस्स रत्तो पुत्ता
 पउमावतीए देवीए अत्तया दुवे कुमार होत्था, तं० पुंडरीए य कंडरीए य सुकुमालपाणिपाया०, पुंडरीए जुवराया, तेणं कालेणं० थेरागमणं महापउमे राया णिग्गए धम्मं सोच्चा
 पोंडरीयं रज्जे ठवेत्ता पव्वतिए, पोंडरीए राया जाए, कंडरीए जुवराया, महापउमे अणगारे चोदस पुद्दाइं अहिज्जइ, तते णं थेरा बहिया जणवयविहारं विहरंति, तते णं से महापउमे
 बहूणि वासाणि जाव सिद्धे । १४७ । तते णं थेरा अन्नया कयाई पुणरवि पुंडरीगिणीए रायहाणीए णलिणवणे उज्जाणे समोसढा, पोंडरीए राया णिग्गए, कंडरीए महाजणसदं सोच्चा
 जहा महब्बलो जाव पज्जुवासति, थेरा धम्मं परिकहेति, पुंडरीए समणोवासए जाए जाव पडिगते, तते णं कंडरीए उट्टाए उट्टेति ता जाव से जहेयं तुब्भे वदह जं णवरं पुंडरीयं रायं
 आपुच्छामि तए णं जाव पव्वयामि, अहासुहं देवाणुप्पिया !०, तए णं से कंडरीए जाव थेरे वंदइ नमंसइ० अंतियाओ पडिनिक्खमइ तमेव चाउघटं आसरहं दुरूहति जाव पच्चोरुहइ
 जेणेव पुंडरीए राया तेणेव उवागच्छति करयल जाव पुंडरीयं एवं व०-एवं खलु देवा० ! मए थेराणं अंतिए जाव धम्मं निसंते से धम्मं अभिरुइए तए णं देवा० ! जाव पव्वइत्तए, तए
 णं से पुंडरीए कंडरीयं एवं व०-मा णं तुमं देवाणुप्पिया ! इदाणिं मुंडे जाव पव्वयाहि अहं णं तुमं महया २ रायाभिसेएणं अभिसिंचयामि, तए णं से कंडरीए पुंडरीयस्स रण्णो एयमट्ठं
 णो आढाति जाव तुसिणीए संचिद्धति, तते णं पुंडरीए राया कंडरीयं दोच्चंपि तच्चंपि एवं व०-जाव तुसिणीए संचिद्धति, तते णं पुंडरीए कंडरीयं कुमारं जाहे नो संचाएति बहूहिं आघ-
 वणाहिं पणवणाहि य० ताहे अकामए चेव एयमट्ठं अणुमन्नित्था जाव णिक्खमणाभिसेएणं अभिसिंचति जाव थेराणं सीसभिक्खं दलयति, पव्वतिए अणगारे जाए एक्कारसंगविऊ,
 तते णं थेरा भगवंतो अन्नया कयाई पुंडरीगिणीओ नयरीओ णलिणीवणाओ उज्जाणाओ पडिणिक्खमंति बहिया जणवयविहारं विहरंति । १४८ । तते णं तस्स कंडरीयस्स अणगारस्स
 तेहिं अंतेहि य पंतेहि य जहा सेलगस्स जाव दाहवक्कंतीए यावि विहरति, तते णं थेरा अन्नया कयाई जेणेव पोंडरीगिणी तेणेव उवागच्छन्ति ता णलिणीवणे समोसढा, पोंडरीए णिग्गए
 धम्मं सुणेति, तए णं पोंडरीए राया धम्मं सोच्चा जेणेव कंडरीए अणगारे तेणेव उवा० कंडरीयं वंदति णमंसति ता कंडरीयस्स अणगारस्स सरीरगं सव्वाबाहं सरोयं पासति ता जेणेव
 थेरा भगवंतो तेणेव उवा० ता थेरे भगवंते वंदति णमंसइ ता एवं व०-अहण्णं भंते ! कंडरीयस्स अणगारस्स सरीरगं सव्वाबाहं सरोगं अहापवत्तेहिं ओसहभेसज्जेहिं जाव तेइच्छं आउ-
 ट्टामि तं तुब्भे णं भंते ! मम जाणसालासु समोसरह, तते णं थेरा भगवंतो पुंडरीयस्स० पडिसुणेंति ता जाव उवसंपज्जित्ताणं विहरंति, तते णं पुंडरीए राया जहा मंडुए सेलगस्स जाव
 बलियसरीरे जाए, तते णं थेरा भगवंतो पोंडरीयं रायं पुच्छंति ता बहिया जणवयविहारं विहरंति, तते णं से कंडरीए ताओ रोयायंकाओ विप्पमुक्के समाने तंसि मणुणंसि असणपाण-
 खाइमसाइमंसि मुच्छिए गिद्धे गट्टिए अज्झोववण्णे णो संचाएइ पोंडरीयं रायं आपुच्छित्ता बहिया अब्भुज्जएणं जणवयविहारं विहरित्तए, तत्थेव ओसण्णे जाए, तते णं से पोंडरीए
 इमीसे कहाए लद्धट्टे समाने ण्हाए अंतेउरपरियालसंपरिवुडे जेणेव कंडरीए अणगारे तेणेव उवा० ता कंडरीयं तिक्खुत्तो आयाहिणं पयाहिणं करेइ ता वंदति णमंसति ता एवं व०-
 धन्नेसि णं तुमं देवा० ! कयत्थे कयपुन्ने कयलक्खणे सुलद्धे णं देवा० ! तव माणुस्सए जम्मजीवियफले जेणं तुमं रज्जं च जाव अंतेउरं च लद्धइत्ता विगोवइत्ता जाव पव्वतिए, अहं णं
 अहण्णे अकयपुन्ने रज्जे जाव अंतेउरे य माणुस्सएसु य कामभोगेसु मुच्छिए जाव अज्झोववन्ने नो संचाएमि जाव पव्वतित्तए, तं धन्ने सि णं तुमं देवा० ! जाव जीवियफले, तते णं से
 कंडरीए अणगारे पुंडरीयस्स एयमट्ठं णो आढाति जाव संचिद्धति, तते णं कंडरीए पोंडरीएणं दोच्चंपि तच्चंपि एवं वुत्ते समाने अकामए अवससवसे लज्जाए गारवेण य पोंडरीयं रायं आपु-
 च्छति ता थेरेहिं सद्धिं बहिया जणवयविहारं विहरति, तते णं से कंडरीए थेरेहिं सद्धिं किंचिकालं उग्गंउग्गेणं विहरति, ततो पच्छा समणत्तणपरितंते समणत्तणनिव्विण्णे समणत्तण-
 णिब्भत्थिए समणगुणमुक्कजोगी थेराणं अंतियाओ सणियं २ पच्चोसकति ता जेणेव पुंडरीगिणी णयरी जेणेव पुंडरीयस्स भवणे तेणेव उवा० असोगवणियाए असोगवरपायवस्स अहे
 पुढवीसिलापट्ठगंसि णिसीयति ता ओहयमणसंकप्पे जाव झियायमाणे संचिद्धति, तते णं तस्स पोंडरीयस्स अम्मधाती जेणेव असोगवणिया तेणेव उवा० ता कंडरीयं अणगारं असो-
 गवरपायवस्स अहे पुढवीसिलावट्ठयंसि ओहयमणसंकप्पं जाव झियायमाणं पासति ता जेणेव पोंडरीए राया तेणेव उवा० ता पोंडरीयं रायं एवं व०-एवं खलु देवा० ! तव पिउभाउए
 कंडरीए अणगारे असोगवणियाए असोगवरपायवस्स अहे पुढवीसिलावट्ठे ओहयमणसंकप्पे जाव झियायति, तते णं पोंडरीए अम्मधाईए एयमट्ठं सोच्चा णिसम्म तहेव संभंते समाने

उट्टाए उट्टेति ता अंतेउरपरियालसंपरिवुडे जेणेव असोगवणिया जाव कंडरीयं तिक्खुत्तो० एवं व०-धण्णे सि णं तुमं देवा० ! जाव पव्वतिए, अहण्णं अधण्णे जाव पव्वइत्तए, तं धम्मसि णं तुमं देवा० ! जाव जीवियफले, तते णं कंडरीए पुंडरीएणं एवं वुत्ते समाने तुसिणीए संचिद्वति दोच्चंपि तच्चंपि जाव चिद्वति, तते णं पुंडरीए कंडरीयं एवं व०-अट्ठो भंते ! भोगेहिं ?, हुंता अट्ठो, तते णं से पोंडरीए राया कोडुंबियपुरिसे सदावेइ ता एवं व०-खिप्पामेव भो देवा० ! कंडरीयस्स महत्थं जाव रायाभिसेअं उवट्टवेह जाव रायाभिसेएणं अभिसिंचति । १४९ । तते णं पुंडरीए० सयमेव पंचमुट्ठियं लोयं करेति ता सयमेव चाउज्जामं धम्मं पडिवज्जति ता कंडरीयस्स संतियं आयारभंडयं गेण्हति ता इमं एयारूवं अभिग्गहं अभि-गिण्हइ-कप्पति मे येरे वंदित्ता णमंसित्ता थेराणं अंतिए चाउज्जामं धम्मं उवसंपज्जित्ताणं ततो पच्छा आहारं आहारित्तएत्तिकट्टु, इमं च एयारूवं अभिग्गहं अभिगिण्हित्ताणं पोंडरी-गिणीए पडिनिक्खमति ता पुट्ठाणुपुट्ठिं चरमाणे गामाणुगामं दूइज्जमाणे जेणेव थेरा भगवंतो तेणेव पहारेत्थ गमणाए । १५० । तते णं तस्स कंडरीयस्स रण्णो तं पणीयं पाणभोयणं आहारियस्स समानस्स अतिजागरिएण य अइभोयणप्पसंगेण य से आहारे णो सम्मं परिणमइ, तते णं तस्स कंडरीयस्स रण्णो तंसि आहारंसि अपरिणममाणंसि पुट्ठरत्तावरत्तकालस-मयंसि सरीरंसि वेयणा पाउब्भूया उज्जला विउला पगाढा जाव दुरहियासा पित्तज्जरपरिगयसरीरे दाहवक्कंतीए यावि विहरति, तते णं से कंडरीए राया रज्जे य रट्ठे य अंतेउरे य जाव अज्झो-ववन्ने अट्टदुहट्टवसट्टे अकामते अवससवसे कालमासे कालं किच्चा अहेसत्तमाए पुढवीए उक्कोसकालट्टिइयंसि नरयंसि नेरइयत्ताए उववण्णे, एवामेव समणाउसो ! जाव पव्वतिए समाने पुणरवि माणुस्सए कामभोगे आसाएइ जाव अणुपरियट्टिस्सति जहा व से कंडरीए राया । १५१ । तते णं से पोंडरीए अणगारे जेणेव थेरा भगवंतो तेणेव उवा० ता थेरे भगवंतो वंदति नमंसति ता थेराणं अंतिए दोच्चंपि चाउज्जामं धम्मं पडिवज्जति, छट्ठस्वमणपारणगंसि पढमाए पोरिसीए सज्झायं करेति ता जाव अडमाणे सीयलुक्खं पाणभोयणं पडिगाहेति ता अहा-पज्जत्तमितिकट्टु पडिणियत्तति, जेणेव थेरा भगवंतो तेणेव उवा० ता भत्तपाणं पडिदंसेति ता थेरेहिं भगवंतेहिं अब्भणुत्ताए समाने अमुच्छित्ते० बिलमिव पण्णगभूएणं अप्पाणेणं तं फासुएसणिज्जं असण० सरीरकोट्टगंसि पक्खिवति, तते णं तस्स पुंडरीयस्स अणगारस्स तं कालाइक्कंतं अरसं विरसं सीयलुक्खं पाणभोयणं आहारियस्स समानस्स पुट्ठरत्तावरत्तकालस-मयंसि धम्मजागरियं जागरमाणस्स से आहारे णो सम्मं परिणमति, तते णं तस्स पुंडरीयस्स अणगारस्स सरीरगंसि वेयणा पाउब्भूया उज्जला जाव दुरहियासा पित्तज्जरपरिगयसरीरे दाहवक्कंतीए विहरति, तते णं से पुंडरीए अणगारे अत्थामे अबले अवीरिए अपुरिसक्कारपरक्कमे करयल जाव एवं व०-णमोऽत्थु णं अरिहंताणं जाव संपत्ताणं णमोऽत्थु णं थेराणं भग-वंताणं मम धम्मायरियाणं धम्मोवएसयाणं पुट्ठिंपि णं मए थेराणं अंतिए सब्बे पाणातिवाए पच्चक्खाए जाव मिच्छादंसणसट्ठे णं पच्चक्खाए जाव आलोइयपडिक्कंते कालमासे कालं किच्चा सब्बट्टसिद्धे उववन्ने, ततो अणंतरं उवट्टित्ता महाविदेहे वासे सिज्झिहिति जाव सब्बदुक्खाणमंतं काहिति, एवामेव समणाउसो ! जाव पव्वतिए समाने माणुस्सएहिं कामभोगेहिं णो सज्जति नो रज्जति जाव नो विप्पडिघायमावज्जति से णं इहभवे चेव बहूणं समणाणं बहूणं समणीणं बहूणं सावयाणं बहूणं साविगाणं अच्चणिज्जे वंदणिज्जे पूयणिज्जे सक्कारणिज्जे सम्माणणिज्जे कल्लाणं मंगलं देवयं चेइयं पज्जुवासणिज्जेत्तिकट्टु परलोएऽविय णं णो आगच्छति बहूणि दंडणाणि य मुंडणाणि य तज्जणाणि य ताडणाणि य जाव चाउरंतं संसारकं-तारं जाव वीतीवइस्सति जहा व से पोंडरीए अणगारे, एवं खलु जंबू ! समणेणं भगवया महावीरेणं आदिगरेणं तित्थगरेणं जाव सिद्धिगइणामधेज्जं ठाणं संपत्तेणं एगूणवीसइमस्स नाय-ज्झयणस्स अयमट्टे पन्नत्ते ॥ इति पोंडरीयज्झयणं १९ ॥ एवं खलु जंबू ! समणेणं भगवया महावीरेणं जाव सिद्धिगइणामधेज्जं ठाणं संपत्तेणं छट्ठस्स अंगस्स पढमस्स सुयक्खंधस्स अयमट्टे पण्णत्तेत्तिबेमि । १५२ । तस्स णं सुयक्खंधस्स एगूणवीसं अज्झयणाणि एकसरगाणि एगूणवीसाए दिवसेसु सम्पंपति । १५३ । पढमो सुयक्खंधो समत्तो ॥ ॥ ॐ ॥ ॐ ॥ ॐ ॥

तेणं कालेण० रायगिहे नामं नयरे होत्था वण्णओ, तस्स णं रायगिहस्स बहिया उत्तरपुरच्छिमे दिसिभाए तत्थ णं गुणसीलए णामं चेइए होत्था वण्णओ, तेणं कालेण० समणस्स भगवओ महावीरस्स अंतेवासी अज्जसुहम्मा णामं थेरा भगवंतो जातिसंपन्ना कुलसंपन्ना जाव चउदसपुट्ठी चउणाणोवगया पंचहिं अणगारसएहिं सद्धिं संपरिवुडा पुट्ठाणुपुट्ठिं चरमाणा गामाणुगामं दूइज्जमाणा सुहंसुहेणं विहरमाणा जेणेव रायगिहे णयरे जेणेव गुणसीलए चेइए जाव संजमेणं तवसा अप्पाणं भावेमाणा विहरंति, परिसा निग्गया, धम्मो कहिओ, परिसा जामेव दिसिं पाउब्भूया तामेव दिसिं पडिगया, तेणं कालेण० अज्जसुहम्मस्स अणगारस्स अंतेवासी अज्जजंबू णामं अणगारे जाव पज्जुवासमाणे एवं व०-जति णं भंते ! समणेणं जाव संपत्तेणं छट्ठस्स अंगस्स पढमसुयक्खंधस्स णायसुयाणं अयमट्टे पं० दोच्चस्स णं भंते ! सुयक्खंधस्स धम्मकहाणं समणेणं जाव संपत्तेणं के अट्टे पं० ?, एवं खलु जंबू ! समणेणं जाव संपत्तेणं धम्मकहाणं दस वग्गा पं० तं०-चमरस्स अग्गमहिसीणं पढमे वग्गे बलिस्स वइरोयणिंदस्स वइरोयणरन्नो अग्गमहिसीणं बीए वग्गे असुरिंदवज्जाणं दाहिणिह्ठाणं इंदाणं अग्ग-

महिशीणं तद्दए वग्गे उत्तरिह्दाणं असुरिंदवज्जियाणं भवणवासिइंदाणं अग्गमहिशीणं चउत्थे वग्गे दाहिणिह्दाणं वाणमंतराणं इंदाणं अग्गमहिशीणं पंचमे वग्गे उत्तरिह्दाणं वाणमंतराणं इंदाणं अग्गमहिशीणं लुट्ठे वग्गे चंदस्स अग्गमहिशीणं सत्तमे वग्गे सूरस्स अग्गमहिशीणं अट्ठमे वग्गे सक्कस्स अग्गमहिशीणं णवमे वग्गे ईसाणस्स अग्गमहिशीणं दसमे वग्गे, जति णं भंते ! समणेणं जाव संपत्तेणं धम्मकहाणं दस वग्गा पं० पढमस्स णं भंते ! वग्गस्स समणेणं जाव संपत्तेणं के अट्ठे पं० ?, एवं खलु जंबू ! समणेणं जाव संपत्तेणं पढमस्स वग्गस्स पंच अज्झयणा पं० तं०-काली राई रयणी विज्जू मेहा, जइ णं भंते ! समणेणं जाव संपत्तेणं पढमस्स वग्गस्स पंच अज्झयणा पं० पढमस्स णं भंते ! अज्झयणस्स समणेणं जाव संपत्तेणं के अट्ठे पं० ?, एवं खलु जंबू ! तेणं कालेणं० रायगिहे णयरे गुणसीलए चेइए सेणिए राया चेइणा देवी सामी समोसरिए परिसा णिग्गया जाव परिसा पज्जुवासति, तेणं कालेणं० काली नामं देवी चमरचंचाए रायहाणीए कालवडिंसगभवणे कालंसि सीहासणंसि चउहिं सामाणियसाहस्सीहिं चउहिं मयहरियाहिं सपरिवाराहिं तीहिं परिसाहिं सत्तहिं अणीएहिं सत्तहिं अणियाहिवतीहिं सोलसहिं आयरक्खदेवसाहस्सीहिं अण्णेहिं बहुएहि य कालवडिंसयभवणवासीहिं असुरकुमारेहिं देवीहिं देवेहि य सद्धिं संपरिवुडा महयाहय जाव विहरइ, इमं च णं केवलकप्पं जंबुद्दीवं दीवं विउलेणं ओहिणा आभोएमाणा २ पासइ, एत्थ समणं भगवं महावीरं जंबुद्दीवे दीवे भारहे वासे रायगिहे नगरे गुणसीलए चेइए अहापडिरूवं उग्गहं उग्गि- ण्हित्ता संजमेणं तवसा अप्पाणं भावेमाणं पासति ता हट्ठतुट्ठचित्तमाणंदिया पीतिमणा जाव हयहियया सीहासणाओ अब्भुट्ठेति ता पायपीढाओ पच्चोरुहति ता पाउयाओ ओमुयति ता तित्थगराभिमुही सत्तट्ठ पयाइं अणुगच्छति ता वामं जाणुं अंचेति ता दाहिणं जाणुं धरणियलंसि निहट्ठु तिकखुत्तो मुद्धाणं धरणियलंसि निवेसेति ता ईसिं पच्चुण्णमइ ता कड- यतुडियथंभियातो भुयातो साहरति ता करयल जाव कट्ठु एवं व०-णमोऽत्थु णं अरहंताणं जाव संपत्ताणं, णमोऽत्थु णं समणस्स भगवओ महावीरस्स जाव संपाविउकामस्स वंदामि णं भगवंतं तत्थगयं इह गए पासउ मे समणे भगवं महावीरे तत्थ गए इह गयंतिकट्ठु वंदति नमंसति ता सीहासणवरंसि पुरत्थाभिमुहा निसण्णा, तते णं तीसे कालीए देवीए इमे- यारूवे जाव समुप्पज्जित्था-सेयं खलु मे समणं भगवं महावीरं वंदित्ता जाव पज्जुवासित्तएत्तिकट्ठु एवं संपेहेति ता आभिओगिए देवे सद्दावेति ता एवं व०-एवं खलु देवा० ! समणे भगवं महावीरे एवं जहा सूरियाभो तहेव आणत्तियं देइ जाव दिवं सुरवराभिगमणजोग्गं करेह ता जाव पच्चप्पिणह, तेवि तहेव करेत्ता जाव पच्चप्पिणंति, णवरं जोयणसहस्सविच्छिण्णं जाणं सेसं तहेव णामगोयं साहेइ तहेव नट्ठविहिं उवदंसेइ जाव पडिगया, भंतेत्ति भगवं गोयमे समणं भगवं महावीरं वंदति णमंसति ता एवं व०-कालीए णं भंते ! देवीए सा दिव्वा देवइढी० कहिं गया० कूडागारसालादिट्ठंतो, अहो णं भंते ! काली देवी महिइिढया, कालीए णं भंते ! देवीए सा दिव्वा देविइढी० किण्णा लद्धा किण्णा पत्ता किण्णा अभिसमण्णागया ? एवं जहा सूरियाभस्स जाव एवं खलु गोयमा ! तेणं कालेणं० इहेव जंबुद्दीवे दीवे भारहे वासे आमलकप्पा णाम णयरी होत्था वण्णओ अंबसालवणे चेइए जियसत्तू राया, तत्थ णं आमलकप्पाए नयरीए काले नामं गाहावती होत्था अइढे जाव अपरिभूए, तस्स णं कालस्स गाहावइस्स कालसिरी णामं भारिया होत्था, सुकुमाल जाव सुरूवा, तस्स णं कालगस्स गाहावतिस्स धूया कालसिरीए भारियाए अत्तया काली णामं दारिया होत्था, वड्डा वड्डकुमारी जुण्णा जुण्णकुमारी पडियपुयत्थणी णिबिन्नवरा वरपरिवज्जिया यावि होत्था, तेणं कालेणं० पासे अरहा पुरिसादाणीए आइगरे जहा वद्धमाणसामी णवरं णवहत्थुस्सेहे सोलसहिं समणसाहस्सीहिं अट्ठत्तीसाए अज्जियासाहस्सीहिं सद्धिं संपरिवुडे जाव अंबसालवणे समोसडे परिसा णि० जाव पज्जुवासति, तते णं सा काली दारिया इमीसे कहाए लद्धट्ठा समाणी हट्ठजावहियया जेणेव अम्मापियरो तेणेव उवा० ता करयल जाव एवं व०-एवं खलु अम्मयाओ ! पासे अरहा पुरिसादाणीए आइगरे जाव विहरति तं इच्छामि णं अम्मयाओ ! तुब्भेहिं अब्भणुच्चाया समाणी पासस्स अरहओ पुरिसादाणीयस्स पायवंदिया गमित्तए ?, अहासुहं देवा० ! मा पडिबंघं करेहि, तते णं सा कालिया दारिया अम्मापिईहिं अब्भणुच्चाया समाणी हट्ठजावहियया ण्हाया कयवलिकम्मा कयकोउयमंगलपायच्छित्ता सुद्धप्पावेसाइं मंगल्लातिं वत्थातिं पवरपरिहिया अप्पमहग्घाभरणालंकियसरीरा चेडियाचक्कवालपरिकिण्णा सातो गिहातो पडिणिक्खमति ता जेणेव बाहिरिया उवट्ठाणसाला जेणेव धम्मिए जाण- प्पवरे तेणेव उवा० ता धम्मियं जाणपवरं दुरूढा, तते णं सा काली दारिया धम्मियं जाणपवरं एवं जहा दोवती जाव पज्जुवासति, तते णं पासे अरहा पुरिसादाणीए कालीए दारियाए तीसे य महतिमहालयाए परिसाए धम्मं कहेइ, तते णं सा काली दारिया पासस्स अरहओ पुरिसादाणीयस्स अंतिए धम्मं सोच्चा णिसम्म हट्ठजावहियया पासं अरहं पुरिसादाणीयं तिकखुत्तो वंदति नमंसति ता एवं व०-सद्दहामि णं भंते ! णिग्गंथं पावयणं जाव से जहेयं तुब्भे वयह, जं णवरं देवा० अम्मापियरो आपुच्छामि, तते णं अहं देवाणुप्पियाणं अंतिए जाव पवयामि, अहासुहं देवा० !, तते णं सा काली दारिया पासेणं अरहया पुरिसादाणीएणं एवं वुत्ता समाणी हट्ठजावहियया पासं अरहं वंदति नमंसति ता तमेव धम्मियं जाणपवरं

दूरूहति ता पासस्स अरहओ पुरिसादाणीयस्स अंतियातो अंबसालवणाओ चेइयाओ पडिणिक्खमति ता जेणेव आमलकप्पा नयरी तेणेव उवा० ता आमलकप्पं नयरिं मज्झमज्झेणं जेणेव बाहिरिया उवट्टाणसाला तेणेव उवा० ता धम्मियं जाणपवरं ठवेति ता धम्मियाओ जाणप्पवराओ पच्चोरूहति ता जेणेव अम्मापियरो तेणेव उवा० ता करयल एवं व०-एवं खलु अम्मयाओ ! मए पासस्स अरहतो० अंतिए धम्मे णिसंते सेऽविय धम्मे इच्छिए पडिच्छिए अभिरुतिए, तए णं अहं अम्मताओ ! संसारभउव्विग्गा भीया जम्मणमरणणं इच्छामि णं तुब्भेहिं अब्भणुत्ताया समाणी पासस्स अरहतो अंतिए मुंडा भवित्ता आगारातो अणगारियं पव्वतित्तए, अहासुहं देवा० ! मा पडिबंध्यं क०, तते णं से काले गाहावई विपुलं असणं० उवक्खडावेति ता मित्तणाइणियगसयणसंबंधिपरियणं आमंतेति ता ततो पच्छा ण्हाए जाव विपुलेणं पुप्फवत्थगंधमल्लालंकारेणं सक्कारेत्ता सम्माणेत्ता तस्सेव मित्तणातिणियगसय-
 णसंबंधिपरियणस्स पुरतो कालियं दारियं सेयापीएहिं कलसेहिं ण्हावेति ता सव्वालंकारविभूसियं करेति ता पुरिससहस्सवाहिणीं सीयं दूरूहेति ता मित्तणाइणियगसयणसंबंधिपरिय-
 णेणं सद्धिं संपरिवुडे सव्विड्ढीए जाव रवेणं आमलकप्पं नयरिं मज्झमज्झेणं णिग्गच्छति ता जेणेव अंबसालवणे चेइए तेणेव उवा० ता लत्ताइए तित्थगराइसए पासति ता सीयं ठवेइ ता कालियं दारियं अम्मापियरो पुरओ काउं जेणेव पासे अरहा पुरिसा० तेणेव उवा० ता वंदइ नमंसइ ता एवं व०-एवं खलु देवा० ! काली दारिया अम्हं धूया इट्ठा कंता जाव किमंग पुण पासण्याए ?, एस णं देवा० ! संसारभउव्विग्गा इच्छइ देवाणुप्पियाणं अंतिए मुंडा भवित्ताणं जाव पव्वइत्तए, तं एयं णं देवाणुप्पियाणं सिस्सिणिभिकखं दलयामो पडिच्छंतु णं देवाणुप्पिया ! सिस्सिणिभिकखं, अहासुहं देवाणुप्पिया ! मा पडिबंध्यं०, तते णं काली कुमारी पासं अरहं वंदति ता उत्तरपुरच्छिमं दिसिभागं अवक्कमति ता सयमेव आभरणमल्लालं-
 कारं ओमुयति ता सयमेव लोयं करेति ता जेणेव पासे अरहा पुरिसादाणीए तेणेव उवा० ता पासं अरहं तिकखुत्तो वंदति ता एवं व०-आलित्ते णं भंते ! लोए एवं जहा देवाणंदा जाव सयमेव पव्वाविउं, तते णं पासे अरहा पुरिसादाणीए कालिं सयमेव० पुप्फचूलाए अज्जाए सिस्सिणियत्ताए दलयति, तते णं सा पुप्फचूला अज्जा कालिं कुमारिं सयमेव पव्वावेति जाव उवसंपज्जित्ताणं विहरति, तते णं सा काली अज्जा जाया ईरियासमिया जाव गुत्तबंभयारिणी, तते णं सा काली अज्जा पुप्फचूलाअज्जाए अंतिए सामाइयमाइयातिं एक्कारस अंगाइं अहि-
 ज्जइ बहूहिं चउत्थ जाव विहरति, तते णं सा काली अज्जा अन्नया कयाई सरीरबाउसिया जाया यावि होत्था, अभिक्खणं २ हत्थे धोवइ पाए धोवइ सीसं धोवइ मुहं धोवइ थणंतराइं धोवइ कक्खंतराणि धोवति गुज्झंतराइं धोवइ जत्थरविय णं ठाणं वा सेज्जं वा णिसीहियं वा चेतेइ तं पुव्वामेव अब्भुक्खेत्ता ततो पच्छा आसयति वा सयइ वा०, तते णं सा पुप्फ-
 चूला अज्जा कालिं अज्जं एवं व०-नो खलु कप्पति देवा० ! समणीणं णिग्गंथीणं सरीरबाउसियाणं होत्तए तुमं च णं देवाणुप्पिया ! सरीरबाउसिया जाया अभिक्खणं २ हत्थे धोवसि जाव आसयाहि (यसि) वा सयाहि (यसि) वा तुमं देवाणुप्पिए ! एयस्स ठाणस्स आलोएहि जाव पायच्छित्तं पडिवज्जाहि, तते णं सा काली अज्जा पुप्फचूलाए अज्जाए एयमट्ठं नो आढाति जाव तुसिणीया संचिट्ठति, तते णं ताओ पुप्फचूलाईओ अज्जाओ कालिं अज्जं अभिक्खणं २ हीलेंति णिंदंति खिसंति गरिहंति अवमण्णंति अभिक्खणं २ एयमट्ठं निवारेंति, तते णं तीसे कालीए अज्जाए समणीहिं णिग्गंथीहिं अभिक्खणं २ हीलिज्जमाणीए जाव वारिज्जमाणीए इमेयारूवे अब्भत्थिए जाव समुप्पज्जित्था-जया णं अहं आगारवासं मज्झे वसित्था तया णं अहं सयंवसा जप्पिभिइं च णं अहं मुंडे भवित्ता आगाराओ अणगारियं पव्वतिया तप्पभिइं च णं अहं परवसा जाया, तं सेयं खलु मम कल्लं पाउप्पभायाए रयणीए जाव जलंते पाडिक्कियं उवस्सयं उवसंपज्जित्ताणं विहरित्तएत्तिकट्ठु एवं संपेहेति ता कल्लं जाव जलंते पाडिएक्कं उवस्सयं गिण्हति, तत्थ णं अणिवारिया अणोहट्ठिया सच्छंदमती अभिक्खणं २ हत्थे धोवेति जाव आसयइ वा सयइ वा०, तए णं सा काली अज्जा पासत्था पासत्थविहारी ओसण्णा ओसण्णविहारी कुसीला० अहालंदा० संसत्ता० बहूणि वासाणि सामन्नपरियागं पाउणइ ता अद्धमासियाए संलेहणाए अत्ताणं झूसेति ता तीसं भत्ताइं अणसणाए छेएइ ता तस्स ठाणस्स अणालोइयअपडिक्कंता कालमांसे कालं किच्चा चमरचंचाए रायहाणीए कालवडिंसए भवणे उववायसभाए देवसयणिज्जंसि देवदूसंतरिया अंगुलस्स असंखेज्जइभागमेत्ताए ओगाहणाए कालीदेवीत्ताए उववण्णा, तते णं सा काली देवी अहुणोववण्णा समाणी पंचविहाए पज्जत्तीए जहा सूरियाभो जाव भासामणपज्जत्तीए, तते णं सा काली देवी चउण्हं सामाणियसाहस्सीणं जाव अण्णेसिं च बहूणं काल (प्र० ली) वडेंसगभवणवासीणं असुर-
 कुमाराणं देवाण य देवीण य आहेवच्चं जाव विहरति, एवं खलु गो० ! कालीए देवीए सा दिव्वा देविड्ढी० लद्धा पत्ता अभिसमण्णागया, कालीए णं भंते ! देवीए केवतियं कालं ठिती पं० ?, गो० ! अड्ढाइज्जाइं पलिओवमाइं ठिई पं०, काली णं भंते ! देवी ताओ देवलोगाओ अणंतरं उववट्ठित्ता कहिं गच्छिहिति कहिं उववज्जिहिति ?, गो० ! महाविदेहे वासे सिज्झि-
 हिति, एवं खलु जंबू ! समणेणं जाव संपत्तेणं पढमवग्गस्स पढमज्झयणस्स अयमट्ठे पण्णत्तेत्तिवेमि, धम्मकहाणं पढमज्झयणं समत्तं २-१-१।१५४। जति णं भंते ! समणेणं जाव संपत्तेणं धम्मकहाणं पढमस्स वग्गस्स पढमज्झयणस्स अयमट्ठे ५० बितियस्स णं भंते ! अज्झयणस्स समणेणं भगवया महावीरेणं जाव संपत्तेणं के अट्ठे पं० ?, एवं खलु जंबू ! तेणं (१२१)

कालेणं० रायगिहे नगरे गुणसीलए चेइए सामी समोसढे परिसा णिग्गया जाव पज्जुवासति, तेणं कालेणं० राई देवी चमरचंचाए रायहाणीए एवं जहा काली तहेव आगया णट्टविहिं उवदंसेत्ता पडिगया, भंतेत्ति भगवं गो० ! पुब्रभवपुच्छा, एवं खलु गो० ! तेणं कालेणं० आमलकप्पा नयरी अंबतालवणे चेइए जियसत्तू राया राई गाहावती राईसिरी भारिया राई दारिया पासस्स समोसरणं राई दारिया जहेव काली तहेव निक्खंता तहेव सरीरबाउसिया तं चेव सबं जाव अंतं काहिति, एवं खलु जंबू !० बिइयज्झयणस्स निक्खेवओ १-२। जति णं भंते !० तइयज्झयणस्स उक्खेवओ, एवं खलु जंबू ! रायगिहे नगरे गुणसीलए चेइए एवं जहेव राती तहेव रयणीवि, णवरं आमलकप्पा नयरी रयणी गाहावती रयणसिरी भारिया रयणी दारिया सेसं तहेव जाव अंतं काहिति १-३। एवं विज्जूवि, आमलकप्पा नयरी विज्जूगाहावती विज्जुसिरी भारिया विज्जू दारिया सेसं तहेव १-४। एवं मेहावि, आमलकप्पाए नयरीए मेहे गाहावती मेहसिरी भारिया मेहा दारिया सेसं तहेव १-५। एवं खलु जंबू ! समणेणं जाव संपत्तेणं धम्मकहाणं पढमस्स वग्गस्स अयमट्ठे पं० । १५५ ॥ वग्गो १ ॥ जति णं भंते ! समणेणं जाव संपत्तेणं० दोच्चस्स वग्गस्स उक्खेवओ, एवं खलु जंबू ! समणेणं जाव संपत्तेणं दोच्चस्स वग्गस्स पंच अज्झयणा पं० तं०-सुंभा निमुंभा रंभा निरुंभा मदणा, जति णं भंते ! समणेणं जाव संपत्तेणं धम्मकहाणं दोच्चस्स वग्गस्स पंच अज्झयणा पं० दोच्चस्स णं भंते ! वग्गस्स पढमज्झयणस्स के अट्ठे पं० ? , एवं खलु जंबू ! तेणं कालेणं० रायगिहे नगरे गुणसीलए चेइए सामी समोसढो परिसा णिग्गया जाव पज्जुवासति, तेणं कालेणं० सुंभा देवी बलिचंचाए रायहाणीए सुंभवडेंसए भवणे सुभंसि सीहासणंसि कालीगमएणं जाव णट्टविहिं उवदं-सेत्ता जाव पडिगया, पुब्रभवपुच्छा, सावत्थी नयरी कोट्टए चेइए जियसत्तू राया सुंभे गाहावती सुंभसिरी भारिया सुंभा दारिया सेसं जहा कालीए णवरं अदधुट्ठातिं पलिओवमाइं ठिती, एवं खलु जंबू !० निक्खेवओ अज्झयणस्स, एवं सेसावि चत्तारि अज्झयणा, सावत्थीए नवरं माया पिया सरिसनामया, एवं खलु जंबू !० निक्खेवओ बितीयवग्गस्स । १५६ ॥ वग्गो २ ॥ उक्खेवओ तइयवग्गस्स, एवं खलु जंबू ! समणेणं भगवया महावीरेणं जाव संपत्तेणं तइयस्स वग्गस्स चउपण्णं अज्झयणा पं० तं०-पढमे अज्झयणे जाव चउपण्णतिमे अज्झयणे, जति णं भंते ! समणेणं जाव संपत्तेणं धम्मकहाणं तइयस्स वग्गस्स चउपण्णं अज्झयणा पं० पढमस्स णं भंते ! अज्झयणस्स समणेणं जाव संपत्तेणं के अट्ठे पं० ? , एवं खलु जंबू ! तेणं कालेणं० रायगिहे नगरे गुणसीलए चेइए सामी समोसढे परिसा णिग्गया जाव पज्जुवासति, तेणं कालेणं० इला देवी धरणाए रायहाणीए इलावडेंसए भवणे इलंसि सीहास-णंसि एवं कालीगमएणं जाव णट्टविहिं उवदंसेत्ता पडिगया, पुब्रभवपुच्छा, वाणारसीए नयरीए काममहावणे चेइए इले गाहावती इलासिरी भारिया इला दारिया सेसं जहा कालीए णवरं धरणस्स अग्गमहिसित्ताए उववाओ सातिरेगअद्धपलिओवमठिती सेसं तहेव, एवं खलु० निक्खेवओ पढमज्झयणस्स, एवं कमा (प्र० मका) सतेरा सोयामणी इंदा घणा विज्जुयावि, सत्ताओ एयाओ धरणस्स अग्गमहिसीओ एव, एते छ अज्झयणा वेणुदेवस्सवि अविसेसिया भाणियत्ता, एवं जाव घोसस्सवि एए चेव छ अज्झयणा, एवमेते दाहिणिह्ठाणं इंदाणं चउपण्णं अज्झयणा भवंति, सत्ताओवि वाणारसीए काममहावणे चेइए, तइयवग्गस्स निक्खेवओ । १५७ ॥ वग्गो ३ ॥ चउत्थस्स उक्खेवओ, एवं खलु जंबू ! समणेणं जाव संपत्तेणं धम्मकहाणं चउत्थं वग्गस्स चउपण्णं अज्झयणा पं० तं०-पढमे अज्झयणे जाव चउपण्णइमे अज्झयणे, पढमस्स अज्झयणस्स उक्खेवओ, एवं खलु जंबू ! तेणं कालेणं० रायगिहे समोसरणं जाव परिसा पज्जुवासति, तेणं कालेणं० रुया देवी रुयाणंदा रायहाणी रुयगवडेंसए भवणे रुयगंसि सीहासणंसि जहा कालीए तहा नवरं पुब्रभवे चंपाए पुण्णभदे चेतिए रुयगगाहावई रुयगसिरी भारिया रुया दारिया सेसं तहेव, णवरं भूयाणंदअग्गमहिसित्ताए उववाओ, देसूणं पलिओवमं ठिई, निक्खेवओ, एवं सुरुयावि रुयंसावि रुयगावतीवि रुयकंतावि रुयप्पभावि, एयाओ चेव उत्तरिह्ठाणं इंदाणं भाणियत्ताओ जाव महाघोसस्स, निक्खेवओ चउत्थवग्गस्स । १५८ ॥ वग्गो ४ ॥ पंचमवग्गस्स उक्खेवओ, एवं खलु जंबू ! जाव बत्तीसं अज्झयणा पं० तं०-कमला कमलप्पभा चेव, उप्पला य सुदंसणा । रूववती बहुरूवा, सुरूवा सुभगावि य ॥ ५३ ॥ पुण्णा बहुपुत्तिया चेव, उत्तमा भारियाविय । पउमा वसुमती चेव, कणगा कणगप्पभा ॥ ५४ ॥ वडेंसा केउमती चेव, वइरसेणा रयिप्पिया । रोहिणी नवमिया चेव, हिरी पुप्फवतीतिय ॥ ५५ ॥ भुयगा भुयगवती चेव, महाकच्छाउपराइया । सुघोसा विमला चेव, सुस्सरा य सरस्सती ॥ ५६ ॥ उक्खेवओ पढमज्झयणस्स, एवं खलु जंबू ! तेणं कालेणं० रायगिहे समोसरणं जाव परिसा पज्जुवासति, तेणं कालेणं० कमला देवी कमलाए रायहाणीए कमलवडेंसए भवणे कमलंसि सीहासणंसि सेसं जहा कालीए तहेव णवरं पुब्रभवे नागपुरे नयरे सहसंबवणे उज्जाणे कमलस्स गाहावतिस्स कमलसिरीए भारियाए कमला दारिया पासस्स० अंतिए निक्खंता कालस्स पिसायकुमारिंदस्स अग्गमहिसी अद्धपलिओवमं ठिती, एवं सेसावि अज्झयणा दाहिणिह्ठाणं वाणमंतरिंदाणं, भाणियत्ताओ स-त्ताओ नागपुरे सहसंबवणे उज्जाणे माया पिया धूया सरिसनामया, ठिती अद्धपलिओवमं । १५९ ॥ वग्गो ५ ॥ छट्ठोवि वग्गो पंचमवग्गसरिसो, णवरं महाकालिंदाणं, उत्तरिह्ठाणं इंदाणं

४८५ ज्ञातधर्मकथांगं, - [अज्झयणा] वग्गो - ६

अग्गमहिंसीओ पुव्वभवे सागेयनयरे उतरकुरुउज्जाणे माया पिया धूया सरिसणामया सेसं तं चेव । १६० ॥ वग्गो ६ ॥ सत्तमस्स वग्गस्स उक्खेवओ, एवं खलु जंबू ! जाव चत्तारि अज्झयणा पं० तं०-सूरप्पभा आयवा अच्चिमाली पभंकरा, पढमज्झयणस्स उक्खेवओ, एवं खलु जंबू ! तेणं कालेणं० रायगिहे समोसरणं जाव परिसा पज्जुवासइ, तेणं कालेणं० सूर-
 प्पभा देवी सूरंसि विमाणंसि सूरप्पभंसि सीहासणंसि सेसं जहा कालीए तहा णवरं पुव्वभवो अरक्खुरीए नयरीए सूरप्पभस्स गाहावइस्स सूरसिरीए भारियाए सूरप्पभा दारिया सूरस्स अग्गमहिंसी ठिती अद्धपलिओवमं पंचहिं वाससएहिं अब्भहियं सेसं जहा कालीए, एवं सेसाओवि सब्बाओ अरक्खुरीए नयरीए ॥ १६१ ॥ वग्गो ७ ॥ अट्टमस्स उक्खेवओ-एवं खलु जंबू ! जाव चत्तारि अज्झयणा पं० तं०-चंदप्पभा दोसिणाभा अच्चिमाली पभंकरा, पढमस्स अज्झयणस्स उक्खेवओ-एवं खलु जंबू ! तेणं कालेणं० रायगिहे समोसरणं जाव परिसा पज्जुवासति, तेणं कालेणं० चंदप्पभा देवी चंदप्पभंसि विमाणंसि चंदप्पभंसि सीहासणंसि मेसं जहा कालीए, णवरं पुव्वभवे महुराए नयरीए भंडिवडेंसए उज्जाणे चंदपभे गाहावती चंद-
 सिरी भारिया चंदप्पभा दारिया चंदस्स अग्गमहिंसी ठिती अद्धपलिओवमं पण्णासाए वाससहस्सेहिं अब्भहियं सेसं जहा कालीए, एवं सेसाओवि महुराए नयरीए मायापियरोवि धूयासरिसणामा, अट्टमो वग्गो समत्तो । १६२ ॥ वग्गो ८ ॥ णवमस्स उक्खेवओ, एवं खलु जंबू ! जाव अट्ट अज्झयणा पं० तं०-पउमा सिवा सती अंजू रोहिणी णवमिया (प्र० या-
 इया) अचला अचलरा (प्र० मचलरा), पढमज्झयणस्स उक्खेवओ, एवं खलु जंबू ! तेणं कालेणं० रायगिहे समोसरणं जाव परिसा पज्जुवासइ, तेणं कालेणं० पउमावई देवी सोहम्मो कप्पे पउमवडेंसए विमाणे सभाए सुहम्माए पउमंसि सीहासणंसि जहा कालीए एवं अट्टवि अज्झयणा कालीगमएणं नायवा, णवरं सावत्थीए दो जणीओ हत्थिणाउरे दो जणीओ कंप्पिहपुरे दो जणीओ सागेयनयरे दो जणीओ पउमे पियरो विजया मायराओ सब्बाओऽवि पासस्स अंतिए पव्वतियाओ सक्कस्स अग्गमहिंसीओ ठिई सत्त पलिओवमाइं महाविदेहे वासे अंतं काहिति । १६३ ॥ वग्गो ९ ॥ दसमस्स उक्खेवओ, एवं खलु जंबू ! जाव अट्ट अज्झयणा पं० तं०-कण्हा य कण्हराती, रामा तह रामरक्खिया । वसू या वसुमित्ता य, वसुंधरा चेव ईसाणे ॥ ५७ ॥ पढमज्झयणस्स उक्खेवओ, एवं खलु जंबू ! तेणं कालेणं० रायगिहे समोसरणं जाव परिसा पज्जुवासति, तेणं कालेणं० कण्हा देवी ईसाणे कप्पे कण्हवडेंसए विमाणे सभाए सुहम्माए कण्हंसि सीहासणंसि सेसं जहा कालीए, एवं अट्टवि अज्झयणा कालीगमएणं णेयवा, णवरं पुव्वभवे वाणारसीए नयरीए दो जणीओ रायगिहे नयरे दो जणीओ सावत्थीए नयरीए दो जणीओ कोसंबीए नयरीए दो जणीओ रामे पिया धम्ममा माया सब्बाओऽवि पासस्स अरहओ अंतिए पव्वइयाओ पुप्फचूलाए अज्जाए सिस्सणीयत्ताए ईसाणम्स अग्गमहिंसीओ ठिती णव पलिओवमाइं महाविदेहे वासे सिज्झिहिति बुज्झिहिति मुच्चिहिति सब्बदुक्खाणं अंतं काहिति । एवं खलु जंबू ! णिक्खेवओ दसमवग्गस्स ।
 दसमो वग्गो समत्तो । १६४ ॥ वग्गो १० ॥ एवं खलु जंबू ! समणेणं भगवया महावीरेणं आदिगरेणं तित्थगरेणं सयंसंबुद्धेणं पुरिसोत्तमेणं जाव संपत्तेणं० । धम्मकहासुयक्खंधो समत्तो दसहिं वग्गेहिं । नायाधम्मकहाओ समत्ताओ । १६५ । इत्युत्कीर्णं षष्ठांगं श्रीसिद्धाद्रितलहट्टिकागतशिलोत्कीर्णसकलागमोपेतश्रीवर्धमानजैनागममंदिरे वीरात् २४६८ वैशाखशुक्लाष्टम्यां